




FIRPO

2143

BIBLIOTECA NAZIONALE
TORINO



chi fa pi' d fil farà pi' d tela

Ex libris

LUIGI FIRPO

11. 9. 30.

Ex libris Nicolai Samoylovi 1780

A

~~Donatus~~
~~Donatus~~
~~Donatus~~

1104. 26. 10. 17. 18.

1104. 26. 10. 17. 18.

**ANTONII
GENUENSIS**

In Regia Neapolitana Academia

PHILOSOPHÆ PROFESSORIS

**ELEMENTORUM
ARTIS LOGICO-CRITICÆ
LIBRI V.**



V E N E T I I S,

Apud THOMAM BETTINELLI.

M D C C X L V L

SUPERIORUM PERMISSU, AC PRIVILEGIO.

Apes debemus imitari ; quæ vagantur , & flores ad mel faciendum idoneos carpunt , deinde quid quid attulere disponunt , ac per favos digerunt , & , ut Virgilius noster ait ,

linquentia mella

Stipant , & dulci distendunt nectare cellas . Concoquamus ergo illa ; alioquin in MEMORIAM ibunt , non in INGENIUM , Seneca epist. 84.



Literarum Neapolitanarum Mæcenati optimo

MATTHÆO DE SARNO
ANTONIUS GENUENSIS.

S. D.



Egregie factum est & præclare, Matthæ de Sarno vir amplissime, ab iis qui veterum Resp. legibus atque decretis instituerunt, quoniam quum alia multa in his, tum illud etiam decreverunt, ut in illis hominibus præcipue ornandis, atque illustrandis ratio haberetur maxima, qui & plurimum forent ipsi consequuti in bonis studiis atque honestis artibus, &, quocumque possent modo, cives suos in literis repurgandis & augendis iuvissent. Eam ob rem veteres non modo Mercurium, & Orpheum, & Apollinem, & Æsculapium inter Deos retulerunt, sed eos quoque maximopere concelebrarunt, qui aut lætissimis bibliothecis, aut doctis congressibus literas seu jacentes excitare, seu rudes perpolire studuerunt, veluti Philadelphum Ægyptii, Attalum Pergameni, Mæcenatem Romani, alii-que alios. Quod egregie, ut dixi, & præclare

factum est : neque enim video qua in re utilior esse Reipublicæ optimus civis possit, nisi in hac sit, qua ad sapientiam suos & exemplis, & opibus adhortatur : quandoquidem sit, ut gravissime dictum est a Platone ; *tunc sunt Resp. beatæ, quum aut Philosophi regnant, aut Reges philosophantur*, is facit ut & beati sint populares sui, & publica eorum res augetur in dies, atque floreat, & apud finitimas nationes (quod publicæ tranquillitatis interest plurimum) per omnium ora celebretur. Quæ quum sint, nemo est, qui minus recte a me factum dicere possit, quod Tibi potissimum hunc meum libellum dicare censuerim : Tu enim es, qui quum & sis ipse in melioribus literis, iis potissimum quibus hominum vita & beatitudo continetur, non mediocriter versatus ; & agnoscas quantum sit in vera sapientia ad beate vivendum momenti, quantumque ea ad optimum Reipub. statum faciat, refertissimam incredibili impensa omnigenorum librorum bibliothecam extruxisti, & viros quosque in omni literarum genere cultissimos ex abditis laribus in publicum commercium revocatos, liberali congressu, doctisque sermonibus accepisti, & qua exemplo, qua adhortationibus effecisti, ut antiqui rursus abolerentur vestigia, quæ inter nostros
ad-

adhuc restabant. Tantam animi magnitudinem, communis civium boni amorem, rerum maximarum providentiam, æternis monumentis veteres sacravissent: nos vero nullo illustrabimus? Equidem quod ad me attinet, vir illustrissime, etsi intelligam me nec munificentia erga me tua, nec admirationi de te mea, satis posse facere; at certum mihi est qualicumque potius; quam nullo gratiani argumento, hæc testificari. Non est, fateor, liber meus rerum sublimium copia refertus: non antiqua eruditione distinctus: ne ad Critolai quidem libram expensus: e parvo est agello munusculum: est tenuitati parentis par: Arsest philosophandi, plana ea, & in medio omnibus posita: admoneo potius in ea tirones, quam doceo: virorum doctissimorum, qui periculis suis viam nobis patefecerunt, præcepta memoro: sed ea explico paulo clarius & distinctius, quam ceteri facere solent: nova quoque via & ratione trado. Hunc librum Tibi do atque dedico quin verear, quin æquissimo sis animo accepturus: scis enim probe, summis viris, & quum gentilitia virtute, tum potissimum sua claris, atque supra mortalium sortem positis, non tam munera, quam offerentium animum pensari. Accedit eodem, quod liber meus in tua est bibliotheca

ca natus, in ea etiam educatus: Si quid in eo boni est, totum quum tibi, tum etiam doctissimis viris, qui domi tuæ tam frequentes, tanque doctos agitant congressus, acceptum debeo: ergo & hoc nomine te omnium maxime spectat. Quid, si ita mihi beato esse liceat, ut librorum tuorum, quorum prope divinam ingenii vim admirari soleo, literariæ institutioni usui sit futurus? Satis tum grande laboris mei præmium retulisse fatebor. Vale, vir præstantissime, & reipublicæ literariæ bono nate.

Datam Neapoli Kalendis Septembribus
anno vulgaris epochæ 1745.



ADOLESCENTIBUS PHILOSOPHIS

ANTONIUS GENUENSIS

S.



Rodeunt, optima spei adolescentes, Elementa Artis Logico-criticæ. Ea in Metaphysica generali indigitaveram : nunc, postquam intellexi studiose ea a vobis expeti, publica ex privatis facio.

Quæ maxime in rem vestram communem fient. Prius vero quam ad ejus adgredimini lectionem libelli, quibus vos opere magno esse oratos volo, eloquar. Adesse paratos audio, qui plurima mihi vertant crimini. Primum, etiamdum, inquiunt, Logicæ elementa? Ligna in lucum defers. Qui si perpendant, hominum eruditionem perpetuo augeri, perpoliri, latissime provehi, ii & artem philosophandi augeri, perpoliri, latissime provehi inficiari nequeunt, nec iis irasce, qui in id operam locant suam. Quid quod non dum artem Logico criticam undique perfectam habemus ullam? Frontem contraxistis? At tum demum scitote omnibus numeris absolutam datum iri. Artem hanc, quum omnibus numeris absoluta humana erit sapientia, idest quum hominum animi eo, unde sunt profecti, remearint.

Deinde non probant libertatem philosophandi tam sæpe commendari. Quod ego duplici, eoque gravissimo consilio feci : nam nec philosophari eos censeo qui in aliorum verba, etiam invita ratione, jurant; & veteres me docuerunt res, ut nimiam olim servitutem, quam
Semi-

*Semi-Christiani plerique Platoni & Aristoteli serui-
runt, perniciosam fuisse Religionem, ita esse posse, quam
Itali Transmontanis seruiunt. Forte fallar: at non certe
fallor, si præcavisse non omnino superfluum putem. Ac-
cedit eodem, quod nulla quum sit in Europa gens mentis
acumine, atque robore Italis par, nequeo non interdum
mecum ipse subirasci ob hanc in re literaria servitutem,
in quam ire occæpimus: ita enim efficitur, ut qui natura
ceteros antecellimus, inertia sequamur.*

*Præterea non placet, me damnatæ memoriæ libros quos-
dam indicasse. At heic si meminerint me aut indigitasse
tantum eos ex quibus profeci, ne ingratus viderer, aut
sicubi commendo, addidisse, si per Ecclesiam liceat,
paulo fortassis æquiores in me erunt. Ceteroquin sic ha-
beant, me nec scriptum velle, sed ne cogitatum quidem,
quod ullo modo damnat Ecclesia: gravissimi enim illius
Origenis verbi non modo recordor, sed reminiscor, non
habet Deum Patrem, qui non habet Ecclesiam Ma-
trem.*

*Tum, me non raro plautino per fricuisse sale viros do-
ctos, dant crimini. Id vero ego non recolo: in vitia paul-
lo vehementius inuictum, fateor: hominibus peperci.
Dissentio plerumque a viris doctis: eorum refello senten-
tias: ineptas quasdam opiniones, perridiculas dico. At
non idcirco clarissimorum virorum doctrinæ detractum vo-
lo. Eos vereor: commendo passim. Tantum ut ne etiam
sine ratione eorum valeat autoritas, præcaveo. In hanc
indurui sententiam, hominum esse neminem, qui quid-
piam rationi præscribere valeat: Deo tantum, & Eccle-
sia, cui Dei adest Spiritus, Mentem omnem dedit: ce-
tera liber sum. Hanc mihi qui libertatem invidet, is me
ex homine pecudem efficere conatur.*

*Ad hæc ajunt, me timidos atque lentos in philosophando
effi-*

efficere adolescentes, quod mentis brevitatem, & imbecillitatem tam saepe prædico. Ita, inquit, despondent animos tirones philosophi. Quid? adulari fas est iis, qui fidei sunt meæ concrediti? inanis spei plenos efficere? Ita confidentes, ut ea etiam pro veris affirmant, quæ ignorant? Ego vero contra nunquam tam bene cum adolescentibus agi intelligo, quam quum ut in affirmando cauti sint mōentur. Non ego igitur in philosophando lentos, sed cautos efficio tirones meos.

Tandem; in historia Logicæ viros quosdam insignes præterisse addunt. Quasi vero integram omnium Logicorum historiam promiserim. Adde, me quorundam, quum illam scriberem, ad manus codices non habuisse, in primis viri clarissimi Nicolai de Martina, a quo in Geometricis sum institutus, & quem honoris semper gratia nomino.

Atque hæc erant, quibus vos, optimæ spei adolescentes, oratos volebam. Vos autem alloquor, quod proventus philosophos nec tantum habere otii puto, ut puerilia hæc legant; nec si habeant legere amem: nimis enim eorum reformido iudicia. Quas vero hoc libello res complexus sim, qui sequitur ostendet capitum index. Restat ut vos moneam, habere quidem vos posse Artis Logicæ libros plurimos, seu hunc, seu alios, idque parvulo impendio: Logici vero ut sitis non ita facile efficere posse: non enim libri, aut pauca artis præcepta id efficiunt, sed EXERCITATIO. Exercere ergo mentis vires necesse est eum, qui logicus, idest perspicax viri investigator, & disceptator esse vult. Id ut sciretis, mea, atque vestra intererat maxime. Valet.

C A P I T U M

I N D E X.

Prolegomena de artis Logico-critice natura, origine, & progressu. pag. 1.

LIB. I. de natura &c.

Cap. I. De natura & operationibus mentis humanæ. 25

Cap. II. De animi morbis & causis errorum generatim. 33

Cap. III. De causis errorum in animo existentibus & primum de duabus prioribus. 38

Cap. IV. De erroribus qui ex affectibus nascuntur. 46

Cap. V. De erroribus, qui ex corpore originem ducunt, ubi de erroribus sensuum. 55

Cap. VI. De externis errorum causis nempe educatione Parentum, Populi commercio, Magistrorum institutione. 69

LIB. II. de ideis &c.

Cap. I. De idearum natura & origine. 83

Cap. II. De idearum generibus. 90

Cap. III. Observationes circa naturam & affectiones idearum. 95

Cap. IV. Prima & generica divisio objectorum idearum nostrarum, atque sapientiæ humanæ. 102

Cap. V. De studio Metaphysicæ & Theologiæ. 103

Cap.

Cap. VI. De studio Physicæ, & Matheſeos,	112
Cap. VII. De ſtudio Ethicæ.	115
Cap. VIII. De vocabulorum natura generatim,	120
Cap. IX. De vocabulis idearum ſimplicium & notio- num compositarum.	125
Cap. X. De vocabulis ſubſtantiarum & modo- rum.	129
Cap. XI. De vocabulis relativis.	139
Cap. XII. De vocabulis notionum abſtractarum.	143
Cap. XIII. De propoſitionibus.	147
Cap. XIV. De propoſitionum quantitate, conver- ſione, & oppoſitione.	152

LIB. III. De vero & falſo &c.

Cap. I. De vero & falſo deque variis animi humani ſtatibus quod ad veritatem attinet,	156
Cap. II. De ſcientia & fide.	165
Cap. III. An ullam habeant homines veritatis Lo- gicæ telleram.	171
Cap. IV. Quæ viæ ſint homini propoſitæ ad ſapien- tiam comparandam, &que viæ explicatæ gene- ratim,	180

LIB. IV. De uſu autoritatis, & de arte Critica.

Cap. I. De recto ſenſuum uſu, deque ſenſuum pro- vincia, & de experimentis atque obſervationibus rite inſtituendis.	185
Cap. II. De autoritate humana.	191
Cap. III. De autoritate divina generatim,	205
Cap. IV. Quam ratione dignoſci poſſit, quænam ſint Dei verba.	212

Cap. V.

Cap. V. De librorum divinatorum interpretatione.	219
Cap. VI. De librorum mendis.	228
Cap. VII. Quod veteres quum librarii tum Critici aliique impostores libros aut depravare aut suppo- nere consueverint, & quod quædam sint indicia, quibus integri a corruptis, genuini a spuriiis di- scerni possunt.	236
Cap. VIII. De Arte hermeneutica.	242

LIB. V. De usu ratiocinii, & de methodo.

Cap. I. De dimetienda & augenda capacitate men- tis.	247
Cap. II. De cognitionis humanæ extensione.	257
Cap. III. De Ratiocinii natura & generibus.	263
Cap. IV. De methodo generatim, tum de iis ratio- cinandi regulis, quæ utrique methodo, <i>compositio-</i> <i>nis</i> scilicet, & <i>resolutionis</i> sunt communes.	270
Cap. V. De Methodi analithicæ legibus.	275
Cap. VI. De Methodo synthetica.	282
Cap. VII. De disputatione dialectica, ubi de arte Syllogistica.	285

Epistolæ, quas promissi, quum ob Auctorum occupationes edi non potuerint, paulo post sequentur.



PROLEGOMENA

DE ARTIS LOGICOCRITICÆ NATURA,
ORIGINE, ET PROGRESSU.

§. I.

Beatitude omnes homines desiderare, atque ad eam vehementissimo naturæ desiderio ferri, notius est, quam ut demonstratione egeat. Nam quum omnes homines natura ipsa duce voluptatem persequantur, dolorem averfentur, omniaque voluptate, aut dolore moti agant (a) : beatitudo vero posita sit in perfecta, æquabili, & certa voluptate, miseria vero in dolore, quem nulla sequitur voluptas; apertum est homines natura ipsa beatitudinem sequi, miseriam averfari, dum voluptatem natura sequuntur, dolorem naturæ horrent,

§. II.

Porro perfecta, æquabilis, & certa voluptas, qua beatitudo continetur (ex §. I.) ex certa *summi boni* possessione manat: nempe ut quicquid in nobis voluptatem ingenerat, quam nullus sequitur dolor, bonum est; ita quicquid perfectam, æquabilem, & certam voluptatem in nobis procreat *summum bonum*. Voco autem perfectam, æquabilem, & certam voluptatem, qua nulla esse aut major, aut secun-

A

fu-

(a) Legatur, *scilicet*, totum caput XXI. libri II. de Intellectu humano Job: Lockii.

suspicio, nullus dolor inturbat. Quicumque ergo beatitudinem adipisci vult, is studere debet, ut summum hoc & optimum bonum inveniat, idest ut res quæ in nobis dolorem, aut voluptatem creare possunt, cognoscat, iisque recte uti, aut frui discat. Quod quum sine sapientia fieri nequeat; efficitur ad beatitudinem consequendam sapientiam esse necessariam; adeoque non sine ratione hominibus cum desiderio beatitudinis a natura ipsa desiderium sapientiæ congenitum esse.

§. III.

Est autem sapientia rerum æternarum, factarum, & possibilem, earumque causarum, finium, relationum, usuum *scientia*. *Scientia* vero cognitio certa usu *rationis* comparata: *ratio* autem vis percipiendi, cogitandi, ratiocinandi: & recta quidem ratio; quæ solidis principiis utitur, & iusto atque necessario ordine ratiocinatur: corrupta & falsa, quæ aut non solidis principiis utitur, aut ex solidis principiis non iusta infert consequentia. Sapientiam ergo hanc ut sibi comparent homines, qui naturam beati esse cupiunt, oportet. Id autem fit *philosophia*, seu studio sapientiæ: nempe si quilibet studeat. 1. ut rationem augeat. 2. ut formet, 3. ut a morbis siue naturæ, siue consuetudinis purget. 3. ut ejus ope scientiam rerum æternarum, factarum, & possibilem, quoad capax est, acquirat. 4. ut hanc scientiam ad usum vitæ referat, idest, ut discat rebus uti, & frui, animoque pacato vivere, quod est vitam ex RECTA RATIONE instituere, quemadmodum veteres loquebantur Philosophi.

§. IV.

Et ad sapientiam quidem comparandam natura ipsa nos impellit. 1. desiderio sapientiæ, & sciendi curiositate. 2. *Rationis* munere, quo nos ornat. 3. Studio commodi. 4. Studio voluptatis. 5. Doloris & miseria; hinc illud, *quid non explorat egestas?* 6. Doloris & miserie metu. Itaque barbaræ ipsæ nationes nulla aliorum institutione, his causis subagitata, ad plurimam sapientiam pervenerunt.

§. V.

§. V.

Sed fatendum est ingenue, sine *Arte* aliqua, & *Institutione*, primum sero tandem, quippe per longas ambages, ad sapientiam perveniri. 2. fallam plerumque scientiam acquiri, 3. eamque haud magnam. 4. confusam etiam, & obscuram. Quum qui arte philosophandi aliqua, & majorum institutione utitur, 1. & citius, 2. & facilius, 3. & rectiore via, 1. ad maiorem, 2. ad clariorem, 3. ad sinceriorem scientiam pervenit. Ars igitur hæc & institutio, potissimum quum hominum vita brevissima sit & plurimis incommodis distracta, sapientiæ amatori necessaria est, nedum utilis.

§. VI.

Vocari autem hæc ars solet Logica. Dialectica, Dia-
noetica, Ars cogitandi, aliisque nominibus. Nos
Artem Logicocriticam appellamus. Est enim ars, quæ
rationem & iudicium auget, format, atque regit in sa-
pientiæ studio. Itaque quod ea discamus recta ratione
uti, recteque & perspicue iudicare, Logica est & Criti-
ca. Confecta autem est primum ex ipso naturæ lumine
& prudentia, 2. Sedulo studio, exprimentis, & exer-
cicio. Nam primum omnes homines in sapientiæ inve-
stigatione naturali quadam prudentia regi solent. Dein-
de exercitium, studium, experimenta vias veritatis in-
vestigandæ plurimas patefecerunt; aut quia capacitatem
adauxerunt; aut quia errores, & errorum causas, &
fontes detexerunt.

§. VII.

EX his vero patet, Artem hanc non esse artem pom-
pæ & victoriæ amore rixandi, qualis olim apud
Græcos Sophistarum, *cujus principium fuisse id, quod vi-
sum fuerit disputanti, officium vero, contentionem, finem,
victoriam*, scribit Clemens Alexandrinus (a): nunc
vero apud Scholasticos, quorum idcirco Logica menti
depravandæ aptior est, quam augendæ, purgandæ,

A 2

for-

(a) *Stromator lib. 1.*

formandæ. Deinde apparet Artem istam non esse quarundam tantum disciplinarum peculiarem, sed generalem, & ad omnes scientias facilius, brevius, ordinatius discendas, aut tradendas comparatam. Itaque longe errant ii, qui solum Geometriæ, aut Algebræ studium pro Arte Logicocritica satis esse arbitrantur, quos jure reprehendit Vir emunctæ naris Johannes Clericus (a): nempe his studiis plurimum quidem mens in veritatis inquisitione juvatur, sed ad omnium disciplinarum studium, quod Logicæ officium est, haud præparatur. Præterea patet artem hanc non esse continendam iis terminis, quibus coerceri solet, nimirum solo operationum intellectus studio, ita ut ab Arte Critica separetur. Quum enim sapientiam aut ratiocinio nostro & experimentis, aut aliorum sensu & auctoritate perquiramus, jungenda est Logica, quæ ratiocinium format, cum Critica, quæ nos de aliorum auctoritate & sensu judicare docet. Imperfectæ sunt igitur Logicæ omnes, in quibus Critica desideratur, quales omnium ferme Recentiorum. Sed ut quid in hac arte omnium certe utilissima hucusque præstitum sit, cognoscatur; paullo altius de ejus origine & progressu disputandum est.

§. VIII.

Historiam Logicæ, præter alios, tribus libris nuper complexus est Vir eruditus Georgius Vvalchius (b). Vel minutissima quæque magna industria vir iste collegit. Nos pauca, & quæ tironibus satis sint. Vetus est litteratorum mos, ut, quum originem alicujus Artis quærunt, ab Adamo initium faciant: qui mos *litteratorum borea* vocatur a Vico nostro viro in primis clarissimo (c). Hinc Logicam Adamiticam passim audias memorari. Et sane ad hanc disciplinam quod attinet, quum Ada magna sapientia a Deo fuerit ornatus, dubitari non potest, quin usu rationis plurimum valuerit, id est

(a) *Præfat. in Logicam.*

(b) *Exstant in ejus Parergis Academicis editis Lipsiæ an. 1721.*

(c) *Lib. 1. Scientiæ novæ axiomatæ 3. edit. 1730.*

quin egregius fuerit Logicus. Sed an Ada regulas recte ratiocinandi in iustam artem collectas filios suos & nepotes docuerit, id vero est, quod nullo modo scire possumus. Quam ob rem etsi non dubitemus, quin homines antediluviani, ut & postdiluviani ad Græcos usque Philosophos plerumque ratione recte usi sint, & plurima acute perviderint, & feliciter detexerint, naturali Logica utentes; at ante Græcorum Philosophorum ætatem Logicam nondum in Artem collatam fuisse confidenter asserimus: Quippe qui ex veterum monumentis, quæ supersunt, nihil tale suspicari possumus.

§. IX.

ITaque Eruditi consentiunt, prima Artis hujus rudimenta Eleatenribus Philosophis deberi, in primis Demócrito, qui artem *geometricarum demonstrationum* quasi jure suo sibi adrogabat præ ceteris (a); & Zenoni Eleatenfi, qui primus Dialecticæ inventor audit (b), quique 450. circiter annis epocham Christianam antevertit. Reapse quum in Schola Eleatenfi a Pythagora usque Studia geometrica floruerint, dubitari vix potest, quin apud eos ars analytica, & synthetica, idest ars dianoetica & logica obtinuerit. Interim ex iis, quæ de Eleatenfium Logica habet Petrus Gassendus (c) apparet ad Sophisticem, idest artem contentionum, horum philosophorum logicam, sero saltem, declinasse.

§. X.

Christianus Thomasius (c) opinatur, Socratem tandem germanæ philosophiæ parentem, ejusque discipulum Platonem philosophorum facile principem; hanc Artem longe lateque promovisse. Ex scriptis sane Xenophontis & Platonis discimus, Socratem ejusque discipulos acute definivisse, divisisse accurate, opportune dubitasse, atque diligenter & ordine pervestigasse.

A 3

Tria

(a) *Apud Clem. Alex. lib. i. Strom.*(b) *Laërt. lib. ix.*(c) *De origine & variet. Log. cap. xi.*(d) *In Philosophia Aulica, cap. 4 §. 7.*

Tria autem sunt, quæ potissimum Socrati & Platoni debemus, 1. Artem recte definiendi vocabula, quæ nihil utilius seu doceas, seu perquiras veritatem. 2. Artem dubitandi opportune, quæ Philosophiæ principium recte Ciceroni dicitur (a) : qui enim dubitare nescit, is nec errores & præjudicia unquam pernoscet, nec occultas veritates investigabit. 3. Inductionem analyticam, qua nihil validius ad veritatis inquisitionem esse censet vir doctissimus Franciscus Baco à Verulamio (b).

§. XI.

Sed nondum tamen in justam artem Logica reducta ab ullo erat. Aristoteles primus id conatus est. Is fuit maximus scholæ Platoniciæ alumnus, vir magno ingenio, & systematico. Testis est Franciscus Patricius ab eo 123. libros Logicos & Dialecticos scriptos fuisse, quorum magna hodie pars desideratur. Qua de re consuli potest Johannes Gerardus Vossius (c). Ceterum, quod in viro docto, & Matheseos non ignaro mireris, tota ferme Aristotelis logica in adornando syllogismo, & arte Synthetica occupata est : artem analyticam & criticam vix ferme attingit. Ineptit etiam plerumque, & in obscuris & confusis hæret, etiam in libris suis analyticis, qui potiores putantur. Interim non est confundenda Aristotelis Logica cum Logica scholasticorum. Scholastici enim aut Aristotelis libros nunquam legerunt, si paucissimos excipias : aut quum græce docti non essent, non intellexerunt : aut pro temporis depravato gustu pejora ex illis mutuati sunt. Uno verbo Sophisticem ex Aristotele egregie depromserunt, & auxerunt : artem vero Logicocriticam aut neglexerunt, aut ignorarunt. Legi posset Launojus de varia Aristotelis fortuna. Cave autem ne in Scholasticorum horum numerum referas B. Thomam : sic enim habet, neminem

(a) *De nat. Deor. lib. 1. cap. 1.*(b) *In novo Organo.*(c) *De origine & Constitutione Logicæ, cap. 10.*

nem unquam eo acutius, solidius, pressius disputasse : vir certe divinus & cultiori seculo dignus. Aristotelis logicam dedit nuper elegantem & lectu dignam vir politissimus Jacobus Facciolatus.

§. XII.

CONvertamus nunc nos ad Stoicorum Sectam, cujus auctor fertur Zeno Citricus, & in qua Logicæ studia floruerunt maxime. Arbitrabantur Stoici sine hac arte neminem esse Sapientem, uti Laertius scribit (a). Ex hac Schola emerfit Chrysippus, qui acutis disputationibus inclaruit circa Cæsaris Dictatoris tempora : quippe qui libros logicos 311. scripsit, quemadmodum idem Laertius narrat. Lepidissime autem Jupiter apud Lucianum (b) Chrysippi syllogismos frigidos vocat. Kekermanus (c) hæc vitia in dialectica Stoicorum notavit : 1. Quod nullum logicæ finem definiverunt, idcirco omnia ad ostentandum disputando ingenium contulerunt. 2. Præter præcepta quædam de Syllogisticis formis ac captionibus pauca alia habuerunt. Unde Cicero, Stoicorum alias sectator ; aperte dicit, Stoicos judicandi parcenti diligentius persequutos, de inventionem non multa docuisse. 3. Methodice artem non construxerunt ullam. 4. Insignes & pueriles sophistæ circa vocabula fuerunt, & ut a reliquis sectis, in primis Peripateticis differre viderentur, novos excogitarunt terminos. 5. Stoicorum Logica chaos fuit confusum ex syllogisticis formis, & mirificis argumentandi speciebus. Hæc ille. Negari tamen nequit Stoicos accurate divisisse, atque definivisse, & acute ratiocinatos esse ; quod probat artem analyticam non ignorasse.

(a) *Lib. 7. Sægm. 46.*

(b) *Tom. 2. oper. pag. 205.*

(c) *Præc. Logic. tract. 2. cap. 2. §. 15.*

§. XIII.

Accedamus ad Epicurum. Eum in hac arte nudum & inermem fuisse censuit Cicero (a). Sed nimium fuisse in Epicurum Ciceronem, apertum est (b). Nimirum contempsit Epicurus Stoicorum & Peripateticorum Sophisticem, & Eristicem, quæ obscurandæ potius veritati, quam detegendæ aptior erat. At artem Logicocriticam impense coluit, ut ex ejus Canonica, cujus epitomen nobis servavit Laertius (c), & quam doctissime est Gassendus commentatus (d), apparet. Quinimmo perspecte Vvalchium scripsisse censeo, ex veteribus neminem Epicuro melius de re Logica meritum esse.

§. XIV.

Censuit autem Epicurus omnem in philosophia quæstionem institui posse, aut de *rebus*, aut de *vocabulis*. In quæstionibus de rebus duo momenta voluit ut observarentur. Veritas, & veritatis criterium. Veritatem aliam esse dicebat *essentiæ*, aliam *judicii* seu *enunciationis*. Veritatem *essentiæ* vocabat *id quo unaquæque res in ipsa rerum natura existens sit id ipsum quod est, nihil aliud*. Veritas *judicii* dicebatur Epicuro *conformitas judicii aut mente comprehensi, aut ore pronunciati, cum ipsa veritate essentiæ*.

§. XV.

Quod ad veritatis criterium attinet, observavit, quod res, cujus veritas quæritur, aut ad solam contemplationem, aut ad vitæ quoque actionem spectet. Res naturæ, quæ ad contemplationem spectant, percipi docuit

(a) *De Finibus, lib. 1. cap. 7.*

(b) *Id fortasse duabus de caussis. 1. Quod Academicæ & Stoicæ Philosophiæ, quibus adversabatur Epicurus, nimis favebat. 11. Quod videbat nimis eam Sectam Romæ serpere, Patriæque moribus metuebat.*

(c) *Lib. x. Segm. 30. Legatur Vvalchius de progressu & Fatibus Logicæ, lib. 2. cap. 1. Sect. 1. §. 16.*

(d) *De origine & variet. Logicæ cap. 7.*

cuit aut sensu, aut mente: res vero vitæ & morales ipso affectu, seu appetitu. Itaque tria veritatis criteria, seu iudices tres statuit: ex parte sensus *Sensationem*: ex parte mentis *Prænotionem*: ex parte affectus, *Affectionem*. Singulis autem criteriis suos præfixit canones; unde ejus Logica Canonica, idest *regulatrix*, est appellata.

§. XVI.

AD *Sensationem* canones retulit quatuor.

I. Primus est. *Sensus nunquam fallitur: ac proinde omnis sensus, omnisque phantasiæ seu apparentiæ perceptio vera est.*

II. *Opinio, seu iudicium, est consequens sensum, sensationique superadjuncta, in quam veritas aut falsitas cadit.*

III. *Opinio, illa vera est, cui vel suffragatur, vel non refragatur sensus evidentia.*

IV. *Opinio illa falsa est, cui vel refragatur, vel non suffragatur sensus evidentia.*

§. XVII.

Sequuntur *Canones Prænotionis* seu *anticipationis* & ipsi quatuor.

I. *Anticipatio est ipsa rei notio; sive definitio, sine qua quidquam querere, dubitare, opinari, imo & nominare non licet.*

II. *Omnis, quæ in mente est anticipatio, seu prænotio dependet a sensibus, idque vel incurfione, vel proportionem, vel similitudine, vel compositione.*

III. *Est anticipatio in omni ratiocinatione principium, quasi nempe id, ad quod attendentes inferimus, unum esse idem aut diversum, conjunctum aut disjunctum ab alio.*

IV. *Quod inevidens est ex rei evidentis anticipationem demonstrari debet.*

§. XVIII.

Addit canones *Affectionis* quatuor.

I. *Ea voluptas, quæ nullam habet adnexam molestim amplectenda.*

II. *Ea molestia, quæ nullam habet adnexam voluptatem, fugienda.*

III. *Ea*

III. *Ea voluptas, quæ aut maiorem voluptatem impedit, aut graviorem molestiam parit fugienda.*

IV. *Ea molestia, quæ aut maiorem avertit molestiam, aut uberiorem voluptatem creat, amplectenda.*

§. XIX.

His subjungit canones ad quæstiones de voce duos.

I. *Dum loqueris dilige voces communes & perspicuas, ne aut ignoretur quod velis; aut interpretando tempus frustra quæras.*

II. *Dum audis id enititor, ut vim docibus subjectam teneas, ne te, aut præ obscuritate lateant, aut præ ambiguitate deludant.*

Atque hæc est quasi epitome Epicuræ canonicæ. De qua, qui plura cupit, adeat Gassendum loco superius laudato.

§. XX.

Quamquam vero ex veteribus philosophis plures res dialecticas & logicas tractassent; contigit tamen, postquam Christianismus in orbem illuxit, ut solius ferme Aristotelis per plura sæcula in his rebus ratio haberetur. Nam etsi primi Christiani litterati Eclectici fere omnes videntur fuisse; (a) tamen Aristotelis dialecticam elegisse præ omnibus, qui his studiis operam navabant, dubitari non potest. Hinc solius Aristotelis libri Logici, non omnes licet, ad nos pervenerunt. Jam vero Arabes in studiis Metaphisicis versatissimi sola Aristotelis scripta in deliciis habuerunt. Quumque barbarorum incursione omnia per Europam, Asiamque atque Africam studia litterarum extincta pene essent, qui illa post decimum Seculum restaurare cœperunt Monachi potissimum, una Aristotelis scripta excoluerunt; quæ ab Arabibus male confuta & interpolata acceperant. Hinc ad xv. usque Christianismi sæculum sola Aristotelis Logica ab iis, qui Scholastici vocati sunt, promota est.

§. XXI.

(a) *Demonstratum id Buddæo in Isagoge ad universam Theologiam. Lege & Clem. Alex. in prim. Ström. & Aug. di Civit.*

§. XXI.

IN Scolaſticatorum Logica plura jamdudum notarunt viri docti (a), quæ ad pauca referam.

I. Quum ſervum eſſent Ariſtotelis pecus, nullaque philoſophandi libertate uterentur, artem hanc nullo modo promovere potuerunt.

II. Eorum Ars Logica genuinas regulas recte cogitandi, & regulas criticas nullibi attingit.

III. Perſequitur ineptias, & quæſtiones vanas de *formalitatibus, hecceitatibus, quidditatibus, intentionibus, ſuppoſitionibus, exponibilibus, reduplicativis, particulariſationibus, ſuppoſitis, mediatis, & immediatis, complexis & incomplexis, reſtrictionibus & amplificationibus, de inferſe, & definit, de differt, & infinito, de ita & ſicut, de aſcenſu & deſcenſu*, in quibus & nihil eſt boni ſucci, & damni plurimum ad mentem obſcurandam, omnemque ſapientiæ guſtum obtundendum.

IV. Non eſt Ars generalis & mentem ad ſtudia omnia formans, ſed particularis, & in rebus nullius pretii inſtruens: quamobrem puro Scholaſtico bona non ſapiunt.

V. Eſt ars potius eſtiche, ſeu contendendi, quam inquirendi veritatem.

§. XXII.

Primi Laurentius Valla, Rudolphus Agricola, Ludovicus Vives, Petrus Rama xv. ſeculi ſcriptores, & viri pro eo tempore litterati & critici adverſus eam ætatis barbariem declamare cæperunt. In primis autem Logicam illustravit Rama vir doctus & politi ingenii. Sequutus mox eſt vir adprime doctus, & cui reſtauratæ per Europam litteræ magna ex parte debentur, Franciſcus Baco de Verulamio, qui ſub initium ſeculi xv. in Britannia floruit: de cujus nunc Logica paucis dicendum eſt:

§. XXIII.

(a) *Erasmus in Morie Encomio pag. 1781. Ludovicus Vives de Cauſſis corruptarum artium, Tribecovius de Doctioribus Scholaſticis, Heumannus, Launojus, Gaſſendus, aliique.*

§. XXIII.

Edidit Verulamius anno 1620. *Novum organum*, quo nomine Logicam, Aristotelem imitatus designavit: etenim Aristoteles Logicam appellabat *ὄργανον καὶ χεῖρα φιλοσοφίας instrumentum & manum Philosophiæ* (a). Organum autem istud ad doctrinam maxime rerum naturalium instruxit, & quidem tribus rationibus a vulgaribus Logicis diversum, Fine, Inquirendi initiis, & Ordine demonstrandi.

§. XXIV.

Inis ei præpositus est, ut artes inveniantur, & augeantur non argumenta. In Inquirendi vero initiis, omnium primum in dubium vocat principia quædam, & præjudicia communiter recepta, quæ *idola* appellat. Idola autem hæc in quatuor classes distribuit. Prima sunt *idolatribus*, idest præjudicia universæ naturæ humanæ in se spectatæ. Altera *idola specus*, seu præjudicia naturæ singularis. Tertia *idola fori* seu præjudicia orta ex commercio cum plebe. Quarta tandem *idola theatri*, quæ nimirum ex Philosophorum doctrinis, & perversis demonstrationum legibus originem habent.

§. XXV.

AD ordinem vero demonstrandi, quod attinet, non vult adhiberi syllogismum, sed inductionem analyticam & Socraticam, quæ a singularibus gradatim procedat ad generalia. Nam I. Syllogismus propositionibus universalibus facile decipit: hinc veriverbium illud Scholarum, *in universalibus latet dolus*. II. Tirones ideas habent particulares, iique difficillime ad universalia ducuntur: inductione vero facillime a singularibus progrediuntur ad universalia.

§. XXVI.

Multa sunt in hoc Verulamii opere Egregia; itaque dubitare non possumus, quin illud ad scientiarum

Euro-

(a) Vide Vossium de natura & constit. Logicæ, cap. 6. § 4.

Europæarum augmentum plurimum contulerit. Ceterum nequit illud haberi pro Logica universalī, seu ita comparata ut doceat & recte cogitationes nostras disponere, & aliorum intelligere, iisque rite uti. Quod præterea in omnibus scriptiōibus Verulamii accusēs, est orrenda illa phantasia, qua cogitationes suas obscurat; qui morbus familiaris est Anglis viris alioquin ingeniosissimis.

§. XXVII.

INter recentiores philosophiæ restauratores magni nominis extitit Petrus Gassendus Gallicanus Sacerdos. Ejus merita in artem logicam non mediocria sunt. Scripsit primum opus *de origine & varietate Logicæ*, quo historiam disciplinæ hujus a prima ipsius ætate usque ad Cartesium diligenter persequutus est. Dedit deinde librum de Logicæ fine, quo exponit *criteria veritatis*, atque ex antiquis monumentis illustrat historiam Scepticismi. Præter hos libros ipsi quoque debemus *Institutiones Logicas* divisas in quatuor partes juxta vulgarem methodum; quarum prima differit *de simplicibus rerum Imaginatione*. II. *De Propositione*; III. *De Syllogismo*. IV. *De Methodo*, Gassendo adjungi potest Thomas Hobbesius Anglus, qui Logicam sub inscriptione *Computationum* scripsit. Continet ea sex capita, I. De Philosophia, ipsius fine, utilitate, subjecto, partibus. II. De vocabulis. III. De propositione. IV. De Syllogismo. V. De erratione, falsitate, & captionibus. VI. De methodo: de quibus breviter, nec sine dignitate differit. Fuit autem uterque Epicureus, sed Gassendus quidem Epicureorum errores in Religione & Morali egregie confutavit; quum Hobbius non raro probasse videatur; Quam ob rem Atheus audit.

§. XXVIII.

Dicamus nunc de Cartesio. Renatus Cartesius natus est Hagæ Turonum an. 1596. Is ad Verulamii imitationem, ut observat Gassendus (a), novam Philosophiam excitaturus, omne omnino præjudiciū exuere in pri-

(a) *De origin. & var. Log. cap. xi.*

primis voluit. Sed non eamdem tamen viam, quam Verulamius, est ingressus. Nam quum Verulamius auxilia a rebus ad perficiendum intellectum petierit, ipse in ipsa cogitatione satis esse præsidii censuit, ut intellectus vi sua possit in omnium rerum, etiam abstrusissimarum, hoc est non modo corporum, sed Dei etiam & animæ notitiam perfectam venire. Itaque non in scite Cartesium inter fanatici restauratores referre possis, Hinc enim Malebranchii cœpit fanaticismus, qui deinde in Spinoza & Beckero in Pantheismum abiit. Scripsit dissertationem *de Methodo recte utendi ratione, & veritatem in Scientiis investigandi*, quæ egregia multa ad Artem Logicocriticam pertinentia continet. Sed tantum abest ut hæc dissertatio pro integra Logica haberi possit, ut potius paucas, easque nimis genericas observationes contineat.

§. XXIX.

QUæ in hac arte debemus Cartesio, sunt.

I. Libertas philosophandi: primus enim quam validissime Aristoteleorum tyrannidem excussit, atque philosophos ut ex ratione, non ex auctoritate philosopharentur, induxit. II. Ars dubitandi: Primus nempe post veteres Academicos universalem dubitationem philosophis præscripsit, cujus ope præjudicia aut Populi, aut Magistrorum pernoscere, & discernere possent. III. Critica & delectus idearum & judiciorum: nimirum quum antea per ideas obscuras & confusas plerique omnes philosopharentur, Cartesius exemplo suo & exhortationibus effecit, ut claras & distinctas amarent & vestigarent, atque qualitates illas occultas, & *vocabula nihili*, seu quibus nullæ sunt subjectæ notiones, cane pejus & angue horrerent. Quæ tamen in Cartesio arguuntur tria sunt potissimum. I. Quod nimium ingenii viribus fuerit, experimenta vero, & aliorum sensum vix aliquando consuluerit. Quo factum est ut in plurimis erraverit & in Physica nihil ferme nisi fabulas docuerit. II. Quod a phantasie morbo non fuerit immunis, ut systemate suo mundano demonstrari potest. III. Quod nimium hæserit hypothesebus quibusdam generalibus & phantasticis. Itaque

que recentiores Physici, ut se Cartesiani opponerent, *Experimentales* se vocarunt.

§. XXX.

INcredibile est quantum incrementum literæ ferme omnes, potissimum Ars Logicocritica, post Cartesium acceperint. Inter Cartesianos, qui hanc artem summo-pere excoluerunt, eminent Claubergius, Auctor Artis cogitandi, Malebranchius, aliique. Johannes Claubergius vir erat solidi & acerrimi iudicii, Methaphysicus certe minime iners. Is inter cetera scripsit Logicam, quam in duas partes pertitus est, *Geneticam* nempe, & *Analyticam*, Illa comparata est ut recte cogitemus: hæc ut aliorum cogitationes rite intelligamus. Multa sunt egregia & lectu digna in utraque,

§. XXXI.

AUCTOR Artis cogitandi aliis est Antonius Arnauldus, aliis Nicolius, aliis Trogny, aliis plures e *portu regio* Scriptores (a). Hujus opus Gallice primum editum est sub inscriptione *La Logique ou l'art de penser*. Versa inde est pluribus in linguis. Versionum tamen Latinarum ea Vvalchio probatur, quæ edita est Halæ Magdeburgicæ an. 1704., & 1718. interprete Joanne Contado Braunio. Habemus & nos Italam versionem, quam illis legendam auctor sum, qui linguam Gallicam ignorant. Est hæc ars in quatuor partes distributa juxta quatuor, ut putat, operationes mentis. In prima enim examinat perceptiones & ideas. In altera iudicia & propositiones. In tertia ratiocinium & syllogismos. In quarta Methodum. Petrus Sylvanus Regis censuit nihil fieri posse hac arte accuratius. Quocirca eam compendiosam dedit (b). Re-vera negare non possumus omnium Logicarum, quæ hucusque editæ sunt, eam longe esse probatissimam & utilissimam. Ego tamen sic censeo, quartam ejus Artis partem optima esse fruge plenam, omni que pretio superiorem.

§. XXXII.

(a) Vvalchius *hist. Logicæ in Parergis*, pag. 652.

(b) *In Cours de Philosophie*.

§. XXXII.

Hæc autem mihi videntur in Arte ista argui posse. I. Nimis promovet Cartesianum systema de ideis innatis. II. Plurima libro primo circa ideas disputat, ut & libro secundo & tertio circa propositiones & Syllogismos, quæ sunt nullius pretii. III. Artem Criticam non attingit, etsi multa huc illuc sparsim ad Criticem pertinentia doceat. IV. Nimis est in arte Syllogistica explicanda, ejusque regulas plurimas tradit manifesto falsas. V. Cui usui esse debeant quæcumque de propositionibus parte II. disputat, nullibi monet. Quæ vero in illa potissimum laudantur sunt. I. Cuncta clare & distincte tradit. II. Verum Logicæ finem ubique intuetur, qui est mentem in studio sapientiæ instituendo formare. III. Scholasticorum ineptias & barbariem refecat, quæstionesque inutiles, & vocabula inania vitat. IV. Exempla addit magna ex parte ethica, quæ nimirum assuefaciunt tirones ad veram & solidam scientiam amandam.

§. XXXIII.

Longe felicius artem inquirendi veritatem persequutus est Nicolaus Malebranchius Sacerdos Oratorii Gallicani Domini Jesu. Is anno 1673. edidit Opus *De la recherche de la verité*. Ejus autem operis editio Parisina an. 1713. omnibus præferenda, 4. voluminibus in 12. Latine vertit celeberrimus L'Enfant. In sex libros distributum est. In primis quinque errorum causas diligentissime perscrutatur: in VI. Methodum veritatis inquirendæ tradit. Primo libro differt de Erroribus sensuum. II. De imaginatione, qui liber omnium est optimus. III. De intellectu puro. IV. De propensionibus, seu inclinationibus animi. V. De affectibus. VI. De methodo quum Analytica, tum etiam Synthetica. Quum Malebranchius in his libris plurima methaphysica passim attingat, de ideis, de Deo, de Mentibus; factum est ut opus pro Metaphysica imperitissime haberetur, quum non sit nisi mera & vera Logica.

§. XXXIV.

§. XXXIV.

Non dubito, quin hoc opus plurimum valeat ad mentem formandam. Sed nec pro integra arte Logico-critica haberi potest, nec est ab omni errore immune. I. quamquam præcepta quædam critica passim adiperget, at artem ipsam criticam proprie dictam non tradit. II. Quæ circa sensus docet æquo nimius provehit: nititur enim ostendere nullam omnino certitudinem ope sensuum habere nos posse, quod est *effrænem scepticismum* inducere. III. Contendit omnia nos in Deo, qui animæ nostræ *essentially* (essentialiter) unitus sit, videre. Itaque in phanatismum proruit, & Enthusiasum, ut Johannes Georgius Pritius in dissertatione de Malebranchii Enthusiasmo demonstrat. IV. Quum omnes cogitationes & motiones nostras a Deo repetit, libertatem nostram radicitus auferre videtur. V. Si Arnaldo credimus, Malebranchius spatium hoc reale pro ipsa Dei immensitate habuit,

§. XXXV.

Fuerunt quoque qui præcepta Logica ex principiis mathematicis deduxerunt, eaque exemplis ad Mathematicum spectantibus illustrarunt, in eam adducti opinionem, quod Mathesis optima atque promptissima remedia ad excolendum intellectum humanum, eumque ad veritatis cognitionem aptum reddendum, afferat. Huc pertinent Erhardus Vveingelius, cujus opera prodiit *Analysis Aristotelica ex Euclide restituta genuinum sciendi modum & naturam restauratæ philosophiæ faciem per omnes disciplinas & facultates ichnographice depingens*, Jenæ 1658. IV. Ehrenfried Vvalther a Tschirnaus, cujus studio prodiit *medicina mentis cum medicina corporis* Amstæledami 1687. & Lipsiæ 1695., quæ posterior editio priore auctior est. Illustri auctori propositum fuit, tradere scientiam generalem, qua quis probe instructus omne incognitum, quod assequi potest suis viribus intellectus humanus, certa constante methodo inveniat. Prima parte demonstra-

elaborat, quod in studio cognoscendæ veritatis posita sit omnium maxima hominum felicitas. Parte vero secunda tradit ipsam methodum veritatem investigandi, his innixam fundamentis, quorum certitudinem quisque in seipso per experientiam possit explorare. Nempe, I. Se variarum rerum conscium esse, quod principium primum & generale nostræ cognitionis sit, II. Se bene a quibusdam, a quibusdam male affici, quod principium sit cognitionis boni & mali. III. Quædam a se posse concipi, siue cogitatione apprehendi, quædam autem a se nullo modo posse concipi, quod principium sit primum verum a falso discernendi, IV. Se varia sensuum exter-
norum, itemque imaginum internarum & passionum ope advertere, quod principium sit primum unde omnia, quæ experientiæ debeamus, emanent. Andreas Rudigerus (a) duo in hoc Auctore reprehendit, I. Quod ratiocinationem mathematicam perturbaverit cum philosophica. II. Quod per integrum librum erronea opinione existimaverit, veritatem philosophicam eodem modo cognosci, atque mathematicam, quum juxta Rudigerum longe alio modo cognoscatur (b). Ad hanc eandem classem spectant quoque Leibnitius, & Vvolsius, de quibus paullo post.

§. XXXVI.

Tempus est, ut de Johanne Lockio dicamus, celeberrimo Angliæ philosopho, qui an. 1704. extinctus est, viro in primis usu mentis, & meditatione accuratissimo. Scripsit libros logici argumenti IV. qui Gallice, & Latine ex Anglo versi sunt sub inscriptione, *de Intellectu humano*. In his libris omnium operationum mentis humanæ originem, seriem, fines, tum & mentis huma-

(a) *De sensu veri & falsi lib. 2 cap. 4. §. 6.*

(b) *Veritates Mathematicæ ex ipsarum rerum Mathematicarum notionibus liquido fluunt: notionēs vero Mathematicæ sunt arbitrariæ, essentiæque sunt nominales simul & reales. At veritates aliarum rerum non licet ita deducere: quippe aliarum rerum notionēs nequeunt haberi pro essentiis realibus.*

humanæ capacitatem accuratissime vestigat. Quanquam in eo opere plurima ex media Metaphysica disputentur, tamen haud dubium est, quin Artem Logicocriticam primum spectet, & mirum in modum promoveat. Libro primo, ostendit, quod nullæ insint nobis ideæ innatæ, ne principiorum quidem ipsorum sapientiæ humanæ, sed omnia cognoscamus sensuum & conjecturæ ope. Libro secundo idem argumentum deducit ad singula quæque idearum nostrarum objecta. Libro tertio de sermone, vocabulorumque proprietate & affectionibus differit, is liber pene totus ad criticem pertinet, & ex eo Clericus *Artem Criticam ornabit*. In quarto tandem de *cognitione humana, diversis ejus gradibus; de veritate, probabilitate, ratione, fide, & aliis ejusmodi agit*.

§. XXXVII.

QUæ in hoc opere commendari possunt hæc esse censéo. I. Acumen, quo res quælibet pervestigantur. II. Ordo & claritas. III. Maxima naturæ humanæ meditatio & cognitio. IV. Libertas philosophandi. V. & modestia, qua ingenue fines mentis humanæ statuuntur. Sunt tamen quæ reprehensione non vacant. I. Plurima plerunque opera in rebus exigui momenti. II. Earumdem rerum repetitio, & verborum ubique nimium. III. Non iusta animi humani notio. IV. Nec sanum homines inter & bruta statutum discrimen. V. Et libertatis humanæ, ut putant (a), falsa sententia. Quorum tamen quædam sunt, quæ bonam in partem interpretari possis, si illud excipias, Lockium Socinianismo æquo nimius fuisse, nec recte de animæ naturâ sentiisse.

§. XXXVIII.

Lockio jungendus est Johannes Clericus, qui primus Critices præcepta in justam artem contulit. Is præter artem hanc Criticam, scripsit & Logicam, in quatuor partes distributam. In prima agit de Ideis: in secunda de Enunciatione: in 3. de Methodo: in 4. de Argumentatione. Quæ sunt meliora in Arte cogitandi, in Malebranchio,

in Lockio, in librum suum transcripsit Clericus. Commendatur in eo in primis rerum delectus, ordo & claritas, Quæ in Logica & Critica argui solent sunt. I. Nollent quidam artem Criticam ab arte Logica divulsam, sed una cum ea conjunctam. II. Nimis est in tractatione de ideis & propositionibus: in pauciora enim ea conferre potuisset. III. Artes generales exemplis invidiosis adversus Catholicam Romanam Ecclesiam fœdat. IV. In arte Critica id videtur fecisse, ut de genuinitate & integritate librorum Canoniorum dubitarem,us,

§. XXXIX.

EX recentioribus, qui hanc artem promoverunt, commemorandi etiam sunt Christianus Thomafius, Petrus Poirer, Andreas Rudigerus, Petrus Crusatius, & omnium maximus Christianus Vvolsius. Thomafius edidit *Introductionem ad Philosophiam Aulicam, seu lineas primas libri de prudentia cogitandi*, ubi ostenditur media inter præjudicia Cartesianorum, & ineptias Peripateticorum veritatem inveniendi via. Lipsiæ 1688., & Halcæ 1702. *Completitur capitula XVI. I. De Philosophorum sectis. II. De Philosophia in genere. III. De homine, & humane mentis essentia. IV. De prudentia cogitandi, & ratiocinandi. V. De veritate & ejus criteriis. VI. De præjudiciis veritatis inquisitionem impediens, eorumque extirpatione, & primis cognoscendi principiis. VII. De objecto ratiocinationis. VIII. De modis ratiocinandi. IX. De mediis ratiocinandi. X. De methodo & ordine ratiocinandi. XI. De prudentia meditandi. XII. De prudentia cogitata proponendi. XIII. De prudentia aliorum mentem intelligendi. XIV. De prudentia judicandi. XV. De prudentia contradicendi. XVI. De pedantismo.*

§. XL.

Petrus Poirer scripsit *Veram methodum inveniendi verum* divisam in tres partes. Prima exhibet sex methodi ad veritatem leges.

- I. *Ad veritatem detegendam ordinem servandum esse.*
- II. *Mentem sinceram esse debere.*

III.

III. *Quemlibet debere incipere a se, & in seipso.*

IV. *Agnosendam esse unicuique corruptionem suam.*

V. *Sanationem mediis aptis ante omnia querendam.*

VI. *Mentem ad incolumitatem recipiendam agnita & deplorata ægitudine, impotentiaque sua, abstinere debere acquiescere ab actibus intellectus sui, quem offerat Deo passivum, solo desiderio sanitatis a Deo interpretandæ agentem, nec non firmiter decernentem, se in posterum, si restituta fuerit, non recturam amplius facultates suas ad placitum proprium, sed ad voluntatem entis summi juxta ordinem, & proportionem, quæ debeat esse æterna inter caduca, spiritualia, & corporea, interna & superficialia, necessaria, & accessoria, realia & umbratilia, divina Dei placita & pessima proprii amoris se pro scopo statuentis cupita.*

Pars secunda exhibet varias quæstiones & difficultates de intellectus impotentia, quiete, passivitate, de Dei in illo actione & lumine, deque ejus statu diviniore, & medio ad illum proximo. Pars tertia ostendit ob neglectum superiorum regularum Cartesium cum suis in multa incidisse errata. Multa egregia hic philosophus continet. Sed omnia fanatismo fœdat, & quietismo.

§. XLI.

ANdræ Rudigeri merita in Logicæ artem omnino sunt amplissima, siue aliorum errores, quos solide confutavit, siue accessiones, quibus disciplinam hanc auxit, spectemus. Is præter alia anno 1707. edidit *Philosophiam Syntheticam*, qua multorum Logicorum vitia observat & emendat. Anno vero 1709. emisit librum elegantissimum nec satis laudandum *De sensu veri & falsi*. Hic primus ceteros Logicos exagitavit, quod discrimen inter ratiocinationem *mathematicam*, & *philosophicam*, quod longum est, ut putat, non observaverint. Crusatius & ipse lingua Gallica edidit, *Système de reflexions* Amst. 1712. quod latine deinde fecit. In eo universam artem Logicocriticam, paulo licet verbosius, at accurate tamen docet.

§. XLII.

T Andem Christianus Vvolſius vir in Mathematicis & Metaphyſicis medicationibus attritus, quum inſtituiſſet univerſam Philoſophiam methodo ſcientifica pertractare, omnium primum Logicam dedit tomo uno. 4. ex editione Veronenſi. Duabus partibus illam abſolvit, theoretica nempe & practica. Quæ in eo ſunt egregia hæc ſunt. I. Exactæ & accuratæ vocabulorum definitiones: amat enim philoſophari per ideas claras & diſtinctas. II. Methodus Mathematica, qua cogitationes ſuas connectit. III. Veritates plurimæ acute detectæ. IV. Vel minutiffimarum rerum demonſtrationes. Sed in Logica reprehenderis I. Quod ab ea *artem inveniendi* abſtraxerit, & ſeparatim promiſerit, ut & *Logicam probabilitum*. II. Quod *artem criticam* non integram dederit. III. Quod prolixus fuerit; & minutiffima, etiam vilia, conſectatus ſit. IV. Quod exemplis ſublimium diſciplinarum regulas Logicas obſcuraverit potius tironibus, quam illuſtraverit. V. Quod nimium uſum fecerit vocabulorum barbarorum, & infinita alia ipſe barbarum in modum invexerit. VI. Quod nimium ſit abſtracta & Metaphyſica. VII. Quod in judiciis & demonſtrationibus non tam cogitationum, quam vocabulorum rationem habuerit.

§. XLIII.

H Is omnibus addimus *Elementa hæc noſtra artis Logicæ criticæ*, quæ partim ex optimorum obſervationibus, partim ex ſtudio & meditatione noſtra contexuimus. In his conamur adoleſcentes inſtituere & in recte ratiocinando, & in aliorum cogitationibus rite intelligendis. Quidquid igitur ad *artem Logicam & Criticam* pertinet, modo, qui ſit tironibus accommodatus, in his Elementis complectimur. Ea v. in libros partimur.

I. De natura mentis humanæ, de errorum cauſſis, iſſque remediis preſtandis.

II. De ideis earumque objectis & ſignis.

III. De vero & falſo, de que Criteriis veri generatim.

IV.

IV. De usu auctoritatis, ubi de Arte Critica.

V. De usu ratiocinii, & de methodo.

§. XLIV.

Sed antequam ad rem aggrediamur unicum ut adolescentem moneam; operæ pretium est. Nempe theoreticam artis Logicocriticæ non efficere hominem recte atque accurate cogitantem, quemadmodum ars Rhetorum Oratorem non efficit: Efficitur enim Logicus & Criticus studio & meditatione; ut exercitatione dicendi Orator: Itaque plures scio, qui lectis infinitis pene hujus artis opusculis; hec ratiocinari tamen recte norunt; nec aliorum scriptis rite uti. Alios è contrario expertus sum, qui sine ulla arte; meditatione & studio Logici & Critici munus magna cum dignitate præstant: Ars ergo hoc efficit, ut facilius recte ratiocinandi habitum comparemus: at sine exercitatione misera est & sterilis: Qui ergo nunquam exercitio suo veritatem ullam detegere conatur, is nulla arte Logicus evadere potest: & docet plus tuius veritatis inventio propria meditatione facta, quam regulæ omnes etiam doctissimorum Logicorum: Quocirca nunquam Logicos dixerim, qui etsi hanc artem docent, nihil tamen ipsi humanæ eruditioni adjumenti asferre conantur; sed inertis disciplina contenti sunt. Qua in re illud veteris Comici appositum est,

Ego odi homines philosopha sententia, & ignava opera.

Eam ob rem auditores meos partim Geometria, partim criticis quæstionibus exerceo.

§. XLV.

Interim, fateor ingenuè, dum de Logico efficiendo curas suscipio, animum quasi despondeo. Duo enim video ob stare adolescentium ingeniis extrema, per quæ mediis quum tuti eant, ire tamen nesciunt. Nam nec servilia ingenia amo, & temeritatem atque confidentiam minime ferre possum. At experientia me docuit, vix adolescentes nostros ab his extremis coerceri: aut enim servire parati sunt, aut petulanter lascivire. Quidam sunt, de quibus apposite Lucretius (a).

B 4

Omnia

(a) *Lucret. in 1. de nat. rer.*

*Omnia enim Stolidi magis admirantur amantque
Inversis quæ sub verbis latitantia cernunt :
Veraque constituunt, quæ belle tangere possunt
Aureis, & lepido quæ sunt fucata colore .*

Hi ingenium, atque iudicium suum nunquam adhibere consueverunt : Mentem in servitutem dederunt, tanto hercle corporis servitute foediorem, quanto animus corpore ipso est nobilior. Præterea ita animus barbaris vocabulis occalluit, ut quemadmodum Gentiles illi, de quibus Clemens Alexandrinus (a), *preces voce barbara* (quæ non intelligeretur, sed sonaret asperius & grandius) *factas* **POTENTIORES** putabant; ita isti quidquid ex media barbarie non depromseris, non audiunt. Hos si conaris vehementiori aliquo remedio curare (nam levia ita afficiunt, ut fomenta podagram), ad alterum deflectunt extremum, evaduntque insolentes, confidentes, omnium contemtores, quod est vitium priore pernicialius, ut error ipsa est pernicialior ignorantia. Alii ex adverso, dum liberi videri volunt & Critici, sinceræ doctrinæ patientes aures commodare non patiuntur. Ex suo vivere malunt, quam ex alieno. At quum eorum ratio tenero adhuc vagetur pede, ineptiunt pueriles ineptias. Hi, quum ad modum conaris ducere, admittunt clitellās, & serviunt miseram servitutem. Præceptis Logicis, quæ in his Elementis doceo utrumque mihi videor infectatus vitium. Et eos quidem, qui ex alieno magis quam ex suo sapiunt jecore, excitasse, ad motis opportune calcaribus: eos vero, qui velut hædi perulci per omnia vagantur fastidiosi, quique nimis confidentes *soli suæ prudentiæ innituntur*, quod cavendum præcipit Salomo, frænâ coërcuisse. Sed libeat sub initium solemnen hanc habere edictionem, *Horum neutros unquam ad veram sapientiam pervenire: illi servient æternum: isti æternum tumultuabunt.*

25

ARTIS LOGICOCRITICÆ

LIBER I.

De natura & operationibus mentis, de mor-
bis intellectus, & de caussis errorum, at-
que de morborum horum & errorum re-
mediis & curatione.

C A P U T I.

De natura & operationibus mentis.

§. I.



Uanquam quæ ad naturam, proprietates, &
operationes mentis spectant in Metaphysica
& Ethica expendere philosophi solent, ut &
nos expendimus accuratius, & prolixius :
sunt tamen quædam, quæ Logici sunt pro-
pria, & quæ hoc in loco, saltem per summa capita, ex-
plicare, operæ pretium est. Per summa, inquam, ca-
pita : nam quum nullæ sint quæstiones explicatu diffici-
liores, quam quæ naturam humanam spectant, eæ hu-
jus ætatis, in qua Logica disci solet, propriæ non sunt.

§. II.

Quidam sunt philosophi, qui Animam, Animum,
& Mentem distinguunt. Latini ipsi, quanquam
plerumque hæc confunderent, tamen quum exactius lo-
qui volebant, Animam vocabant vim qua vivimus, seu
potius sanguinis motum & respirationem (a) : Animum
vim qua dolores & voluptates sentimus : Mentem vero
vim & facultatem intelligendi. Nec hodie desunt, qui

(a) Hinc illud Plauti, *sciet anima uxoris tuæ? Le pu-
te il fiato?*



putant, vim corporis vitalem, ut & vim dolores & voluptates sentiendi, esse corporis humani affectiones, aut saltem substantiæ; cujus natura sit media inter mentem & corpus (a); nec ad mentem, seu substantiam cogitantem pertinere. At hæc fuit veterum ferme omnium sententia; Platonis, Platoniorumque; Aristotelis, & Peripateticorum præcipuorum; vim ipsam *sentiendi*, seu Latinorum *animam*, tam esse Mentis facultatem, quam *vim cogitandi*: sed vim sentiendi per totum corpus diffundi, quum vis cogitandi in cerebro sese exlerat. Addunt tamen, *vim sentiendi* toto fusam corpore, magna ex parte cogitationi ipsi parere. Non vacat hæc fusius explicare: Vide ut propugnat hanc sententiam Cudworthus (b). Quidquid ea de re sit, quum non sit hic ejus disputandi locus, id certum est, nos cogitare, seu plurimas res percipere, & de iis judicare & ratiocinari: est igitur in nobis principium aliquod cogitationum nostrarum activum: id vero est, quod mentem, animam, animum appellamus (c).

§. III.

Effe vero mentem hanc substantiam a corpore distinctam & diversam, primum revelatione discimus: quæ quum doceat animas corporibus superstites esse, simul docet earum essentiam & naturam a natura & essentia corporis longe differre. Deinde ex ratione: quis enim sibi persuadeat tantam vim cogitandi, & reminiscendi, & hanc corporis movendi facultatem, corporis esse affectiones? Quæ quum sint omnium primum diligenter sunt expendenda quæ animi, quæ corporis sint propria, ne ex horum commixtione turpiter post hac erremus.

§. IV.

(a) Post Cassendum, plurimosque Scholasticos, qui animas sensitivam & vegetativam a Rationali distinguebant, ipse Clericus Biblioteque Choise tom. 2. pag. 213.

(b) In dissert. de natura genitrice §. 17. tom. 2. Syst. Intell.

(c) Tria illa vocabula passim ipsi miscuit Latini, in primis Cicero in Tuscul.

§. IV.

IN corpore hæc omnia insunt, extensio, soliditas, divisibilitas, mobilitas, figurabilitas, vires gravitatis, inertię, atque elasticitatis: motiones varię, motionibusque varię inductę configurationes internarum partium, aut externę figurę. Sunt etiam in corpore qualitates sensiferę, seu vires sensationes in nobis excitandi, colorum, saporum, sonorum, odorum, aliasque: Sunt fortassis & alia multa, quę ignoramus. Quoniam vero animus est substantia a corpore distincta & diversa (ex §. 3.) ea certe proprietates habebit ab his proprietatibus corporeis diversas.

§. V.

ET primum quidem animus extensionem divisibilem, aut figurabilem nullam habet: quum enim sit incorporeus, simplex est, adeoque nec dividi, nec figurari potest. Nihil tamen prohibet habere extensionem quamdam virium suarum, qua in extenso aliquo operetur aut patiatur (a). Itaque non sane inepte quis animum conceperit tanquam circulum quemdam, cujus centrum sit ipsa animi substantia, circumferentia vero ejus vis & operatio qua per corpus diffunditur (b). Quam opinionem qui in Nevvtoniana philosophia instituti sunt, inscitam putare non possunt: quippe qui docent etiam corpora habere hanc attractionis atmospheram incorpoream.

§. VI.

Soliditatem quoque, gravitatem, inertiam habere nequeunt, quę corporis propria sunt. Sed & ceteris viribus corporeis, ut & qualitatibus sensiferis destituuntur. Hinc est ut nulli sensui Mentis subjctę esse possint. Præterea destituuntur motionibus internis, seu motiones

B 2 nul-

(a) *Vide quę dicta sunt ad §. 2. Ex Philosophis recentioribus idem sentire Rudigerum ex Buddeo (compend. hist. Phil. pag. 101.) didicimus.*

(b) *Passim eodem circuli exemplo utitur Augustinus.*

nullæ corporeæ in iis fieri possunt, quæ sint motiones partium ipsius animi. Quamobrem perceptiones & cogitationes esse nequeunt motiones corporeæ, ut Epicurei delirant. Sed id, quoniam quasi fundamentum est humanæ sapientiæ, liceat paullo exactius demonstrare. Quum percipio omnes angulos Chiliogoni æquales rectis 1996. præter perceptiones Chiliogoni, obversari debent menti perceptiones æqualitatis inter omnes Chiliogoni angulos & 1996. rectos. Si id motionibus sit, jam tot erunt motiones, quot anguli Chiliogoni cum rectis comparantur, seu potius, quot sunt anguli Chiliogoni, & recti, cum quibus comparantur, id est motiones saltem 4980. circiter, quæ & eodem tempore, aut saltem brevissimo, & in eadem cerebri parte, qua nempe ideæ illæ connectuntur & comparantur, fieri deberent, quod est *αδυνατον*. Fateamur ergo oportet, perceptionem esse æctionem, quæ nihil habet similis motionibus corporeis (a).

§. VII.

QUæ ad animum igitur referimus sunt. I. Perceptiones & ideæ. II. Desiderium. III. Voluntas, IV. Libertas. V. Potentia corpus movendi. VI. Voluptas & dolor. VII. Effectusque qui ex opinione boni vel mali nascuntur. Percipimus aliquid, quum ejus idea menti nostræ obversatur: Idea autem est rei quasi forma quædam & ima-

(a) *Leibnitius in principiis Philosophiæ §. 17. Sic hac in re mentem explicat suam. Negari nequit, perceptionem, & quod inde pendet, per rationes mechanicas explicari non posse, hoc est per figuras & motum. Quod si fingamus dari machinam, quæ per structuram cogitet, sentiat, percipiat; non obstat quo minus, iisdem proportionibus retentis, sub majore mole construi concipiatur, ita ut in eam aditus nobis concedatur tanquam in molendinum. Hic supposito, intus nil deprehendemus nisi partes se mutuo impellentes, nec unquam aliud quicquam, per quod perceptio explicari queat. Hoc itaque in substantia simplici, non in composita, seu machina quærendum. In actis eruditorum Lipsiensibus tom. VII. supplementorum Sect. XI.*

& imago. Ita plantam percipio, quum planta ipsa media sui idea seu imagine menti meæ sit præsens. Idearum naturam accuratius loco suo expendemus.

§. VIII.

PErceptiones non unius sunt generis. Quædam dicuntur simplices: est autem perceptio simplex unius tantum ideæ intuitus, veluti solus trianguli intuitus. Quædam aliæ perceptiones dicuntur *judicia*, *ratiocinationes*, *methodi*, seu *systemata*. Judicium est perceptio duarum vel plurium idearum, & relationis quæ est inter eas, veluti quum percipimus conferimusque inter se ideam trianguli & quadrati. Quolibet judicio affirmamus aliquid aut negamus. Assertio autem aut negatio, quæ fit mente, non differt ab ipsa clara perceptione convenientiæ, aut disconvenientiæ idearum. Claram hanc perceptionem semper mentis convictio comitatur; Si enim non comitatur, assertio non est, sed vel dubium, vel opinio.

§. IX.

Ratiocinatio est operatio mentis, qua plures ideæ, quarum una ab alia pendet, perceptione contextimus, ut quod latebat detegamus, seu est perceptio relationis plurium judiciorum instituta ad id percipiendum, quod primo intuitu percipere non possumus. E. g. scire volumus an Deus velit summos Imperantes; sic ratiocinabimur.

Quicumque aliquid efficit, vult ut opus suum conservetur, quousque opifici placuerit:

Sunt autem homines Dei opus ceteris telluris operibus nobilior:

Quin igitur ut conserventur velit, dubitare non possumus.

At conservari homines sine societate non possunt:

Societas igitur ut sancta tecta servetur vult Deus,

Porro societas sine legibus stare nequit:

Nec leges sine summo aliquo Imperante; Vult ergo
Deus

Deus ut leges sint in societate, & summus aliquis Imperans, qui legum sit Custos.

Quod si plures ratiocinationes simul intexemus, iisque disciplinam aliquam conficiamus, qualis est Geometria, Metaphysica, Physica, Ethica, tum ea operatio vocatur Methodus seu ordo, aut systema aliquod scientificum. Sunt autem ut ratiocinationes, ita methodi aliae aliis breviores, vel longiores,

§. X.

AD perceptiones quoque pertinent *reflexiones*, seu *apperceptiones*, ut vocat Leibnitius, & *reminiscentia*, *Apperceptia* seu *reflexio* est ea mentis actio, qua animadvertit se percipere, perceptionisque hujus sibi conscia est. *Reminiscentia* vero est perceptio ideæ alias perceptæ, cum reflexione & sensu eam alias notam nobis fuisse. Ea est distincta a memoria, quæ est habitus mentis & cerebri, quo ea facilius percipimus, quæ alias sunt a nobis percepta. Hinc memoria, ut ceteri habitus, excolendo fit,

§. XI.

AD intellectum quoque, seu vim percipiendi & cogitandi, pertinent *phantasia*, *ingenium*, & *judicium*. *Phantasia*, seu vis imaginatrix, dicitur vis mentis, qua sibi corpora absentia repræsentat in suis imaginibus, & qua valet imagines istas corporeas pro lubitu augere, minuere, varie associare, aut etiam res incorporeas corporum instar imaginari. Itaque differt a *pura* intellectu, quæ nullis corporeis phantasmatibus utitur. E. g. quamlibet lineam esse in infinitum divisibilem clare *intelligo* quum id demonstrationes evidentes conficiant: at non *imagino*. Atque hoc attente est recolendum: nam plures sunt, qui quæ *imaginari* nequeunt, ea intelligi non posse clamant. Differt vero a vi sentiendi, qua præsentia tantum corpora, & quæ organa sensoria movent, percipimus. *Ingenium* dicitur acumen & perspicacitas mentis in excogitando, & intelligendo. *Judicium* est scientia bona deligendi, iisque recte utendi, qui ab Italis vocatur

buon

buon gusto, a Gallis *bon sens*. Judicium acquiritur aut quum viros summo iudicio præditos audimus; aut quum libros cum iudicio scriptos legimus; quemadmodum malum iudicium comparatur & ineptos magistros audiendo & ineptos libros legendo. Iudicio autem bono ab infanti affuescendum est; scilicet, *quo semel est imbuta recens servabit odorem testa diu*, inquit Horatius. Ingenium vero plerumque naturale est; sed potissimum exercitatione cogitandi & ratiocinandi acquiritur: hinc Scholastici continuis luctis ingeniosissimi. Ingenium sine iudicio sophisticem parit & fallam scientiam: iudicium vero sine ingenio iners est (a).

§. XII.

Desiderium est animi quædam inclinatio erga bonum seu apparens, seu verum: Pendet igitur a perceptione: nam *ignoti nulla cupido*, ut vetus est adagium. Voluntas est a desiderio distincta: quædam enim desideramus, quæ tamen nolumus. Est ergo determinatio mentis ultima, qua aliquid persequitur, aut fugit, quæque plerumque a desiderio nascitur. Libertas vero est ea mentis facultas, qua actiones quasdam seu internas, seu externas, prout libitum fuerit, agere, aut non agere, potest. Voluntas & libertas duæ sunt & distinctæ mentis facultates, sed ut plurimum inter se conjunctæ & copulatæ. Qui igitur quærit an voluntas sit libera, nisi hoc intelligat, an mens dum aliquid vult habeat libertatem, is id quærit, an una facultas mentis sit altera, quod est ineptire. Nam cur is etiam non quærit an voluntas sit intelligens? an virtus sit quadrata (b)? Nempe quam una eademque mens nostræ sit intelligens, volens, libera: intellectus tamen, voluntas, & libertas sunt tres distinctæ ejus facultates, &c., si quibusdam credimus, tres distincti habitus.

§. XIII.

(a) *Lepidum hoc de Caramuele dictum*, Ingenium habuit ut octo, Eruditionem ut quatuor, Judicium ut unum.

(b) *Lockius lib. 2, cap. XXI.*

§. XIII.

JAm vero habet & mens nostra potentiam corpus movendi, quod ex intrinseca experientia discimus; itaut putemus non esse audiendos Cartesianos, & Leibnizianos, qui id negant. Ex hac potentia egregium argumentum pro animi incorporeitate desumebat Plato; quod nempe animus, qui corpus movet, eoque utitur, debeat esse distinctus ab ipso corpore, quod movetur, & quo animus utitur. Qua autem ratione vis hæc animi in corpus exseratur, ignoramus. Nec mirum est: nam ignoramus etiam qua ratione unum corpus alteri motum suum communicat. Interim consule quæ dicta sunt ad §. 2.

§. XIV.

IDeæ voluptatis & doloris simplices sunt & claræ: definiri ergo non possunt. Pertinent voluptates & dolores ad animam. Sed ii dolores eæque voluptates, quæ occasione motuum corporis in nobis generantur, corporis esse dicuntur; dolores vero & voluptates, quæ occasione perceptionum nascuntur, animi. Ut autem intelligatur qua ratione in nobis dolores & voluptates gignantur, oportet statuere animam nostram vi sua vivifica per totum corpus diffundi, & harmoniam cum illo facere (ex §. 2.) Quæ igitur perceptiones, aut motus harmoniam hanc turbant, dolores, qui restituunt aut conservant, voluptates sunt. Nisi hoc dicatur, prorsus ignorabitur, quid in nobis sint voluptas, & dolor. Nam qui mentem nihil esse aliud putant nisi *cogitationem*; quum cogitatio non sit nisi cogitatio; ij negare debent ullum mentem dolorem, ullam voluptatem sentire.

§. XV.

Affectus sunt varix commotiones sanguinis, seu potius partis animi sensitivæ, cum dolore aut voluptate conjunctæ, qualis amor, ira, timor. Nascuntur ex perceptione, seu, ut Stoici loquuntur (a), ex

epi-

(a) Ad is Ciceronem lib. 4. Tuscul.

opinionem boni, vel mali. Qui ex opinione boni proveniunt, licet inquietitudinem quamdam secum afferant, quæ omnibus affectibus est communis (a), tamen cum voluptate quamdam sunt conjuncti. Ex. g. a. in inquietudinem quamdam adnexam habet, quæ tamen suavis est, & dulcis. Qui vero proveniunt ex opinione mali omnes dolorem afferunt, & inquietudinem sine ulla suavitate, nisi ubi sunt cum prioribus commixti. In affectibus igitur quædam sunt animi, perceptiones nempe, inquietitudo illa, & voluptas, aut dolor: quædam corporis, variæ nimirum commotiones illæ.

§. XVI.

Superest ut pauca dicamus de sede animi. Animi sedem in corde simpliciores quædam nationes statuebant: hinc illa *excorde, & corde*. Alii animam esse totam in toto corpore, & totam in qualibet parte totius, opinati sunt. Cartesiani animi substantiam in Cerebro ponunt, eamque per motus machinæ in toto corpore dominari volunt. Probabilior est Platonis sententia, substantiam animi in cerebro locatam esse, sed vim ejus sensitivam & vivificam per totum corpus effundere, vim vero rationalem in solo cerebro. Legatur §. 5. Res alioquin est valde perplexa & incerta: idque ex eo, quod animi natura latet. Sed fatendum, difficiliorem evasisse Philosophorum disputationibus, qui eas plerumque perquirunt rerum qualitates, quæ nullibi extant, & disputando tenebras offundunt, ubi vix sunt aliquæ.

C A P. II.

De animi morbis, & causis errorum generatim.

§. I.

PRæcipui animi nostri morbi sunt. I. Ignorantia, in qua nascimur. II. Intellectus brevitās. III. Imbecillitas. IV. Corruptio voluntatis, qua fit ut ab investigatione veritatis distrahamur. Et primum omnes homines

(a) Malebranchius lib. v. de inq. verit.

mines sine usu rationis nascuntur; quæ in re bestiis esse similes gravissime pronuntiat Salomo (a). Omnium ergo ignari nascimur, nescimusque bonum a malo, dextrum a sinistro discernere. Paulatim usu sensum & meditationis informem quandam Scientiam nobis comparamus. Infantes, nisi usu edocti fuerint, manum sine ullo timore flammæ admovent, lapides, coenum, ligni frusta in os ingerunt. Non oportet igitur eos audire, qui fabulantur (b) animas nostras ante corpora nostra conditas esse, & antequam corpori uniantur, esse sicut Angelos sapientes: aut saltem quum a Deo creantur accipere partem mundi intelligibilis Dei. Nam vult Deus ut usu, studio, labore discamus. Hinc videmus eos majorem sibi scientiam comparare, qui cum hominibus, & natura rerum magis versantur; eos minorem, qui minus. Naturalem igitur ignaviam alunt ea sententia Platonici.

§. II.

Vis tamen percipiendi & intelligendi innata nobis est: nempe est ipsa anima, cujus substantia eadem est in infantia, & in virilitate. Sed eius tamen capacitas brevissima est, perspicacitas debilis, distractio maxima. Et primum quidem probabile est, & ex experientia confirmatur, non omnes animas eadem capacitate & perspicacitate præditas esse, sed alias majore, alias minore polleere. Deinde maxima capacitas, & perspicacitas, quæ in hominibus reperiri potest, si capacitati & perspicacitati Angelorum compareretur, stupiditas erit: ut si capacitas & perspicacitas Angelorum cum ipsa Dei intelligentia conferatur, ignorantia & ipsa atque stupiditas esse reperiatur. Præterea si capacitas humana cum rerum, quæ sciri possunt, numero conferatur, erit velut unum ad infinitum. Nempe quæ sciri possunt infinita sunt, quæ nedum homines, sed Angeli ipsi ignorant, & quæ scire non possunt. Quæ veritas cautos nos facere debet. I. ne iis

(a) Ecclesiastæ cap. 3.

(b) Platoniorum ea est opinio, probata etiam Origeni, & Augustino, quum adhuc esset Juvenis: nam vir actus rejcit.

perquirendis operam demus, quæ sciri nequeunt; II. ut mentem nostram necessariis tantum sciendis admoveamus. Vetusissimum est enim Senecæ illud, *necessaria ignoramus, quia superflua discimus.*

§. III.

Imbecillitas spectatur vel in intelligendo, vel in recordando. Utraque maxima, licet non æqualis in omnibus. Quod ad primam, quidam sunt, qui vix trium idearum concatenationem perspicere queunt, quos unius syllogismi homines appellat Lockius: alii seriem idearum paullo longiorem intueri possunt. Primi series plurium idearum videre nequeunt: eas vocant supra captum humanum. Videmus sane tirones diu laborare ut primarum propositionum Euclideanarum demonstrationes intelligant: & eorum plures nullo modo intelligere posse. At quædam sunt series idearum, quas paucissimi intelligunt, etiam ex subactis, tantum abest, ut secundi illi. Quotusquisque ordinem principiorum Newtoni perspicit? Paucissimi autem isti Angelorum paullo longiores quasdam ratiocinationes fortassis non intelligerent. Apparet ergo vim ratiocinandi & intelligendi & brevissimam esse in hominibus, & non in omnibus æqualem.

§. IV.

Sed hæc imbecillitas evadit major si memoriæ quoque adsit debilitas: nisi scilicet memoria sit robusta & vivida, ut dum secundam ideam intueri conor, primam vivacissime retineat, & secundam, dum ad tertiam progredior, & ita porro, efficitur ut nullo modo ratiocinari queam. Prout ergo magis vel minus robusta & vivax est memoria, ita longius, aut brevius ratiocinando pergere possumus. Inde provenit ut longiores demonstrationes primo conatu non intelligamus, quæ assuetudine postea familiares fiunt. Jam vero memoria non eadem est in omnibus. Quidam sunt qui adeo labilem memoriam habent, ut vocaveris homines solius simplicis perceptionis. Alii vero paullo robustiorem & vivaciorem habent, ut alii ad miraculum, ut nobis videtur, robustam & vivacem. Ex

pendet a cerebri textura. Qui temperamento sunt sanguinei, aut cholericī, ingenio & acumine valent, memoria non æque. Qui atrabile, aut phlematico temperamento sunt præditi, memoria plurimum, ingenio & perspicacitate parum valent.

§. V.

His omnibus accedunt morbi, qui ex voluntate nascuntur. I. Per varia distractio. II. Propensio ad voluptates. III. Aversio a labore. IV. Mala electio studiorum. Et primum quidem veritatis inquisitio exigit *attentionem*, sine qua nihil accurate examinari, nihil probe intelligi potest. At voluntas dum nos per varia distrahit objecta inconstans, & levis, attentionem *scientiæ conciliatricem* avertit. Deinde natura ipsa rapimur ad voluptates; eæ & attentionem, & studium omne interrumpunt. Dum voluntas frænum voluptatum desiderio laxat, omnem vitæ ordinem evertit, & nos pigriores etiam, quam natura sumus, efficit. Præterea dum aversionem a labore; studio & exercitio non conatur mitigare, sed eam fovet, ignorantiam & stupiditatem nostram auget. Tandem dum ea studia eligimus, quæ capacitati, statui, tempori accommodata esse non possunt, tempus frustra terimus, & laterem crudum lavamus.

§. VI.

Dubitari non potest, quin ignorantia, brevitās, imbecillitas, voluntatis corruptio, non minimum sint malorum, quibus homines subagitantur. Sed majus sunt, & quod miseriam mirum in modum auget, errores prope infiniti in quibus homines versantur, quum in scientiis theoreticis, tum potissimum in practicis. Errores isti contentiones, iras, bella progignunt, unde vita humana continuo afflictaur. Nihil igitur prius Logicus habere debet, quam ut errorum fontes, præcipuos saltem, indigitet, & remedia, quæ inveniri possunt salubriora, adhibere conetur.

§. VII.

ERror est falsa cognitio quæ pro vera habetur. Est autem vel in perceptionibus & ideis: vel in judiciis, vel in ratiociniis. Idea falsa est, quæ objecto suo non respondet. Plurimas esse ideas falsas, potissimum vero abstractas, & compositas, vix credibile est Cartesianos negasse, quos idcirco gravissime reprehendit Buddeus: ii enim non negabant ideas sensuum plerunque objectis suis non respondere, adeoque perceptionum, & judiciorum falsorum causas esse, aut saltem occasiones. Judiciam falsum, est quum vel de idea ea affirmamus, quæ illi non conveniant, vel illa negamus, quæ ei tribuenda erant. Itaque tam errat, qui affirmat trianguli rectilinei angulos æquales esse tribus rectis, quam qui duobus rectis æquales esse negat: & tam errat, qui nullum esse Deum fatetur, quam qui illum cum universo confundit. Ratiocinatio est falsa, quum conclusio deducta judicium falsum continet. Id autem fit, aut, quia ex falsis principiis ratiocinamur, aut quia ex veris non rite & juste.

§. VIII.

Causæ autem errorum, seu cognitionum falsarum, quæ pro veris habentur, vel in animo sunt, vel in corpore, vel extra nos. In animo potissimæ sunt. I. brevitas mentis & imbecillitas cum infinita sciendi libidine conjunctæ. II. Defectus voluntatis & attentionis cum amore proprio junctus. III. Affectus dominantes. In corpore præcipuæ sunt. I. ejus pondus quoddam & pigritia naturalis. II. Ejus, potissimum cerebri, temperies, a qua animus plurimum pendet. III. Sensuum paucitas & imperfectio. Extra nos primariæ sunt I. Parentes. II. Magistri. III. Populus. Et hæc quidem sunt causæ maxime universales. Ex his porro fluunt infinitæ aliæ minus universales, quas singillatim enumerare longissimi esset operis & quarum præcipuas, prout se occasio tulerit, indigabimus.

C A P . III.

De causis errorum in animo existentibus , & primum de duabus prioribus .

§. I.

Mentem nostram esse brevissimam , atque imbecilem , superiori capite demonstratum est . Sola autem brevitās & imbecillitas , nisi accederet infinita illa sciendi cupiditas , ignorantiae tantum causa esset , non etiam falsae cognitionis & errorum . Sed cum cupiditate ista occulta sciendi conjuncta , vix credibile est quot errorum causa sit . Id vero plurimis fit modis . I. Falsa opinione putantes tantum sciri posse quantum quæri , adeoque ea studiose pervestigantes quæ . 1. aut captum nostrum superant . 2. aut quorum sciendorum media & viæ deficiunt . 3. aut ad quæ scienda nondum rite præparati sumus . II. Sine ordine dicentes plurimis simul operam navantes , atque attentionem ad multa dividentes . III. Iis nobis ideis satisfaciētes , quæ inadæquatæ sunt confusæ . IV. Iis operam dantes , quæ statui & ordini nostro non sunt necessaria , quæque voluptatis magis habent , quam utilitatis , unde fit , ut in necessariis postea deficiamus . V. Novitatibus nimium studentes . Examinemus pauca hæc paullo accuratius .

§. II.

Primum , plurima sunt , quæ non paucorum tantum , sed omnium hominum captum superant , quæque operose investigare , est oleum operamque perdere . Ad hanc classē referendæ sunt omnes quæstiones de *possibilibus* , quibus Scolastici libros suos instruxerunt , & quæ neque lumine naturæ , neque Dei revelatione sciri possunt . Ex.g. An Deus mundum ab æterno facere potuerit : utrum mundus ab æterno factus , libere factus fuisset : utrum Deus aliquid ab æterno fecerit : Quo in loco Deus exsistebat ante conditum mundum ; Quo modo sit im-

men-

menſus, nec extenſus & diviſibilis: Qua ratione futura libera cognoſcat: utrum immenſitas Dei ſit etiam infinita reſpectu Dei intellectus: utrum poſſit Deus elevare creaturam per potentiam obedientialem ad vim creandi: utrum Dei potentia fieri poſſit ut lapis cogitet: Quid futurum fuiſſet ſi Adam non peccaſſet; & an Adamo non peccante Chriſtus veniſſet: utrum incarnari potuerint Pater & Spiritus Sanctus: Utrum verbum aſſumere potuerit naturam bruti, aut plantæ, & qua ratione tunc prædicaſſet: an hoc univerſum ſit infinitum: & ſi finitum eſt, qua cum re terminet: qua ratione animi a corpore ſoluti corpora percipiant: An in corporibus proprietates quædam ſint, quæ ſenſus & conjecturas noſtras lateant: Quid ſit in aliis orbibus; & ſi in iis ſit animantia, quæ eorum vita, quæ ſocietas, qui mores, quæ ſtudia: & huiusmodi infinita, quæ nec ratione ulla, nec revelatione ſciri poſſunt, & de quibus ſine magna imprudentia & temeritate definire nequimus; & in quibus perquirendis mirum eſt potuiſſe litterarum ſtudioſos per tot ſæcula operam perdere.

§. III.

Alia autem ſunt, quæ idcirco ſciri nequeunt, quod media, & viæ ad ea ſcienda nobis nulla ſuppetant, cuiusmodi ſunt præter quædam, quæ ſuperiori §. memoraviſus de aliis globis, hæc. I. Quælibet materiæ portio dividi poteſt in infinitum? II. exiſtat extenſio vacua? Sol ſit corpus metallicum, an vitreum igne fuſum? IV. In centro telluris ſit ignis, an maſſa metallica? V. Quadrari poſſit circulus? VI. In Saturno aliisque Planetis ſint atmophæræ aeræ? VII. circa ſingulas ſtellas ſint ſua ſyſtemata planetaria? VIII. Tellus circa Solem, an circa Tellurem ſol moveatur? IX. cujus figuræ ſint primæ corporum monades? X. Quanta ſit diſtancia fixarum a nobis, & quanto temporis intervallo inde ad nos lumen tranſmittatur? XI. Quantum conferat Sol, quantum Luna ad elevationem aquarum Oceani? & alia innumera, in quibus examinandis graviſſimi quandoque homines tempus perdiderunt. Eodem ſpectant investigationes

historiarum antiquissimarum nationum temporis obscuri, quarum ad nos nulla monumenta transmissa sunt, & in quibus major hominum pars bonas horas consumunt. His adde studiosas inquisitiones in veterum Chronologia ordinanda, aut in annis mundi fixandis.

§. IV.

JAm vero quædam sunt, quæ sciri recte nequeunt, nisi ad ea probe præparati accedamus: sunt enim quædam disciplinæ, quæ aliis faciem præferunt. v. g. I. ut Scripturas Sacras intelligamus linguarum orientalium studium, studium Critices, & historiæ veterum Asiæ nationum, necessarium est. II. Et ad leges Romanas rite interpretandas Romanæ historiæ cognitio, plerumque etiam Græcæ. III. Jurisperitus jus naturale & Gentium noscat oportet. IV. Canonista Scripturas, Conciliorum statuta, & historiam Ecclesiasticam. V. Physicæ amator historiam naturæ. VI. Qui cupit recentiore Philosopherum Systemata noscere, disciplinas Mathematicas. VII. Qui librum aliquem est interpretaturus, Auctoris linguam, & Scientiam. VIII. Ethicæ studiosus Metaphysicam. IX. Qui accedit ad Medicinam, præter Physicam etiam Staticem, Hydrostaticem, aliasque disciplinas physicomatemáticas. Mitto cetera, ne sim longior. Qui sine his præsidiis ulterius progreditur in cæptis, is haud dubium ad singulos passus cespitat.

§. V.

Præterea quoniam capacitas & attentio mentis brevis est, qui aut sine ordine discere conatur, aut ad plura attentionem divertit, in errores incidat necesse est. Nam I. qui sine ordine philosophatur, ad mentis brevitate addit confusionem. II. Qui ad plura attentionem divertit, is nulla de re claras, distinctas, & adæquatas ideas acquirit: unde non solum tenebras intellectui offundit, sed superficiariam quandam scientiam, & falsam acquirit. Hoc peccatum ii magis peccant, qui magis sunt sapientiæ aut amantes, aut saltem ambitiosi. Hujusmodi esse philologorum bonam partem jam dudum doctis observatum est.

§. VI.

§. VI.

E Venit plerunque, ut qui magis eruditionem amant, minus sint laboris patientes, aut præ ceteris occupationibus animi, vel corporis minus lectioni & meditationi vacare possint. Eam ob rem omnium disciplinarum compendiola sibi comparant, & studiose legunt. Ea quum perlegerint, interdum magna festinatione, putant se Historicos, Philosophos, Theologos & id genus alios. Si in longiores libros incidunt, satis habent legisse vel titulos, vel saltem indiculos (a). Hinc se ad quavis de re, etiam abstruclissima, confidenter judicandum ingerunt. Quot autem falsa judicia inde proveniunt? Dolenter dico: ex quo compendiola ista scientiarum edita sunt, & indiculi, Gallorum maxime opera, disciplinæ enervatæ sunt, & quæ mentes profundæ vocari solent, evanuerunt. Arogantes enim hæc juvenes faciunt, dum ex iis judicant paucis annis, aut mensibus; posse se cunctarum disciplinarum peritos fieri. Quantum igitur hæc conficientibus profunt, tantum nocent legentibus.

§. VII.

AD hæc, quum iis ut plurimum operam dant homines, quæ voluptatis magis, quam utilitatis aut necessitatis sunt, utilia & necessaria prætermittunt, atque inde in muneribus suis fungendis misere perturbantur & hallucinantur: cujusmodi sunt qui Reipublicæ, aut Religioni regendæ destinati, pro Legum, Ethicæ, Politicæ, germanæ Theologiæ, gravis Eloquentiæ studio, toti sunt aut in vetustis, inscriptionibus numorum tabulatum, statuarum, tempore magna ex parte corrosarum, interpretatione: aut in linguis, quarum vix aliqua ad nos vestigia pervenerunt, veteri Egyptiaca, Ethiopica, Carthaginienſi, coagmentandis: aut in Ebræorum poesi restituenda; aut in minutiis ineptissimis veterum morum & temporum: aut in improbo Algebræ studio. Generatim autem

(a) *Lepide Switb, recentiores, inquit, literati omnes sunt Ebræi: legunt enim sinistrorsum dextrorsum, idest ab indiculis.*

autem Philologi in quot ineptiis occupantur? Quot fuerint Hercules? Quot Zoroastres? Major ætate sit Homerus, an Hesiodus? Quoto mundi anno Eneas venerit Italiam? Quænam poësis forma prius obtinuerit, rithmica, an metrica? Lirica, an Epica? Roma dicta ita sit a Romulo, an a *romæ*? Quæ vestes, qui accumbendi ad mentiam modi, quæ armorum formæ apud veteres? Annibal qua Alpium parte transierit? Sunt huiusmodi infinita, pro quibus ingentia volumina sæpe cudi videas. Sed & sunt huiusmodi nugæ etiam in sublimes disciplinas a levissimis & otiosis hominibus inductæ, quæ ab utilibus & necessariis animum avertunt. Quid? non attingenda hæc sunt? Respondeo eos in his immorari æquum est, qui nihil agere majus & utilius possunt. Legenda est omnino aurea Senecæ epistola 87. ad Lucilium.

§. VIII.

Novitati quoque dum æquo nimium studemus, fieri non potest ut in plurimos errores, & absurdas sententias non incidamus. Inde enim provenit, ut gloriæ ambitiosi ceteros contemnamus, & soli intellectui nostro nitamur. Hinc natæ sunt tot pueriles conjecturæ de rebus aut in tempore, aut in natura occultis: tot philosophorum systemata, in quibus præter ingenium nihil laudes: tot in Religione Christiana hæreses. Non ego autem is sum, qui Juvenes ab investigatione veritatis abstertere cupio: tantum modum & iudicium adhibendum præcipio; tantum moneo ut & ne nimium de viribus mentis nostræ desperantes, servum aliorum pecus evadamus; & ne, dum omnes alios contemnimus ut truncos, ineptias ipsi & absurda proferamus. Amor hic novitatis Anglos potissimum postremis hisce temporibus vix dici potest in quot absurda systemata coniecit:

§. IX.

Accedamus nunc ad defectum voluntatis cum amore nostri ipsorum conjunctum. Ad hominem eruditum efficiendum hæc potissimum requiruntur. I. Nativa quædam mentis perspicacitas. II. Vivax memoria.

III.

III. optimorum Magistrorum aut librorum copia. IV. & seria voluntas cum improbo studio conjuncta. Horum tamen omnium si priora tria sint mediocria, postremum vero perfectum, etsi sero tandem, at pervenimus tamen ad eruditionem & scientiam non certe parvam. Sed si priora tria vel egregia sint, ultimum vero deficiat, nemo unquam vel latum unguem in litteris proficiet. Seria ergo voluntas ad sapientiam comparandam omnino est necessaria. Apposite Horatius,

Qui cupit optatam cursu contingere metam.
Multa tulit, fecitque puer, sudavit & alsit,
Abstinit Venere & vino.

§. X.

PROvenit autem defectus voluntatis a pluribus causis. I. Ex voluptatibus corporeis, quibus distrahimur. II. Ex opinione imbecillitatis mentis nostræ, atque ex præjudicio, aut nos in quibusdam disciplinis proficere non posse aut nihil a nobis sciri posse. III. Ex timore amittendæ salutis. IV. Ex eo quod vi quadam cogimus iis operam dare, a quibus animus paullo abhorret: V. Ex superstitione quadam, qua putamus fas non esse quædam ad incudem revocare. VI. Ex nimia erga majores nostros reverentia. Sed perpendamus hæc accuratius.

§. XI.

VOLuptates corporeæ animum enervant, atque objecto voluptatis ita affigunt, ut ostracæ scopulis, inquit gravissime Plato. Ergo I. memoriam, sine qua nulla scientia comparari potest, auferunt. II. auferunt attentionem scientiæ conciliatricem. III. acumen retundunt, potissimum nimius usus veperis, & cibi. Legenda est Architæ Tarentini contra voluptates corporeas divina oratio (a).

§. XII.

EX imbecillitatis mentis nostræ opinione efficitur, ut animum despondeamus. Hæc opinio plurimum nocuit Peripateticis, uti observat Verulamius. Oportet enim ea etiam tentare, quæ majores nostri frustra

ten-

(a) *Apud Tull. de Senect.*

tentaverunt, dummodo non esse supra captum humanum, constet, & probabilis adsit spes inventionis. Quot enim detecta sunt majoribus ignota, aut frustra investigata? Huic autem vitio si addas nimiam erga majores reverentiam, aut animum scepticismo imbutum, efficies hominem, qui nihil minus studeat, quam sapere.

§. XIII.

Quidam alii sunt adeo delicatuli, ut putant vitæ spatio detrahi horas omnes, quæ meditationi, aut lectioni impendunt. Quæ opinio falsa est. Prostant enim in historia literaria exempla plurima hominum meditatione & lectione subactorum, qui tamen ad decrepitam usque Senectam pervenerunt, cujusmodi Plato, qui 81. annis natus legens mortuus est, S. Hieronymus, qui 91. Thomas Hobbesius, qui decrepitus, Nevvtonus, qui circa 85. vitæ annum, alique infiniti. Sic enim habeto, cibi, potius, Veneris, aliarumque rerum intemperantiam, non lectionem & meditationem homines occidere; dum ordinata sit: *nam alioquin studiorum quoque intemperantia est.*

§. XIV.

Plerique etiam sunt, qui studiorum genus non eligunt, sed ad illud majorum imperio adiguntur, ipsi plerumque inviti. Ex eo fit, ut quoniam nulla attentione genus illud studiorum persequuntur, nihil in eo proficiant, ineptique inde artium professores, erroresque plurimi proveniant. Peccant igitur hac in re majores nostri, qui quum indolem puerorum & adolescentium minime explorant; tum vero etiam eos invitos, ut plurimum, ad studia quædam impellunt. Legendus hac de re Quintilianus sub initium lib. 1.

§. XV.

His accedit superstitio. Quidam sunt qui putant nefas esse studiis quibusdam animum applicare, quod credant ea Religionem corrumpere: quasi vero studium sapientiæ religioni adversetur; aut quasi Religio sit falsa, adeo-

adeoque timeat sibi ab inquisitione veritatis. Hoc modo apud quosdam Europæ populos studia Metaphysicæ, Criticæ, Mathematicæ inculta jacuerunt: Qui Geometriam discabant Magi vocabantur. Alii vero in ea sunt opinione, non licere sententias semel receptas ad incudem revocare, Nec defuerunt apud nos, qui docerent, sententias veterum Patrum usque ad ultimum jota adorandas, non esse curandum de Ecclesiæ judicio, si constet aliquid dictum esse ab Augustino, & similia, quæ jure Ecclesia Romana, & doctiores Theologi gravissime damnarunt. Qui hac superstitione tenentur, nec veteres errores perspicere, nec in investigatione veri vel hilum proficere possunt. Sed de auctoritate majorum paullo post exactius.

§. XVI.

V Ideamus nunc quibus remediis his occursum ire possimus. Id ut fiat sequentes Canones memoriæ sunt infigendi.

Can. I. uQuæ constat supra captum humanum esse, ne investigato: Si non constat, animum quidem ne despondeto, sed si inutilia sunt, ut parum utilia, ne diu quærito, animumque a necessariis ne abstrahito.

II. Ea ne perquirito, quorum sciendorum media non comparasti, & ad quæ intelligenda probe prius non es initiatus.

III. Quæ non omnium capacitatem, sed tuam tantum superant, ne inquirito, priusquam opportunis studiis capacitatem & acumen necessarium comparaveris.

IV. Attentionem ad plura ne dividito; minor fit enim divisa, & nihilo apta.

V. Studia ordinato. Ea præcedant, quæ aliis lumen præferunt.

VI. Ne perfunctorie de rebus difficilibus meditator: ne credito ex compendiis disciplinarum animum fieri satis profundum. Libros legito qualibet in re optimos quidem, sed exactos, & profundos.

VII. Quoniam vita brevis est, scientiam comparato necessariam & utilem tibi, atque societati. Curiosa &

vapa

vana aut nunquam, aut e limine tantum salutato, non ut in illis aliquid boni inesse putes, sed ut quam nihil boni contineant agnoscas.

VIII. Novitatis nec nihil, nec multum amans esto. Primum enim facit paullo stupidiorem (a): alterum arrogantiorum (b). Omni in re sensum communem consulito; tibi soli ne fidito.

IX. Ex animo veritatis studio incumbito sciens nihil sine improbo labore fieri posse in literaria Rep.

X. Philosophus voluptates ne nimium sectator: Vix enim reperire est hominem vere doctum, simul autem & mollem.

XI. Nihil aggreditor invita minerva. Studia eligito indoli & corpori accommodata.

XII. Superstitionem, si qua est, exuito: Eclecticorum libertate philosophator. Ne quid nimis, nisi veritatem, amato.

C A P. IV.

De erroribus, qui ex affectibus nascuntur.

§. I.

Superest ut tertiam errandi causam, ex iis quæ in animo sunt, persequamur, nempe affectus: Sunt affectus ignorantia simul & errorum causæ. Nam qui affectu subagitur, animum investigationi veritatis serio admoveere non potest: deinde ea pro veris & probabili-

(a) Hinc Philosophia Scholastica ne latum quidem unguem profecit, quod, quoniam in ea erant Scholastici Philosophi opinione, nihil addi Aristoteli, generis illi humanigenio, posse, nihil melius excogitari; nihil novi unquam conati sunt: nempe religio erat vel hilum ab Aristotele discedere. Quasi novare in philosophia perinde esset atque in Religione.

(b) Quod hoc esset neglectam, magna illa plurium recentiorum emerfit temeritas, hypotheses pro statis naturæ vulgare, & confidenter de incertis judicare: Legatur Malebranch. lib. 2. de inq. verit.

babilibus habet, non quæ ratio, sed quæ affectus suaserit. Nempe affectus & attentionem avertunt, & acumen retundunt. Hinc Plato eos appellat, nebulas, quibus serena mentis regio opacatur: Plutarchus vitra colore perfusa, quibus rerum aliarum colores immutantur.

§. II.

UT autem intelligatur clarius, quid in animo efficiant affectus, eorum natura paullo accuratius explicanda est. Tria sunt potissimum in affectibus consideranda. 1. variae perceptiones boni vel mali 2. variae commotiones corporis; præcipue sanguinis, & nervulorum. 3. voluptas, dolor, & inquietitudo quædam. Ex his secundum tantum affectus nomine vocatur: nam primum causa secundi est, seu affectus: ut tertium est effectus secundi. Non omnis autem perceptio affectus in nobis gignit, sed tantum perceptio boni vel mali. Perceptio boni præsentis lætitiâ, absentis desiderium, amorem, spem, alacritatem, audaciam, aliosque. Perceptio vero mali præsentis dolorem, iram, odium: absentis timorem, desperationem, & huiusmodi alios de quibus in Ethicæ Elementis disputamus. Porro Bonum, quod desideratur vel corpus spectat, vel animum, vel famam, vel divitias. Primum desiderium facit voluptuosos & brutos: alterum efficit virtuosos & philosophos: tertium efficit ambitiosos: quartum avaros.

§. III.

Omnes ferme affectus duo maxime, mala, ut diximus §. 1., philosopho afferunt; 1. attentionem & voluntatem avertunt: 2. ideas & iudicia corrumunt. Itaque qui aut nimia & gestiente lætitiâ, amore, desiderio, spe, ambitione; aut gravi dolore, mœstitiâ, timore, desperatione, ira, odio laborat, animum nullis studiis advertere potest: cuius ratio ea est, quod mens nostra semper a vehementioribus impressionibus impellitur; nam semper vehementiores impressiones & sensationes intensiorem dolorem, inquietudinem, aut voluptatem gene-

generant : & mens quemadmodum a voluptate, vel dolore, vel inquietudine, semper determinatur, ita semper a maiore inquietudine, vel voluptate, vel dolore, magis impellitur. Vix autem reperias hominem, in quo amor sapientiæ vividior impressionem faciat, quam affectus ipsi.

§. IV.

Sunt tamen affectus quidam qui attentionem, voluntatem, & alacritatem studiorum augent, veluti 1. amor & ambitio honoris. 2. Spes præmii. 3. Invidentia. 4. dolor ex contemptu; atque indignatio. Quod spectat ad primum, & secundum, id probatur evidentissimis experimentis, quibus constat tunc maxime artes omnes & scientias splenduisse, quum literati homines in honore habiti sunt, & præmiis ornati; veluti in Græcia Reipublicæ tempore, quum Philosophi & Oratores & magni æstimarentur, & ad summa Reip. munera everherentur: Romæ ante Cæsarem dictatorem Oratores: Augusti, & Mecenate tempore Poetæ, quod eo tempore Oratores summo in pretio haberentur, & ad Reipublicæ majores dignitates promoverentur; hoc vero Poetæ intimi essent Augusti familiæ, & divis propiores, inquit Horatius: in Galliis sub Ludovico XIV. literati ferme omnes, quos ille vel invitos ad præmia adigebat. Præterea eæ disciplinæ magis coli videntur & augeri, quæ magis in pretio habentur, cujusmodi Mathematicæ apud Anglos: Jurisprudentia apud Neapolitanos: illis enim Mathematicæ ad navigationem, istis ad Forum jurisprudentia prodest plurimum. E contrario quum disciplinæ nullo sunt in pretio, & literati homines despicuntur, artes & scientiæ omnes jacent. Egregie igitur Cicero, *honor olit artes*. Præterea plures invidentia, contemptus, indignatio, ira ad egregia molienda adegit, dum Superiorem non tolerarent. Violentissimi enim sunt affectus invidentia, indignatio cum contemptu conjuncta, & ira. Et ira quidem præclare ingenii eos dicta est veteribus. Quidam etiam sunt, qui amorem platonicum, ut vocant, his addunt. Nec negandum est

est affectum hunc, dum nihil fordidi admistum habet, alacriorem animum reddere, & dociliorem: alioquin si ab ea puritate degenerat, hebetat & obtundit. Sed amor hic cum tota Platonis Republica in Adæ fece nec fuit unquam, nec futurus est.

§. V.

JAm vero affectus ideas & judicia corrumpunt: nempe res nobis aliter atque sunt, ostendunt. Id quod aliquot exemplis demonstrabimus. I. ex lætitia gestiēte. II. ex amore & odio. III. ex desiderio. IV. ex spe. V. ex ambitione. VI. ex avaritia. VII. ex timore. VIII. ex ira. IX. ex suspitione. Primum lætitia gestiēns quum animum occupavit, res omnes vel gravissimas, leves, vel turpissimas, indifferentes ostendit. Animus enim hoc affectu plenus nulli rei serio advertere potest: omnes præterit, tanquam nullius momenti: & paulatim a voluptate ad errores & scelera rapitur. Non alio certe modo crimina gravissima admittuntur. Itaque viri sanctissimi quum incauti hanc lætitiā, & voluptatem animo exceperant, in deridicula & nefanda delapsi sunt, qualis Eva, David, Salomon, aliique, quos ipsa sacra memorat historia. Clarum est quod de Alexandro paulo hilariore refert Curtius, eum nempe ut Meretrici morem gereret, jussisse, ut Persepolis combureretur: at, quod in his evenire solet, fera eum pœnitentia cepit.

§. VI.

AMor vero & odium mirum in modum rerum ideas pervertunt: ille quidem ampliores efficiens; hoc minores: ille amatæ rei deformitates & vitia tanquam pulchritudinem & virtutes exhibens: hoc pulchritudinem & virtutes referens velut dehonestamenta, & vitia. Est ad manus egregium Plauti exemplum. Agorastocles adolescens deperit Adelphasium virginem meretricem. Milphio servus eandem odit. Uterque de illa non certe sanum judicium pronunciat: quippe uterque corruptus Judex. Agorastocles;

Dii immortales omnipotentes ! Quid est apud vos pulchrius ?

Quid habetis , qui magis immortales vos credam esse quam ego sim ,

Qui hæc tanta oculis bona concipio ? Nam Venus non est Venus &c.

Quid Milphio ?

Propudium ! Quasi bella sit ! Quasi campse Reges ducitent !

En monstrum mulieris ! tantilla tanta verba fundit !

Quojus ego nebulae cyathos septem noctes non emam. (a)

Duo isti affectus , & partium studia historias ferme omnes corruperunt olim , & nunc corrumpunt : vix enim reperias historicum , qui *incorruptam fidem professus* , eam solvat , & *nec amore quemquam* , & *sine odio scribat* , quod in historico exigit Tacitus (b).

Nec in vita tantum morali , atque civili , sed & in litteraria ita errare passim homines solent . Litterarum studiosi unam præ reliquis habent in deliciis disciplinam . Familiari consuetudine ita illius colore animum imbuunt , ut I. nihil eis sapiat , quod illam non redolet : II. quæcunque concipiunt , ejus colore inficiant . III. Si quid in illa novi moliuntur , tam esse putent antiquum , quam est mundus (c) . Leibnitius ita erat Algebrae studiis mancipatus , ut , quemadmodum retulit Vvolsius , ipsam Grammaticam Algebraicis calculis explicare cogitaverit . Nevvtoni vox fuit , probari a se ex omnibus Christianorum sectis *Socinianam* , quod Geometricum in morem consideret illam , fidiis placet , demonstrare . Geometram non ineptum dicentem audiui , nulli alii disciplinæ oportere hominibus operam dare , præterquam mathematicis . Indignus Philosopho sententia . Non enim id de Ethicis saltem dicitur , quæ hominum vitam atque beatitudinem continent . Jam vero Antiquarii & Polyglotti adunco suspendunt naso quidquid barbaris notis non est varie-

(a) *Plaut. in Pænulo Act. 1. scen. 2.*

(b) *Lib. 1. hist. cap. 1.*

(c) *Legatur Vicus nostræ Scientiæ novæ , Dignitæ III.*

variegatum aut ex Pyrrhæ Seculo minime repetitum .
Nec semel quempiam dictare audiui, homini studioso
cetera negligenda esse, unum *Linguarum & Antiquita-*
rum studium per totam vitam persequendum. Quod is
& facit, qui

..... nisi quæ terris semota, suisque

Temporibus defuncta videt, fastidit & odit,

Miraturque nihil, nisi quod Libitina sacrauit.

At Metaphysico sordescunt, quæcumque mundum in-
telligibilem, an intelligibilem? non crepant. Dici ne-
quit quot sint hanc ob causam de gerris germanis scripti
libri, quantaque animorum contentione pugnatum (a).

§. VII.

Idem faciunt desiderium, & spes, nempe in causa
sunt ut facile pro re desiderata aut sperata accipiamus
vel quamlibet similem, vel phantasmata nostra. Vetus
enim proverbium est, *quod volumus facile credimus; ut*
tarde, quæ credita ledunt, credimus. Exemplum illu-
stre habemus in Judæorum natione. Hæc Messiam vehe-
menti desiderio expectat. Hoc desiderium impostores
Rabbini vehementissimum faciunt. Sed persuasio istæ
publica plures viros astutos edegit, ut se Messiam face-
rent: quod quum fecissent, majori nationis parti facile
persuaserunt. Celebris fuit Barchocheba ille paullo post
Apostolorum tempora. Sed omnes superavit Sabbatai
Sevi Smyrneus, qui nondum ducenti sunt anni, plu-
quam ducenta millia judæorum Asiæ, Africæ, Europæ
ad se commovit; ita ut Judæi Batavi res suas venderent,
ut in Asiam ad hunc Messiam trajicerent (b). Eadem
causa effecit, ut quandoque impostores regnarint, quod,
ut vetera mittam, contingit nuper in Moscovia, quum
plures Pseudodemetrii apparuerunt. An non eadem est
causa cur levissimæ fœmellæ tam sæpe cum Deo, Ange-
lis, Manibus, tamque diuturna, ut referunt, ferunt col-
loquia? Nam desiderium vires phantasie, qua fœminæ,
& rustici pollent, ad furorem usque adaugere potest.

D 2

Ex

(a) Legatur Charletaneria Eruditorum Menckenii.

(b) Argens lettres Jud. let. 249.

§. VIII.

EX ambitione & avaritia eodem modo rerum notiones & judicia depravantur. Videre est ambitiosos miserum in modum deludificari ab Ariolis, & Astrologis judiciariis, quod hominum genus *potentibus insidum, sperantibus fallax* vocat præclare Tacitus. Viri alioquin prudentes, nec indocti, sed ambitiosi tamen honoris & dignitatum; divinationes has sibi persuaferunt veras, & se deridiculos fecerunt. Avari autem quam turpiter ab impostoribus Magis & Chemicis deluduntur, dum Persifcos montes sperant? Dum thesauros, & lapidem *philosophicum* exquirunt? Quibus si gravissimum illud Ennii inclames,

Qui aliis monstrant viam, sibi semitam non sapiunt, non audiunt: affectus enim, gravissimus orator, dicit contra. Hinc facile creditæ fabelæ de clavo partim aureo partim ferreo, de vi herbarum aurifica, de Mercurii metamorphosi; & aliæ.

§. IX.

JAm nullus affectus hominibus magis illudit quam timor: Res enim omnes refert diversas,

Et Solem Geminum, & duplices se ostendere Thebas: Potissimum autem efficit timor, ut aut impune quædam fingantur, aut facile credantur, quemadmodum Tullio observatum est (a) Sanguinem pluuisse, inquit, Senatui renunciatum est, atratum fluvium fluxisse sanguine, Deorum sudasse simulacra Atque hæc in bello plura & majora videntur TIMENTIBUS; Eadem non tam animadvertuntur in pace. Accedit illud etiam, quod in metu & periculo quæ creduntur facilius, tum finguntur impunius. Tota veterum Gentilium superstitio ex timore quoque, cui comes aderat naturæ ignorantia, & perpetua admiratio, magna ex parte originem habuit: Hinc vetus illud, adorari se Deos bonos ut prodescent, malos, ne nocerent: & primus in Orbe Deos fecit timor. Timori quoque pro maxima

(a) Lib. 2. de divin.

xima parte debentur narrationes Spectrorum, aut Lemurum. Eadem causa Vulgo persuasit Cometas portendere aliquid mali, idque tam pertinaciter, ut, qui dedocere velit, periculum sit subiturus increduli.

Invisibilem & incomprehensibilem quoque timor opinionem fecit vulgarem de *magia nigra*, seu de evocandorum Dæmonum arte, de Strigibus, Lamiis, maleficiorum scientia, quæ tam veræ Religioni, quam rectæ rationi e diametro adversatur: nam etsi Dæmones hominibus illudere & nocere, quocunque tandem modo, possunt; nulla tamen ars, nulla disciplina esse potest, qua homines eos evocare, sibi que mancipare possint. Interim nemo est, qui publicam hanc persuasionem evellere queat ex vulgi animis. Scheinerus vir Philosophus & doctus quum per Belgas iter haberet, in ignoto extinctus est oppidulo. Evolutis ejus Sarcinulis, inventum est microscopium, occluso ad lentem pulice. Is trans lentem horrendam præseferbat Speciem. Forte fortuna eo introspexit quispiam. Is conspicato pulice, exhorruit, exclamavitque dæmoniacum fuisse Scheinerum. Quod quum ceteri comprobassent, pedes stantes in uno, ut ne sepeliretur edixere Sacerdotes. Interea audacissimus nescio quis eorum, qui aderant, microscopium aperuit. Ah, inquit, pulex est, Oho! inquit (a).

§. X.

IRa præcipitati judicii, atque plurimorum inde nascentium malorum causa est. Hæc bona apparentia pro veris continue hominibus propinat; & vera mala, quæ tamen quod affectui adulentur, bona putantur, eligere impellit. Lectu digni sunt Senecæ libri de ira ad Novatum scripti. Eorum in primo cap. i. sic egregie iram describit. *Quidam itaque e sapientibus viris iram dixerunt brevem insaniam: æque enim impotens sui est, decoris oblita, necessitudinum immemor, in quod cæpit pertinax & intentata, rationi consiliisque præclusa, vanis agitata causis, ad dispectum æqui, verique inhabilis, ruinis simillima,*

D 3

quæ

(a) Refert Volfus in optica.

quæ super id, quod oppressere, franguntur. Suspicio autem efficit, ut nosea, de quibus suspicamur, extra nos videre credamus: inficit enim colore suo objecta ferme omnia, quæ in suspicionem veniunt. Egregius est hac in re Plauti locus in *Aulularia*. Inducit senem avarum Euclyonem, qui domi suæ thesaurum invenerat, omnes timentem, ne detossas opes sibi raperent. Hæc suspicio in causa est, uti in aliis ea observet, quæ ante non observaverat, aut ea saltem sibi videre videatur, quæ nullibi sunt. Sed audiamus ipsum Senem, ne impendio longius evagemur (a).

*Nam nunc quum celo sedulo omnes, ne sciant,
Omnes videntur scrire, & me benignius
Omnes salutant, quam salutabant prius:
Adcunt, consistunt, copulantur dexteras,
Rogitant me ut valeam, quid agam, quid rerum geram.*

Quot ea suspicio in Republica humana. Tragædias excitavit? plenæ sunt exemplorum historiarum.

Eadem dici & plura possunt de suspicionibus amantium, quas zelotypiam Græci appellant. In quas enim absurdas opiniones, atque deridiculas actiones affectus hic homines non præcipitat? est enim & ipse insaniam genus.

§. XI.

Pater ex superioribus, homines ita ab affectibus deludi, ut plura multo judicent odio, aut amore, aut cupiditate, aut iracundia, aut dolore, aut letitia, aut spe, aut timore, aut alia peremotione mentis; quam veritate, quemadmodum perspecte observat Tullius (b). Philosophi hac in re præscribunt, ne ulla de re iudicium feratur, quum animus affectu subagitur. Sed id est canere Surdis: affectibus enim quasi ad iudicia inviti rapimur. Duo igitur sunt monenda.

I. Operam dato, ne affectibus animus occupetur, neve proclivis ad affectus concipiendos evadat.

. animum rege, qui nisi paret

Im-

(a) *Æt.* 1. *Scen.* 2.

(b) *Lib.* 2. *de Oratore cap.* 42.

Imperat: hunc frænis, hunc tu campesce catena (a): ob id, principiis obstat: nam sero medicina paratur, Quum mala per longas invaluerè moras.

Scito, non possè te simul litteris & affectibus indulgere.

II. Quæ judicasti, dum affectu agitareris, sereniorè mente ad incudem revocato: quæ scripsisti nonum saltem in annum premito: pluries relegito, atque considerato.

C A P. V.

De erroribus, qui ex corpore originem ducunt.

§. I.

Magna ignorantia & errorum nostrorum causa haud dubium est corpus nostrum. Non quod animæ corporibus, veluti tenebricosis carceribus, inclusæ, & pristinum sapientiæ lumem amiserunt, & ineptæ ad cogitandum Evaferunt, ut Platonici fabulantur: Sed quum aliis, tum tribus potissimum de causis. I. Pigritia & pondere quodam corporis naturali. II. Temperamento. III. Sensuum aut paucitate, aut imperfectiōne. Et primum quidem, est quædam corporis gravitas, pigritia, ignavia, eaque naturalis. Nempe corpus natura sua iners est, & laboris impatiens: Lassatur etiam, & consumitur vel exiguo labore. Hinc fit, ut quum mens nititur in egregia quædam, corpus eam remoretur, saltem usquequo habitus ad laborem non est contractus. Videmus pueros & adolescentes lectionem, meditationem, & laborem ferme omnem averfari, aut magna cum ignavia suscipere, & lente sub initium prosequi. Videmus etiam majorem hominum partem gaudere compendiolis disciplinarum, quæ laborem discendi imminuunt, & magnam brevi eruditionem pollicentur. Ex hoc provenit, I. ut pauca discamus. II. ut paullo difficiliora scitu prætereamus. III. ut superficie scientiarum contenti simus. IV. ut ideis magna ex parte obscuris, confusis, & inadæquatis hæreamus. V. ut tandem præjudicia & errores non animadvertamus.

§. II.

Temperies quoque corporis, aut ignorantiae nostrae, aut errorum ubertissima causa est. Corporis temperamenta alia sunt simplicia, alia mista, ut filii medicorum docent. Simplicia sunt quatuor. I. Flegmaticum, crassum, tardum. II. Sanguineum & hilare. III. Cholericum. IV. Melancholicum seu tetrum. Mista vero vel ex horum duobus, vel ex pluribus plurima. Qui temperamento sunt flegmatico, licet memoria valent, ingenio tamen & acumine nihil, judicio parum. Sanguinei ingeniosi sunt, sed inconstantes, *Vertumnis, quotquot sunt, inquinati*, laboris impatientes; judicio quoque carent: aut natant, modo recta capeffentes, *interdum pravis obnoxia*. Cholerici & ingeniosi sunt, & acris atque solidi judicii, & laboris patientes. Melancholici sunt Mente confusi, & nunquam sibi æquales: rebus magnis & obscuris admodum delectantur. Mistorum vero temperamentorum ad mentem quod attinet, qualitates sunt variae: semper tamen dominantis temperamenti qualitas prævalet. Qui cupit his de rebus plenius edoceri adeat Scipionis Claramontii viri doctissimi Semioticæ libros decem. Proveniunt autem hæc temperamenta a corporis structura, præcipue cerebri; a sanguinis agitatione; a natura fibrarum, nervulorumque. Causas vero temperamentorum externas ad cibum, & aerem refert Malebranchius (a). Quocirca vitandi sunt *Philosopho* ii cibi, eaque climata, unde crassior sanguis, tardiorque motus machinæ vitalis evadere potest. Apud ipsos veteres notata quædam climata. Hinc illud Tullii, *Athenis tenue Cælum, ex quo etiam acutiores putantur Aëlici*. Crassum Thebis (b).

§. III.

(a) *Maleb. de Inquir. verit. lib. 2. legatur totus. Consultatur & vir clarissimus Antonius Muratorius in Philosophia Morali.*

(b) *Cicero de Fato. Crassities Bestiorum notata Horatio, Abderitarum Martiali.*

§. III.

QUin temperies hæc corporis in animum influat, sitque plerumque ignorantia & errorum causa, dubitari non potest. Ex hac enim temperie pendere ingenium, acumen, phantasiam, tarditatem, confusionem, inconstantiam, apertum est. Videmus pueros, & feminas, quum magna ex parte temperamento sint sanguineo, ludis delectari, laboris esse impatientes, esse somnolentos & pigros, nec multum iudicio valere. Videmus Flegmaticos tardos esse, & crudis lateribus similiores, infelicitate conari ad scientias paullo sublimiores, homines esse unius syllogismi. Melancholicos vero experimur Fanatismo omnes addictos, & nihil crepare nisi mundos ceteris ignotos, lumen, quod mortalium nulli conspicitur, imagines magnas & miras, sed tetras. E contrario Cholerici meditabundi sunt, iudicii acris & solidi. Itaque ut Sanguinei iudicium præcipitant, & rerum cortice contenti sunt; & Melancholici confusis & obscuris notionibus, modo aliquid magni præseferunt, hærent; ita Flegmatici incerti semper ferme sunt, & dubii.

§. IV.

Sed commodum est, ut de phantasia aliqua dicamus: Quid possit in mentem humanam phantasia nemo accuratius Malebranchio explicuit: ea enim de re toto secundo disputat libro, eorum qui sunt *de inquirenda veritate* perscripti. Eum librum plurimi facio, & ut pluries legatur ab amatoribus VERITATIS autor sum. Nam aut ex eo, aut ex nullo alio, plene disci potest, qua ratione in nobis variarum rerum perceptiones variæ, imaginationes, memoria, reminiscencia, perceptionum & motionum corporis harmonia, fiant. Quod ad rem nostram pertinet, hæc Philosopho errores phantasie evadere cupienti, sunt observanda.

I. Ea est inter mentem & corpus unio, ut excitatis in organis sensoriiis, corde, & cerebro motionibus, respondeant in mente perceptiones.

II. Non alia ratione *sensationes ab imaginationibus* distinctæ.

stinguimus, nisi quod illæ vividiores sint & clariores, minus istæ vividæ, minusque claræ.

III. Si *imaginatio* aliqua tam sit vivida & clara, ut sensationis vivacitatem & claritatem exæquat, habetur pro sensatione.

IV. Imaginationum vivacitas & claritas pendet a sanguine calidiore & copiosiore, & a robusta cerebri temperie. Itaque quo natura humana est robustior & calidior, eo phantasia est vividior & fortior. Hinc videmus populos agrestiores & rudiores, fœmellas, pueros vividissima esse phantasia.

V. Quo Cerebri structura est robustior, & sanguis copiosior & calidior, eo facilius vividissima phantasmata inueniuntur, & quidem per longius tempus.

VI. Si naturæ phantasticæ addatur simplicitas & ignorantia, phantasmata facillime pro sensationibus habebuntur. Nam quum sint vivacitate sensationibus æqualia (3), vix distinguuntur: & simplicitas & ignorantia præpediunt in eorum veritatem inquirere. Hinc passim legimus homines agrestes, quales sunt detecti in America, & Laponia, jactitare continuos cum mortuis, aut Dæmonibus Congressus. Experimur etiam nostras fœmellas perpetuo prædicare divinas revelationes. Quid? viri ipsi litteris illuminati plerunque hærent. Morbum patior decem ab hinc annis, quem *incubum* vocant Medici. Quum eo laboro (laboro autem sæpissime, & semisomnus) loca, amicos, bruta me coram tam clare & distincte transire video, ut experrectus plerunque diu immotus persisto & dubius, sensationes ne fuerint, an imaginationes.

VII. Ergo *Philosophus* per quam diligentissime caveat, ne aut suas, aut aliorum *imaginationes* pro *sensationibus* habeat, neu sit aut ipse phantasticus, aut phantasticis nimis credulus.

VIII. Jam vero quum ab infantia assueti simus cuncta ope *sensationum*, & *imaginationum* percipere (nam intellectuum purarum ulus sero in nobis provenit, & non nisi quum in sublimibus disciplinis plurimum versati fuerimus), caveat *Philosophus* ne phantasia in rebus incor-

incorporeis intelligendis abutatur. Errores enim omnes circa res incorporeas admissi huic potissimum causæ debent originem, quod *quæ intelligi debebant conati sint homines imaginari*, ut præclare observatum est beato Augustino.

§. V.

Temperiei addi possunt corporis morbi & necessitates, quibus partim a meditatione & studio distinemur; partim ingenium, solertiam, memoriam deperdimus. Vita enim animalis majorem a nobis exigit curam, quam animi vita. Quumque ætas nostra, qua vivimus, vix pertingat ad 80. annos, peream si ex his decem solidi anni in studium sapientiæ impendantur, idest tres solidæ quotidie horæ, nullo unquam die excepto. Quæ quum sint, quid mirum est, nos omnes esse ignorantissimos, omnesque infinitis erroribus volutari?

§. VI.

Restant sensus, quo vocabulo intelligimus *aures*; *oculos*, *nares*, *os*, *tactum*. Quin sensus sint necessarii ad scientiam rerum externarum comparandam, extra omne dubium est: earum enim rerum ideæ non alia certa via a nobis comparantur. Audiendos non putamus, qui sensus non ad usum *scientiæ*, sed *vitiæ* datos nobis docent. Quanquam an parva Scientia est scire vivere? Sed evenit tamen ut ignorantia, & errorum nostrorum ubertissimæ sint causæ; & id quidem plures ob rationes. I. Ob voluptatem, qua omnes perquam vividissime afficiuntur. II. Ob paucitatem. III. Ob imperfectionem. Et primum voluptates, quæ afficiunt sensus, præcipue *aures*, *gustum*, & *tactum*, omnium sunt vividissimæ: eam ob rem animum totum occupant, itaut nulli alteri rei serio incumbere possit: ita enim a natura comparati sumus, ut mens nostra vividiori semper pareat corporis motioni (a): Sic occupatus & delinitus animus, aut investigationi veritatis aptus non est: aut pronus in judicia, quæ voluptatibus illis adulantur. Hinc illud.

Lan-

(a) Vide Volfium in *Psychologia Empyrica*.

Laudibus arguitur vini vinosus Homerus. Indi prove-
nit, ut homines sensuum voluptatibus mancipati in A-
theismum ut plurimum incidant: cupiunt enim hujus-
modi, bruta potius dixerim, quam homines, ut ne esset
Deus malorum vindex, uti docet David (a). Videre est
poetas potissimum, dum vino indulgent, & amoribus,
impiis se, aut alios adhortari incitamentis. Anacreon ode
ἀνέκοντον sic ad bibendum se animat

Τροχός ἄρματος γὰρ οἷα
Βιοτοῖς τρέχει Κυλιδῆς,
Ολίγη δὲ Κισσομεδα
Κόμι, ὅσων λυδέντων
Nota nam velut curulis
Properat volucris ætas,
Tenuis jacebimusque
Cinis, ossibus dissolutis.

Quod Flaccus (b) imitatur ad Sextium scribens
Vitæ summa brevis spem vetat inchoare longam.
Jam te premet nox fabulæque manes,
Et domus exilis Plutonia

§. VII.

Sensuum paucitas caussa est, & cur plurima ignore-
mus, & cur putemus falsa opinione, nulla alia esse ex-
tra nos objecta in hac rerum universitate, quam quæ quin-
que illis sensibus percipimus. Sane quis sibi persuadere
potest in tanta rerum universitate nulla esse alia objecta,
nisi quæ auribus, oculis, tactu, gustu, odoratu percipi-
mus, qui secum reputet Dei sapientiam, non minus at-
que ejus potentiam esse infinitam? Mihi potius persua-
sum est, in tot Planetis, & Stellis fixis, in tanta aeris &
pene infinita extensione, esse objecta quum viventia,
tum etiam vita destituta, numero infinita, genere &
natura varia, quorum idcirco nullas habemus notiones,
quod nec sub sensus nostros cadunt, nec cum iis,
quæ sub sensus cadunt, connexionem ullam habent
necessariam. Veteris plurimi philosophi, in primis
Chal-

(a) Psalm. xlii. v. 1. & seqq. & xxxv. v. 1.

(b) Ode 4. lib. 1.

Chaldæi (a) hanc aeris immensitatem infinito animantium ratione & libertate utentium numero plenam esse conjiciebant, id quod probatum est & Græcis, Latinisque, & non abhorret a Revelatione, quæ Angelorum & Dæmonum infinitum pene numerum esse docet. Quanta ergo ignoramus, palustria & inertia animantia? Dicere vero hæc nullibi esse, aut rebus nostris similia esse, non minus temerarium est, atque quod cæci dicere solent, aut colores nullibi esse, aut sonis esse persimiles.

§. VIII.

AD imperfectionem sensuum, quod attinet, nemo eam accuratius Malebranchio explicuit. Hanc enim per singulos sensus eundo diligentissime aperit. Ejus igitur ratiocinium paucis pro Elementorum angustiis exponemus. Initium facit ab oculis, qui sensuum præcipuus videntur. Ab iis decipimur plurimis modis: I. quod credamus res extra nos videre, quum in imaginibus intra nos depictis videamus. Nempe ex quolibet corpore reflectuntur undequaque in modum sphaeræ luminis radii, qui per corneam & humores oculi transeuntes, in oculi fundo ejus imaginem depingunt. Quocirca nos non res ipsas, sed rerum imagines videmus.

§. IX.

Secundo decipiunt nos circa objectorum magnitudinem & figuras. Nempe scimus istis rerum externarum imaginibus non exhiberi veram magnitudinem corporum. Nam si Microscopio granulum arenæ intueamur, videbimus illud milleplum, quam nunc oculis videmus (b). Idem efficiunt optima Telescopia cum rebus distantibus. Sunt autem oculi respectu animæ, quod sunt Microscopium & Telescopium respectu oculorum. Præterea res externas majores, vel minores videmus,

prout

(a) Vide Stanlegum p. XIII. hist. phil. & Rabb. Abraham Coher irira in pneumatika Kabbalistica dissert. I. cap. 5.

(b) Demonstrat Vvoisius in Elementis Dioptricæ, construi posse microscopia, quæ augeant objecta magnitudine quatuor millionum.

prout viciniore nobis, aut distantiores a nobis fuerint ; nam viciniore sub majori angulo majores, distantiores sub minori angulo minores apparent. Ex quo etiam fit, ut veras corporum figuras ignoremus. Hinc granula arene sine Microscopio rotunda, aut prope rotunda videntur ; Microscopio autem variarum & irregularium figurarum (a).

§. X.

Tertio circa motum. Plerumque, si oculis credimus, quæ moventur putamus stare, moveri vero, quæ stant. Quum navi velociter & æquabiliter motæ insideo, *terra urbefque recedere* mihi videntur, navis vero, cui insideo, quiescere. Hunc errorem adhibita in consilium ratione, aut aliorum sensuum experimentis, facile agnoscimus, quod nempe & navis parvum corpus est, cujus terminos videmus, & in navi nec nati, nec educati sumus. At si Tellus nostra moveretur (quod opinantur Astronomi) in qua nati & educati sumus, & cujus extremos fines non intuemur, nullo certe consilio ejus motum deprehendere ope sensuum possemus. Dum nubes magno impetu feruntur Luna sublustri, putamus Lunam magno impetu ferri, nubes vero stare. Si nubes ex Occidenti in Orientem ferantur, nos velocissime ex Oriente in Occidentem, nubes aut stare, aut in Occidentem nobiscum moveri videbimus. Ad hæc, absolutam corporum velocitatem ignoramus : velocitates enim ex relatione metiri solemus. Nunc nec distantias absolutas scimus, nec tempus absolutum ; quæ, ut absoluta motus velocitas cognoscatur, cognitu necessaria sunt, ut demonstrant Physici.

§. XI.

(a) *Microscopiis & Telescopiis puncta radiantia realia in apparentia commutantur : idcirco enim objecta videntur & viciniore, & sub angulo majori. Demonstratum jam id ab Opticis. Idem evenire in oculis necesse est. Hinc vero fit, quod nos ipsa corpora non cernimus.*

§. XI.

Quarto, quum oculi decipiant nos circa extensionem, sequitur & decipere circa distantias. Hinc si A. B. C. sint paullo distantiora; etiam si non æque distantia, tamen tanquam æque distantia aspicio. Luna e. g. distat a nobis in distantia media trecentis triginta tribus millibus, milliariis Italicis circiter: Sol vero in media distantia, secundum quosdam, nonaginta millionibus circiter. Interim, si anticipata judicia seponamus, oculis Sol & Luna æque distare videbuntur. Sic Stellæ licet non omnes æque distent a nobis, tamen æque distantes apparent.

§. XII.

Quinto, oculi nos decipiunt circa colores, quos esse qualitates reales corporibus inhærentes referunt; quum nihil aliud sint, quam sensationes nostræ a variis *refractionibus & reflexionibus* materiæ luminosæ ex corporum superficiebus provenientes. Itaque extra nos nec lumen proprie, nec colores sunt; sed tantum vires quædam quibus ita afficimur, ut lumen & colores percipiamus.

§. XIII.

Accedamus ad tactum, qui omnium sensuum latissimus est; quippe qui totum occupat corpus. Tactu percipimus. I. *Soliditatem*. II. *gravitatem*. III. *duritiem*, *lenitatem*, & *fluiditatem*. IV. *extensionem*. V. *figuram*. VI. *motum* & *divisionem*. VII. *frigus* & *calorem*. VIII. *dolorem* & *voluptatem*. In omnibus his mirum in modum sensus iste decipere nos potest. Et primum quidem circa soliditatem corporum. Est soliditas ea vis, qua corpora sibi mutuo resistunt, ut ne eundem occupent locum. Eam non alia ratione percipimus, nisi quia continuo corpori nostro corpora externa resistere sentimus. Percipimus ergo soliditatem ex impenetrabilitate. Itaque si videremus corpora per alia corpora libere penetrare, aut per corpus nostrum libere transire sine sen-

sensibili resistantia, hæc solida non haberemus. Hinc provenit idea vacui, seu extensi non solidi: paulatim nempe corpora fluida extenuamus, usque dum putamus omnem amittere resistantiam: Ex hac vero idea, opinio de vacuo immenso. Præterea quoniam ex impenetrabilitate soliditas cognoscitur; soliditas percipitur tanquam vis resistens. Jam quum vires resistendi non in omnibus corporibus esse æquales videamus: inde alteram opinionem quidam ducunt, vim soliditatis non esse infinitam, adeoque posse corpora ea vi spoliari, itaut se compenetrent.

§. XIV.

Idem dicendum est de gravitate. Corporum absolutam gravitatem ignoramus. Eam ex relatione ad tactum nostrum definire solemus. Utimur etiam oculis, atque ex mutua relatione corporum inter sese, de eorum gravitate judicamus. Sed quum aer sit corpus, suamque habeat gravitatem, is certe corporibus decidentibus, aut appensis, resistit: ex quo fit ne absolutam eorum gravitatem nullo modo percipere possimus. Ergo de corporum gravitate ex tactu judicare periculosum: præcipue quum ex relatione ad vires nostras corpora magis, aut minus gravia dicere soleamus. Idem enim corpus dum ægroto, grave; dum valeo, leve mihi videtur. Vestes quæ in frigore, flante borea, sentiuntur leves; flante austro, aere paullo calidiore, & minus gravitante, gravissimæ habentur.

§. XV.

Periculosum quoque est de *duritie*, *lenitate*, & *fluiditate* corporum ex tactu judicia ferre. Nam quum *durities*, *fluiditas*, *mollitudo*, *lenitas* non sint qualitates corporum reales, sed tantum eorum *potentiarum* effectus in tactu nostro excitatæ; fieri nequit, quin de talibus potentiis non ex relatione ad tactum nostrum judicemus. Ita idem corpus viro erit molle, infanti durum, aut fluidum viro, molle infanti; manui delicatæ asperum, leni rûvidæ. Præterea corpora ipsa, quæ tactui levigatissima

sima videntur, ut chrystallus politissima, & terfa metal-
la, si microscopio observentur, apparebunt scabrosissi-
ma. Quæ observatio diligenter recolenda est, dum de co-
loribus, & variis luminis reflexionibus & refractionibus
disputatur.

§. XVI.

Circa extensionem, figuram, & motum tactus etiam,
ut oculus, decipere potest. Recolenda igitur quæ
superius dicta sunt. Unum addam exemplum. Si quis ab
infantia oculis præditus tactu caruisset, eumque deinde
repente recuperasset, is certe figuras corporum oculis di-
stinguere posset, tactu non posset: quemadmodum si cæ-
cus tactu figuras didicisset, visum recuperans, solis ocu-
lis nunquam eas distingueret. Est hæc omnium philoso-
phorum doctrina. Ex ea autem discimus, de extensione
& figuris nos non alia ratione judicare, quam ex relatio-
ne ad impressiones sensuum, aut ad imagines ope sensuum
in nobis factas. Quum autem nesciamus an imagines istæ
figuris realibus sint conformes, quippe potest res quadra-
ta, veluti turris eminus conspecta, imaginem in nobis
rotundam imprimere; sequitur ex sensibus non tuto de
figuris corporum judicari.

§. XVII.

IN frigore etiam & calore pueriliter decipimur, quum
has qualitates corporibus inesse putamus. Nempe
sunt sensationes nostræ: tantum sunt in corporibus po-
tentie has in nobis excitandi. Nempe in corporibus cali-
dis talis est partium agitatio, quæ valeat in nobis calorem
producere: in frigidis verotalis est vis, quæ valeat san-
guinis motum in nobis retardare; quod est *frigus*. Præ-
terea major aut minor intensitas caloris, aut frigoris pro-
venit partim ex majori, aut minori intensitate potentia-
rum corporum, partim etiam ex corporis nostri tempe-
rie, quæ sola efficit, ut eadem res uni calida, alteri ca-
lidior, uni frigida, alteri frigidior sit: aut eidem nunc
calida, nunc frigida.

§. XVIII.

DOlores & voluptates partim animi, partim corporis esse dicuntur. Primi dolores proveniunt ex cogitationibus animi, nullis præcedentibus in corpore motibus violentis: Secundi ex violentis motibus corporis. Eodem modo primæ voluptates nascuntur ex solis animi cogitationibus: secundæ ex placidis motionibus corporis. In omni tamen dolore, vel voluptate, seu animi sit, seu corporis, conjunctæ sunt actiones animi & corporis: nam ut dolores animi apparent in oculis & vultu; ita voluptates oculis & vultu dignoscuntur. Præterea quasdam sentimus commotiones sanguinis, aut cordis dilatationes, & constrictiones in ipsis voluptatibus & doloribus animi. Id autem argumento est nec solius corporis, nec solius animi ullos esse dolores, aut voluptates, sed omnes esse hominis, aut harmoniæ animi & corporis. Exploratum est enim animi vim vivificam harmoniam facere cum corpore. Ea harmonia quum rumpitur seu cogitatione, seu violenta motione, fit dolor; quum instauratur, aut lenibus motibus conservantibus agitur, voluptas sentitur, quemadmodum Plato egregie docuit in *Philebo*.

§. XIX.

ACcedamus ad alios sensus. Naribus odores, Gustu sapes percipimus. Si sensibus credendum est, odores, & sapes sunt qualitates corporum reales. At nihil aliud sunt præter sensationes nostras; & dumtaxat in rebus externis vires quædam sunt, quæ valeant in nobis hujusmodi sensationes excitare. Quum autem vires istæ agant diverso modo pro subjectorum diversitate, inde fit ut eadem res uni gratum, alteri ingratum odorem, aut saporem excitet. Quam ob rem ex his nostris sensationibus de viribus odorificis, aut saporificis corporum judicare sine errore non possumus.

§. XX.

QUOD ad aures pertinet, cavendum est, ne credamus, sonos esse qualitates corporum reales. Nempe sunt & ipsi sensationes nostræ a corporibus motu undulatorio provenientes: Nempe dum motus corporum tremulus variè modificatus aures nostras pertingit, varios in iis excitat sonos. Hinc videmus campanas, aut cordas tamdiu sonare, quamdiu in iis tremulus iste motus perdurat. Observevamus etiam oportet, ne decipiamur ex loco, unde sonum provenire putamus. Nihil enim est facilius. Ita dum motus isti tremuli in tures, montes, aut cavernas impingunt, indeque minime dissipati reflectuntur, ex turribus, montibus, aut cavernis illis sonos provenire credimus, quæ est Echo. Potest autem eadem vox, aut idem motus ita ex pluribus concavitatibus reperi, ut plurimas voces, plurimosque sonos referat. Olimpiæ in Græcia porticus fuit, quam heptaphonon appellabant, quoniam pro una septuplicem vocem reddebat. Hinc Lucretius,

*Sex etiam ac septem loca vidi reddere voces,
Unam quum faceres*

§. XXI.

HIS de erroribus, qui ex occasione corporis proveniunt, adnotatis veniamus ad remedia. Primam causam, quæ est corporis inertia, & gravedo, hi spectant canones.

I. Conator paullatim & continuata attentione, ac meditatione, studiorum habitum contrahere. Etiam si sub initium cum pondere corporis, tædio, & fastidio colluctari te sentias, ne cessato: hæc enim impedimenta continuato exercitio sunt minora. Sed exercitium, ut dixi, continuetur: nulla scilicet dies esto sine linea.

II. Stilo utitor: nihil enim validius est ad philosophandi saporem excitandum, atque ad studiorum habitum comparandum. Quod si tu nondum aptus sis commentando, saltem optimum librum seligito & describito. Ita iudicium tuum in optimi auctoris iudicio formabis, gustumque optimi comparabis.

III. *Literatos viros colito: fieri enim nequit, quin animus eorum imaginibus excitetur. Literatorum vitas legito attente: transmeat enim ex iis in animum sapientiæ desiderium, & philosophandi vigor augetur.*

IV. *Quæ corpus gravius, & pigriorem animum efficiunt, caveto; cuiusmodi sunt ludi, qui attentionem a studiis averunt; nimius somnus, quo animi corporisque vires hebetantur; Spectacula; nimius cibus & potus; voluptates tactus, aliæque nimis gestientes.*

V. *Studiorum habitum semel contractum ne desuetudine languescere sinito: amittitur enim facilius, quam acquiritur. Itaque æquabile vitæ genus sectator.*

VI. *Corporis sanitatem diligenter custodito: idque aurea victus mediocritate; exercitio corporis aliquo; & curarum, quoad fieri potest, vacuitate.*

§. XXII.

CIrca temperiem corporis hæc moneri possunt.

I. Quilibet corporis sui temperiem attente perpendito. Si se phantasia nimis vivida & inconstante sentiat esse I. caveat a spectaculis & pompis, II. a lectione Poetarum & Romanensium, III. a nimio vino, IV. a locis nimium amœnis, quæ, ut observat Plato, animum quasi diluunt, V. ab iis omnibus, quibus animus æquo nimius exhilarescit, VI. a cibus nimium sanguificis, VII. assuescat lectioni continuatæ, meditationi, & æquabili vitæ ordini, VIII. caveat a judiciis præcipitatis; in pueriles enim ineptias proni sunt sanguinei.

II. Qui vero sunt temperamento tetro, curanto, I. ut remediis temperamentum istud mitescat, II. delectum ciborum habento, idest ut ne sint nimis calidi & inflantes (a), III. cavento a spectaculis tragicis, aut a Tragico- rum lectione, IV. distineant ab animo tristes curas, V. Eligunto loca amœna, tristitia fugiunto. VI. Illacrymantor sæpe: lacrymæ enim mentem quasi purgant, cerebrum veluti

(a) *Quo fortassis Pythagoræ illud spectat, abstineteto a fabis, quo nomine legumina omnia accipio. Quamquam hac de re tot sunt Philologorum sententiæ, quot capita.*

veluti eluendo; VII. assueſcant lectioni librorum perſpicuorum, & methodicorum, potiſſimum Geometricorum ut diſcant vitare notiones conſuſas, & obſcuras, VIII. caveant a judiciis præcipitatis: in Fanatiſmum enim proni ſunt.

III. Qui temperamento ſunt tardo, conantur ſe excitare; I. æmulatione æqualium, II. ſapientiæ amore, III. lectione librorum criticorum, IV. converſatione virorum perſpicacium; criticorum; & eloquentium; V. fugiant loca humida, & craſſa; & cibos craſſiores, VI. cavento à commercio cum tardis; & tetrīs; VII. ira; quæ ingeniū cōſ Ciceroni dicitur; iis eſt utilis; VIII. Præſcribunt quidam *amorem platicum*: ſed vereor ne remedium ſit morbo pejus, ut ſupra eſt dictum.

§. XXIII.

QUod pertinet ad ſenſus, pauca monenda reſtant.

I. Caveto, ne de rebus externis, ſolo ſenſuum officio iudices: Recolito, ſenſus factos, non ut rerum eſſentias deſerrent; ſed eſiſtentiam, & relationes. Caveto ne ea tantum eſſe putes; quæ ſub ſenſu cadunt.

II. In conſilium adhibeto rationem; & ſenſum communem optimum ſciendi magiſtrum.

III. Curato, ut ſenſus habeas; quo fieri poteſt; perfectiores.

IV. Armato illis instrumentis, & quam optimis:

C A P. V.

De externis errorum cauſis:

§. I.

EXternas errorum cauſas ad tres potiſſimas claſſes referre poſſumus. I. Parentes. II. Populum. III.

Et Magiſtros, quo nomine etiam libros quosdam indigitamus: Eas omnes elegantiffime explicat Cicero in Tuſculanis loco prorfus aureo (a): Nunc, inquit, Paulus igniculos nobis dedit (natura), quos celeriter malis moribus; opinionibusque depravatis ſic reſtinguimus; ut huſ-

E 3

quam

(a) Lib. 2. cap. 1.

quam natura lumen appareat. Sunt enim ingeniis nostris semina innata virtutum, quæ si adolescere liceret ipsa nos ad beatam vitam natura perduceret. Nunc autem simul atque editi in lucem & suscepti sumus, in omni continuo pravitate, & in summa opinionum perversitate versamur, ut pene cum lacte nutricis errorem suxisse videamur. Quum vero parentibus redditi, & Magistris traditi sumus, tum ita variis imbuimur erroribus, ut vanitati veritas, & opinioni confirmata natura ipsa cedat. Accedunt etiam poetas, qui quum magnam doctrinæ sapientiæque speciem præ se tulerunt, audiuntur, leguntur, ediscuntur, & inhaerescunt penitus in mentibus. Tum vero accedit eodem quasi maximus quidam Magister populus, atque omnis undique ad vitia consentiens multitudo: tum plane inficimur opinionum pravitate, a naturaque ipsa desciscimus. Sic Cicero.

§. II.

Sed ut has causas distinctius explicemus oportet. Primum parentes ignorantiae, & errorum nostrorum causæ pluribus modis esse possunt. I. Neglecta cura, aut nimia indulgentia. II. Non rite instituta cura. III. Nimia severitate. IV. Auctoritate. Et quidem parentes omnium primum & diligentissime natorum infantium atque mox puerorum indolem explorare deberent, ut perspecte moneret Quintilianus (a). Deinde vultu, gustu, verbis, actionibus nihil illis inspirare deberent, nisi magnum, nobile, honestum, iustum, atque maiestatem referens. Nam infantes, & pueri sunt veluti mollis cera, in qua facile quidvis impresseris. Formantur itaque ex aspectu, gestu, verbis, & actionibus eorum quibuscum vivunt. Apposite Horatius,

*Pingit equum tenera docilem cervice magister
Ire viam, quam monstrat eques. Venatius ex quo
Tempore cervinam pellem latravit in aula
Militat in silvis catulus. Nunc adhibe puro
Pectore verba puer, nunc te melioribus offer,
Quo semel est imbuta recens servabit odorem
Testa diu.... (b).*

§. III.

(a) Lib. 1. cap. 2. quod caput attente ut legatur moneo.

(b) Horat. lib. 1. ep. 2.

§. III.

AT plerique parentum hanc curam negligunt, aut non rite instituunt. Infantibus enim & pueris educandis, aut nullam navant operam; aut iis viles, & sordidas inclinationes, & vitia etiam sua, vel exemplis, vel verbis instillant. Alii nimia illos indulgentia habent, eosque molles, somnolentos, insolentes, & immorigeros faciunt. Alii ad alterum extremum declinant, & nimia severitate, præcipue verberibus, igneam puerorum indolem retundunt, & aut stupidos faciunt, aut certe a liberalibus studiis abhorrentes. Recte itaque optabat Chrysippus, ut pueri educarentur a philosophis, qui indulgente severitate nihil illis nisi honestum, grave, & sanctum inspirarent. Sed sunt hæc vota inania. Quum enim fieri nequeat, ut infantes cum Matribus & Nutricibus non conversentur, quantum ædificant philosophi, sæminæ illæ imbelles destruunt.

§. IV.

JAm vero quum ut plurimum parentes non satis culti sint, & præjudiciorum vacui, auctoritate sua errores plurimos & præjudicia pueris communicant, quæ vix inde spoliari possunt: nam sunt & parentum natura sua reverentissimi, & eorum, quæ semel didicerunt, tenacissimi. Spectant autem præjudicia hæc vel *disciplinas*, vel *vitam* atque *mores*, vel *religionem*. Pauca exempli causa memorabo. I. Majores nostri, si paullo civiliores sint, litteris que operam dederint, inutiles eas reputant disciplinas, quas ipsi non didicerunt, easque tantum commendant, quas didicerunt. Hinc videre est senes dissuadere juvenes a studio Mathematicarum, Linguarum, novæ Philosophiæ, exhortari que illos ad *Scholasticarum disciplinarum* eruditionem; putant enim abduc nec disputari recte sine Scholasticorum Logica posse, nec esse Theologum sine Peripatetica philosophia. Præterea opiniones quasdam manifesto falsas in re Theologica, Medica, Physi-

ca, Ethica, Historica, quas ipsi imberbes didicere, quasque senes turpe putant edoceri, dum magna severitate defendunt, minoribus propinant. Hinc proveniunt tot fabellæ, quæ vulgo circumferuntur de *Spectris*, de *Spiritibus familiaribus*, de *Lemuribus*, de *excantationibus*, de *viribus herbarum*, aut *metallorum*, aut etiam *vocabulorum*, & aliis rebus, quas longum esset numerare.

§. V.

II. **M**Ores cum semine transire vulgatum est. Id autem non tantum de corporis *temperie*, & phantasia, (de qua præclare *Maleb. lib. 2. cap. 8.*) accipiendum est, quam de commercio cum majoribus. Videri est ob eam causam mores quosdam esse in familiis hæreditarios, tum & varias opiniones, aut falsas, aut ridiculas, aut superstitiosas, quæ mores spectant.

III. Religionem infantes & pueri a majoribus suis potissimum accipiunt. Majores autem isti ut plurimum sunt homines rudes: de *Deo*, *Angelis*, *animabus humanis*, altera vita non justas habent ideas, veluti, quod Angeli habeant corpora, quod sint pulchri juvenes, quod edant & bibant; quod in altera vita sint musicæ corporeæ, flores, poma lepidissima; in qua etiam opinione Sacerdos quidam mihi amicus, sed vir tamen bonus, & vitæ integritate spectandus obfirmato animo insenuit. Eas aliasque, dum natis suis inculcant, illos circa Religionem miserum in modum corrumpunt: ita nempe, ut nunquam postea præjudicia illa expoliari possint, & ea constantissime tueantur. Hæc potissimum causa *Gentiles*, *Mubammedanos* & *Hæreticos* in sectis suis pertinaces efficit. Scilicet ob has impressiones, quas ab infantia receperunt, nefas putant de religione sua dubitare. Eos, qui illis saniora prædicant, spectant ut hostes, & malignos: itaque aures obturant. Ita errores consecrantur & ignorantia, ac *superstitio*, radices agit.

§. VI.

Accedamus ad populum maximorum atque plurimorum haud dubium errorum *colluviem*. Quot præjudicia populus foveat, & sacrata habeat, vix dici potest. Nam seu spectes mores, seu vitæ rationes, seu notitiam earum rerum, quæ nos ambiunt, ubique videas errores infinito, fabellas aniles, illusiones sensuum, & phantasie pro veritatibus haberi. Quumque opiniones istæ falsæ, apud diversas nationes, & diversa loca, diversæ regnent; inde videre est nasci nationum odia, & bella æterna,

*Inter finitimos vetus atque antiqua simulas,
Immortale odium, & nunquam sanabile vulnus.*

Inde furor vulgo, quod Numina vicinorum

Odiit uterque locus (a).

Quoniam vero in his præjudiciis nascuntur homines, & educantur, pauci inde proveniunt, qui, de iis dubitare sciant, & errores suos pernoscere. Sunt præterea talia hujusmodi præjudicia, maxime si Religionem spectant, ut scientias ferme omnes sædent: quandoquidem religio res est, quæ cum ceteris omnibus arctissime conjuncta est. Sed operæ pretium est hac de re paulo distinctius commentari.

§. VII.

Mentem nostram omnium rerum ignaram corpus nostrum subire & superius admonuimus, & tam est evidens, ut probatione non egeat. Præterea nos in infantia nostra *solum sensationem & perceptionem simplicem*, sine ullo rationis usu, habere, ad rationis vero usum gradatim & pedetentim progredi, & ipsam apertum est. Ergo quæ in infantia discimus, aut sola *sensatione* discimus, ut *calorem & frigus, lucem & tenebras, dulce & amarum*, atque similia: aut auctoritate *Parentum, Magistrorum, Populi* ut, plurima quæ ad *honestum*, aut *inhonestum, sanctum*, aut *profanum* pertinent. Hæc prius in nobis fuerunt quam ullum rationis usum habemus.

(a) *Juvenal. Satyr. xv.*

mus. Ea ergo, postquam adolevimus, ex sapientium præceptis (a) ad incudem rationis sunt revocandæ, ne, si falsa fuerint, per totam nos vitam perturbent, omnesque cogitationes nostras atro inficiant colore.

Præterea omnes homines prius vocabula linguæ, in qua nascuntur, discunt, quam vocabulorum potestatem. His vocabulis infantie notiones informes & præjudicatas affingunt. Quum adolescunt, eadem verba cum iisdem notionibus usurpant, pueriliterque per totam vitam hallucinantur (b) Ergo vocabula, quæ pueri didicimus, horumque vocabulorum potestatem revocanda, quum possumus, ad examen. Sed quotusquisque tantæ animi attentionis capax esse potest? Paucos videmus huic Canoni parere,

§. VIII.

Videamus præjudicia popularia circa Religionem. Religiones, quæ nunc in Tellure obtinent præcipuæ sunt, I. Gentilis, seu Idololatrarum, II. Mahammedana, III. Christiana. Mitto enim alias parum vulgaras. Hæ religiones ita comparatæ sunt, ut in præcipuis Religionis naturalis capitibus conveniant, nempe in his I. Deum esse Mentem quamdam æternam, incorpoream, sapientissimam, potentissimam, optimam, eumque esse unum *totum animum, totum animi*, reliquos esse aut Dæmones, aut homines, aut Dei, ejusque virtutum simulacra. II. ab eo universum factum esse, & summa sapientia & bonitate gubernari. III. Ab eo sperandam felicitatem, timendam miseriam. IV. esse alteram vitam miseram, aut beatam, seu animas humanas esse immortales. In præcipuis etiam Moralis capitibus conveniunt, e. g. I. Deum amandum mente pura, eique supplicandum. II. Non esse aliis faciendum, quod nobis nolumus. III. Indigentibus subveniendum, & in iis, quæ inde fluunt (a) Discrepant autem inter se in plurimis aliis & gravissimis ca-

(a) *Cartesius medit. prima de prima Philosophia.*

(b) *Lockius lib. 3. cap. 10 §. 4.*

(c) *Lege Tull. de nat. Dear. Plinium lib. 1. cap. 7. Pfan-
nerum in syst. theol. gent. pur. Heutium in Alnet. lib. 2. & 3.
quod ad Gentiles; Relandum de Mahammedanis.*

capitibus, quæ recensenda hoc in loco non sunt. Nunc illud dico, si Religiones Idololatrarum, & Muhammedanorum quod ad *substantiam* ipsam spectes, licet illis addi multa possint ex *revelatione*, at pauca tamen sunt, quæ demerere, aut emendare tanquam falsa, possis, pauca dixi: erat enim qui, quod ad *substantiam* nulla esse apud illos errata prædicat. At si apud populum spectentur, quid scdus? I. Gentiles turbam Deorum *superorum*, *mediorum*, *patellarium* venerantur. Is, ne summo quid Jovæ excepto omnes hominum affectiones, & vitia tribuunt. III. Dæmonibus, & Lemuribus omnia plena putant. IV. Depravatas de altera vita habent sententias: hinc Cerberus tri-faux, Peryphlegeton & similia monstra. V. Garritus avium, fulgura, auguria, omnia, portentâ, ostenta, monstra voluntatem Deorum referre credunt. VI. Oracula, Vates, Hariolos magna reverentia prosequuntur. VII. Moribus lascivissimis & corruptissimis vivunt,

§. IX.

MUhammedani licet unum colant Deum, imagines vero, statuas, Angelos, aut alias res in Deorum numero cum Gentilibus non habeant; tamen infinitis fabellis erroribus Religionem suam scdant. I. Fato quodam agi universum, cui adversari nefas esse. II. Non licere de religione disputationes ullas habere. III. Genios genitos a quodam Ebliso seu Diabolo, & a Mahammede religionem converfos. IV. Licere *Santonis* suis Domos quas volunt intrandi, & cum quavis concubendi (a). V. Omnia esse dæmonis plena. VI. Non licere sue vesci, bibere vinum, similia. VII. Voluptates corporeas, gustum præcipue & tactum afficientes, post hanc vitam adesse (b). VIII. Fœminas animantia esse generis alterius, quam viri sint, expertesque futuras *Paradisi* ejus, cujus sint viri participes (c): & trecenta alia.

§. X.

(a) Baumgartenus in itenerario lib. 2. cap. 1.

(b) Vide Gros. de verit. Relig. Ch. lib. 6. §. 10.

(c) Salmon de Imperio Turcico.

Delibavimus quædam ex Gentilismo & Muhammedanismo. Hæc, quæ esse errata; Religio nostra docet; exemplo esse debent, ut ne ex commercio cum imperito vulgo in similia delabamur. Fatendum est enim ingenue, Religionem Christianam; si in Ecclesiæ publicis *Confessionibus*; *Catechismis*; *hominibus cultis*; præcipue vero in Ecclesiæ *ministris* spectetur, nihil continere nisi *verum*, & *sanctum*: at apud plebejos homines; rusticos, agrestes, uti *mores*, ita *fidei* quoque falsa quædam esse præjudicia: quæ etsi perpetuo Sacri Ecclesiæ administrari evellere conantur; tamen aut *consuetudo mala*; aut rustica natura & plebeja renitur, efficitque, ut etiam si audiant, non tamen exaudiant; aut si exaudiant; relabantur denuo eo, quo ire ceperant; quæ rusticanæ; & phantasticæ naturæ sunt propria; ut observat Malebranchius. Longum esset rusticanas hæc superstitiones enumerare. Theologi nostri morales, qui & *Casuistæ* dicuntur, longam suppeditabunt seriem: Legi ea de re in primis meretur *Tiers de superstitione*. Nec hujus popularis superstitionis parva causa sunt, aut *Gentilium* majorum nostrorum mores etiam per plura secula ad nos demandati; aut eorum libri, in primis Poetæ; quos quum Platon e Republica sua ejecerit, mirum est posse tanto plausu apud nos pueris commendari, & legi. Quidquid ejus sit; Philosophus noster caveat; ne *Religionem a plebe accipiat*; aut *plebeis notionibus corrumpat*: accipiat potius a fontibus *Sacrorum librorum*; *Patrum*, *gravissimorum Theologorum*, *publicorum Ecclesiæ Catechismorum*. Nullo enim tempore, & apud nullam nationem plebei homines recte de Religione judicarunt; aut Magistri esse potuerunt: gravissimum enim illud Christi Servatoris nostri monitum; & totius Christianæ Religionis fundamentum; *SPIRITUS est Deus*; & eos qui adorant illum oportet in *SPIRITU & VERITATE* adorare; vix intelligit vulgus. Quo circa stulte faciunt ii, qui ex popularibus erroribus toti homini Christiano invidiam creant: veluti auctor litterarum Judaicarum; qui, quod fortassis inve-

nerit,

nerit, qui adulterium uxoris libenter pateretur, Christianos scripsit adulterium inter licita habere. Qua in narratione non modo malevolentiam & livorem, sed & imperitiam manifestat. Eodem sunt habendi loco Novatores, qui errores quosdam plebejos circa cultum Imaginum, circa Animarum, aut Angelorum apparitiones toti imputant Ecclesiæ nostræ. Interim quoniam

Dum vitant stulti vitia in contraria currunt,
cavere & illud debet, ne superstitionis popularis timore ad alterum deflectat extremum, & ideis nimis metaphysicis a commercio populi Religionem ad mundum intelligibilem revocet, quod imperite simul, & impie efficere conantur Deistæ: nam Religio naturæ est accommodata humanæ. Itaque illud recolat.

Medium tenuere beati.

S. XI.

Superest auctoritas Magistrorum. Sunt litterarum magistri varii: alii primis rerum elementis pueros imbuunt, alii vero paullo provectiores in sublimibus disciplinis erudiunt. Utrique plurimum nocere possunt. I. *moribus*. II. *auctoritate dogmatum*. Et primum quidem, quum pueri & adolescentes magnâ reverentia Magistros colant, fieri nequit quin eorum mores imbibant. Itaque Magistri aut verbosi, aut tardi, aut gloriosi, aut nimis abjecti, aut superbi, aut feri, aut luxu molles, sibi similes faciunt auditores, maxime pueros. Hinc notatum est in sectis veteris Philosophiæ, Heracliticis obscuros fuisse: Pythagoreos impostores, & *alti silentii*; Platonicos graves; Peripateticos molles; Stoicos severos (a). Nocent etiam nimia severitate, aut indulgentia: quarum illa stupidos, hæc inertes facit. Præterea primi litterarum magistri puerorum mentem corrumpunt, dum eorum solam excolunt memoriam tanta vocabulorum farragine, ingenium vero & iudicium negligunt. Dolenter dico: nihil tam pueris nocet, quam præsens usus, eos in linguis exoticis instruendi: hic enim puerorum conatus igneam ingenii vim, quæ in pueris elucet, retun-

(a) *Adeatur Horn. hist. Phil. lib. 7. cap. xxi. & seqq.*

tundit atque hebetat : quippe dum totum conatum vertunt in excolenda memoria , ingenium & iudicium negligunt. Publicum malum , & cui vix ullum est hodie in Europa remedium. Hinc fieri puto , quamobrem in Græcia plures fuerint uno seculo viri doctissimi , quam pluribus in tota Europa . Græci enim , quum linguas externas discere non congerentur , ab ipsa infantia philosophabantur , nec ingenium usu memoriæ conterebant.

§. XII.

JAm vero Magistri omnes in Dogmatibus disciplinarum plurimum auctoritate sua nocere possunt , dum adulescentes eorum *dictata* accipiant , & venerantur , atque in eorum verba jurant . Hoc enim modo , vel magistrorum errores mordicus defendunt , & pro iis , tanquam pro *aris & focis* , concertant ; vel putantes nihil posse se accuratius & melius Magistris suis reperire , ab omni investigatione cessant . Eam ob causam Philosophia Peripatetica & errores plurimos per plurima sæcula promovit ; & ne latum quidem unguem profecit : quod & nefas putabatur ab Aristotelis auctoritate discedere ; & Aristoteles ingenii humani finis habebatur , ut sæpe est a nobis adnotatum . Ob eandem causam Philosophia Platonica vel in ipsa Christiana Religione hæreses plurimas peperit , quod Plato tanquam Philosophorum Deus aliquis colebatur . Eidem causæ debetur , quod Cartesiani plures Cartesii errores & fabulas adoptaverint . Infinita sunt errorum exempla ex auctoritate hominum in Rep. litteraria natorum . Nempe ubique gentium sunt ingenia quædam servilia , quæ *credere malunt , quam scire* ; quæque nullo examine Magistrorum Dogmata excipere parata sunt .

§. XIII.

His errorum causis ut adversum eamus sequentes canones attente sunt servandi .

I. *Si te non rite a parentibus institutum agnoscis , sedulo tui studio conator te purgare , & ita vitam litterariam suscipito ; tanquam sibi aut nudius tertius natus sis . Utere amicis perspicacioribus & sinceris , atque ab iis reprehensiones leto excipito animo .*

II. *Cum ignaro vulgo ne versator : præjudicia autem populi*

puli diligenter prescrutator : omnes tuas opiniones ad examen revocato ; de omnibus dubitato , quousque certus non es , non posse te amplius falli . Horatii illud observato .

. Denique te ipsum

*Concute , num qua tibi vitiorum in se verit olim
Natura , aut etiam consuetudo mala . Namque
Neglectis urenda filix innascitur arvis .*

Porro ea est imperiti *Vulgi natura* , ut eorum eventuum aut *phenomenorum* , quorum causas *immeditatas* ignorat , *Deum* , qui *mediat* a tantum est , *immediatam* . faciat *causam* . Quæ natura tum continua cum vulgo familiaritate discitur , tum in Poetis , qui *sensus hominum vulgares sentiuntur* , maxime videtur . In utroque Homeri poemata exempla habes infinita .

Eadem *Vulgi natura* res paullo insolentes , aut raras , aut in genera suo magnas , quæque animos commovere possunt *vehementius* , Deo *ajutoris* tribuit . Hinc apud omnes Nationes *fulmina tributa* Jovi . Hinc in ipsa Hebraica Gente , *Ventus Dei* , *Cedrus Dei* , *Tempestas Dei* , *Grando Dei* & similia , quæ imperite quis , Deo *immediate* dederit , quum ex vulgari sensu dicta sint (a) . Ea propter Philosophus noster hunc Canonem servabit .

Nihil

(a) *Cavendum tamen est , ne hanc doctrinam æquo nimius provehamus , quemadmodum Auctor Theologico Politicus efficit .* Is enim eodem vult modo veteris testamenti libros vocatos ab Hebræis *Scripturam Dei* , & Spiritum Prophetarum *Spiritum Dei* , & Prophetas viros Dei , & Prophetarum opera , *miracula* , idest *opera Dei* , quo dictum est , *Mons Dei* , *Cedri Dei* , *Ventus Dei* . Qua opinione nihil fingi potest putidius . Nam Hæbrei , quantum ex eorum constat historicis , eos libros vocaverunt *Scripturam Dei* , quos certi erant a Prophetis , idest hominibus *διονόμοις* scriptos fuisse . Nec vero Prophetas habuerunt , nisi eos , qui , I. integri essent vitæ scelerisque puri , II. qui veram docerent doctrinam Supremi Dei naturæ & cultui consonam , III. qui indubiis *signis* & *portentis* auctoritatem suam probarent . In quo prophetarum delictu tantum abest ut credulitati indulserit , ut modum

Nihil Deo æquius tribuito, quod id imperitum vulgus magna faciat consensione: tute potius omnia explorato, atque perpendito: Rerum pluris, quam vulgi, naturam facito.

Sed & illud inter præjudicia aut vulgaria, aut popularia non minimum est, quum quædam non ratione ulla, sed publico aut vulgi, aut Scholarum judicio, plerumque non satis solido, contemnere assuescimus. Ita vulgus nostrum *Idololatrias, Muhammedanos, Hebreos* in Bestiarum numerum censet: qua ex re fit, ut aut nullam cum iis *juris communionem* esse putet, aut eorum opera omnia negligat, atque derideat. Qui hodie Theologicis studiis operantur paulatim in summum & *Scolasticorum Doctorum, & Scholasticæ disputandi methodi* contemptum inducuntur, ut eos ne nominari quidem se coram ferant: in quo ita peccant, ut ii peccabant, qui eos nullo olim judicio sectabantur. Philosophiæ studiosi *Peripateticos & Cartesianos* ita oderunt, ut, si iis Peripatetici alicujus, aut Cartesiani quidpiam laudes, statim nares contrahant, quasi ceteri homines, præterquam *Nevvtoniani*, crudi fuerint lateres: nam & sunt quædam acutæ a Peripateticis excogitata & a Cartesianis plurima summo judicio scripta, quæ idcirco contemnere, quod *Nevvtoniana* non sint, est pueriliter desipere: & *Nevvtoniani* ipsi non quasi ex Deorum concilio aliquo demitti, sed ut homunciones, dormitant aliquando, & naturæ cedunt. Philosophus ergo noster hunc memoriæ canonem insculpat.

Nullius hominis contemnito ingenium: de humanarum mentium cogitatis non ex ullo prejudicio, sed ex ratione judicato: libertatem philosophandi, quæ divina quædam res est, ut ne vis consuetudinis & sæculis secum abripiat, cave-to: Nulli æquo nimius credito:

Virtus est medium vitiorum, & utrinque reductum.

Nullius ergo frænum recipito: ECLECTICORUM in morem philosophator: qui semel enim in alterius verba juravit.

Liber-

potius excesserint, verosque non raro pro falsis, infectati fuerint Prophetas, Quod Christus servator noster eis improbat *Hierusalem*, quæ occidis Prophetas, & lapidas eos, qui ad te missi sunt.

*Libertate caret, dominum vehet improbus, atque
Serviet æternum, ingenio quia nesciit uti.*

§. XIV.

Hic postremus canon luculentius explicabitur, si pau-
ca de Eclecticis addemus. Philosophia Eclectica, seu
Electiva, ea est, in qua sapientiam *ratione* tantum quæri-
mus: rationem autem regimus *sensuum experimentis* &
observationibus, intima conscientia, auctoritate circa ea, quæ
nulla alia via a nobis sciri possunt, & *ratiocinatione* atque
conjectura. In hac ratione philosophandi non quæritur
quis quidpiam dixerit, sed quam recte, idest quam rationi
conforme. Hanc esse veram philosophandi rationem docet
Aristoteles (a) & Plato (b) & Clemens Alex. (c) Hunc in
modum philosophati sunt præter laudatos, meliores om-
nes, Cicero, Hammonius, Plotinus, Origines, Lactan-
tius, Gregorius Thaumaturgus, Augustinus, Cartesius,
Malebranchius, Sturmius, Nevvtonus, Leibnitijs, Vvol-
fius, ceterique. Hæc philosophandi ratio vocatur etiam
libertas philosophandi. Hinc sit ut *sectarii*, idest qui uni sectæ
nomen dant, *servum pecus*, nec philosophandi libertatem
habeant, nec recte unquam philosophari possint. Audien-
dus omnino est hoc in loco Lactantius (d). *Quare oportet*,
inquit, *in ea re maxime, in qua vitæ ratio versatur sibi quem-*
quam considerare, suoque judicio, ac suis sensibus niti ad inve-
stigandam, & perpendendam veritatem, quam credentem
alienis erroribus decipi, tanquam ipsum rationis expertem.
Dedit omnibus Deus pro virili portione sapientiam, ut & IN-
AUDIT A investigare possent, & *AUDIT A* perpendere.
Nec quia nos illi (maiores nostri) temporibus antecesserunt,
sapientia quoque antecesserunt; quæ si omnibus æqualiter da-
tur, occupari ab antecedentibus non potest. Illobabilis est,
tamquam lux & claritas Solis: quia ut sol oculorum sic Sa-
pientia lumen est cordis humani. Quare cum sapere, idest
veritatem quærere, omnibus sit innatum, Sapientiam sibi
adimunt, qui sine ullo judicio inventa majorum probant, &
ab aliis pecudum more ducuntur. Sed hoc eos fallit, quod

F majo-

(a) 1. Eth. cap. 4.

(b) In Gorgia, in Critone, in Charmide & alibi passim.

(c) Stromat. 1. (d) Lib. 2. cap. 7.

majorum nomine posito, non putant fieri posse, ut aut ipsi plus sapiant, quia minores vocantur: aut illi desipuerint, quia majores nominantur. Hæc divino quasi furore incitatus Lactantius. Consulantur quæ de libertate philosophandi nos scripsimus in Appendice ad priorem Metaphycæ partem, Dialogo primo. Atque hac admonitione Theologi potissimum uti debent, ut nulli Philosophorum sectæ in verbis Dei interpretandis & docendis adhæreant. Quid Athenis & Hierosolymis? Quid Academiæ & Ecclesiæ? Quid Hereticis & Christianis? nostra institutio de porticu Salomonis est, inquit apposite Tertullianus de Præscriptionibus. Quis certe non doleat, repertos esse homines, qui, quum Aristotelis libros nocturna diurna manu versassent, Scripturas vero divinas, & cetera Ecclesiæ monumenta ne inspexissent quidem, ausi sint Theologos se appellare? In publica quadam disputatione fuit Theologiæ Doctor, qui totius quum duceret concertationis agmen, argumentis ex Pauli epistolis ab adversario prolati respondere non erubuerit, se Paulum nunquam legisse: at forte attente Aristotelem versaverat. Sed legant tirones in Theologia aureos Melchioris Cani libros de Locis, & viri Clarissimi Constantini Grimaldi epistolam primam ad P. Aletinum. Cavendum tamen est, ne libertate hac abutamur, aut ad omnium contemptum, quem in errorem incidunt adolescentes, dum liberi in philosophando videri volunt; aut ad contemptum divinæ revelationis, qualem licentiam potius quam libertatem Antonius Collinus (a) promovere conatus est. Recolendum Horatii illud

In vitium ducit culpæ fuga, si caret ante. (b)

ARTIS

(a) *In libro de libertate cogitandi, qui primum editus est Londini 1713. lingua Anglicana, posthac Gallica 1714. Londini, & 1717. Amstelædami sub inscriptione discours sur la liberté de penser. Eum confutarunt in ipsa Anglia Samuel Pycroft, & Richard Bentley, & in Germania Jo: Franciscus Budæus Commentatione de libertate philosophandi Jenæ 1715.**

(b) *Videatur Rudigerus de sensu veri & falsi lib. 1. cap. 5.*

ARTIS LOGICOCRITICÆ

LIBER II.

DE IDEIS, IDEARUMQUE OBJECTIS,
ET SIGNIS.

Quæ in hoc libro complexi sumus ad quinque summa capita referri possunt. I. de idearum natura & origine. II. de idearum generibus. III. de erroribus, quos idearum occasione admittere possumus. IV. de idearum objectis. V. de idearum signis, seu vocabulis.

CAP. I.

De idearum natura & origine :

§. I.



Ocubulum *idea* græcum est a verbo *ἰδω*, idest video, & quod antiqui dicebant Latini, *specio*. Latine dicere possis *imaginem*, *speciem*, *simulacrum*. Philosophi vocant ideam, id quod sit menti præsens dum percipit, aut cogitat, quodque semper rei a mente distinctæ, & quidem aut existentis, aut possibilis, imago quædam est. Nimirum res extra nos positas mens nostra sine earum imaginibus quibusdam percipere non potest: neque enim ipsa cum rebus ipsis conjungi potest exeundo de corpore; neque res ipsæ in mentem intrare queunt: omnes igitur res externas ope idearum percipimus.

§. II.

Illud a philosophis disputatur, idæ sint ipsæ ne *perceptiones*, an vero *imagines* quædam rerum a perceptionibus

bus distinctæ. Ea de re hæferuntur opiniones. I. Quidam opinantur *ideas & perceptiones* unum idemque esse, perceptiones vero esse motiones organorum sensoriorum & cerebri (a). II. Alii arbitrantur perceptiones & ideas unum esse, sed perceptiones esse actiones solius mentis (b). Alii vero putant distinguendas esse ideas *materiales*, ab *ideis intellectualibus*; & illas quidem esse impressiones quasdam organorum sensoriorum & cerebri; has vero ipsas perceptiones, quibus impressiones illæ menti exhibentur: adduntque cuilibet ideæ materiali respondere ideam intellectualem, & cuilibet intellectuali materialem (c). Scholastici ideam materialem vocabant *impressam speciem*; intellectualem vero *speciem expressam*.

§. III.

PRior opinio animi incorporealitatem, & substantiam evertit: falsa ergo putanda est, quando animum substantiam esse a corpore distinctam demonstratum est (d). Altera internis animi ipsius experimentis repugnare videtur: Nam, I. res omnes extra nos positas non percipimus, nisi ope impressionum istarum in sensibus & cerebro factarum: & memoria nostra ab his impressionibus pendet. II. Nullæ perceptiones, & ideæ mentibus nostris obverſantur, quin simul eis obversentur vocabula, quibus perceptiones & ideas illas exprimere solemus: *vocabulorum* autem memoria *sensualis* est, seu ab impressionibus cerebri pendet. III. Iplas incorporearum rerum perceptiones non fieri, nisi excitatis quibusdam in cerebro motibus, intime consci sumus. Quæ probant ideas nostras non esse ipsas tantum perceptiones. Præterea si ipsæ perceptiones sunt ideæ, duorum alterum dicatur oportet; aut Mentem nostram, quæ causa est activæ suarum perceptionum, ideas sibi creare, rerum ignotarum nempe imagines; quod est absurdum: aut omnes ab externis causis, Deo

(a) *Hobbius in Leviatane, & in Logica. Eodem tenet Lokii doctrina si attente expendatur.*

(b) *Ita Arnaldus.*

(c) *Ita Christianus Wolffus post Scholasticos.*

(d) *Vide lib. 1. cap. 1.*

Deo nimirum, vel corporibus, recipere, ipsamque in perceptionibus omnibus *mere passive* se habere; quod animi naturæ repugnat. Verisimilior ergo est Scholasticorum & Vvolffii opinio, præcedere in corpore ideas *materiales*, sequi in mentē ideas *intellectuales*, aut sibi utrasque conjunctas esse: nam eas semper esse conjunctas experimento continuo discimus: nisi quis maluerit hoc inter ignota referre.

§. IV.

DE idearum origine longior est, & difficilior quæstio. Ea de re quæ feruntur opiniones sunt hujusmodi. I. Quidam putant ideas esse menti innatas: qui tamen sibi non consentiunt: nam alii omnes ideas: alii primorum tantum principiorum notiones innatas esse opinantur: & hanc opinionem Platonici & Cartesiani quidam tuentur. II. Alii mentem tali vi præditam faciunt, ut positis motionibus sensuum & cerebri, ipsa sibi ideas creet. Ita sentiunt auctor Artis cogitandi, & Vvolffius, etsi non eadem via atque ratione. III. Alii censent Deum ex occasione motionum corporearum producere in mente ideas earum rerum, quās percipere mentem oportet: ita Cartesius ipse, & ejus Sectatores plurimi. IV. Alii existimant mentem nostram Deo uniri *essentially*, & in Deo, aut Dei lumine omnia videre, quemadmodum Malebranchius. V. Alii tandem ideas a sensibus, & a meditatione super ideis sensuum, provenire docent, illudque usurpant, *nihil est in intellectu, nisi prius fuerit in sensu*. Qui item non sibi conveniunt. Nam Lucretius vult ex ipsis rebus avolare idola & simulcra, atque per sensus intrare; Scholastici contendunt ideas materiales seu *species impressas* ab objectis provenire; hinc ab intellectu agente spiritualizari & intellectui passivo præsentari, fierique *species expressas*. Lockius ipsas motiones sensuum & cerebri esse perceptiones & ideas. Alii vero recentiores philosophi, licet fateantur omnes ideas a sensu & meditatione videri nasci, non dubitant tamen asserere, se non intelligere qua id ratione fiat: atque isti *Jove judicant æquo*.

§. V.

Quanquam sententias istas ad examen revocare non sit hujus loci, placet tamen pauca per summa capita delibare. Et primum quidem qui ideas innatas statuunt, ii proculdubio nomine *idearum* non intelligunt impressiones in cerebro factas: essent enim ideæ istæ mutabiles, quemadmodum cerebri ipsius structura mutatur; neque enim idem est in infantia, pueritia, virilitate, senectute, cerebrum. Præterea si omnes ideas, quas mens percipere potest, statuant isti natura in cerebro insculptas, perridiculi sunt, qui nobis persuadere credunt, quod omnem fidem superat. Si autem in animi ipsius substantia ingenitas ideas istas volunt. I. non puto eos idearum nomine intelligere ipsas perceptiones: qui enim, qui sibi non sit penitus ignotus, dixerit, omnes perceptiones possibiles simul in animo exitisse ab initio suæ existentia? Quinimo ne plures quidem simul in animis infantium perceptiones esse, confidenter dicere possumus, si observemus, infantes vix simplici perceptione uti. II. Restat ergo ut dicant ideas innatas aut esse *inclinationes*, & *leges naturæ*, ut sic dicam, quibus anima natura ipsa agente erga quædam objecta impellatur: aut nescio *quas* *imagines* in ipsa insculptas, quæ eam ad perceptionem quarundam rerum excitare valeant. Primum nemo unquam negavit. Quis enim in dubium vocaverit, animam nostram natura sua ferri ad bonum, abhorrere a malo? At has inclinationes ideas vocare non possumus. Sunt enim vires naturæ, quibus Deus creaturas rationales gubernat. Posterius qui asserat, is primum fateatur etiam, se non intelligere quid sint ideæ istæ, adeoque ignota loqui: deinde ut illis respondeat oportet, qui fatentur animum horum sigillorum, & notarum insculptarum capacem non esse, quum sit substantia non tam incorporea, sed etiam inextensa, ut his placet.

§. VI.

Deinde certum est, mentem sibi primas & simplices ideas efficere non posse, nisi dicere velimus rerum
igno.

ignotarum sibi imagines creare posse : quod non tam potest, quam pictor rei, quam ignorat, picturam. Quæ quum sint, licet concedatur notiones compositas posse sibi mentem efficere, plures simplices copulando: aut etiam ex primis, quas aliunde habet, alias conjectura deducere, incredibile tamen restat, sibi etiam primas ideas simplices creare. Qua in re miror Vvolfsium, magna confidentia *harmoniam illam præstabilitam* Leibnitii sui, idest *qualitatem occultissimam*, propagasse, eaque simul statuisse, omnium, etiam primarum & simplicium idearum, mentem ipsam sibi causam esse. Est hæc harmonia in hoc posita, ut mens legibus naturæ suæ producat sibi continuata serie omnes perceptiones, quæ respondeant ideis materialibus cerebri, & sensuum; seu sibi representet mundum intelligibilem eo ordine & serie, qua mundus sensibilis sensibus obversatur: & ita quidem sibi representet, ut semper antecedens perceptio rationem sufficientem sequentis continent (a). Nam præter quam quod Fato cuidam mens subjicitur, a Spinozistico haud dissimili: sit etiam mentalis, ut sibi ignotarum rerum imagines efficiat. Non inscite ergo vir quidam doctus pronunciat, harmoniam præstabilitam lulum esse ingenii Leibnitiani nulli fundamento hærentem. Quis igitur feret recentiores plures literatos, qui hoc phantasma ambabus vulnis amplexi sunt?

§. VII.

Tertio, qui putant Deum producere in nobis ideas, ii coguntur fateri. I. Deum producere quoque in nobis ideas earum rerum, ex quibus adversus Dei legem commovemur, adeoque aliud ipsum ut Legislatorem vel, aliud ut naturæ motorem,

Quæ non sana esse non sanus juret Orestes.

Deinde omnem nobis vim percipiendi activam negant, idest omnem animam. Præterquam quod, cur nullas in

F 4

nobis.

(a) Hunc in modum explicatur a Vvolfo ejus systematis præcipuo propugnatore in Psychologia Rationali, quo in loco ex infirmo ea de re agit.

nobis Deus ideas excitat rerum quæ sunt in globo Lunæ, aut Saturni, quas scire maxime cupimus? Cur excitat quasdam ideas, quas non vellemus? Sed peream si isti intelligunt, quid sit Deum excitare in nobis ideas. An enim intellectiones & perceptiones suas animæ communicat? an illa creat? an illam tantum ad cogitandum adjuvat? & qua ratione? Incerta omnia.

§. VIII.

Quarto, qui mentem cum Deo *essentialiter* unitam faciunt, I. videant ne Spinozismum inducant, unicamque in universo mentem & animam omnia permeantem, qui omnia vivant & cogitent, doceant. II. Quales rationes afferre possunt, cur alii quædam intelligant, alii non, ita ut frustra conentur: quidam hanc, alii diversam de eadem re ideam habeant? quidem memoria plurimum, alii nihil valeant? denique cur tanta sit inter cogitationes humanas discrepantia, ut plures sint sententiæ, quam non capita, sed capilli? Respondent id provenire ex eo, quia Deus leges naturæ & motionum cerebri sectatur. Quasi vero & ista non immediate a Deo pendeant in horum systemate. III. Cui usui dicent nobis datos sensus? ad usum vitæ, inquit Malebranchius: nempe ut vitam servare sciamus. Ergo dati sunt ad usum ejus scientiæ, quæ nobilior est, qua scilicet vitam regere sciamus. Ea vero parva certe non est. IV. Cur sensus non decipere isti docent, si sensuum via nihil discimus?

§. IX.

Quinto, qui volunt ex rerum superficiebus idola continue avolare, ii concedere debent hæc idola non esse corporea: alioquin jamdudum corpora omnia evanuisent ab oculis. Deinde cur tot idola, nempe pene infinita, nec inter se miscentur, nec se mutuo corrumpunt, quum oporteat ut alia per alia transversim pertranseant? Sed demus hæc idola a corporibus avolare, qua ratione dicemus hæc a nobis percipi? An perceptiones erunt motiones cerebri ad idolis excitatæ? at motiones istæ [qua ratione] representabunt idola illa?

Quod

Quod si perceptiones erunt actiones distinctæ a motionibus cerebri, uti sunt, id ut dicant etiam necesse est, qua ratione idola hæc a nobis percipiantur? Nam asserere ea *spiritualizari ab intellectu agente*, est sine ullo iudicio loqui, aut ignota per ignotiora explicare.

S. X.

Sexto, qui contendunt motiones sensuum & cerebri esse ideas & perceptiones simul, ii asserere debent, aut motiones istas similes esse rebus, quas representant, aut nihil a nobis certo sciri. Primum manifesto fallum est. Quæ enim motiones cerebri colorem representare possunt? quæ figuras? quæ res alias, quibus similes nullo modo esse possunt? Asserere vero nihil a nobis certo cognosci, hominis est patientia aliorum abutentis. Quæ quum sint, fatebimur ingenue, nos ignorare, qua ratione res extra nos positas percipiamus & quid sint ideæ & perceptiones nostræ. Iterim ne ullum hinc præjudicium pro inquirenda veritate nascatur, putabimus verum, etiamsi forte non sit, omnes ideas nostras partim sensationi, partim & meditationi originem debere. Ex quo hos deducemus canones. *Curato, ut sensuum experimenta, quo plura fieri potest, habeas; ut cum mundo rerum, & hominum, quo fieri potest diutius, verseris; ut acumen mentis augeas; ut ratiocinandi facultatem acquiras: putato fabulas, etiamsi non sint, te posse via idearum innatarum, & luminis malebranchiani sapientiam consequi, ne hæc te ab investigatione remorentur. Revocato ad animum, homines ex solo commercio cum mundo intelligibili evadere fanaticos: ex commercio cum mundo naturæ, & hominum, doctos.*

§. I.

I Deas ex quatuor adspectibus contemplari possumus :
 I. Ex earum origine & natura . II. In seipsis . III.
 Ex relatione ad objecta . IV. Et ex relatione ad Men-
 tem . Primo modo ideæ spectatæ, sunt . I. vel adventi-
 titiæ, II. vel factitiæ, III. vel innatæ . Secundo modo
 sunt , I. simplices , II. vel compositæ . Tertio modo
 sunt , I. adæquatæ , II. inadequatæ, III. singulares,
 IV. universales , V. absolutæ , VI. relativæ , Quarto
 tandem modo sunt , I. claræ , II. obscuræ , III. distinctæ ,
 IV. confusæ . Quæ paulatim nunc sunt explicanda .

§. II.

I Deæ adventitiæ sunt eæ, quas ex sensu provenire pu-
 tamus, quales sunt ideæ omnes rerum corporearum,
 quas res sensatione percipimus. Ideæ istæ omnes simplices
 sunt . Sensus enim ideas complexas nullo modo deferunt .
 Ideæ factitiæ sunt eæ omnes, quas sibi mens conficit, seu
 conjectura & ratiocinio ; seu copulando simplices ; seu
 proportionem & similitudinem cum iis, quas sensus deferunt ;
 seu quocumque alio modo . Oportet autem diligenter duo
 hæc idearum genera distinguere : nam primæ naturales
 sunt, & semper ferme veræ : non item secundæ .

§. III.

I Deæ innatæ dicuntur eæ, quæ nec adventitiæ sunt,
 nec factitiæ, sed a Deo menti, quum primum existere
 incipit, insculptæ, uti vulgo putatur . Ceterum non
 eodem modo ideæ istæ innatæ apud eorum patronos ac-
 ciipiuntur . Veteres Epicurei & Stoici notiones innatas
 vocabant, aut quas primum sensus deferunt, quum ani-
 ma adhuc veluti *tabula nuda* est ; aut quas nullo studio,
 nulloque labore ipsa universi hujus contemplatio defert,
 cu-

cujusmodi est secundum Epicurum Dei notio (a). Cartesius vero (b) ideas innatas sic explicuit. *Non enim*, inquit, *unquam scripsi, vel judicavi, mentem indigere ideis innatis, quæ sint aliquid diversum ab ejus facultate cogitandi. Sed quum adverterem, quasdam in me esse cogitationes, quæ non ab objectis externis, nec a voluntatis meæ determinatione procedebant, sed a sola facultate cogitandi, quæ in me est, ut ideas, quæ sunt istarum cogitationum formæ, ab aliis adventitiis, aut factitiis distinguerem, illas innatas vocavi.* Alii vero esse characteres animo impressos censuisse, scribunt, in primis Malebranchius, & Lockius, qui has ideas hoc sensu acceptas vehementissime confutaverunt (c). Quibus accedit Andreas Rudigerus, qui anno 1704. dissertationem edidit, *De eo, quod omnes idee oriuntur a sensu*, in qua Cartesianorum, ut inquit, nugæ refutat. Sed fateor ingenue, me nullum Cartesianum, qui commendari mereatur, reperiisse, qui hoc modo ideas innatas explicaret; idest qui diceret, characteres esse menti insculptos. Videant igitur ne Cartesianis imponant, qui ita illos interpretantur.

§. IV.

Ideas simplices vocant philosophi eas, in quibus ne mente quidem plures partes distinguere possumus: compositas vero eas, in quibus plures ideas simplices, quæ distingui & seorsim intelligi possunt, videmus. Ideas simplices partim *sensu*, partim *meditatione* in nobis progigni docent Philosophi. Ad primam classem referuntur omnes sensationes, colorum, sonorum, odorum, saporum, voluptatis, doloris, extensionis, motus, alia-

(a) *Apud Cic. lib. 1. de nat. Deor. Legatur & Plutarchus lib. 1v. de Placit. cap. xi. Non recte igitur Hornius καὶ οὐκ ἴδωκεν ἰδέας ἐννοίας, καὶ καταλήψεις* Stoicorum pro ideis innatis accepit lib. 1. hist. Phil. cap. 2. pag. 9.

(b) *Responsione ad art. xii. Program. Belgici ann. 1647.*

(c) *Maleb. lib. 3. de inq. verit. cap. 4. Lockius de intell. hum. lib. 1. cap. 1.*

aliarumque rerum. Hæ enim ideæ via sensus habentur, & tales sunt, ut in iis nullas partes distinguere possimus. Ad alteram classem referunt ideas *potentie*, *unitatis*, *existentiæ*, *cogitationis*, *voluntatis*, & similes (a).

§. V.

Ideæ compositæ nihil sunt aliud, quam associationes variæ idearum simplicium. Qua autem ratione eæ fiant ita explicat Lockius. *Quanquam mens nostra passive tantum se habeat in perceptione omnium idearum simplicium, tamen potis est ita agere, ut ex combinatione idearum simplicium, quæ omnium suarum cogitationum veluti materies sunt, plures ideas sibi constet. Actiones autem mentis, quibus hoc agit, sunt sequentes: I. Plures simplices ideas in unam constat: hinc ideæ complexæ nascuntur. II. Unam ideam alteri consociat, ut eæ simul percipi possint, etiamsi in unam non coeant. Hinc relativæ ideæ proveniunt. III. Ideas quasdam ab iis separat, quibus erant conjunctæ, quod abstrahere dicitur; unde universales generantur ideæ. Hæ distinctæ mentis actiones ostendunt, quid mens nostra in ideis possit: ostendit præterea hominis operationes in mundo intelligibili (idest in mundo idearum) esse easdem atque in mundo Corporeo. Materies nimirum utriusque illius mundi talis est, ut nihil novum ei addi, nihil ex ea in nihilum referri possit hominis opera. Hæc ille (b).*

§. VI.

Sed explicandum est clarius, qua ratione associationes istæ idearum fiant. Quantum animo recolere possumus eæ debentur quatuor causis. I. *Sensationi*, II. *Ratiocinationi*. III. *Pbantasiæ*. IV. *Institutioni*. Et primum quidem certum est, nos sensibus quasdam ideas simplices inter se conjunctas percipere, seu uno successive, seu pluribus simul fiat sensibus. Hujusmodi sunt ideæ compositæ corporis, plantæ, hominis, iridis, pugne, & similium rerum. Sunt scilicet associationes simplicium idearum sensatione factæ. Deinde *ratiocinando* plures simul ideas simplices jungimus, unoque vocabulo appellamus. Ita conficitur idea Dei: ex universi enim contemplatione per-

(a) Lockius lib. 2. cap. 6. & Clericus in Logica part. pr. cap. 2. (b) Lib. 2. cap. 12. §. 1.

percipimus existere *rem quandam æternam, cogitantem; potentissimam, optimam*. Ratiocinatione quoque series & systemata idearum & scientiarum conficimus. Tertio *phantasia* libere varias idearum associationes efficimus, quales sunt associationes *poetarum, & pictorum*, eorumque, qui turres in aere ædificare dicuntur. Tandem *institutione majorum*, vel magistrorum, aut librorum lectione, varias quoque idearum associationes facere solemus, quales sunt opiniones quas aut ex populo, aut ex parentibus, aut ex Magistris & libris haurimus.

§. VII.

Quod vero attente observare debemus, est, quod licet idæ simplices apud omnes sint eadem, aut simillimæ; idæ tamen compositæ, ceteræque idearum associationes non apud omnes sunt eadem, aut similes. Primum enim potest quis eidem vocabulo, quo nos quatuor ideas simplices explicamus, quinque, sex, decem addere: Itaque, e. g. notio *Dei* composita non æque ampla est omnibus mentibus. Deinde series & systemata, quæ ex comparatione idearum simplicium nascuntur, & ipsa esse possunt diversa: quippe diversi homines easdem ideas ex diversis adspectibus contemplari possunt. Tertio idæ omnes phantasticæ, aut abstractæ, & variæ esse solent, & non æque amplæ, quum ob diversam mentium capacitatem, tum etiam ob variam cogitandi libertatem.

§. VIII.

Jam vero si idæ referuntur ad objecta, primum esse possunt vel adæquatæ, vel inadæquatæ. Primæ sunt quæ exhibent clare & distincte omnes objecti partes, proprietates, notas: Secundæ vero, quæ non omnes exhibent. Quum objecta *idearum phantasticarum* ut plurimum sint ipsæ *idæ*, idæ hujusmodi sunt semper adæquatæ, id est semper tantum exhibent, quantum cogitamus, cujusmodi sunt idæ Geometricarum & Arithmeticarum rerum. At id de compositis sensatione, & ratiocinio, quæ ad objecta externa referuntur, dici nequit; sunt enim omnes inadæquatæ,

DE ideis singularibus & universalibus sic scribit Auctor Artis cogitandi (a). *Quamvis quidquid existit singulare sit, nihilominus ope abstractionum varia idearum genera in nobis gignuntur; quarum aliæ unicam tantum rem representant, qualis est idea, quam quisque habet sui ipsius; aliæ plures simul, uti quum quis triangulum concipit, nihil in illo considerans, nisi quod sit figura habens tres lineas eodemque angulos. Idea autem sic formata inservire potest omnibus aliis triangulis concipiendis. Ideæ rem unam representantes, singulares; quæ autem plures, universales, communes, & genericæ dicuntur. Hæc ille. Quæ autem addit de comprehensione & extensione idearum universalium nullius sunt pretii.*

§. X.

Disputatur inter philosophos, an ullæ hujusmodi ideæ universales existent? Platonici affirmant: sed negant Lockius, & Volfius. Putant enim isti totam idearum universalitatem positam esse in celeri perceptione singularium & similium. Itaque perceptio plurimum hominum dicitur *idea universalis*, & *species*: perceptio plurimum animantium diversarum naturarum, & adfectuum, dicitur *idea universalis*, & *genus*. Hinc patet quid sint *genera* & *species* secundum philosophos hujusmodi. Sane ideæ universales simplices ne sunt, an compositæ? Si primum singulares sunt: nequit enim idea simplex plura objecta referre. Si alterum, idea universalis una non est, sed ex pluribus composita. Ideæ igitur universales intelligi non possunt, nisi simul naturæ quædam rerum universales statuantur.

§. XI.

Ideæ *absolutæ* sunt quæ nullam continent cum aliis relationem, ut *hominis*, *corporis*, *prudentiæ*: *Relativæ* autem quæ relationes continent, ut ideæ *Patris*, & *Filii*; *uxoris*, & *viri*: *creatoris*, & *creaturæ*, & similes.

(a) Parte I, cap. 6.

les. Non sunt autem *ideæ relativæ* cum *ideis relationum* confundendæ : nam *ideæ relationum* sunt illæ, quæ præsentant relationes. E. g. *Idea creatoris* relativa est; *idea vero creationis* est *idea relationis*.

§. XII.

Idea clara est quæ ita objectum offert, ut si iterum occurrat, statim agnoscat: *obscura* vero, quæ objectum ita refert, ut si iterum occurrat, non facile dignoscatur. Ita *Lunæ* quilibet etiam de plebe claram habet ideam, non item *Martis*, *Jovis*, *Saturni*, nisi si assuetudine planetas istas discernere didicit. *Ideæ* omnes sensationum claræ sunt, cujusmodi sunt *colorum*, *luminis*, *saporum*, *odorum*, & *ceterorum*: *spirituum* vero *ideæ* obscuræ sunt omnes.

§. XIII.

Idea distincta est, quæ non solum rem clare, sed etiam rei præcipuas notas, quibus ab omni alia distinguitur, refert: contra vero si rem clare, notas autem nullo modo referat, confusa est. E. g. *idea trianguli* est clara & distincta: exhibet enim rem clare, reique notas distincte. At *idea coloris rubri* clara quidem est, sed confusa: coloris enim illius notas nullo modo exhibet. Ex his apparet claritatem, & obscuritatem, distinctionem & confusionem esse affectiones non *idearum*, sed *mentis* & *perceptionum*, quod Lockius animadvertit. Videamus nunc quæ his de rebus observanda sunt Logico.

C A P. III.

Observationes circa naturam & affectiones idearum.

§. I.

Observationes, quas nunc daturi sumus, spectant *ideas* ex iisdem quatuor adspectibus, de quibus cap. præcedenti §. I. Omnium primum supponemus nullas esse *ideas innatas*: nam etiam, si sunt, quænam illæ sint, ignoramus. Deinde omnes *ideas* ex origi-

ne sua vocabimus vel adventitias, vel factitias : factitias vero etiam phantasticas, & conjecturales. Adventitias tria referunt. I. Quarundem rerum *existentiam*. II. *Et qualitates*. III. *Et relationes*. Primo modo acceptæ omnes sunt veræ : nempe omnibus ideis adventitiis respondent objecta quædam extra nos existentia. Itaque hoc sensu ex ideis corporum adventitiis eorum existentia probanda est. Nempe quum ex nihilo provenire nequeant ; esse debent causæ, ex quibus proficiantur, idest corpora ipsa : affirmare enim a Deo eas menti imprimi cum *Idealistis*, est sensuum evidentiam omnem pernegare & fictis hypothesibus omnium hominum patientia abuti. At duobus aliis modis acceptæ ut plurimum sunt falsæ. Nam nec veras externarum rerum qualitates, nec veras relationes semper referunt ; quod plurimis exemplis demonstrari posset ; Sed legantur quæ lib. 1. de erroribus sensuum cap. 4. differuimus,

§. II.

IDeæ factitiæ esse possunt aut simplices, aut compositæ. Simples per abstractionem fieri possunt. Hujusmodi sunt ideæ geometricæ *lineæ*, *superficiæ*, aliæ : ex quibus iterum per ratiocinium aliæ deducuntur. Fit autem abstractio, quum ea separatim percipere conamur, quæ natura sua sunt conjuncta. E. g. dum *cubum* aliquem metalli intueor, & tango, nascitur in me idea *entis* cujusdam *extensi*, *solidi*, *figurati*, *colorati*. Hæc idea composita est. At ego sic conari possum, ut solam *extensionem*, solam *soliditatem*, solam *figuram*, solum *colorem* mihi repræsentem. Ideæ *extensionis*, *soliditatis*, *figuræ*, *coloris* hunc in modum formatæ, *abstractæ* sunt. Eodem modo ratiocinio mihi ideam Dei conficio, *Entis* nempe *æterni*, *sapientissimi*, *potentissimi optimi* ; eaque composita est : at per abstractionem creo mihi ideas simplices *æternitatis*, *sapientiæ*, *potentiæ*, *bonitatis*, &c.

§. III.

PAssim peccari solet in usu idearum abstractarum . Quemadmodum enim istæ separatim percipiuntur, ita separata objecta iis respondere judicatur . Et quidem ubi non est necessaria magna attentio ut cognoscatur ideis abstractis distinctis non respondere distincta objecta , homines non facile errant : contra vero si majore attentione opus sit . Ita non facile reperias hominem , qui sibi persuadeat existere *motum sine re* quæ moveatur, *calorem*, *sine re calida* , *sodilitatem sine extensione* : at multos reperias in hominibus fantastis qui *genera & species* existere credunt , idest *naturas quasdam universales & communes* ; ideis scilicet abstractis objecta sui generis respondere opinantes ,

§. IV.

QUa ratione nascantur ideæ compositæ superiori cap. §. 6. explicuimus . Illud superest ut observemus, ex ideis *compositis*, seu idearum *associatione*, plurimos nasci posse errores . Potissimus committitur, dum putatur ideas compositas *adequatas* esse, seu omnes objectorum proprietates referre, quo casu *essentiæ notionales* pro *realibus* habentur ; aut dum creditur talia esse objecta , qualia ideis associatis representantur . Familiaris est hic error Philosophis, potissimum iis, qui per *hypotheses* philosophantur . Sunt enim *hypotheses & systemata arbitrariæ ut plurimum idearum associationes*, quibus *res universi, earumque causæ, & ordo explicatur*. Quidam philosophi primum apud mentem suam *systemata* condunt, quam universum observent : dehinc ex *systematibus* illis *causas, ordinem, fines, naturas* rerum universi deducunt ; quum deberent ex rebus ipsis *systemata* deducere, si recte philosophari vellent .

§. V.

Associationes istæ §. 4. vocari possunt *phantasticæ & conjecturales* . Sunt vero etiam plurium errorum causæ *associationes*, quas ex consuetudine ab infantia

haurimus: hæ enim longius latiusque per totam vitam grassantur. Quumque viis de iis dubitari sciamus, quandoquidem cum iis adolevimus, sunt nobis plurium ratiocinationum nostrarum principia. Quod si tales associationes cum affectibus aliquibus ab infantia fuerint conjunctæ, tum vero nulla ope dedoceri eas possumus. Infans dum audit insolita quædam vocabula à nutrice pronunciari vultu tetrico, & simul tenebras indicari videt, cum iis vocabulis, atque tenebris ideam nescio cujus rei terribilis conjungit: Quotiescumque ergo vocabula illa audit, aut tenebras videt, excitatur in eo rei cujusdam terribilis idea; simulque timore concutitur; etiam vir factus.

§. VI.

QUum primæ ideæ, quæ mentibus nostris obversentur, sint rerum corporearum, primæ quoque consoziationes sunt eæ, quæ fiunt ex ideis corporeis. Ex primis illis ideis nostris regi solemus ad alia entia, cujuscumque generis percipienda: eodem modo omnes alias associationes nostras ad normam primarum conficimus. Res ipsas igitur incorporeas ideis rerum corporearum nobis representare solemus: de illis itaque associationes idearum efficimus, eodem modo ac de corporeis. Hinc nati sunt omnes errores circa substantias incorporeas (a). E. g. Nos cogitationes; & vim cogitandi non percipimus, nisi in corpore sensibus quibusdam instructo, & cum corpore & sensibus. Ideæ etiam potentia, & libertatis nascuntur ex nostri, aut aliorum hominum, aut

(a) *Atque hinc fit ut passim Cicero in libris de natura Deorum dicat, res incorporeas intelligi omnino non posse; quod difficillimum sit mentem a corporeis ad incorporea avocare: quod dum ad incorporea intelligenda conamur, phantasia retrahat ad corporea, ex quo & illud est; ut homines, qui quod intelligere nequeunt, esse quoque inficiantur, incorporea aut negent, aut in dubium revocent; nec idiotæ tantum, sed, quod mirum est, qui litterati videri volunt, Hobbessius, Spinoza, Tolandus; quum certum sit, ut nos in Metaphysica demonstravimus, esse corporea non posse, nisi sint incorporea.*

aut animantium contemplatione, & cum horum naturalis sunt conjunctæ. Inde ens; cogitans, potens, liberum, ut *corporeum* nobis repræsentatur. Eam porro ob rem fit, ut omnes alias substantias cogitantes; *Deum ipsum & Angelos* non possimus intelligere, nisi ad nostri formam. Itaque Deo & Angelis non veremur omnes virtutes & affectiones humanas tribuere, & de iis non aliter judicare, quam de hominibus; quasi aut eædem, aut similes in illis essent. Quod gravissimorum in Religione errorum causa esse potest.

§. VII.

SI ideæ spectantur ex relatione ad objecta; quod omnium maxime observare Logicus debet; est, ideæ *adæquatas* aut nullas esse; aut vix *modorum simplicium* aliquas. Primum enim substantiarum incorporearum inadæquatas habemus ideæ; obscuras etiam & confusas. II: Omnium virium activarum; quæ quid sint ignoramus: III: Essentiæ & naturæ corporum: IV: Ordinis & relationum rerum hujus universi: V. Finium rerum. Eam ob rem ex ideis nostris non rite plerumque; nec recte de hujusmodi rebus judicamus. Ea est ratio, ob quam ceteræ disciplinæ methodo geometrica tractari non possunt: Nempe id proprium est in Geometria; ex ideis figurarum omnes earum deducere proprietates: quod feliciter evenit; idcirco quod in his rebus *essentiæ notiones eadem sunt & reales*. At in aliis disciplinis; quum essentiæ *notiones* infinite quasi dissent a realibus; quippe quæ sunt ideæ inadæquatæ; ut dictum est; non licet ex illis *realium* proprietates Geometrarum methodo derivare.

§. VIII.

Circa ideæ universales observandum est; eas in nobis fieri, eodem modo; quo vocabula evadunt universalialia. Nempe ut infantes ad vocabula paulatim ad alia atque alia objecta similia extendunt; eaque faciunt universalialia; ita ideæ plures paulatim res similes extendunt, faciuntque universales: Accedit inde etiam abstractio,

qua ex ideis *circumstantiæ particulares* quasi refecantur, æque; ut putatur, *universales* remanent. Ita ex idea hujus hominis dum *circumstantias*, quæ individuum constituunt, refecamus, remanet idea *naturæ humanæ generica*.

Duo autem errores ex hujusmodi ideis nasci possunt. Primus, ut credamus *celeres perceptiones rerum similium* unicam esse & universalem ideam: alter ut ex ideis universalibus nobis persuadeamus & naturas quasdam universales extra nos existere. Hinc natæ portentosæ illæ opiniones. I. *Existere exemplaria quædam æterna universalis extra Deum*. II. *Plurimas esse naturas universales, animalis, e. g. hominis, plantæ, metalli, similes*. III. *Unicam esse & individuum in omnibus corporibus materiam, eamque esse indivisibilem, & immutabilem*. IV. *Ipsam justum, ipsum bonum, ipsum pulchrum esse naturæ suæ universalis & æternæ, & sexcenta alia ejusdem originis*.

§. IX.

JAm vero ex ideis *relativis* non pauci nasci solent errores, dum aut relationes non percipiuntur, aut non rite accipiuntur. Major pars vocabulorum & idearum relativa sunt. Ita *doctus, eruditus, perspicax, astutus, malus, bonus, dives, potens, magnus, parvus, pulcher, deformis, dulcis, amarus, & infinita alia*, ne sim longior, relationem continent *locorum, temporum, personarum, morum*. E. g. qui in barbarie Europæ dicebatur *doctus, & perspicax*, nunc audiret *ignarus, & stupidus*. Quæ erant *magnæ copię Romuli* tempore, nunc essent manipuli. Qui inter barbaros est *humanus*. Italis aut Gallis nunc esset *barbarus*. Quum mores depravati sunt, qui minus est *corruptus, probus, sanctus, & divinus* aliis reputatur. Quæ capacitatem nostram superant, *miracula* appellamus. Hinc vetustæ gentes tamquam Deos habuerunt eos, qui aut literis, aut virtute alias superabant.

§. X.

§. X.

His generatim observatis, sequentes canones statuendos censemus.

I. *Ideæ simplices ne definiantor: obscurantur enim (a). Definiantor vero quam accuratissime notiones composite.*

II. *Ideas phantasticas diligenter perspicito, & ab ideis simplicibus & adventitiis discernito.*

III. *Ne putato ideis phantasticis objecta sui generis respondere.*

IV. *Caveto ab ideis abstractis & universalibus: ex iis de rebus ipsis ne judicato.*

V. *Observato utrum idearum associationes phantasticæ sint, an naturales, & inter utrasque acute distinguo.*

VI. *Ex Systematibus phantasticis ne philosophator: philosophator potius ex experimentis perpetuis, & sensu optimorum communi. Ne ex systematis universum tibi confugas, sed ex universo stude ut systemata nascantur.*

VII. *Nullas ideas putato adæquatas, nisi quum certus es nihil in re superesse, quod ignores: & ex ideis inadæquatis ne temere judicato de essentiis substantiarum, de viribus activis, de causis & finibus rerum.*

VIII. *Conator ideas obscuras, confusas, inadæquatas, studio, experientia, meditatione claras, distinctas, adæquatas efficere. Idcirco operam dato capacitati, perspicacitati, & judicio augendis & formandis.*

IX. *Ne putato te doctum fieri posse ex commercio cum solo mundo intelligibili; sed potius cum mundo naturæ & hominum, nisi tu recta in fanaticum ire velis. Contemnito ergo Logicam illam, qua vir quidam doctus (b) gloriatur sine experientia & lectione in mundo intelligibili omnia sciri posse, deque omnibus judicari.*

G 3.

CAP.

(a) Nam si ipsas simplices ideat definire oporteret, nullus esset definiendi finis, nec controversiarum certum ullum statumque fundamentum, uti ipse Sextus Empiricus observat. In Hipot. Pyrrohon.

(b) Doria in libro cui titulus, Saggi d'un libra inedito, &c.

*Prima & generica divisio objectorum idearum
nostrarum, atque sapientiæ humanæ.*

§. I.

Nemo a me hoc in loco expectet, ut vocabula quædam consarcinem, quæ *categorias*, & *prædicamenta* Peripatetici vocant, & in quibus explicandis magna Scholasticorum Logicarum pars occupatur. Sunt enim meræ ineptiæ, nec in promovendo sapientiæ studio vel hilum proficiunt. Noxia quoque sunt: nempe, ut perspecte Auctor Artis cogitandi animadvertit, *assuefaciunt adolescentes ad inania vocabula pro sincera scientia acceptanda*. Illa igitur mihi, quoad Elementorum sinunt angustia, propositum explicare, quæ sapientiæ humanæ partes, qui fines, quæ studendi rationes & viæ; quæ, ut a ceteris Logicæ Scriptoribus omissa, ita omnium sunt maxime necessaria in Juventute instruenda atque regenda,

§. II.

Totius sapientiæ humanæ tres partes veteres statuerunt, Rationalem, Naturalem & Moralem. Nulla aptior divisio fieri potest, uti ostendit Lockius (a). Prima docet recte ratiocinari. Ea est ars *Logica & Critica*. Altera rerum omnium *naturas, proprietates, causas, fines, ordinem*, quoad mens humana capax est, investigat. Tertia inquit in leges & mores hominum. De studio Philosophiæ rationalis non est ut plura loquamur: satis sunt quæ diximus in prolegomenis. Naturalis igitur & Moralis partes primum per summa capita, dehinc paullo distinctius persequemur. Omnes autem hujusmodi studia *philosophiam* appellamus, & studentes *philosophos*. Quisquis enim aliquid scire studet *Philosophus* est, & studia omnia *Philosophia*.

§. III.

(a) *Lib. 4. cap. 21.*

§. III.

Naturalis Philosophia tres continet præcipuas partes, Metaphysicen, Physicen, & Mathesim. Metaphysice de primis & æternis rerum causis; Physice de secundis; Mathematicæ de lineis & numeris, idest abstractis rebus, differit. Metaphysica in tres alias distribuitur, *Ontologiam*, *Pneumatologiam*, *Theologiam*. Physica vero dividi hodie solet in *generalem*, & *particularem*; quarum illa continet quæcumque generatim ad corpora, & motum spectant; hæc in particularium rerum corporearum naturas & causas inquirat. Mathesis dividitur in Geometricam, & Arithmeticam: illa lineas, hæc numeros spectat.

§. IV.

Moralis est vel *theoretiva*, vel *practica*, seu potius *generalis*, & *particularis*. Illa continet *Jus naturæ* & *Gentium*, *jus divinum positivum*, *jus Canonicum Ecclesiasticum*, & *jus Civile*: hæc vero tractationes de *affectionibus*, de *virtutibus*, & de *vitiis*. Logici munus est adolescentes instruere, qua ratione ad hæc studia præparandus sit animus. Scio generatim & particulatim plurimos scripsisse de studiorum ordine & regimine. Nos pro munere nostro pauca & meliora seligemus, librosque indigitabimus, ex quibus eadem copiosius disci possint.

C A P. V.

De Studio Metaphysicæ.

§. I.

Metaphysica, quæ & *prima Philosophia* vocatur ab Aristotele, est ea disciplina qua *constituuntur causæ & principia prima & generica rerum omnium æternarum, factarum, & possibilium; & de spiritibus atque Deo disputatur*. Ea in tres partes, ut diximus, distribui solet: Prima est *Ontologia*. In ea agi solet de *Ente* generatim. Ea proprie est *prima & maxime generica Phi-*

philosophia. Ejus muneris est tradere prima & generalia principia, quibus ceteræ disciplinæ omnes inædificentur; primasque rerum omnium causas, in quo a Physica distat, quæ causas immediatas & secundas vestigat. Hanc philosophiæ partem præ ceteris Scholastici coluerunt. Quum autem Philosophi isti magna ex parte judicio destituerentur, utut acutissimi, eam in inanem sophisticem converterunt. Christianus Vvolffius summus Philosophus tomo uno in 4. hanc scientiam complexus est (a). Nos in priori metaphysicæ nostræ parte principia *Ontologiæ* (idest scientiæ quæ de universo generatim agit) per summa capita explicuimus. Hæc disciplina meditatione magis *naturæ* quam ulla alia via discitur. Videri possunt quæ scripsimus in citati operis prolegomenis (b).

Illud in hujus studio cavendum est, quod sæpius monui, *ne essentia notionales pro realibus habeantur*. Quod

quum

(a) Idem vero Philosophus ceteras omnes *Metaphysicæ* partes luculentissime persecutus est. Nam præter *Ontologiam* tom. 1. in 4. Scripsit & *Cosmologiam* tom. 1. in 4.: *Psychologiam* Empiricam tom. 1. in 4. in qua de natura animi ex ejus phænomenis differit: *Psychologiam* Rationalem tom. 1. 4. ubi *Synthetica* Methodo, quæ per *analyticam* in Empirica detexerat, explicat, præcipue vero *Systemata* de unione mentis & corporis expendit: Primam partem *Theologiæ* Naturalis, in qua ex mundi phænomenis de natura Dei agit; tom. 1. 5. Hoc opere & rerum varietate, & neritate, & sublimitate valde delector: Secundam partem *Theologiæ* Naturalis, ubi *Cartesium* imitatus de Deo disputat a prioribus; tom. 1. 4. Hoc in opere aliquantulum genio indulxit: Primam partem *Philosophiæ* Moralis, quæ *Juris æterni* & *naturalis* principia continet. Atque hæc sunt opera *Metaphysica* Vvolffii, quæ literis extant latinis, quæque ad nos devenerunt. In his autem omnibus, præter quædam alia, at illud certe ferendum non est, virum magnum in id unice incubuisse, ut *Leibnitium*, quantus quantus erat, exprimeret, invita quaque rerum natura.

(b) Ex recentioribus *Ontologiam* non certe inepte dedit *Johannes Clericus*.

quum Spinoza non cavisset in Ethica sua, in Pantheismuni evasit: ut non melius confutari id possit opus, quam detegendo frequentes paralogismos, quos auctor admittit, dum ab *essentiis notionalibus* nimis confidenter ad *reales argumentatur*, seu, ut Scholastici loquuntur, *ab ente rationis, ad reale*.

§. II.

Altera Metaphysicæ pars est *Pneumatologia*. Ea deserit de Spiritibus. Spiritus autem nomine intelligimus animas humanas, & Angelos quum bonos, tum etiam malos. Itaque hæc pars in duas alias distribui posset, *Psychologiam*, & *Demonologiam*, quarum illa, de *animis humanis*, hæc de *Dæmonibus*, idest bonis & malis Angelis agat. Et Psychologiæ studium ex intimo nostri sensu, suscipiendum est: Etenim animus noster nemini melius notus esse potest, quam nobis. Juvat autem observare aliorum hominum operationes, quibus animus se prodit, harumque operationum observationes iis, quæ in nobis observamus, addere. Complectitur vero hoc studium res & natura sua difficiles, & infinitis philosophorum erroribus implicatas, quales sunt *incorporalitas*, *immortalitas*, *libertas*, *vires*, *ideæ*, *origo*, *memoria*, *habitus* animorum. Plerique in hoc studio revelatione quoque utuntur. Nec incite: Fatendum enim est horum plura *solo nature lumine sciri non posse*. Plures exstant egregii libri his de rebus scripti, quum ex nostris, tum etiam ex Hæreticis. Ex nostris Institutiones pneumatologicas dederunt Hamelius in Philosophia Burgundica, Purchotius, Le Grand, Regis, Claubergius, la Forge, & alii infiniti. Ex Eterodoxis Clericus, Buddeus in philosophia theoretica, Vvolsius in Psychologia *Empirica & Rationali*, qui prolixè ea de re disputat, aliique non pauci. Plura quoque de natura animorum sparsa reperias in Malebranchii libris de inquirenda veritate, & Lockii de Intellectu humano, & Poirreti variis.

§. III.

IN hoc studio duo cavenda sunt, *Fanatismus & Materialismus*. Sunt duo isti scopuli adeo evitatu difficiles, ut vix reperiās metaphysicum, qui in alterutrum non illiserit. Fanatismum voco eam sectam, in qua nimium animæ tribuitur, & omnia quæ cognoscimus, ex *ideis innatis*, *unione cum Deo*, *lumine Dei substantiali*, repetuntur. Materialisipsum vero eam, in qua nimium anima demittitur, fitque corporis affectio, idest omnis substantia incorporea aufertur. Pertinent ad priorem sectam Malebranchius, Poiretus, etiam Leibnitius & Vvolsius, & quicumque Idealismum profitentur, si ulli sunt, qui sic insaniunt. Ad alteram vero quum veteres Epicurei, tum recentiores Hobbesiani, Epicuri & ipsi de grege porci,

§. IV.

VEniamus ad Theologiam. Ea est disciplina, in qua *de Deo, divinisque rebus differitur*. Id autem fieri potest, faciendumque est, triplici via, *via nempe nature, via traditionis & via librorum divinatorum*. Et primum *naturæ* lumine de Deo ejusque attributis, de origine mundi & providentia, de Religione naturali, & præcipuis ejus capitibus, commodissime disputari potest. Hæc Theologia vocatur *naturalis*. De ea optime meriti sunt Beatus Thomas Aquinas prima Summæ parte, & in libris contra Gentes, Suarezius in Metaphysica, Cudvorthus in systemate intellectuāli, Parkerus in disputationibus de Deo & providentia, Clarkius in opere ejusdem inscriptionis, Buddeus de Atheismo & superstitione, Nievventitius de Deo, & quicumque recentiores Atheos oppugnare conati sunt, qui infinito pene sunt numero, & quorum pleraque opuscula collegit Burnet tomis VII. sub titullo *Defensio Religionis* (a). In primis autem hanc Theologiam profundissime & copiosissime persequutus est Vvolsius in *Theologia naturali methodo sci-*

(a) Vide Albertum Fabricium in *Bibliotheca Auctorum de religione contra impios*.

scientifica pertractata: quod Vvolffii opus omnium maxime facio. Nos in altera Metaphisicæ nostræ parte hanc theologiam per summa capita tradimus.

§. V.

IN hujus autem studio lente & caute incedendum, ne rationi nimium tribuendum, nec nihil. Nempe natura Dei innotescit quidem nobis rationis lumine, sed per ideas obscuras, confusas, inadæquatas. Quicumque igitur æquo nimius in his studiis rationi naturali indulgent, non possunt non in gravissimos errores prolabi. In primis autem cavendum est, ne de natura Dei ex ideis rerum nostrarum judicetur, Deoque tribuantur ea, quæ humanæ naturæ conveniunt. Ex hoc enim fonte ridiculi Ethnicorum errores manarunt, quibus omnes humanæ imperfectiones naturæ divinæ tribuebantur. Inde quoque provenit Materialismus Spinozistarum, qui mundum cum Deo miscuerunt, Deumque fecerunt immensum animal ex immensa cogitatione, & immenso corpore conflatum. Nullum est studium hoc periculosius, si rite institui nesciatur: nam homines parum acutos, quique rationem contemnunt, superstitiosos: nimium confidentes, impios & Atheos efficit (a). Exigit etiam studium hoc mentes ab omnibus affectibus repurgatas: nam qui affectibus agitantur, nec tantæ contemplationi apti sunt, & hac disciplina ad libidinem suam excusandam abuti solent.

§. VI.

QUum via traditionis theologia conficitur *traditionaria* vocari potest. Id autem fit consulendo quid diversæ per orbem nationes quum veteres, tum recentiores de Deo senserit, sentiantque. Nam quanquam Nationum theologia haud dubium absurdas, ineptasque; sententias, de Deo & rebus divinis tenet; plurima tamen sunt

(a) *Legatur liber primus questionum Alnetanarum Huetii.*

sunt quæ Nationes vera docent, & quæ aut naturæ lumine, aut majorum traditione habent, quæque Theologo plurimum prodesse possunt. Ei igitur, qui absolutus theologus futurus est, Theologiæ Gentilis studium inutile non erit. Est autem Gentilis Theologia ex Varronis partitione, triplex, *Poetica*, *Civilis*, & *Philosophica*. Prior est, quæ reperitur in Poetarum carminibus: altera quæ a populo usu consecrata est, quæque haud multum a Poetica differt; nam, ut observat Arnobius, nunquam Poetæ, qui sensa vulgaria sectantur, de Diis scripsissent, quæ populo improbari vidissent. Est hæc theologia corruptissima, ut ipsi Gentiles agnoscebant, hodieque agnoscunt. Sed diligens veritatis investigator etiam ex hac, plurima rei theologicæ utilia expiscabitur (a). Philosophica theologia ea est, quam in scholis suis Philosophi docebant, quæ varia est pro sectarum varietate: sed & hæc depravata est Atheismo, ut puto. Philosophi enim ferme omnes & materiæ æternitatem dederunt, & Deo ademerunt libertatem, inducto Fato: Quæ duo Pantheismi Spinozistici sunt capita.

§. VII.

PLures sunt iique optimi libri quum veteres, tum recentes, ex quibus Gentium theologia disci potest. Meliores sunt libri *Nationum*, si qui supersunt. Itaque Græcorum, Latinorumque theologia ex eorum Poetis, Historicis, & Philosophis petenda; nam plerumque nostri ex nimio erga nationes idololatrias odio, sententias depravant: augent nempe notiones, aut minuunt, oratorium potius, quam philosophicum in morem. Egyptiorum vero Chaldaeorum, Indorum, tum & Sabæorum, atque Magorum thelogiam ex Græcorum; Arabum, & Christianorum libris discedere necesse est: nulla enim eorum ad nos monumenta pervenerunt, si Zoroastris Persici libros

(a) *Quædam enim vera latent in veteri mythologia. Aperte demonstrarunt viri docti, plures Gentilium fabulæ res Patriarcharum, aut Hebræorum exprimere: quamquam nolim hæc diduci ad omnia, in quo a multis peccatur, in primis a Bocharto & Muetio viris aliquin eruditissimis.*

brosc excipias, quos Thomas Hyde vetustæ linguæ Persicæ callentissimus, superesse a Magis servatos, testatur. Legenda igitur sunt, Oratio ad Gentes Clementis Alexandrini, Eusebii Cæsarensis Præparatio Evangelica. Arnobius, & Lactentius adversus Gentes, Augustini libri XXI. de Civit. Dei, Vossius de Theologia Gentilium, Phannerus in Systemate theologiæ Gentilis purioris, Stanleyus de Philosophia Caldaica, Huetius in Demonstratione Evangelica, & in Quæstionibus Alnetanis, Burnentius in Archeologiis, Thomas Hyde de veterum Persarum Religione. Recentiores Orbis Religiones plurimi persecuti sunt accuratissime. Dignus qui legatur Salmon: ex omnium enim viatorum libris egregia selegit: & clarissime exposuit. Legendus autem est Gallice, Itala enim versio infinitis referta est erroribus.

§. VIII.

Sed moneo tirones, ut magna acribia utantur in investiganda nationum religione ex exterorum libris. Omnes enim ferme, qui de exterorum religione commentantur, turpissime hallucinantur. Id vero provenit, I. quia cum natione illa diuturnam familiaritatem non habuerunt. II. quia a populo, non a peritis religionem illam didicerunt. III. quia de illa ex-notionibus religionis propriæ judicarunt. Hinc factum est ut quidam viatores absurdas, aut ineptas exteris opiniones tribuerint, aut popularem superstitionem toti genti affixerint. Primæ post diluvium nationes nulla templa, nullas imagines, nullas statuas Deorum habebant: Deum mente pura & sub Cælo, idest in magno Naturæ templo, colebant. Paucas etiam ceremonias seu ritus externos habebant (a). Hæc religionis forma diu perduravit apud quosdam Asiæ & Africæ gentes. Interim Græci, Romanique, qui templis & idolis undique circumdabantur, quum has gentes primum noverunt, atheismi accusarunt? Eodem modo priorum Christianismi sæculorum Gen-

(a.) *Aperte id de Persis scribit Herodotus: de aliis ex ipsis Sacris libris discimus.*

Gentiles cum Christianis egerunt eosque Atheos vocarunt, quod Nullos DEOS; nulla TEMPLA, nulla SACRIFICIA haberent (a): Jam vero popularis Gentilium opinio, in templo Hierosolymitano caput Arietis adorari a Judæis; quam falsa (b)? Quam solemniamentitur de Judæis Juvenalis (c)?

Quidam sortiti metuentem Sabbata Patrem,

Nihil præter nubes & Cæli lumen adorant:

Ex his alios metitor: Igitur ne facile historicis credito, dum exteras explicant religiones.

§. IX.

QUæ ex libris Sacris ducitur theologia, *revelata* dicitur; Sunt enim libri illi theopneusti, seu divinitus inspirati: Quamquam libros divinitus inspiratos omnes nationes præseferunt, Gentiles *oracula*, Magi *Libros Zoroastris*, Muhammedani *Al Koran*; alique alios; facile tamen est demonstrare solos Hæbræos, & Christianos hujusmodi libris donatos esse: Interim quæ observata sunt necessaria circa revelationem divinam dignoscendam, loco suo commodius examinabimus. De theologiæ revelatæ studio instituendo pro suscepto munere pauca addemus: nam qui plura cupit, adire potest Dupinum (d) Mabillonium (e), Fleurium (f); aliosque; qui id ex instituto egerunt.

§. X.

STUDium Theologiæ revelatæ *longum est, & difficile, & periculosum*. Longum, quia Theologus nedum *Scripturarum Sanctarum*; & *Ecclesiasticæ historiæ*; *Conciliorum* potissimum, tum & *Patrum doctrinæ* peritus sic oportet; Sed & *germanæ Philosophiæ*, & *Criticæ*, & *Linguarum orientalium*; & *profanæ etiam historiæ*. Ex his enim

(a) Justin. in Apol. 2. Minutius Felix in Octavio.

(b) Tacit. lib. v. histor. Joseph. contra App.

(c) Satyr. 14. v. 96.

(d) De Studio theologiæ.

(e) Schola Mabilloniana, & de Studiis Monasticis.

(f) De delectu Studiorum.

enim omnibus ad revelationem interpretandam, confirmandam, & adversus impios defendendam non parum utilitatis haurit. *Difficile* vero, quia res captum nostrum superantes ita tractare debet, ut nec in atheismum proruat; nec in superstitionem; qui sunt duo scopuli in re theologica cavendi. Quæ ex re etiã patet *periculosum* esse. Nam si quis aliis disciplinis errat, aut *risum*; aut, quod maximum est, aliorum *iram* incurrite potest: at in theologia revelata error in religionem redundat, atque ex eo miseriam, idest *mortem æternam*, parere potest.

§. XI.

QUicumque ergo huic studio animum intendere vult, primum linguas *Græcam*, & *Hebræam*, *Arabicam* etiã, si commode potest, discat: Ejus ratio est, quod non aliter ad intellectum Autographorum Sacrorum pervenire potest. II. Et *Criticen*: Facit enim utramque paginam *ars Critica* ad veterum quorumvis, Sacrorum potissimum librorum; *genuitatem*; *integritatemque* agnoscendam; III. Et *Chronologiam* atque *Historiam universalem*; sine quibus res Hebræorum intelligi vix possunt. IV. Et *mores* atque *Instituta* Reip. Hebræicæ. V. Et *historiam Ecclesiasticam*, ex qua attente curet ut expiscetur Ecclesiasticarum rerum *origines*; *fata*, & *progressum* dogmatum; aliarumque doctrinarum theologicarum. VI. Optimos, sed paucos libros sibi comparet, & ordine atque studiose legat. VII. Accedat ad hoc studium animo affectibus repurgato; & non partium, sed veri amante. VIII. Conjungat cum hoc studio studium Theologiæ *naturalis* & *traditionariæ*. Libros autem Theologo quum necessarios, tum utiles, ego ad quinque classes referre soleo. I. Textus Sacros Hebræos, Græcos, Latinos; eorumque *Concordantias*. II. Notatores, & Commentatores. III. Historicos & Criticos. IV. Majora Theologorum opera & opuscula de rebus singularibus selecta. V. Institutiones ad usum & tironum, & Scholarum. Qui autem ex singulis classibus sint optimi, in eorum gratiam, qui in his studiis proficere volunt, ad calcem hujus opu-

opusculi dicetur. Interim legatur Dupinus de studio Theol.; Mabillon. in Schola Monastica, Lamy in Conversat. circa Scientias, Calmetus ad frontem Dictionarii Sacri.

C A P. VI.

De studio Physicæ, & Matheseos.

§. I.

TRes statuo Physicæ partes, *historicam*, *theoreticam*, & *præcticam*. Prima & præcipua est *historica*. Ea colligit phænomena rerum omnium naturalium, idest quidquid sensibus observari potest circa corpora quum animata tum etiam inanimata. Physicæ igitur theoreticæ præponenda est cognitio historię *lapidum*, *metallorum*, *aliorumque mineralium*, *ignium*, *fontium*, *plantarum*, *herbarumque*, *animantium brutorum*, *hominum*, *meteororum*, *astrorum*, & *omnium earum rerum*, quæ sensibus subesse possunt. In hac autem historia colligenda notanda sunt *loca*, *tempora*, *rerum partes*, *mutationes*, *effectus*, idque diligente studio. Potest hæc historia vel itineribus & experimentis colligi, vel ex libris aliorum hauriri. Prior utilior est: nam ex posteriore decipi possumus; quod scilicet facile fuerit ejus conditoribus quædam omittere, aut ea ex alio adspectu referre. Plurimi extant libri historię hujus physicæ quum recentiorum, tum etiam veterum. Ex veteribus hujus generis plurimis supersunt quæ *Aristoteles* de *animantibus* scripsit, *Seneca* in *questionibus naturalibus*, *Plinius* de rebus ferme omnibus, *Dioscorides* de *Planetis*, *Galenus*, & alii *Medici* de *homine*, & aliis rebus rerum *rusticarum* *Scriptores*, aliique. Sed *Plinii* in plerisque suspecta fides, non enim omnia ipse observavit; & pleraque ex auctoribus sublectæ fidei hausit: Itaque ejus narrationes accurate examinandæ sunt. Ex recentioribus legendi cum primis itinerari *Thevenotii*, *Turnesfortii* aliorumque, historia rerum præsentium *Solmoni*, *experimenta*
natu-

§. II.

IN Confesso est Physicæ Studium sine historia naturali ne latum quidem unguem procedere posse. Hinc Scholasticorum Physica jacuit per plura secula sterilis ob historię potissimum naturę defectum, ut apposite observat Verulamius, qui omnium maxime & inter primos hoc studium promovit. Quocirca ii mihi disciplinas physicas rite tradere censentur, qui qualibet in re primo loco observationes & experimenta colligunt; inde vero rerum naturas perscrutari pergunt. Hanc sibi methodum proposuit Joannes Clericus in Physica, & omnium maxime Sturmius in *Physica*. Electiva, cujus opus Physicæ studiosi ut continua versent manu, moneo. Sed & eodem modo Physicam suam scripsit Vvolsius Germanice, uti ex parvis *Thumingii* Institutionibus discimus. Præterea Graverlandius in *Elementis Physicæ Newtonianæ*, & omnium accuratissime Muschembroekius, quum in *Elementis Physicæ*, quæ Gallice prodierunt, tum in *Latinis* (a) ob eandem rem commendandi sunt plurimum. Sed rerum mathematicarum notitia juvenes horum lectores instructi sint oportet: sunt enim illi rebus ad has disciplinas pertinentibus referti.

§. III.

IN eo autem magna diligentia opus est, ut ex *physica historia*, *theoretica* rite ducatur. Est autem *Physica theoretica* & *universalis* ea, in qua generatim de corpore, motu, motusque legibus disputatur. Solent hanc physicam *particulari* præponere: quod non placet quibusdam (b). Nascitur enim, inquirunt, *theoretica* ex *historica*:

H ergo

(a) *Hæc brevi typis Neapolitanis prodibunt, aucta, ornataque quum elaboratis viri doctissimi Josephi Orlandi Notis, & Institutionibus Astronomicis; tum duabus nostris disputationibus, De rerum corporearum origine & constitutione, & De anima brutorum.*

(b) *Clerico.*

ergo historica præponenda. Sane, addunt, ii, qui Physicas theoreticas scripserunt, Robaltus, Nevvtonus, & Gravetrandius, Muschembroechius, alique, coacti sunt passim naturalem ordinem interrompere, ut experimenta spargerent, & theorematibus suis præponerent. Sed quoniam de *tradenda* Physica agitur; non de *conficienda*, parum id referre puto. Immo Tyrones, qui non ipsi invenire, sed inventa discere debent, ordinatius ducuntur præposita Generali.

§. IV.

Physicam practicam appello eam; quæ in usum vitæ deducitur, cujus potissima pars est *Medicina*. Sed & Medicinæ duæ partes statui possunt *theoretica una; practica altera*. Illa naturas rerum viresque vestigat; tum & hominis potissimum partes; morbos, morborumque causas: hæc rebus utitur ut morbis medeatur. Utraque semper difficillima visa est. Nam prior incertâ est: latent enim rerum naturæ; vires, partes, morborumque causæ. Ex quo sequitur ut & posterior sit incerta, magna saltem ex parte. Qui enim nec morbum certo nescit, nec medicamentorum vires exacte metiri potest; is haud dubium mederi cum certitudine non potest. Medicorum meliores id non diffitentur: itaque nunc eo redacta est Medicina, ut compositiora medicamenta exoleverint, rebusque simplicissimis & paucis utantur Medici. Quinam libri Medico potissimum legendi sint, docebunt Medici. Mihi tria videntur Medicinæ studiosis commendanda esse. I. Historiæ naturalis improbum studium. II. Anatomix peritia. III. Sedulum & diuturnum rerum corporumque humanorum experimentum. Cavendus igitur Medicus, qui tres has dotes non habeat.

§. V.

Matheseos Studium & Physicæ necessarium est, & vitæ atque societati hominum. Mathesis est vel *Geometrica*, vel *Arithmetica*. Illa lineis, hæc numeris regitur. Ejus usus est, I. ut mentem ad recte ratiocinandum *capaciorem*, & *aptiorem* efficiat, II. ut demon-

stran-

strandis theorematibus physicis inserviat, III. ut artes mechanicas promoveat. Sane sine Matheſeos studio homines alioquin multijugæ lectionis & meditationis inertes sunt, & confusi: perspicacissimi vero; & perspicui, qui mathematicis sunt innutriti. Deinde theoremata Staticæ, Hydrostaticæ, Nauticæ, Opticæ; Dioptricæ, Catoptricæ, Astronomiæ, usu Geometriæ, & Trigonometriæ facillime demonstrantur & intelliguntur. Tandem artes plures mechanicæ & vitæ utiles; ut *Ars perspicillorum*; *Arts horologiorum*; *Nautica*, *Architectonica*, *Agrimensoria*, *Bellica* ex Matheſi plurimam utilitatem accipiunt.

§. VI.

CONTRÖVERSUM est inter doctos, utrum Geometriæ studium suscipiendum sit Methodo Euclidea; an recentiorum Gallorum: Euclidean plurimi præferunt, tamquam menti ad difficillima formandæ aptiorem. Ego sic censeo, tirones elementis Lamy quum Matheſeos Generalis, tum Geometriæ manuducendos; deinde methodo Euclidea subagendos: tandem etiam ad Apollonii, & Archimedis, aut aliorum qui sublimiorem mathematicæ partem excolunt, lectionem inducendos. Libri ad hanc rem apti sunt Elementa Lamy; Tacqueti, & magnum Matheſeos corpus Christiani Vvolſii. De Studio Matheſeos legatur Vvolſius tom. v. Elementorum Mathematicorum. (a):

C A P. VII.

De Studio Ethicæ.

§. I.

NULLA sunt studia aut magis necessaria, aut magis utilia, aut magis suavia; aut quæ a viris doctioribus magna cum laude tractata sint, quam Ethicæ. Est enim hæc quasi ceterarum disciplinarum fructus:

H 2 fine

(a) Adeatur & Epistola viri Cl. Josephi Orlandi de Studiis Physicis & Mathematicis ad calcem hujus opusculi adjecta.

sine hac ceteræ disciplinæ pondus sunt iners. Veteres quum totam philosophiam agro frugifero comparassent, *Logicam* sæpi & maceriæ circumjectæ, *Physicam* plantis, *Ethicam* fructibus similem esse dixerunt. Continet nempe hæc totam vitæ & hominum societatis rationem. Ad rem Persius Satyra 3.

*Discite o miseri & causas cognoscite rerum,
Quid SUMUS, & quid VICTURI GIGNIMUR, &
ORDO*

*Qui datus, aut METÆ quam mollis flexus & UNDE,
Quis modus ARGENTO, quid fas OPTARE, quid asper
Utile nummus habet. PATRIÆ, CARISQUE PRO-
PINQUIS*

*Quantum elargiri deceat; QUEM te Deus esse
Jussit, & humana qua parte locatus es in re (a).*

S. II.

Sed rite tamen hæc studia instituenda sunt: nam ut recte suscepta vitam & societatem & servant, & beatam efficiunt; ita non recte instituta, perturbant atque evertunt. Ut autem rite instituantur præmittendum est eis. I. Studium *Physicæ*. II. *Metaphysicæ*. III. *Historiæ humanæ*. Nempe ex *Physica* & *Metaphysica* discimus, hoc universum esse factum a summa quadam & perfectissima atque potentissima Causa, II. Ab eadem summa ratione & providentia regi. III. Nihil adversus illius voluntatem faciendum. IV. Nihil moliendum adversus universi ordinem, & potissimum vitæ & societatis hominum. V. Ei deberi a Creatura rationali amorem, obsequium, servitutem, præces, quæ nomine religionis veniunt. Pauca enim hæc principia sunt totius morales fundamenta. Ex his accurate consequentia ad Vitam, Societatem, & Religionem pertinentia deducenda sunt. Historia vero humana ad hoc comparanda est, ut cognoscatur, I. ex sensu communi, quænam natura vetentur, aut præcipiantur; impossibile enim est ut hæc sese non pro-

(a) Legatur Tullius sub initium libri primi de Officiis, Seneca ep. 88. Barbeiracius præf. ad Pufendorfii versionem de Jur. Nat. & Gent.

prodant in tanta hominum multitudine & varietate. II. Ut observentur inclinationes naturæ humanæ, ex quibus regulæ confici possint pro moribus conformandis. III. Ut variarum Societatum, Morum, Institutorum, & Legum Civilium origo, & progressus intelligatur.

§. III.

ET primum quidem Moralis studium versari debet in cognitione Juris naturæ & gentium. Spectat jus naturæ. I. Deum. II. nosmetipsos. III. alios. Primo ergo quæ Deo debemus, deinde quæ nobismetipsis, tandem quæ aliis, discenda sunt, quæ efficiunt tres Ethicæ partes. I. *Theologiam practicam*. II. *Monasticam*. III. *Politica*. Hæc scientia acquiri potest etiam sine libris, sola contemplatione naturæ quum universi, tum nostri, idque tam certo quam Geometria, ut demonstrat Lockius (a) & Barbeiracius (b). Sunt tamen libri quidam his de rebus a viris doctissimis scripti. Et pro tironibus facti sunt Pufendorffii *de officio hominis & Civis*, Buddei *Philosophia practica*, Heinnecii *Philosophia Moralis*, & *Elementa juris Naturæ & Gentium*. Iis autem qui paullo sunt provecti (semper intelligo dum per Ecclesiam liceat) commendari possunt Grotius *de jure belli & pacis*, Seldenus *de jure Naturæ & Gentium juxta disciplinam Hebræorum*, Pufendorffius *de jure Naturæ & Gentium*. Perspectæ autem in his libris legenda sunt quæ de juribus Summorum imperantium in Ecclesiam traduntur ex Sectæ suæ præjudiciis.

§. IV.

TUm vero opera danda est Jurisprudentiæ divinæ *passiva*. Ea discenda est ex Sacrarum Scripturarum lectione, potissimum Novi testamenti. Si quis autem a lectione Scripturarum incipere nolit, is incipiat a Cathéchismo Romano, quo nullum librum his de rebus doctiorem habeo. Omnibus certe Theologorum systematibus præferendus est Cathéchismus Romanus.

H 3

Ad-

(a) *Lib. 4. cap. 3.*(b) *Præf. ad Pufendorffii versionem Gallicam.*

Addendi & libri duo de Sermone Domini in Monte beati Augustini. Sunt & plerique alii libri qui aut Decalogum interpretantur, aut Moralem Christianam persequuntur, quos facile Philosophus scire & comparare potest. Ex ipsis Hæreticis Moralem Christianam luculenter exsequuntur & clare Episcopus in *Institut.*, Limborchius lib. v. Theologiæ Christianæ, & Buddeus in Theologia Morali, præcipue 2. part.

§. V.

PRæterea studio juris Canonici incumbendum. Sunt ea de re Institutiones pro tironibus scriptæ a plurimis veluti a Lancellotto, quæ editæ sunt cum Notis Doviatii, a Cabassutio, a Fleurio, a Gravina, nuper autem a viro nostro longe erudito Neapolitani Juris Regio professore Josepho Pascali Cyrillo: tum & majora opera, quorum Corpus Juris Canonici Van-Espen præ omnibus erit. Quum autem jus Canonicum constet Conciliorum canonibus, Patrum Sententiis, Romanorum Pontificum rescriptis, qui hanc Scientiam affectat is. I. Historiam ecclesiasticam legere debet. II. Et Conciliorum gesta atque Canones. III. Et patrum opera, saltem veterum & præcipuorum. IV. Et PP. Romanorum quæ extant. Hadendæ sunt collectiones canonum a variis editas, & Commentarii in hos Canones virorum illustrium. Hæc omnia facile Philosophus discet ex Van-Espen, aut aliis.

§. VI.

AD hæc addendum est studium Juris Civilis. Est autem Jus Civile quod non totius generis humani, sed unius tantum Reip., aut Regni, aut Civitatis proprium est. Sed quum in majori Europæ parte vivamus partim Romanis, partim propriis legibus & consuetudinibus; utrumque studium jungendum est, & *Romani juris*, & *proprii*. Jus proprium vix ulla est natio quod collectum non habeat, aut privatis aut publicis collectionibus. Jus Romanum discimus primum ex Collectionibus Justinianeis, aut aliis: deinde ex Institutionibus & Com-

Commentariis illustrium Jurisconsultorum, quæ omnia passim prostant. Plurima sunt autem Jurisconsulto necessaria. I. Juris naturæ & Gentium Scientia. II. Romani Imperii, Romanarumque antiquitatum historia, sine quibus jus Romanum vix intelligi potest. III. Historia propriæ Reip., ejusque legum. IV. Scientia Theologiæ & juris Canonici, ut sciat Ecclesiam cum Imperio qua ratione conciliari possit, & ne alterius jura lædat, dum alterius æquo nimius promovet. V. Ars Critica: quandoquidem esse Legum interpret debet. VI. Etiam aliarum Rerump. & Regnorum leges, quibus facile æquitas dignosci possit. VII. Ars Oratoria cum omnibus iis quæ hanc aut antecedunt, aut sequuntur: quippe Orator futurus est.

§. VII.

Cum his studiis conjungendum est Studium *virtutum, morum, affectuum, propensionum animi, & similium*. Id autem instituitur partim ex meditatione eorum, quæ in cujusque animo eveniunt; partim ex observatione aliorum: partim etiam ex lectione Historicorum, & librorum, qui a viris doctis his de rebus scripti sunt. Et quod ad libros spectat primo loco legendi sunt qui naturam *affectuum & morum* physice explicant, quales Cartesius de *passionibus animi*, Vvolsius in *Psycologia Empyrica*, Claramontius de *conjectandis animi moribus*, & quæ in Ethicis suis ceteri Philosophi monuerunt. Ex veteribus plurima his de rebus passim disputant Plato, Aristoteles in *Moralibus*, Theophrastus in *Characteribus*, Cicero in *Tusculanis lib. 4. & 5.*, Seneca in *epistolis*, alique. Secundo vero loco commendandi sunt libri, qui de moribus & virtutibus disserunt. Tirones studiose legant *aureos* Ciceronis libros de *officiis*, Beati Ambrosii opus ejusdem inscriptionis, *Epistolas Patrum*, *Colloquia Erasmi*, *Specimina moralia Nicolii*. Qui paullo sunt provecti etiam veteres *Tragicos & Comicos*, & *morales alios* libros non gravabuntur legere. Plurima enim in illis egregie dicta sunt & explicata. Addent *Homilias Patrum*, potissimum *Chrisostomi*, quæ in hoc genere vere

sunt aureæ. Non est hinc difficile ceteros libros discere. Sunt enim his de rebus scripti & plurimi & docti, quos, ne sim longior, omitto. Atque hunc in modum nobilissima hæc scientia, & unice necessaria disci potest; non jam ex ineptissimis quibusdam libris, quos Casuistæ nulla harum rerum scientia dictarunt; quique veram moralem labefactarunt, ut ipsi Romani Pontifices gravissime queruntur.

C A P. VIII.

De vocabulorum natura generatim.

§. I.

Magna Sapientiæ humanæ pars in hoc posita est, ut aliorum cogitationes intelligamus. Quum autem id fiat *vocabulorum* potissimum ope, hæc prima ratio est, qua Logicus de vocabulorum *natura, usu, & interpretatione* jure quodam suo differat. Est & alia: nempe Logica etiam ad docendum comparatur: quod quum vocabulorum usu fiat, ut de vocabulis Logicus præcipiat, necesse est. Accedit tertia: quod nimirum vocabulorum tractatione, quæ ad animi notiones pertinent, clarius explicantur: sunt enim notiones cum vocabulis quasi natura conjunctæ & colligatæ. Egerunt ea de re Logici ferme omnes: sed aut barbarum in modum; & sine ulla utilitate, ut plerique Scolasticorum; aut non satis apposite, si Lockium, & Clericum (a) excipias: quorum tamen prior sine ulla necessitate ad modum prolixus extitit & perturbatus. Nos pauca & meliora eligemus.

§. II.

Ex omnibus animantibus solus homo multiplici varioque sermone præditus est; idcirco, quod is solus ad societatem factus est, quæ sine sermone stare non potest. Nam quanquam & cetera animantia societatem

quan-

(a) Lockius toto libro 3. de *Intell. hum. Clericus in Arte Crit. part. 2. Sect. 2.*

quandam inter se inire videntur, & vocibus quibusdam se intelligere, nullas tamen habere societatis leges, nullumque proprie dictum sermonem, in confesso est. Hinc soli homini organa ad sermonem accommodata sunt facta. (Quod magnam Dei erga hominem curam & providentiam demonstrat.)

§. III.

DE sermonis origine disputarunt jam olim acerrime Philosophi. Epicurei qui sponte sua homines e Tellure natos censuerunt, in ea fuerunt opinione, homines illos elingues paulatim aut externos sonitus imitatos esse, aut necessitate sese explicandi in quosdam sonos prorupisse, quos deinde *commodo*, & *delectatione* docti auxerint, atque expoliverint. (a). Audiendus est Lucretius Epicureorum Patronus.

*At varios lingue sonitus natura subegit
Mittere, & utilitas expressit nomina rerum.
Non alia longe ratione, atque ipsa videtur
Protrahere ad gestus pueros infantia lingue,
Quum facit ut digito, quæ sint præsentia monstrent.
Proinde putare aliquem tum nomina distribuisse
Rebus, & inde homines didicisse vocabula prima,
Disperere est (b)*

Si homines e Tellure geniti essent, nihil dici probabilius posset: at quum id falsum sit, frustra se torquet Epicureus ille. Sed data etiam illa hypothese, argumentum ei facile qui reggeret:

*Præterea si non alii quoque vocibus usi
Inter se fuerant, unde insita notities est
Utilitatis? Et unde data est huic prima potestas,
Quid vellent facere ut scirent, animoque viderent?*

§. IV.

Alii in ea fuerunt opinione, primos homines suapte natura loquutos, & quidem linguam, cujus vocabula

(a) Vide Diodorum Siculum lib. 1.

(b) Lib. 5. de natura rerum. Adde Laertium lib. x. & Vitruvium de Architect. lib. 2. cap. 1.

ab ipsa rerum natura expressa essent, (a) idest linguam quandam naturalem. Nec desunt qui putant infantes, si nullo hominum commercio educarentur, hanc linguam loquuturos, quod Psammeticus Aegypti Rex tenebat (b). Sed isti mihi desipere videntur. Nullum enim est in ulla lingua vocabulum, si paucas onomatopias excipias, quod aut ex ipsa rei natura videatur expressum, aut cum re ipsa necessariam connexionem habere: sunt enim vocabula *Soni articulati*, qui animi conceptus, seu ideas significant, & omnia sunt arbitraria, & *hominum placita*, ut loquitur Arnobius (c). Quod si natura nos ad linguam quandam adigeret, & qui sine societate educarentur, loquaces essent; & loquerentur Surdi, quorum lingua non est præpedita; & una esset omnium lingua; quæ nunc non eveniunt. Quam ob rem nullo certo nituntur talo, qui docent Adæ linguam hujus generis fuisse. Ne fingi quidem hæc naturalis lingua potest. Dubitandum igitur non est, quin primi homines a Deo vocabula docti fuerint; alioquin, ut probat Lamy (d) nullo modo unquam loquuti essent. Sed ea lingua paucis constabat & simplicissimis vocabulis, quæ duobus illis mortalibus satis essent. Consuetudine tandem aucta est (e). Verum quidquid sit de vetusta primorum hominum lingua, de qua ne divinari quidem aliquid possumus; certum, earum linguarum omnium, quæ nunc in usu sunt, arbitraria esse vocabula, & auctoritatem a populorum consuetudine habere.

§. V.

Quoniam ergo vocabula sunt arbitraria (ex §. 4.), hinc sequitur manifesto, non significare nisi *notiones ejus, qui vocabulis utitur*, adeoque dum vocabula interpretantur non esse referenda ad res ipsas, sed ad *notiones loquen-*

(a) Est Cratylæ sententia ad Platonem in Cratyllo.

(b) Apud Herod. lib. 2.

(c) Lib. 1. adversus Gentes.

(d) Art. de parler.

(e) Vide Ricchardum Simon. hist. Critic. veteris test. lib. 1. cap. 14. & 15.

loquentis aut scribentis. Quocirca errant, qui vocabula ex relatione ad res ipsas interpretantur, quasi tantum significant, quantum est in rebus, ad quæ indigitanda adhibentur. E. g. Dum quis pronunciat *animus*, ego, qui audio, vocabulum illud referre non debeo ad rem ipsam, putareque tantum significare, quantum est in re illa, quæ *animus* vocatur, sed tantum ad *notiones ejus*, qui eo vocabulo usus est, dum vocabulum interpretari volo. Quicumque hunc canonem non servant, auctores non intelligunt, sed aut *plus*, aut *minus*, aut *diversum*, quam auctor cogitat, intelligunt.

§. VI.

Sequitur secundo, iisdem vocabulis a diversis hominibus non easdem notiones affigi. Nempe eidem vocabulo ut plurimum hic affigit notionem ampliorem, alter arctiorem. E. g. omnes, qui latine loquuntur, adhibent vocabulum Deus ad Mundi opificem explicandum. At quum non omnes æque de Deo cogitent, sed alii aliis perfectius, eidem vocabulo non eandem omnes tribuunt notionem. Præterea res non easdem im præssiones faciunt in omnium animis, nec ex eodem *aspectu* omnibus cernuntur. Eam quoque ob rem fit, ut cum iisdem vocabulis notiones diversæ colliguntur, Hinc alter canon conficitur:

Vocabula ne ex propriis notionibus interpretator, sed ex ejus mente, qui iis utitur. Si secus faxis, decipieris. Infinitis erroribus, qui ex auctorum lectione manant, hoc canone obviam itur. Dici enim vix potest, quot ex aliorum libris falsæ sententiæ hauriantur, quotve aliis calumniæ inferantur, dum ex notionibus nostris eorum verba accipimus. Est autem hoc factu difficillimum, idcirco quod ita ab infantia verba accipere assuefacti sumus, & quod subdole notiones nostræ animo occursant, dum aliorum libros legimus. Quocirca non inscite vir quidam doctus pronunciat, tum demum fore ut libri recte intelligantur, quum homines ad eos accedunt animo pullis notionibus imbuti,

§. VII.

QUicumque autem vulgo loquuntur, aut scribunt, duo videntur supponere. I. Quod qui audiunt, aut legunt easdem ideas vocabulis affigant, quas ipsi affigunt. II. Quod vocabula non tam ideas, quam *essentias ipsas reales* significant. V. g. qui pronunciat *Deum*, aut *animam*, & supponit eos, qui audiunt, easdem ideas his vocabulis jungere, quas ipse: & iis vocabulis *Dei* & *animæ* *essentias* explicuisse. At hæc duo falsa sunt. Nam nec reperies duos, qui de eadem re æquales habeant notiones; nec vocabula *rerum essentias* explicare possunt, quæ homines omnes latent. Quamobrem ab his duobus præjudiciis cavendum est Philosopho.

§. VIII.

Posterius tamen præjudicium difficillime vitatur; quare doquidem consuetudine ipsa vitæ ab infantia usque confirmatum est. Hinc videre est Philosophos ipsos in ridiculos errores eam ob rem lapsos. E. g. Quæsit quidam quid esset *homo*, responderunt, *animal rationale*, iisque duobus vocabulis hominis *essentiam* se complexos putarunt. Alii interrogati quid sint *Angeli*, responderunt *Spiritus*, eoque vocabulo Angeli naturam explicuisse crediderunt. Atque vulgo ita loquimur ut vocabulis quibuldam *Dei*, *spiritum*, *animæ*, *herbarum*, *plantarum*, *mineralium* integras naturas explicare credamus, & ex ea opinione inde operationes nostras dirigamus erremusque turpissime. Servet igitur hoc monitum Philosophus noster: *Quoniam rerum essentiae latent, caveto ne putes, quibusvis, & quotvis vocabulis, essentias reales aut intelligere, aut explicare posse.*

C A P. IX.

*De vocabulis idearum simplicium, & notionum
compositarum.*

§. I.

Longum est discrimen inter vocabula *idearum simplicium*, & *notionum compositarum*, ut longe inter se *notiones compositæ*, & *simplices ideæ* differunt. I. Illorum enim ideæ pro realibus haberi possunt, non horum. II. Ideæ simplices magna ex parte adventitiæ sunt: notiones vero compositæ factitiæ. III. Vocabula idearum simplicium ut plurimum clarissima sunt; non secus atque ideæ ipsæ simplices: vocabula vero notionum compositarum ut plurimum sunt obscura, quod obscuræ sint maxima ex parte notiones compositæ. Qua ex re sequitur ut ex vocabulis simplicibus non tam facile quis decipiat, dum alterum interpretatur: at decipimur facillime, & sæpissime in vocabulorum notionum compositarum interpretatione. Eam ob rem recte præcipiunt Logici, *Ideas simplices, simpliciumque idearum vocabula definire non posse*: nulla scilicet sunt clariora: *definienda tamen esse vocabula notionum compositarum*: quandoquidem id per ideas simplices fieri potest. E.g. Si quis ignorat *colores*, nullis verbis ei colorum ideas communicare possum. At si quis *Iridem* nunquam viderit, possum illi eam ope idearum simplicium *figuræ, colorumque* definire.

§. II.

Sed sunt tamen vocabula simplicium idearum, quæ sensationes nostras spectant, magna ex parte *confusa*, licet forte *clara*. Exemplis rem illustrabimus. Vocabula *colorum* quibusdam sensationibus ex certis objectis manantibus aptata sunt. Eodem modo vocabula, quæ aliorum sensuum sensationes explicant, ut *suavis sonus, gravis, acutus; odor gratus; sapor amarus, acidus, dulcis;*

cis; *superficies aspera*; vel *lenis*; *voluptas*; vel *dolor*, & similia. Quoniam autem hominum corpora non sunt eadem in omnibus; & objecta externa impressiones suas in hominum corporibus faciunt diversas; pro diversa corporum temperie; nos ceteri non sumus, ab iisdem objectis eodem modo affici omnes: adeoque intelligere plane non possumus, an iisdem harum sensationum vocabulis easdem sensationes cuncti homines designent:

§. III.

PRæterea quum sensationes, *suas habeant intensitates*; & *remissiones*; licet vocabulorum ope *generatim* intelligamus huiusmodi impressiones; *exakte* tamen non intelligimus. Hoc sensu vocabula colorum; saporum; odorum; voluptatum; dolorum confusa sunt. Nec ullo modo hæc confusio auferri potest. Nempe ego alterius sensationes non alia ratione intelligo, quam ex meis: nisi enim colores unquam; sapores; odores sensissem; intelligere non possem; quid alter sibi vellet vocabulis *viridis*, *rubri*, *dulcis*, & similibus. Jam quum intensitates harum sensationum non sint eadem in omnibus; ex meis alterius intensitates nunquam plene intelligam. Ut huic incommodo mederentur homines repererunt *adverbia*. Nec dubitandum est; quin adverbis *multum*; *parum*; *mediocriter* confusio illa aliqua ex parte auferatur. Sed tota auferri nequit: nam & ipsa *multum*; *parum*; *mediocriter* gradus suos habent, quos ex nostris sensationibus tantum dimetiri possumus: & alienas sensationes ex nostris metiri, admodum est periculosum.

§. IV.

QUOD si vocabula sensationum ad corporum externorum qualitates referamus, quod vulgus facit, tum vero maxime confusa; & plurimorum errorum causæ sunt. I. Quia nescimus quales sint qualitates corporum; quæ in nos sensationes istas producere valent. Nam quamquam microscopio plurimarum rerum corporearum partes exiguae; earumque figuræ sunt detectæ: at nec accurate omnes sentiuntur; & qua ratione illæ in sen-

sensus nostros agant, penitus ignoratur. II. Quia faciles sumus ob infantia præjudicia ad judicandum, in corporibus externis, a quibus sensus nostri agitantur, esse qualitates similes sensationibus nostris, veluti sonos in instrumentis musicis, colores in rebus coloratis, sapores in rebus sapidis.

§. V.

EA etiam vocabula idearum simplicium, quæ dolorem & voluptatem spectant, licet clara sint, confusa tamen sunt. Quum audio, aut lego aliquem sensisse dolorem, aut voluptatem, generatim quidem quid fuerit intelligo: at quantum doloris, vel voluptatis senserit, non intelligo. Possum hanc confusionem ex parte minuere, si ad examen revoco hominis illius quoad dolorem. I. temperiem corporis, II. animum rebus adversis magis aut minus obfirmatum, III. præsentem sui statum, dum dolore invasus est, IV. doloris causas, seu mali magnitudinem, & alias *circumstantias*, præsertim effectus, qui dolorem, aut voluptatem sequuntur: Quod ad voluptatem vero. I. boni magnitudinem, II. expectationem, III. repentinam possessionem, IV. animi & corporis temperiem: V. similium voluptatum usum, & hujusmodi alia. Sed non idcirco omnem confusionem vitare possum, ita ut gradus ipsos voluptatis & doloris dimetiri exacte possim.

§. VI.

Ipsa *perceptionis & voluntatis* vocabula confusa sunt. I. Perceptiones sunt aliæ aliis velociores: quum igitur quis dicit se aliquid percepisse, ignoramus quanta celeritate perceperit. Viri potissimum docti dum cogitationes suas aliis communicant, facile credunt, ab iis eadem celeritate percipi, qua ipsi eas mente volutant, II. demonstrationes etiam quædam non eadem claritate ab omnibus percipiuntur: itaque dum quis dicit demonstrationis vim percepisse, non intelligo quanta claritate perceperit. Ad voluntatem ipsam quod spectat, habet ea *inclinationis gradus*. Quædam sunt, quæ quadam necessitate

tate

rate volumus, & ad quæ naturæ vi impellimur: alia omnino libera, & indifferentia: quædam etiam, quæ non *efficaciter* volumus, sed veluti perplexe. Nempe prout major vel minor *voluptas*, aut *inquietudo* ad volendum nos impulerit, ita magis aut minus libere ad ea determinamur. Dum ergo dicitur, aliquem *voluisse*, non semper intelligo, qua voluntate.

§. VII.

QUOD spectat ad ideas simplices, quæ *abstractione* fiunt, videntur ex magis *distinctæ*, quam quæ *sensatione* habentur. In hunc censum venire solent ideæ. I. *Existentiæ*. II. *Extensionis puræ*. III. *Temporis*. IV. *Æternitatis*. V. *Immensitatis*, & similes. Sed & inter ideas abstractas refert Sanctus Augustinus *Dei notionem*: eam enim conficimus transcendendo omnia corpora, finita, & imperfecta, ipsamque mentem incorpoream, infinitam, perfectissimam quomodocumque attingendo. Sed cum hæc notio non sit simplex, licet in hoc sit clara, quod spectat existentiam *Principii primi universorum*; at quod spectat hujus *Causæ*, idest Dei, *naturam*, obscura est, inadequata & confusa, ut docti omnes fatentur (a). Quis enim sibi *claram*, *distinctam*, *adequatam* rei undequaque *infinite* infinitoque intervallo capacitatem intelligentiæ humanæ superantis, notionem sibi confinxerit?

§. VIII.

EA tantum vocabula simplicium idearum clara sunt & distincta, quorum ideæ certis calculis dimetiri possunt, qualia vocabula rerum *Arithmeticarum*, & *Geometricarum*. E. g. nulla esse obscuritas aut confusio potest in quantitatibus numericis, *lineis*, & *figuris*. Quum dico, *bis duo sunt quatuor, si æqualibus æqualia demas, quæ remanent sunt æqualia*, utor ideis clare & distinctæ definitis, atque idcirco nihil dico, quod non æque ab omnibus intelligatur. Eam ob rem res *geometricæ* & *arithmeticæ* Syntheticum in morem tractari possunt,

(a) B. Thom. I. part. qu. 2. art. 1. ad prim.

sunt, quum res aliæ aut nullo modo, aut vix in paucis, queant.

§. IX.

NOtiones compositæ *claræ* sunt & *distinctæ*, ubi simplices, ex quibus constant fuerint & ipsæ *claræ* & *distinctæ*: sed vero *obscuræ* sunt & *confusæ*, si simplices fuerint *obscuræ* & *confusæ*. Quum vero ideæ simplices, exceptis rebus mathematicis, confusæ ut plurimum sint, uti supra demonstratum est; efficitur in ceteris rebus, præterquam in mathematicis, notiones compositas esse confusas. Ergo & vocabula hujusmodi notionum. Quocirca in his plene se homines non intelligunt. Unde & illud sequitur, *In his rebus non esse temere & mordaciter disputandum: conandumque esse certis terminis, vagas, confusasque ideas complecti, & quoad fieri potest exactius, vocabula definire.*

C A P. X.

De vocabulis substantiarum, & modorum.

§. I.

VOcabulum substantiæ valde est confusum. Eo Philosophi intelligunt *primum subjectum ejus quod est, aut fit, quasi fulcrum aliquod, & fundamentum* (a). Itaque substantiam non accipiunt nisi cum relatione ad adjuncta subjecti. E.g. corpus dicitur substantia respectu adjunctorum *figuræ, motus, coloris, duritiæ* &c. anima appellatur substantia respectu *operationum & modificationum* suarum, saltem in eorum sententia, qui agnoscunt esse in nobis subjectum aliquod cogitationum nostrarum a corpore distinctum, quæ haud dubium vera est. Nam ii qui hoc subjectum esse corpus volunt, vocabulo animæ non substantiam, sed operationes, aut facultates quasdam operandi intelligunt.

I

§. II.

(a) *Lockius l. 1. c. 3. & l. 2. c. 23. §. 1. & 2. Vide quæ diximus in prima Metaph. part. in Scholio defn. xxii.*

§. II.

Confusum dixi *substantiæ* vocabulum, quod etiam si certo sciamus esse quædam prima subiecta modorum, quos aut sensu, aut animo percipimus, tamen quæ sint ignoramus. E. g. quale sit subiectum primum corporearum proprietatum *extensionis*, *soliditatis*, *motus*, *figuræ* nescimus. Qualis sit substantia *cogitationum* & *voluntatum*, quis dixerit? In Metaphysica demonstro, prima subiecta, & substantias omnes debere esse incorporea, idque post Phytagoricos: sed substantiarum huiusmodi incorporearum vix confusas ideas habemus. Quinimo si eas *inextensas* cum Cartesianis faciamus, tum vero quid sint penitus ignoramus (a).

§. III.

Ne ullam quidem viam Logica subministrat, qua possimus substantiarum *essentias* investigare. Sensus enim, qui *modos* tantum *externos* referunt, esse nequeunt hac in re iudices. Conjecturæ omnes rationis hoc tantum efficere possunt, ut esse aliquas demonstrent, sed *quales* sint non monstrant. Auctoritas hac in re locum non habet. Nam humana rationi quum nitatur, esse nulla potest, ubi ratio fileat. Divina vero de substantiis cogitantibus tantum docet, esse eas incorporeas, de ceteris tacet. Quamquam nec eodem sensu hæc substantiarum cogitantium *incorporalitas* a Theologis accipitur, uti docebit Petavius de Angelis, & Huetius in Alnetanis.

§. IV.

Igitur quotiescumque occurrit nomen substantiæ apud veterem aliquem Scriptorem, ante omnia sciamus oportet, illi ignotum fuisse *subiectum* illud, cui qualitates quasdam inesse intelligebat. Ignoratio substantiarum huiusmodi uberrima fuit, estque etiamnum causa, cur quibusdam ignotis subiectis qualitates tribuerentur aut fictæ,
aut

(a) Conferri posset Henricus Morus in *Enchiridio* tapl.

aut certe quæ diversis tantum subjectis convenire possunt : vel etiam cur , quæ qualitates unius sunt subjecti , diversis tribuerentur . E. g. quum vocabulum Deus substantiam explicet hominibus ignotam , quot ei fictas qualitates affixerunt Gentiles ? Quot ei tribuerunt , quæ hominibus conveniunt ? Veluti , *videre , audire , affectibus agitari , reminisci* & similia , quæ sunt hominum propria ; & Deo tribui nequeunt , saltem talia , qualia in nobis sunt : Quinimmo ne ipsæ quidem perfectiones mentis nostræ illi tribui possunt : nam licet Deus sit mens *sapientissima ; liberatissima , potentissima , nostri amantissima ; scelerum vindex* , at qualis sit ejus *intelligentia , potentia ; libertas ; amor , justitia* ignoramus , erramusque profecto turpissime ; si illi hæc ex qualitatibus nostris tribuamus : quum ut Deus a natura nostra , ita Dei qualitatibus nostris infinite distant . Est hoc observatum Arnobio lib. 111. (a) :

I 2

§. V.

(a) Ponam verba Arnobii , ne quis me hæc confinxisse putet . In tertio ergo adversus gentes Arnobius Presbyter sic disserit : *Si nostri animi motum non recusatis audire tantum abest ; ut nos Deo corporalia linamenta tribuamus , ut animorum etiam decora , ipsasque virtutes , quibus emnere vix concessum est paucis , tantæ rei vereamur adscribere . Quis enim Deum dixerit FORTEM , CONSTANTEM , FRUGI , PATIENTEM ? Quis PROBUM ? Quis SOBRIMUM ? quis imo aliquid NOSSE ? quis INTELLIGERE ? quis PROVIDERE ? quis ad fines officiorum certos actionum suarum DECRET A dirigentem ? HUMAN A sunt hæc bona , oppositione vitiorum existimationem meruerunt habere laudabilem : Quis est autem tam obtusi pectoris ; tam bruti , qui humanis bonis Deum esse dicat magnum . . . Quid quid de Deo dixeris ; quidquid tacita mentis cogitatione conceperis , in humanum transit ; & corrumpitur sensum ; nec habet PROPRIÆ SIGNIFICATIONIS NOTAM ; quod NOSTRIS dicitur VERBIS ; atque ad negotia humana compositis . Unus est hominis intellectus de Dei natura certissimus , si scias , & sentias , NIHIL de illo posse MORTALI ORATIONE depromi .*

§. V.

Obeandem substantiæ ignoracionem plerumque qualitates, quæ non sunt nisi unius subjecti, pluribus tribuuntur. E. g. iidem Gentiles, magna saltem ex parte, Deos fecerunt alios *bonos*, a quibus bona proveniunt, alios *malos*, a quibus mala (*a*); quod nempe non intelligerent, qui ab eadem natura Dei *bona* & *mala* derivari possint. Fuerunt quidam qui quum non possent intelligere ab eadem mente corpus vivum fieri, & moveri, duas substantias animales in homine statuerunt, *Mentem*, principium cogitationum, & *Animam* vitæ & motionum. In confesso ergo sit, ex ignoracione substantiarum, I. *subjectis fittas qualitates tribui*. II. *tribui qualitates diversorum subjectorum*. III. *Unius subjecti qualitates pluribus tribui*. Quot sunt in *Physica*, *Medicina*, & *Metaphysica* huiusmodi errores?

§. VI.

Modorum duo sunt genera: alii enim sunt *physici*, alii *morales*. Utrique *substantiis* adhærere intelliguntur. *Modi physici* sunt *qualitates physice*, quæ considerantur in substantiis seu corporeis, seu incorporeis. Substantiarum corporearum modi sunt *motiones*, *figure*, *configurationes*, *vires activæ*, similia, quæ sine substantiis illis intelligi nequeunt. Modi vero substantiarum incorporearum intelligentium sunt *varie perceptiones*, *voluntates*, *desideria*. Sunt quidam etiam modi qui in homine ad corpus simul & mentem pertinent, quales sunt *affectus*, in quibus *perceptiones* & *sensus doloris* aut *voluptatis* mentis sunt & animi; *commotiones* vero hinc productæ, corporis. Præterea alii sunt modi qui ad animum, corpus nostrum, & externa alia corpora simul pertinent, quales sunt *lumen*, *colores*, *calor*, *frigus*, *soni*, *sapores*; qua de re legantur, quæ dicta sunt libro 1. de erroribus sensuum,

§. VII.

(a) *Adifis Plutarchum de Iside & Osiride.*

§. VII.

Modi morales sunt *judicia* aut *opiniones*, quæ *actiones*, aut *substantias* intelligentes consequuntur. Ita actio aliqua dicitur *bona*, *honestæ*, *gloriosæ*, *virtuosæ*; aut *mala*, *turpis*, *audax*, *vitiosa*: dicitur *iusta*, aut *injusta*, variisque aliis afficitur iudiciis, aut opinionibus. *Modi morales* a Pufendorfio (a) vocantur *entia moralia*. Actiones sunt horum modorum *quasi substantiæ*. Origo *entium & modorum moralium* est aut *lex*, aut *opinio*. Ex enim actiones dicuntur *bonæ*, aut *malæ*, *iustæ*, aut *iniustæ*, *virtuosæ*, aut *vitiosæ*, *honestæ*, aut *turpes*, quæ *legibus*; vel *hominum opinionibus*, & *consuetudini*, conformes sunt, aut diffformes.

§. VIII.

MOdorum tandem vocabula modos aut *simplices*, aut *compositos*; aut *abstractos*, aut *concretos* significant. Simplicium modorum vocabula sunt quæ unum tantum modum significant, qualia sunt *extensio*, *figura*, *divisibilitas*, *perceptio*, *motus*. Composita autem plures simul modos complectuntur, veluti *amor*, *odium*, *lux*, *sonus*. Vocabula modorum abstractorum significant *ideam genericam* alicujus modi, veluti *idea figure* & *motus*. Vocabula modorum *concretorum* explicant modos prout sunt in ipsis substantiis, non vero prout in idea generica exhibentur, seu modos cum suis subjectis, ut *figuratum*, *coloratum*, *cogitans*.

§. IX.

Videamus modo, quæ sint Logico observanda circa vocabula modorum. Primum, vocabula modorum simplicium clarissima esse solent: itaque in iis intelligendis nulla esse potest ambiguitas. Ex. g. Si quis dicat *animam esse extensam*, quid sibi velit facile intelligimus. Eodem modo si quis dicat rem aliquam *moveri*, aut *dividi*, aut ab ea aliam *moveri*, *vel dividi*, Quod ita
I 3 intelli-

(a) *De jure nature & Gent. l. i. c. i. Legatur de his etiam Lockius lib. i. cap. xxii. & xxviii.*

intelligendum est, ut percipiatur quid sit *extensum*, quid sit *moveri*, quid sit *dividi*: nam potest ex aliis causis obscuritas etiam in his nasci, v. g. quod non semper intelligamus qualem extensionem res aliqua habeat, quâ ratione moveatur, vel moveat. Ita ignoramus quâ ratione Deus sit immensus, anima sit per corpus diffusa, anima moveat corpus, magnes attrahat ferrum. Eodem in loco haberi possunt vocabula modorum abstractorum, Itaque Geometrarum, & Arithmetici, quorum disciplinæ circa modos abstractos *figurarum*, aut *numerorum* versantur, nullam offendunt circa huiusmodi vocabula obscuritatem.

§. X.

AT vocabula modorum compositorum ut plurimum obscura sunt & confusa, nec raro in iis interpretandis hallucinamur. Exempla quæ libro primo de *sensationibus* protulimus, id clare demonstrant. Nunc pauca de vocabulis affectum subjungemus (a). *Amor & Odium* sunt duo affectus, qui in historia humani generis, omnibusque fere omnium Scriptorum libris utramque faciunt paginam. Amor vix potest ita definiri, ut una definitio conveniat omnibus affectibus, qui eo nomine vocantur, propter maximam eorum varietatem. Constat, id quod dicitur amor, oriri ex re quapiam, quæ nobis & voluptatem & varias commotiones creat. Sed is pro rerum, quæ amantur, varietate, varius est. E. g. I. amor significat eum affectum, quo masculus fertur in feminam. In hoc amore observantur, I. Totius sanguinis quidam fervor, & *mollis, quæ est medulla, flamma*, II. Voluptas animi in aspectu, confabulatione, cogitatione objecti, quod amatur. III. Cupiditas ea potiundi, atque una vitæ transigendæ. IV. Vota, quibus amans optat omnia ei, quem amat, secunda accidere. V. Animus paratus ad alacre, promptum, ac profundum auxilium personæ amatæ præstandum. VI. Letitia, aut dolor, prout persona amata rebus secundis, aut adversis agitur. VII. Egregia de ea opinio sive corporis,

(a) *Observatio est Joann. Clerici in Arte Crit.*

ris, five animi dotes spectentur. VIII. Animus ad quævis obsequia paratissimus. IX. Varii gradus hujus affectus. Jam autem quis est, qui lecta hac voce *amor*, quomodo omnia illa se habeant accuratissime norit? Itaque fateamur oportet nos non plene assequi narrationes, in quibus hoc vocabulum occurrit: quod quum plerumque sit necessarium ad historiam aliquam intelligendam, aut ad judicium de aliquo, aut ejus factis conficiendum: sequitur nos nec historiam plene intelligere, & in his judiciis errare posse.

§. XI.

II. **A** Mor passim etiam sumitur pro amicitia, quæ intercedit inter viros, qualis fuit inter *Ciceronem* & *Atticum*. Nihil autem est in amicitia, quod non sit in amore antea descripto, si quæ ad voluptatem corpoream pertinent exceperis. Hæc omnia igitur probe noscat oportet eum, qui de quorundam amicitia judicare velit, aut qui ingentes illas laudes, quæ *Amicitia* tribui solent a veteribus, potissimum ab Aristotele & Cicerone, velit intelligere.

§. XII.

III. **A** Mor est *parentum erga liberos*, & *liberorum erga parentes*: qui amor præter omnia, quæ sunt in arctissima amicitia, conjunctionem sanguinis habet qua fit vehementior inter eos amicitia, ita ut parentes liberos, liberi parentes omnibus aliis amicis anteponan. Qui non animadverterint quanta sit conjunctio in hac amicitia, aut qui cœlibes vitam egerunt, non capiunt: cur parentes mortem liberorum tam dure ferant: quippe qui nunquam omnes illas notiones, quas *paternæ amicitia* nomen complectitur, attenderunt.

§. XIII.

IV. **A** Mor denique sumitur pro *quavis cupiditate*, ut *amor regni*, *amor pecuniæ* &c. quæ sunt circumlocutiones *ambitionis*, *avaritiæ*, & aliorum affectuum, quibus homines permoti in bonum quoddam, aut

quod bonum videtur feruntur. Eos non aggrediar describere, uti nec odium, cuius natura ex descriptione contrarii facile intelligi potest. De omnibus summatim observandum, eos solum, qui eorum naturam diligenter investigarunt, & varias partes, ut dicam, quibus constant, discriminare didicerunt, assequi posse quæ de illis dicuntur. Studium igitur hujus Ethicæ partis, quæ de affectibus eorumque characteribus agit, summopere est necessarium, ut veteres libri intelligantur, præcipue vero poetæ. Quis igitur Comicum, Tragicum, Epicum poetam, sine hac notitia, recte exposuerit? at videntur passim superciliosi quidam homines confidenter ad libros hujusmodi publice interpretandos adgredi.

§. XIV.

VEniamus ad vocabula modorum moralium: Omnium primum edico ad hæc rite interpretanda duo esse necessaria. I. Summam justitiae, & honestitatis peritiam. II. Et peritiam morum, atque opinionum ejus nationis, de cuius rebus igitur. E.g. quum legimus scriptum virum aliquem *bonum* fuisse, aut *magna gloria* affectum, aut *virtutem* aliquam egregie gessisse, examinandum. I. In qua gente hic vixerit. II. Quo tempore. III. Quales erant mores & opinionem ejus gentis, & temporis, IV. Ex qua norma justum, aut injustum, turpe, aut honestum isti definiaverint. Nam non eadem ubique honesta sunt, aut turpia. Vir fornicator non eodem characterē depingebatur apud omnes. In gente Hebræa nefas quidem habebatur fornicari popularibus suis, at licebat fornicari extraneis. Apud Romanos usurae semper licitæ fuerunt. At Græci quidam Philosophi turpes eas, & contra naturam habebant, ut habent & Christiani. Persis licebat Sorores ducere uxores, id incestuosum Græcis habebatur. Mores igitur, instituta, & opiniones Gentis, vel Scriptorum scienda sunt ei, qui hæc velit intelligere. Præterea Philosopho, qui his exemplis in morali uti velit, investigandum est, ex quibus principiis Nationes in has opiniones & judicia de honestate, aut turpitudine devenerint. Non tam enim pondus habet exemplum, quam

quam exempli ratio. Quod vellem factum Grotio & Pufendorffo, dum Dogmata Juris naturæ ex nationum consensu probant.

§. XV.

Sed quantacumque sit harum rerum peritia, effici tamen nunquam potest, quin magna obscuritas & confusio offendantur in interpretatione vocabulorum modorum moralium, nempe *officiorum*, *virtutum*, & *vitiiorum*. I. Hæc non sunt eadem apud omnes nationes: variant pro morum & institutorum varietate. Itaque erit virtus Athenis, quod vitium Romanis (a): *Justitia* Romæ, quæ *sevitia* alibi: *Charitas*, aut *religio* apud Ethnicos, quod *impietas*, aut *superstitio* apud Christianos. II. Variant etiam pro varietate subjectorum. Sic actio non eadem laude, aut vituperio afficietur facta a viro, & a muliere; a puero, & a viro, vel sene; a docto, & ab ignaro; a nobili, & a plebejo; ab homine scelesto & a viro bono. III. Variant pro varietate objectorum: E. g. aliud est auxiliari Parentibus, vel Patriæ, aut eos prodere; aliud extraneis, aut hos prodere: aliud amico injuriam inferre, aliud inimico. IV. Variant pro varietate circumstantiarum aliarum loci, temporis, personarum, mediorum: veluti aliud est viatorem spoliare, aliud templum suppire: aliud solum scelus aliquod, perpetrare, aliud alios inducere in idem scelus. V. Variant pro varia intensitate, V. g. adversa tolerare fortitudo est: sed est hæc virtus major, vel minor prout adversa fortius, aut minus fortiter tollerantur. Eodem modo charitas erga Deum, vel parentes, esse major, aut minor potest. Idem de aliis affectibus quum virtuosus, tum vitiosus. Habent nimirum virtutes & vitia intensitatis, aut remissionis suæ gradus (b) Jam quis potis est hæc omnia in his modis mixtis probe discernere, & dime-

(a) Vide Nepotem in proemio.

(b) Nullus his de rebus accuratius scripsit, quam Cicero in vere aureis libris de Officiis. Hos adolescentes nocturna; diuturnaue manu conserant.

dimetiri? Inde provenit in Theologia nostra tanta circa *gravitatem*, aut *levitatem* peccatorum, Theologorum qui *Casuiſtæ* dicuntur, discordia. Nam præterquam quod pauci eorum fuerunt iis dotibus ornati, quibus hoc examen indiget, res etiã ipsa per se difficillima est.

§. XVI.

Pertinet tandem ad hanc classẽ vocabulum *Religio*. Ejus vocabuli notio *composita est*, *multiplex*, *varia*, Apud Philosophos Religio est cultus internus unius Dei universi creatoris & gubernatoris cum iusta ejus notione. Itaque cõplectitur. I. *iustam Dei notionem*. II. *amorem*. III. *timorem*. IV. *obsequium*. V. *existimationem*. VI. *Invocationem* in adversis. VII. *Gratiarum actionem* in Prosperis, VIII. *externum* harum actionum coram aliis humilemque testificationem. Hæc eadem est Religionis notio in libris Christianorum, in quibus *templum Dei est animus*, *Sacrificium*, *amor*, inquit Justinus martyr. At apud Gentiles longe diversa hoc vocabulum sonabat. I. *Animi interiora* non valde curabant Gentiles, si pauculos excipies Philosophos, quorum præceptum erat *Caste ad Deos accedito*. II. Itaque? totam religionem in actibus externis magna ex parte deridiculis, & obscænis collocabant. III. Deo ea tribuebant, quæ ejus totam evertunt naturam, qualia sunt, quæ sunt hominum etiam stultissimorum propria, IV. Religionis partem censebant plurimorum numinum cultum.

C A P. XI.

De vocabulis Relativis,

§. I.

Appellamus vocabula *relativa* omnia illa, quæ eas res significant, quæ *augeri*, aut *minui*, esse *maiores* aut *minores* possunt, & quæ interpretanda sunt ex relatione aut *ad semet*, quod ad tempus, vel locum; aut ex relatione ad alias res ejusdem, vel diversi generis; aut tandem ex relatione ad personas. Veniunt igitur in hunc sensum. I. Nomina modorum *corporum*, & qualitatum quæ *intendi* & *remitti* possunt. II. Nomina *sensationum*. III. Nomina *virtutum*. IV. Nomina *vitiorum*. V. Nomina earum *animi qualitatum*, vel etiam *habituum*, qui esse *maiores*, aut *minores* possunt, VI. Nomina *actionum verborum*, Illustrabimus hæc exemplis.

§. II.

Quædam sunt *corporum qualitates*, quæ *intendi* & *remitti* possunt, cujusmodi potissimum sunt qualitates sensibiles *calor*, *frigus*, *lumen*, *sonus*, *odor*, In his, ut alibi dictum est, duo sunt distinguenda, *corporum vires quædam*, & *sensationes* a viribus illis in nobis productæ. Utrarumque vocabula, *virium* nempe, seu *qualitatum corporearum*; & *sensationum*, relativa sunt: quia quum vires illæ, tum sensationes, augeri, & minui, maiores & minores esse possunt. In his igitur vocabulis interpretandis attente sunt relationes perpendendæ, ut, quoad fieri potest, gradus virium illarum, & sensationum, perspiciantur. Quod contigit ut plurimum in *historia naturali*. I. In historia *regionum*, quorum qualitates naturales describuntur. II. In reliqua historia naturæ, *aquarum*, *plantarum*, *ignium*, *salium*, *ventorum*, *meteororum*, & *similium rerum*,

§. III.

Nomina quoque *virtutum & vitiorum* relativa sunt. I. Habent virtutes & vitia suos gradus & intensitates, ut dictum est superiori capite. II. Plerumque eadem nomina virtutum aut vitiorum adhibentur, licet notiones pro temporum aut locorum varietate variant, ita ut quod apud unam notionem dicatur virtus, sit apud aliam vitium (a) Ea de re dictum est cap. superiori: addam unum exemplum. Scribit Ælianus (b) in Eryce Siciliæ templum Venereis fuisse, quod vocat *τῶν σεμνῶν καὶ ἁγίων venerandum & Sanctum*. Non aliis Epititis in Sacris Scripturis Templum Salomonis VERO DEO dicatum describitur. Vocabula sunt eadem: at nisi ex relatione intelligantur, religio cum superstitione fœde miscebitur.

§. IV.

Nomina earum qualitatuum aut habituum animi, qui esse majores, aut minores possunt, sunt & ipsa *relativa*, adeoque quum interpretantur ad hujusmodi relationes animus diligenter adverrendus est. E. g. *Scientiarum*, & *artium* habitus, *Goemetria*, *Astronomia*, *Metaphysica*, *Musica*, *Sculptura*, *Nautica*, *Bellica*, similes, quum paulatim culti fuerint inter mortales, non uni Cœlo dati post diluvium, fuerunt certe majores, aut minores. I. pro temporum ratione. II. pro ratione locorum. III. pro capacitate discentium. IV. pro exercitatione. Ergo quum legimus aliquem fuisse in *Musica*, in *Astronomia*, in *Nautica*, in *Bellica* peritum. i. cavendum est ne ex rerum nostrarum ideis ea vocabula accipia-

(a) Huc pertinet illud Tullii lib. 111. de Off. Quod potest majus esse scelus, quam non modo hominem, sed etiam familiarem hominem occidere? Num igitur se adstrinxit scelere, si quis tyrannum occidit, quamvis familiarem? POPULO quidem ROMANO non videtur, qui ex omnibus præclaris factis illud pulcherrimum existimat. At non ita censeret Grotius.

(b) *Varia hist. lib. 1. cap. xv.*

piamus, idest vocabulis antiquis notiones affigamus novas. 2. curandum ut locorum, temporum, personarum etiam scriptoris eruditionis rationem habeamus (a). E. g. S. Stephanus Protomartyr. in oratione ad Judæos, quam retulit in Actis S. Luca, Mosem ait *educatum in sapientia Ægyptiorum*. Ut hoc rite intelligeretur, sciendum esset quænam fuerit & qualis sapientia Ægyptiorum tempore Mosi. Quæcumque autem ea fuerit, quod haud dubium ignoramus, ea certe comparari non potest cum sapientia Græcorum sequiorum, aut cum ea quæ nunc in Europa viget. Nihilo tamen minus Clemens Alexandrinus (b) probare conatur Mosem fuisse τακτικόν, στρατηγικόν, & πολιτικόν excellentissimum ex temporum suorum notionibus. Nec desunt qui eum summum *Geometram, Astronomum, Theologum, Chemicum, Oratorem* ex eo Lucæ loco faciunt (c). Eodem modo quum dicitur *Salomon* omnium mortalium doctissimus, id intelligendum est ex eorum temporum relatione, in quibus vivebat. Similiter quum in historia veteri legimus, quosdam fuisse aut Oratores eximios, aut artis bellicæ peritissimos Duces, aut egregios Musicos, non est ut eos cum nostris conferamus, aut ex nostris dimetiamur.

§. V.

Nomina actionum & ipsa ut plurimum relationem continent. Nam & actiones suas habent intensitates, & remissiones. Itaque Physici sapienter docent,

(a) Cicero lib. III. de officiis: nec vero, inquit, quum duo Decii, aut Duo Scipiones, fortes viri commemorantur, aut cum Fabricius, Aristidesque justus nominatur, aut ab illis fortitudinis, aut ab his justitiæ, tanquam a **SAPIENTIBUS**, petitur exemplum. Nemo enim horum sic sapiens est, ut sapientem volumus intelligere. Ne ii qui sapientes habiti sunt & nominati M. Cato. & C. Cælius, sapientes fuerunt. Ne illi quidem septem: sed ex **MEDIORUM** officiorum frequentia **SIMILITUDINEM** quandam gerebant **SPECIEMQUE** sapientum.

(b) Lib. I. Stromat.

(c) Legatur Georgius Serpilius in Personalibus Mo-
sis cap. 8.

potentiarum, & *actionum intensitates* absolute dimetiri non posse, sed *relative*. Ex. g. vocabula *velox*, *tardus* actiones significant, quæ quantæ sint non nisi ex relatione aut ad tempus, aut ad spatium, aut ad alias res, quæ agunt, vel moventur, sciri potest. Actiones verborum *amare*, *odisse*, *legere*, *verberare*, *loqui*, *pugnare*, & infinita alia, suas habent *intensitates*, quas quum ex aliis circumstantiis, tum *ex relatione* potissimum investigare debemus.

§. VI.

PRæterea actiones verborum suos habent modos, quos *adverbiis* explicare solent qui scribunt aut loquuntur, v. g. *ardenter amare*, *attente legere*, *diserte loqui*, *fortiter pugnare*. Sed nulla alia vocabula tam sunt *relativa*, quam ea, quæ *adverbia* dicuntur: Illa enim *fortiter*, *diserte*, *attente*, *ardenter* & suos habent intensitatis gradus, qui ex aliis circumstantiis, & potissimum *ex relatione* personarum, & *ex effectibus* dignoscendi sunt.

§. VII.

Concludamus verbis Ciceronis (a). *Rerum natura* nullam nobis dedit agnitionem finium, ut ulla in re statuere possimus *quatenus*. Nulla omnino in re minus ratim interroganti, dives, pauper; clarus, obscurus; multa, pauca; magna, parva; longa, brevia; lata, angusta; quanto aut addito, aut demto, certum respondeamus non *habemus*. Qua ex re sequitur ut iudicia, quæ his de re rebus fiunt, nequeunt esse *geometricos exacta*: quum enim *ideæ* certis limitibus definiri nequeunt, nec iudicia esse certa possunt. Qui ergo ea pro certis habet, is etiam dicere potest reperiisse proportionem inter *incommensurabilia*, aut *mediam proportionalem* inter duas lineas A, B, utramque *indeterminatam*. *Diligentissimè ergo rerum & vocabulorum relationes perspicito, & discerne*, & de *relativis* noli temere & *confidenter* iudicare.

CAP.

(a) *Academ. Qq. lib. 4. Legatur & sextus Empir. Pyrrh. Hypoth. 1.*

C A P. XII.

De vocabulis notionum abstractarum.

§. I.

Nomina notionum abstractarum fere sunt *Substantiva* formata ex *adjectivis*. Sic a *divinus* fit *divinitas*, ab *humanus* *humanitas*, a *sanctus* *sanctitas* &c. Ea significant non *subiecta ipsa realia*, sed *notiones* quasdam a *subiectis* illis abstractas, & *naturas*, quas, velut a *subiectis* separatas, mens sibi representat. Quum autem quæ & æquales sint huiusmodi *naturæ abstractæ* ignoretur; fit ut hæc si non ad *ideas*, sed ad *bas naturas* ut quidam fecerunt *scholastici*, referantur, omnium sint obsecurissima & confusissima. Nihilo tamen secius omnes ferme disciplinæ huiusmodi vocabulis sunt refertæ, opera maxime *Scholasticorum*, qui nec cogitare, nec loqui, nisi de rebus abstractis didicerant. Hinc in ipsum familiarem sermonem magno numero irrepererunt, adhibenturque passim, non a vulgo tantum, sed & a viris non mediocriter cultis ex vi consuetudinis magis, quam quod illis aut ullam notionem, aut claram & distinctam respondere sentiant. Interim his pronuntiatis quilibet vel abstrusissimas res explicasse, vel dixisse saltem aliquid, credit, eique plerumque belle ab ignaris, minus etiam ipsis intelligentibus, plauditur.

§. II.

Ut cumque in rebus *Geometricis* & *Arithmeti-*
cis usus notionum & vocabulorum abstracto-
rum frequentissimus sit, & iis disciplinis, quæ totæ
tunc abstractæ utilissimus; in rebus tamen *physicis*,
magnum errorum causa esse potest; Idque quia indu-
cit homines ad credendum existere quasdam *naturas*
abstractas a rebus ipsis separatas, ex quo infinita judi-
cia falsa proveniunt. Ex. g. *Naturæ* istæ abstractæ in
personas commutari possunt, uti a *Gentilibus* com-
mu-

mutatæ fuerunt (a) Hinc nati Dii illi *Amor* *Deus* *Iustitia*, *Μνησιν* *Memoria*, *Cupido*, *Mors*, *Fortuna*, *Putæ*, *Petella*, *Pomona*, *Segetia*, & innumeri alii (b). Quæ quùm essent vocabula *abstractarum notionum* ut Seneca ipse observabat, tamquam personæ reales habitæ sunt a populis, & cultæ (c).

§. III.

A Beodem fonte natæ sunt *ideæ Platonice*. Primi Philosophi & Poetæ de ideis Mentis divinæ, abstracto modo sunt loquuti. Eas uti rerum omnium exemplaria depinxerunt. Ingenitas eas & immutabiles fecerunt, quippe quæ nihil sunt aliud nisi ipsa Dei scientia ingenita & immutabilis. Paulatim eo ventum est, ut *ideæ* istæ tanquam *naturæ quædam reales*, & a Deo separatim existentes crederentur, rerumque factarum *essentiæ* quædam immutabiles haberentur. Hanc enim doctrinam Platoni suo tribuit Aristoteles ejus discipulus & familiaris (d) riteque addit eos, qui talia defendunt, *inania loqui*, & *figuras poeticas proferre*, quod nempo fieri non possit, *ut seorsim sit essentia*, & *id cujus essentia*. Scio alios ita Platonem intellexisse, quasi idearum istarum vocabulo ipsas Dei notiones significare voluerit. Sed quæ Plato in *Theætetho* scribit, & Aristotelis auctoritas, tum & Plutarchi (e), refragari videntur.

§. IV.

(a) *Clericus in Arte Crit. part. 2. sect. 2. cap. 5. §. 3. & seqq.*

(b) *Consulatur Arnobius lib. 2. & Clemens Alex. exhortatione ad Gentes.*

(c) *Vide Arnob. lib. 4. cap. 1. quo in loco vocat huiusmodi nomina cassa, & nullius substantiæ. Plautino vocabulo vocare possis verba nihili.*

(d) *Metaphys. XII. & alibi.*

(e) *Lib. 1. de Placitis cap. 3. & 10. Legatur & Petavius in Dogmatibus Theologicis tom. 1. lib. 4. c. 9. Sed rem omnem confecit Jacobus Bruckerus in historia Philosophica de ideis.*

§. IV.

Distinctio quoque *personæ & naturæ* tanquam *duarum rerum realium* eidem causæ originem debet. Quicumque sano iudicio philosophantur non distinguunt personam Pauli a *natura* Pauli. Totum enim individuum humanum *persona humana* dicitur. At Scholastici personam tanquam *reale aliquod*, & a natura ipsa humana *separabile*, & tanquam partem unam hominis ab altera distinctam sibi effinxerunt. Sed inquirunt, hæc doctrina Theologico dogmati innititur. Constat enim ex Theologia Christiana in Christo totam naturam humanam fuisse, non vero personam. Respondemus separandum esse dogma Christianæ Theologiæ, quod planum & sibi constans est, ab abstractis Theologorum notionibus. Dogma Christianum est, naturam divinam, & humanam ita inter se arctissimo nexu conjunctas fuisse in Christo, ut in una *hypothesi*, seu *persona*, divina nempe, subsisterent, aut *concurrerent*, ut loquuntur Patres Chalcedonenses; adeoque Christum non in duas personas partitum, seu divisum; idque contra Nestorium, qui quasi duos Christos statuebat; sed unum eundemque filium, & individuum unum, esse *hominem* simul, simul *Deum*, uti recte hæc explicat Eugenius Papa in comitiis Florentinis (a); At nunquam Ecclesiæ, aut Patrum mens fuit, personam esse *ens reale* a natura separabile: alioquin nunquam dixissent, *nihil, quod ad naturam humanam pertinet, verbum non assumptum reliquisse*. Notiones igitur illæ abstractæ non sunt cum dogmate miscendæ.

§. V.

Huc quoque referunt Cartesius, Hobbius, Leibniti-
tius, Vvolfius nomen spatii *vacui* tanquam distincti a rebus ipsis seu substantiis extensis, quod & veteres Epicurei, & recentes Gassendistæ, & Nevvtonia-

K

nia-

(a) *Decreto pro Armenis apud Labæum pag. 532. edit. Paris. an. 1672. Vide & Estium in l. sent. dist xxiii.*

niani docent: nempe contendunt nomen esse *notionis abstractæ*. Extensio enim inquit, *modus est rei aliqujus extensæ*, nec sine *re* illa esse potest. At nunc, addunt, eo res evasit, ut notio abstracta *pro ente reali* a plurimis habeatur. Et quum quidam eorum satis intelligerent *extensionem sine re extensa esse non posse*, extensionem mundanam, quam ipsi vacuum appellant, Deum esse asserere non sunt veriti. Quæ quum sublimiora sint, hujus loci non sunt propria.

§. VI.

Sunt infinita alia vocabula abstracta, quibus aut nihil respondet, aut *nescio quid*, veluti *Eccreitas*, idest id quo res aliqua singularis est, & individua, *Petreitas*, id quo Petrus est Petrus, *Animalitas*, id quo animal est animal, *Humanitas* id quo homo est homo, *Personalitas*, id quo persona est persona, *Aureitas*, *Saxeitas*, *Metalleitas*, id quo aurum, saxum, metallum talia sunt potius, quam alia, quibus Peripateticorum libros saburratos videas. Ea vero omnia duo maxima Philosopho malo inferre possunt. I. prævum philosophandigustum. II. mentem confusam, & sophisticam. Nec tamen hoc dico, quod *vocabulorum abstractorum* usum penitus velim avulsum, quod nec potest, nec, si posset, faciendum esset, ob facilitatem, & compendium loquendi in rebus sublimibus: tantum ut abusus vitetur, & ne usu erretur nimio moneo. Alioquin scimus in omnibus disciplinis majorem reum partem per vocabula abstracta tractari. Ita Physici de *motu*, ejus *legibus*, & *proprietatibus*, de *calore*, de *coloribus*, aliisque qualitatibus corporum abstracte disputant: Ethici vero de *virtutibus*, & *vitiiis*, de *legibus*, *moribus generatim* & abstracte & ipsi; & alii similiter. Quinimo ne superest quidem alius modus, quibus hujusmodi disciplinæ tractari possunt. Sed monendi sunt, qui hæc legunt. I. *ne notiones abstractas pro rebus ipsis accipiant*. II. *ut quoad fieri potest eorum vocabulorum ideas statuunt fixas*. III. *ut sicubi obcura & vaga repererint, ne tempus perdant in iis nimis*

mis studiose interpretandis : quandoquidem infinita sunt hujusmodi vocabula, quibus auctores utuntur ex usu magis, quam ex scientia, quæque interpretari velle, est id velle intelligere, quod qui scripserunt non intelligebant (a).

C A P. XIII.

De Propositionibus.

§. I.

PROPOSITIO Logiciis dicitur omnis oratio, quæ integrum refert sensum, quæque affirmamus aliquid, aut negamus. Itaque ex Logicorum doctrina tribus saltem constat omnis propositio, *subjecto*, *attributo*, & *forma*, quam *copulam* vocant. Subjectum illud est de quo affirmatur, aut negatur aliquid; attributum vel prædicatum, quod de subjecto affirmatur, aut negatur. Ipsa affirmatio aut negatio forma dicitur, & *copula*.

§. II.

PROPOSITIONES aut *simplices* sunt, aut *complexæ*, seu *compositæ*. Simples vocamus eas, quæ in nullas alias solvi possunt, idest quæ nullas alias complectuntur, veluti, *virtus est nobilis*, *corpus est grave*, *homo est mortalis*. Complexæ seu compositæ (nam non placet cum Auctore artis cogitandi complexas a compositis sine ulla ratione discernere) sunt quæcumque in alias solvi possunt. Est autem hæc propositionum compositio multiplex I. vel *ratione terminorum*, vel *ratione formæ*. II. vel *diserte*, vel *latenter*. Ratione terminorum, scilicet vel *subjecti*, vel *attributi*, vel *utriusque simul*. Ex. *Mens æterna omnipotens existit*. Non

K 2

unum :

(a) Quale e. g. est vocabulum *ἐνταλμα* Aristotelis, pro quo intelligendo malum Genium excivisse Hermolaum Barbarum, utut id neget Naudæus, scripsit ejus æqualis Petrus Crinitus. Legatur dissertatio nostra de rerum origine, & constitutione.

unum affirmo, sed tria. 1. existere mentem quandam: 2. existere mentem aliquam æternam. 3. mentem hanc æternam esse omnipotentem. Tria illa in subjecto continentur. Quum dico, *Plato Atheniensis fuit magnus Philosophus*, tria dico 1. Platonem fuisse Philosophum. 2. Fuisse Atheniensem: 3. Fuisse magnum Philosophum. Subjectum simul & attributum composita sunt. Hæc alia propositio composita est ratione attributi, *Discite justitiam moniti & non temnere divos*: subjectum enim est *miseri*, qui duo discere debent *justitiam*, quæ homines, & non *temnere Divos*, idest *religionem*, quæ Deum spectat.

§. III.

PRæterea compositio propositionum aut *aperta est*; aut *latens*. Propositiones, quæ apertam compositionem habent, ad sex classes referri solent. I. *Copulativas*. II. *Disjunctivas*. III. *Conditionales*. IV. *Causales*. V. *Relativas*. VI. *Discretas*. Copulativæ complectuntur plures simplices particulis copulativis conjunctas. Ex. g. *Divitiæ, & sapientia, & nobilitas sunt causa superbiæ*: in qua propositione tria sunt subjecta conjuncta, de quibus attributum affirmatur. *Disjunctivæ* continent plures propositiones particulis disjunctivis a se invicem sejunctas, e. g. *Amicitia aut accipit pares, aut facit Bonum aut honestum est aut utile*. *Conditionalis* continet duas partes, quarum una ex præjacente conditione pendet Ex. g. *Si providentia est* (quæ est antecedens conditionalis) *Deus est* (quod est consequens ex antecedente conditionali pendens). *Causalis* continet duas partes, quarum una alterius causa statuitur. Ex. g. *Deus fecit mundum* (effectus est) *ut ostenderet suam gloriam* (causalis est: nam finis est: finem vero inter causarum genera statuunt Philosophi). *Relativæ* continent relationem, v. g. *qualis vita; finis ita*. Discreta propositio continet duo judicia de eodem subjecto, quorum unum affirmans est, alterum negans, veluti, *Cælum, non animum mutant, qui trans mare currunt*.

§. IV.

§. IV.

PROPOSITIONES *latentem compositionem* habentes ad quatuor classes referri solent. Sunt enim. I. *Exclusivæ*. II. *Exceptivæ*. III. *Comparativæ*. IV. *Inceptivæ & desitivæ*. Sic autem appellantur aut a particulis quibusdam, quibus connectuntur: aut a principio vel fine rerum, quas res significant. *Exclusivæ* particulæ sunt *tantum, solum, & similes*; *exceptivæ præter, excepto, similes*. Explicemus rem exemplis. Hæc propositio. *Deus tantum est æternus*, duas complectitur. I. *Deus est æternus*. 2. *& nihil aliud eorum quæ sunt est æternum*; itaque exclusiva est. In propositionibus exclusivis diligenter perspiciendum est, an particula exclusiva afficiat subiectum; an vero attributum; illa enim dicitur de *subiecto excluso*: hæc de *excluso prædicato*. Illæ docent attributum nulli alii subiecto convenire, qualis antecedens: hæc nullum aliud attributum subiecto attribui posse, ut *oculus videt tantum*; sensus est, ita videt, ut nec audiat, nec odoretur &c. *Exceptivæ propositionis* exemplum est, *omnia sunt mortalia, præter spiritus, vel, exceptis Spiritibus*. Complectitur has duas. I. *Spiritus sunt immortales*. II. *Cetera mortalia*. *Comparativæ* hoc, *Ira amore est validior*: Solvitur ita, I. *ira & amor affectus sunt validi*: II. *ira tamen præ amore validior*. *Inceptivæ & desitivæ* hoc: *a Comitibus Tridentinis res Europæ literia magnum augmentum caput*; quæ sic solvitur. I. *ante Comitibus Tridentina literæ jacebant* (quæ est barbariei desitiva): II. *post floruerunt* (quæ inceptiva est literarum.)

§. V.

IN propositionibus compositis distinguendæ plerunque sunt *principales ab incidentibus & accessoriis*. E. g. quum dico, *Ninus, qui idem fuit atque Belus, fundavit Ninivem*; duo affirmo. I. *Ninum fuisse eundem cum Belo*. II. *Ninum fundasse Ninivem*. Duarum autem istarum propositionum prior *incidens* est, posterior *principalis*. Eodem modo, *Lingua Sinarum, quæ Noetica est, omnium est simplicissima*, duo dico. I. *Sinarum*

linguam Noeticam fuisse. II. omnium esse simplicissimam. Posterior tamen propositio principalis est. Plurimum in librorum interpretatione refert nosse quænam sint *principales*, quænam *incidentes* propositiones. Nam qui scribit, videtur de principalibus potissimum sollicitus, de incidentibus minus. Quocirca Canon est omnium Logicorum, *Propositiones incidentes nec nimium esse urgendas, nec valde pertinaciter scriptoribus imputandas.* Qui Canon in Sanctorum Patrum lectione potissimum recolendus est. Si enim ante natas quasdam hæreses, quasdam propositiones incidentes bona mente protulerunt, quas, si hæreses illæ natæ fuissent, haud dubium non protulissent: quippe quæ videri potuissent hæresibus illis favere;

S. VI.

Circa propositiones compositas hæc mihi videntur non sine utilitate adnotari posse.

I. Propositio conjunctiva ut sit vera omnes ejus partes debent esse veræ: si una falsa fuerit, tota est falsa. Nam *affirmatio*, aut *negatio*, quæ una est & individua, omnes partes complectitur: earum igitur si una falsa est, tota *affirmatio*, aut *negatio* erit falsa.

II. Si antecedens conditionalium in se consequens non contineat, propositio conditionalis, aut falsa est, aut inepta. V. g. *Si Plato fuit Philosophus, Plato fuit Atheus.* Falsa est. *Si Plato fuit Philosophus, Plato fuit filius Aristonis.* Inepta.

III. Propositio conditionalis neque antecedentis, neque consequentis existentiam affirmat, aut negat, sed tantum statuit connexionem inter antecedens, & consequens. Qui dicit e. g. *Si non est providentia, non est Deus*, neque Deum negat, neque providentiam, sed tantum statuit connexionem inter antecedens illud, & hoc consequens.

IV. In causali duæ sunt partes, quarum una continere debet rationem alterius sufficientem. Si hæc ratio desit, propositio aut falsa est, aut inepta. V. g. *Romanum imperium cecidit, quia Christianam Religionem*
ad-

admisit, ut declamabant Gentiles : falsa enim est effectus illius causa ; Christiana enim Religio non evertit, sed mirifice conservat societates, & imperia (a). Hæc inepta est, *Aquæ maris fluunt atque refluent, quia Oceanus pulmonum habet systolem, & diastolem.*

V. Relativæ propositiones aut falsæ sunt, aut ineptæ, si falsa relatio, aut inepta statuitur.

VI. Disjunctivæ propositiones sunt ineptæ si medium est aliquod inter partes, quæ ut oppositæ statuuntur. V. g. *Omnes homines sunt aut Medici, aut Jurisperiti.*

VII. Propositionum exclusivarum veritas difficillime patet. I. Ut pateat veritas propositionum de subiecto excluso sciri debent omnia alia subiecta existentia, aut possibilia. Qui dicit, v. g. *ex omnibus animantibus Universi solus homo ad æternam beatitudinem factus est*, ut se verum dicere affirmare possit, scire debet, sint in aliis universi globis animalia alia ratione prædita e diversorum generum, quæ & ipsa ad beatitudinem sint facta, quæ sola ratione scire nequit. II. ut pateat veritas propositionum de prædicato excluso sciri debet adæquate subiecti essentia. Utrumque autem istud difficillimum est.

VIII. Si extrema, inter quæ fit comparatio, non omnia eandem qualitatem, in qua comparantur, participant, propositiones comparativæ ineptæ sunt, v. g. *Nix est Ebano candidior. Punctum est omni triangulo minus. Dei cogitatio velocior est cogitatione humana.*

IX. Omnis propositio inceptiva continet desitivam, ut & desitiva inceptivam. E. g. *Hebræi a Mose ceperunt esse liberi*: ergo ante Moysen servi erant. Ante seculum 14. non erat ars typographica: ergo fuit post seculum 14.

Possent alia plurima non inutilia hoc in loco præcipi. Sed quædam relinquenda sunt auditorum acumini.

*De propositionum quantitate, conversione,
& oppositione.*

§. I.

PRæter *qualitatem* propositionum, qua propositiones sunt *affirmantes* vel *negantes*, *simplices* vel *compositæ*, de qua superius; spectandæ etiam sunt tres aliæ eorum proprietates, *quantitas*, *conversio*, & *oppositio*. Ratione quantitatis omnis propositio est. I. *Indefinita*. II. *Universalis*. III. *Particularis*. IV. *Singularis*. *Indefinita* vocatur quæ nullo quantitatis signo efficitur, veluti, *Virtus est vera nobilitas: circulus est figura plana*. Hæ vero propositiones universalibus æquivalent, uti recte docet auctor Artis cogitandi. *Universalis* propositio afficitur signo aliquo universalis, veluti *omnis homo est mortalis, nemo est omni ex parte beatus*. Propositio *singularis* illa est, cujus subiectum unum quidem est, sed non determinatum; *singularis* vero si subiectum sit unum determinatum: hæc *particularis* est, *sunt lineæ quædam incommensurabiles: hæc vero singularis, Cicero præfuit Romanæ Reipublicæ*. Logici quatuor litteris symbolicis propositionum qualitatem, & quantitatem complectuntur. Sunt autem A, E, I, O. Hujusmodi litterarum vim his versiculis explicant.

Asserit A, negat E, verum universaliter ambo.

Asserit I, Negat O, sed particulariter ambæ.

§. II.

PROPOSITIONUM oppositio, est *duarum propositionum ex eodem subiecto, eodemque prædicato constantium, repugnantia in qualitate*, ita scilicet ut una sit *affirmans*, altera *negans*. Sunt autem tria oppositionis genera: propositiones enim oppositæ sunt vel *contrariæ*, vel *contradictoriæ*, vel *subcontrariæ*. *Contrariæ* sunt A E. *Contradictoriæ* A O, vel E I. *Subcontrariæ* I O.

Hinc

Hinc facile solvi potest problema hoc Logicum. *Data quavis propositione oppositam ei facere.* Nempe si propositio sit A, ei fiet contraria E, contradictoria O. Data E, ei fiet contraria A, contradictoria I. Data I, fiet ei contradictoria E, subcontraria O. Data O, fiet ei contradictoria A, subcontraria I.

§. III.

USus oppositionis duplex est, primus *in rite attentionem propositionum intelligendo*; Secundus *in disputando ad adversarium contradictionis convincendum.* Et primus quidem usus magnus est in Conciliorum Canonibus, quibus errores quidam condemnarunt, interpretandis. Scilicet Patrum mens fuit oppositos errores damnandi: datis ergo propositionibus erroneis, fiant eis oppositæ: hæ erunt propositiones Canonum, E. g. Ecclesia damnat hanc Jansenii propositionem. *In statu naturæ lapsæ interiori gratiæ nunquam restituitur*: opposita est vera. Fiat contraria, *In statu naturæ lapsæ interiori gratiæ semper restituitur*: & hæc falsa est: vera ergo erit contradictoria: *In statu naturæ lapsæ interiori gratiæ aliquando restituitur.* In disputando vero plerumque disputantes certis terminis contineri se nequeunt: ad terminos disputationi statutis adigimus oppositionis usu: nam ne duo opposita dicant, ad controversiæ terminos redeunt.

§. IV.

CONVERSIONUM usus & ipse duplex est, ut nempe rite propositionum extensio intelligatur, & ut accurate disputetur. Fit autem conversio propositionis, *quum ejus subiectum transponitur loco prædicati, prædicatum loco subiecti, eadem qualitate propositionis manente, quantitate vero manente in conversionibus simplicibus, non vero in versionibus per accidens.* E. g. *Triangula æquilatera sunt æquiangula*: conversa: *Triangula æquiangula sunt æquilatera.* *Omne corpus est solidum*: omne solidum est corpus. Simpliciter converti possunt ex Logicorum doctrina propositiones EO. Per accidens vero
pro.

propositiones A. Quæ non semper vera sunt. Sed tædet me ineptias hujusmodi prosequi: sunt enim tales, quas contempleris doctius, quam iciveris. Interim, si vacat, legantur quæ his de rebus habet Auctor *Artis cogitandi lib. 11.*

§. V.

Circa quantitatem propositionum hæc interpretandis aliorum dicta utilia observabimus ex eodem Auctore artis cogitandi (a). I. Propositionum *universalitas* vel est *Metaphysica*, vel *Moralis*: & in illa quidem nulla est exceptio: in hac vero exceptio esse aliqua potest. E. g. *omnis homo mortalis est*: universalis est metaphysice: nullam enim habere exceptionem potest. At hæc, *Non est qui faciat bonum, non est usque ad unum*, moralem habet universalitatem: Itaque nec nimium urgenda est, nec ex ea propositiones particulares indiscriminatim deducendæ, tamquam si universalitas esset *metaphysica*.

§. VI.

In eo autem magna est difficultas, ut discernatur quandoam propositiones metaphysice, quando vero moraliter sint universales. Id investigandum est partim ex *auctoris mente*, & *loquendi ratione*; partim ex *ipsa rerum*, de quibus agitur natura. E. g. dicit Paulus Apostolus, *Deus vult omnes homines salvos fieri*: sunt qui hanc propositionem non *metaphysice*, sed *moraliter* universalem esse volunt. Sed hos non rite accipere & ex ipsa rei natura, & ex Pauli mente discere possumus. I. Quia quum Deus sit æque omnium Pater, nulla ratio est, cur aliquem, nisi mereatur, rejicere a beatitudine velit. II. Quia idem Paulus docet non esse apud Deum personarum ullam acceptionem, eodemque loco apud illum esse *Judeos*, & *Gentiles*, *cultos*, & *barbaros*, solaque operum sanctitate discerni. III. Quia Deus malos perpetuo ad bonam frugem exhortatur. IV. Quia id toti scripturarum divinarum *œconomia*, qua duce scripturæ sacræ recte interpretantur, adversatur.

§. VII.

(a) *Part. 2. cap. 13.*

S. VII.

II. **Q**uædam sunt Propositiones universales, *quæ de generibus singulorum, non de singulis generum accipi debent.* Veluti quum dicitur, *omnia animalia fuerunt in arca Noemi,* idest omnia animantium genera. Quum Christus dicit de Phariseis, *decimant omnes olus,* ita intelligendum, ut decimaverint omne oleris genus, quod in usu apud Ebreos erat. Hæc diligenti indagine sunt investiganda.



LIBER III.

De vero & falso, deque Criteriis veri
generatim.



Bene habet. Quæ mentem aut ab investigatione veritatis abstertere possunt, aut in errores agere præcipitem: tum quæ ideæ, idearumque origo, & genera; quæ vocabulorum natura, qui usus, in duobus prioribus libris, satis, aut fallor, enarrata; atque explicata habemus. Ea primum ut tirones philosophi discerent oportebat: ea si probe habuerint perspecta, exercitioque ipso mentis in succum converterint & sanguinem, satis grandem fecisse ad rem *logicam*, atque *criticam* gradum sciunto. Nunc ad majora aggredimur: dicendum enim restat *quas ob res* tantas curas suscipiet philosophus: quæ veritatis & scientiæ insignia, & quasi *tesseræ*; quæ discendi *viæ* & *rationes*; quæ tribus, qui sequuntur, libris, quod felix fortunatumque sit, porro explicaturi pergamus.

CAP. I.

De vero & falso, deque variis animi humani
statibus quod ad veritatem attinet.

§. I.

Vocabulo *veritas* non una atque simplex subjecta est notio: est enim veritas aut *moralis*; aut *realis* atque *naturalis*; aut *Metaphysica*; aut *Logica*. Veritas moralis est *concordia sententiarum animi* cum *signis quibus illæ exprimi solent*. Ea dicitur moralis, quod ad hominum mores spectet. Qui igitur ita eloquuntur, ut sentiunt, ii *veridici* appellantur. Huic veritati opponitur

nitur *mendacium*, & , ut Cicero gravissime censet (a), dissimulatio etiam atque simulatio. Hujus loci non est canones hanc spectantes veritatem præcipere. Ethicorum id est proprium (b). *Veritas realis est quum res est id quod esse in natura debet*, easque habet in natura proprietates, affectiones, aut relationes, quas habere natura debet: seu, ut apertius dicam, *est ipsa existentia, essentia, relatio rei, prout in natura ipsa statuta spectatur*. Hanc veritatem habent hujusmodi propositiones, *existit res quædam cogitans: Aurum est grave: tres trianguli anguli sunt æquales duobus rectis: si existit motus existit causa motrix*. Veritas *Metaphysica est congruentia rerum aut factarum, aut possibilium cum ideis Dei æternis & immutabilibus*. Duabus hisce veritatibus, *Naturali scilicet, & Metaphysicæ nulla est opposita falsitas*: quælibet enim res ut necessario est, quod natura esse debet, quæ est *veritas naturalis*; ita æternis Dei & immutabilibus ideis non congruere nequit, quum sit ille & sapientissimus, & potentissimus, & mundi opifex, atque conservator,

§. II.

Veritas Logica est convenientia judiciorum nostrorum cum veritatibus ipsis naturalibus & realibus; quum scilicet id nos judiciis nostris affirmamus, aut negamus, quod natura ipsa *tale est, aut non est*. Falsitas autem Logica est discordantia judiciorum nostrorum a veritatibus naturalibus & realibus, nempe quum judiciis

no-

(a) *Lege quæ bas de re præclare præcipit in tertio de Officiis, Ita inquit, nec ut emat melius, nec ut vendat, quidquam simulabit, aut dissimulabit VIR BONUS..... Hoc autem quale sit, & cujus hominis, quis non videt? certe non aperti, non simplicis, non ingenui, non justî, non VIRI BONI: versuti potius, astuti, fallacis, malitiosi, callidi, veteratoris, vafri.*

(b) *Legatur Aug. de mendacio ad Consentium, Grotius lib. 11. de jur. B. & P. Pufendorfus lib. 14. de J. N. & G. cap. 1.*

nostris affirmamus, quod, si ipsam rerum naturam introspexissemus, fuerat negandum, aut negamus id, quod fuerat affirmandum. Vocatur autem hæc veritas *Logica*, quod nimirum quemadmodum Philosophi officium est *veritates naturales* investigare, ut iis ad beatitudinem uti possit; ita Logici canones præcipere, quibus veritates istæ *certa via & ordine* perquiri possint. An autem veritates naturales certo sciri a nobis possint, & qua via atque ratione, dicetur inferius. Porro hæc veritates dicuntur a Logicis *propositiones aut evidentes*, aut *sin evidentes*, saltem *certa*. Quum autem propositiones istæ ad varias humanæ eruditionis partes pertineant, inde fit ut appellentur aut *Physicæ*, aut *Theologicæ*, aut *Ethicæ*, aut *Historicæ*, aut *Juridicæ*. Sed & ipsæ veritates *naturales* prout pertinent ad varia objecta idearum nostrarum, iisdem variis vocabulis nominantur: hinc dicimur investigare veritatem *Physicam*, quum causas motuum Cœlestium proximas, aut attractionis magneticæ perquirimus: *Geometricam*, quum studemus reperire aut problematis Geometrici solutionem, aut theorematum demonstrationem. De aliis eodem modo ratiocinator.

S. III.

A Nimihumani status, quod spectat ad *cognitionem*, omnino sunt quatuor. I. *ignorantiæ*, II. *Dubii*. III. *Opinionis*. IV. *Certitudinis*. I. Ea ignorare dicimur, quorum nullas nec sensu, nec conjectura & ratiocinio habemus ideas. Sed & status ignorantie est triplex I. *omnigenæ ignorantie*. II. *meræ fidei*. III. *ignorantiæ cum scientiâ conjunctæ & temperatæ*. In primo statu versantur infantes dum adhuc in utero sunt matris, seu quod nullas vident ullarum rerum ideas homuli isti, seu quod nondum exsertam habent & expeditam percipiendi facultatem: dicere enim infantes in utero matris cogitare, est hominibus *sensum communem* velle præripere. Hunc *omnigenæ ignorantie* statum excipit *status fidei*, ut ego appello, idest status idearum confusarum atque obscurarum, in quo nec nihil cernitur, & clare atque di-

distincte non cernitur, omnino vero non judicatur, sed aut sensuum, aut aliorum vivitur iudicio. Talis est status infantium ante *adultam rationem*: talis præterea status hominum stupidorum. Huius status propria sunt *iudicia naturalia*, ut vocat Malebranchius, idest *præiudicia sensuum & phantasiæ*, que in animum irrepunt, quasi nobis insciis, minimeque advertentibus; quippe qui in eo statu nec dubitare scimus, nec perpendere; rapimur ergo a *sensu & phantasia*. Ad eundem statum spectant *præiudicia consuetudinis & auctoritatis*: quandoquidem in eo statu constituti, quum *scire videreque* ipsi, atque *examinare* nequeamus, aliorum aut *exempla*, aut *verba* pro *ratione* habemus. *Præiudicium* autem quum dico, non ut hodie imperite a pluribus accipi video, *opinionem falsam*, sed iudicium intelligo seu verum, seu falsum, aut ab aliis (quod *præiudicium auctoritatis* dicitur); aut a nobis, minime tamen animadvertentibus, sed vehementer a *sensibus*, & *phantasia* commoti (quod sensuum est *præiudicium*) factum, quod pro vero sine ullo examine accipimus. Ex quo sequitur ineptum esse illud plurimorum, qui quum falsum aliquid dicere volunt *præiudicium est*, inquirunt; sunt enim & *falsa* & *vera præiudicia*, quæ acri ratione sunt discernenda; non vero anticipata opinione, & sine ullo examine, idest altero *præiudicio*, statim expuenda. (a).

§. IV.

Sequitur status ignorantie cum *scientia* conjunctæ & temperatæ. Is regnat in reliquo vitæ humanæ tempore, idque in hominibus omnibus. Nam ipsi illi, quos conceptis in adulationem formulis *doctissimos*, & *eruditissimos* appellamus, *pauca* certo sciunt, in *plurimis* opinantur, aut hærent dubii, *infinita* ignorant: qui idcirco si non ex rerum, quas sciunt, numero, sed ex numero ignotarum sint designandi, rectius *ignorantissimi*, & *imperitissimi* appellabuntur. Horum autem

ani-

(a) *Legenda sunt quæ magno iudicio ea de re differit Barclajus in dissert. ad magistratus de tuenda Religione, in Bibliotheca Britannica tom. XII. p. 2.*

animus in iis, quæ non omnino ignorat, aut *hæret dubius*, aut *opinatur*, aut *certus* est. Et dubius quidem est animus, aut quum neutra ex parte rationes habet, quibus impellatur ad assensum, quod dubium *negativum* vocant: aut quum ex utraque parte habet æquales, quod *positivum* nominant. Est enim animus, quod ad assensum, aut dissensum attinet, *Lancis* instar, quæ nisi præponderante ex alterutra parte momento, nullam in partem declinat, sed perstat in æquilibrio. Momentum, quo intellectus inclinatur est *RATIO*. Ea si neutra ex parte apparet, is in æquilibrio est suapte natura: ex utraque æqualis, momentorum æquilibritate stat immobilis.

§. V.

Status *probabilitatis*, seu, ut vulgo dicitur, *opinionis*, is est. in quo animus alterutram quidem in partem flectitur, sed lente, perplexim, timide, nec sine sollicitudine. Quod fit, aut quod ex una tantum parte apparent rationes, quibus inclinatur, non illæ licet *aperte*, *evidentes*. quæque omnem ex animo anxietatem auferant: aut quia ex utraque adsunt, quamquam ex alterutra graviores. Quum autem quæ animum commovere possunt momenta sint aut *RATIO*, aut *AUTORITAS*, quæ ex ratione nascitur probabilitas, *intrinseca* appellatur, quæ ex auctoritate, *extrinseca*. Ea autem ex re patet, statum *probabilitatis* medium esse inter *ignorantiam*, qua nihil, & *scientiam*, qua certo scimus: ergo distat hic status ut ab ignorantia, ita certitudine. Distat autem gradibus quibusdam. Gradus distantix a certitudine dici solent *gradus probabilitatis*, iique, dum opiniones duæ conferuntur, numerantur in *ratione inversa*. Ex. g. sit Certitudo D, opiniones duæ B, C, distetque Ba D 4. C vero 2., erit probabilitas 7x C ad probabilitatem 7x B, ut est 4. ad 2.. Quas tamen collationes quum efficere nequeat, nisi qui certitudinem intuetur; inde fit ut difficillime hoc modo probabilitatis gradus dimetiantur, faciliusque cognoscantur ex distantia ab ignorantia. Sed ea de re alibi commodius. *Probabilitas & opinio* pro eodem vulgo haberi solent: non recte tamen. Opinari

nari enim Latinis est probabilitati tanquam certitudini assentiri, idest incerta habere pro certis. Notum est Stoicorum illud, *sapientem nihil opinari* (a).

§. VI.

Quartus jam superest animi status, *certitudo*. Certus est animus, qui de iudicio suo, quantumvis velit, aut conetur, dubitare nullo pacto potest: nam si vel minima insit suspicio, aut sollicitudo, certus non est. Certitudinis iudex sui cuilibet est conscientia, nemini alter. Ergo in his iudiciis, *Non potest idem simul esse & non esse, Quæ eidem sunt æqualia inter se sunt æqualia, Triangula habentia eandem altitudinem sunt ut bases*, certus sum. Nam nulla mihi est de eorum veritate suspicio, & quantumvis conor de iis dubitare nequeo. Suam dixi cuique esse certitudinis iudicem *conscientiam*, quod interiorē hunc animi statum, nisi Deus, alius intuetur nemo: quanquam id non prohibet, quin certis is signis cognoscatur, aut autoris asseveratione, aut actionibus, uti ex exemplis, quæ mox subjiciam patebit. Est porro certitudo vel *vera* vel *fallax*: potest enim quis certus esse, interim errare: Certus quidem, quod nec dubitet de iudicio suo, nec dubitare sciat: errare vero si iudicium illud minus sit *veritati naturali* conforme.

L

§. VII.

(a) Cicero IV. Acad. Qq. Interim non intelligo, qui possit quispiam animo hoc modo opinari, idest temere assentiri. Assentiri enim dicitur animus, quem convictus est et certus: quod si in probabilitate certus non est, assentiri nequit; aut si assentitur, convictus est & certus; probabilis ergo non est; neque idcirco opinatur. Video tamen unde ea sit nata opinio. Persuaserunt sibi quidam, intellectum humanum libertatem habere iudiciorum, adeoque iis etiam assentiri posse, quæ aut non intelligit, aut non clare intelligit, aut quæ esse falsa videt: non alia ratione quam qua voluntatis libertate etiam contra animi sententias vocabulis abutimur. Quæ opinio omnino est falsa: quanquidem intellectus potentia est necessaria.

§. VII.

Mirum est potuisse Philosophos *fallaces* istas certitudines negare, quæ & in litteratorum libris proferuntur quotidie, & in tota humana regnat vita. Nullane erunt judicia falsa quæ pro veris habentur? mihi potius videtur nulla esse tam numerosa judicia, quam isthæc, quæ certa habentur, & fallunt. Quot sunt non in Philosophia modo, sed in Religione sectæ, qui sibi adversantur, & quarum, nisi una, nulla esse alia vera potest? Quot sectarum hujusmodi sectatores? Eorumne nullus erit, qui certam sectam suam habeat? Mihi contra paucos esse, qui suam certam non habeant videtur; quippe qui video pro ea ita ut pro vita pugnare. Philosophi ipsi fallaces istas certitudines, dum rerum suarum amore incalescerent, omnium maxime passi sunt. Non posse esse mundum nisi æternum, censebat Aristoteles: at factum esse, idest aliquando cœpisse, docebat Epicurus. Lactantius risit Antipodas (a), qui nunc ipse ridetur a pueris. Malebranchius adeo certus erat se omnia in Deo videre, ut scripserit, *amare se melius vocari fanaticum*, quam de sententia abire (b): contra Lockius nihil habet exploratius, quam omnia *sensu & meditatione* sciri. Nihil magis Cartesius sibi persuaserat, *εὐκτατον*, quam vacuum: cæcutire eos qui vacuum hodie non vident, scribunt Nevvtoniani. Memorat Ricaut Turcam obfirmato animo Constantinopoli pro Atheo maluisse comburi, quam tam nefando posito errore, vitam excipere (c). Non est igitur, quod *fallaces* istas cer-

(a) *Lib. III. cap. 24. Est inquit, quisquam tam ineptus qui credat esse homines, quorum vestigia sint superiora quam capita? Ædepol rem intellectu negotiosam!*

(b) *In illustrat. ad libros de inqu. verit. Deum, inquit, solum nos illuminare Religionem adeo conforme mihi videtur, ut illud ad extremum usque explicare & defendere muneris mei esse arbitrer. Phantasticus, illuminatus, fanaticus. nuncupari malo &c. pag. 70. edit. Latin.*

(c) *Vocat eum Muhammed. Effendi: in historia Imperii Ottoman. lib. II. cap. XII. edit. Amstel. 1672.*

istas certitudines negemus: nihil potius inculcandum est Philosopho, quam ut ab his caveant: quippe nihil est VERITATI, & VITÆ HUMANÆ perniciosius, quam in prævum indurescere, nec ulla perniciēs major inveniri potest, quam in fallitate opinio intelligentiæ.

§. VIII.

Certitudo apparens nascitur ex omnibus iis causis, ex quibus error manat, sed præsertim ex his quatuor I. *brevitate mentis*. II. *Præjudiciis*. III. *Pigritia*. IV. *Affectibus*. Et primo quidem mentes breves, quum paucis ideis sunt imbutæ, nihil ulterius prospiciant: putantque nihil sciri aliud posse, quam quod ipsæ sciunt. Hinc suis judiciis ita acquiescunt, ut dubitare de iis neque sciant, neque possint. Eos immo insectantur, aut rident, qui adversus eorum errores prædicant. Si idiotæ dixeris *ignem non esse calidum*, nec *nivem frigidam* cachinnatur. Si plebejo Muhammedano cōaris probare *Muhammedem summum fuisse impostorem* quumque non posset alia viā *summum imperium* habere, religionis specie aucupatum fuisse, irascitur, atque insectatur tanquam veritatis hostem. Uno verbo, mentes breves, nisi tu eodem modo, atque ipsæ cogitant, cogitaveris, *pertinaciter* vel irrident, vel minantur: II. Præjudicia efficiunt & ipsa, ut neque sciamus, neque possimus de iis dubitare, quæ tamdiu pro veris habuimus. Sunt autem duæ istæ causæ, *mentis brevitās*, & *obstinata præjudiciis fides* firmæ semper conjunctæ. Vide quæ superius dicta sunt de *statu fidei*.

§. IX.

III. **J**Am pigritia causā est, ut primis ideis, & scientiarum cortice simus contenti; ulterius inquirere vetat. Itaque pigro homini nemo tam est odiosus, quam qui ad severum atque improbum studium, adhortatur. Stulte vero stomachatur, si quis saniora ei prædicat. Hinc delicatuli isti Apollines

.... fruges consumere nati,
Sponsi Penelopes, nebulones, Alcinoique
In cute curanda plus æquo operata juventus,
Cui pulchrum fuit in medios dormire dies, &
Ad strepitum citharæ cessatum ducere curam, (a)
 postquam perfunctorie & diariis istis, ac menstruis libellis pauca & indigesta didicerunt, ad Mercurii adnarunt columnas; nil ultra est. *Quæ ignorant* (ut *Æsopica olim vulpecula*) *blasphemant*, ut B. Augustini verbo utar. IV. Tandem idiplum efficiunt affectus; mentem enim uni objecto defixam tenent, ita ut potis non sit aliud cogitare, I tu, & iis, qui,
Lævo suspensi loculos, tabulamque lacerto
 recinunt plebeja dicta

O Cives, Cives, quærenda pecunia primum est,
Virtus post nummos.....

Suade VERITATIS, VERÆQUE VIRTUTIS studium;

Suade ei, qui sub *Domina meretrice turpis* &

Excors vivit cæcis immundus, vel amicaluto sus;

Suade ei, qui in ambitione posuit summum bonum, quique hoc maximum credit malum, *turpem reputat*; otiosum ridebit philosophum.

S. X.

QUærat autem aliquis, an sint ulli certitudinis gradus, seu, quod eodem redit, sitne certitudo certitudine certior. Video quosdam in eam propendere sententiam, certitudinem esse certitudine majorem (b) Ipse autem in Elementis Metaphysicæ scripsi, *Certitudinem gradus nullos habere, nec iis de rebus, in quibus nos certi sumus, majorem vel ipsi Deo esse certitudinem* (c). idque post Malebranchium, Sed quum eo in loco, tum in aliis opusculi illius, haud mihi placeo, exigitur ingenuitas ut fatear, me amore potius ingenii periclitandi, nec satis maturo, quam serio, & destinato con-

(a) Horat. lib. 1. cap. 7.

(b) Huetius in Alnet. lib. 1.

(c) In prim. par. Metaph. schol. prop. VIII.

consilio, edidisse. Ergo quæstio clarius explicanda. Nam aut certitudo spectatur ut animi status, in quo qui certus est, nec dubitat de iudicio, nec scit dubitare, & ea nullo habet gradus; quandoquidem si gradus statuas, dicas, oportet, minorem certitudinem cum sollicitudine aliqua esse conjunctam, adeoque quæ minor est certitudo, non esse certitudinem: aut spectatur in *securitate iudicii ut veri*, & quum non omnis certitudo sit vera, ut supra est demonstratum, est certitudo certitudine perfectior. Ita quo mens capacior est, & perfectior eo iudicia, quæ certa habet, securiora sunt, minusque erroris susce-
pta.

C A P. I.

De Scientia & fide.

§. I.

Scientia vocabulo intelligimus cognitionem claram & evidentem usu rationis comparatam. Dividi solet in scientiam simplicis intuitionis, & scientiam demonstrationis. Illa sine ullo ratiocinio habetur, cujusmodi est scientia axiomatum, Quæ eidem sunt æqualia, inter se sunt æqualia. Non potest idem constare ex illis quæ se mutuo destruant. Eiusdem naturæ est scientia eorum, quæ intima conscientia sine ulla ratiocinatione sentimus, ut, Nos esse, cogitare, affectibus agitari, dolorem, aut voluptatem sentire, & similia. Tum & scientia eorum, quæ clara sensatione percipimus, veluti esse corpora, moveri, ejusdemque generis alia. Hæc sine ratiocinio non acquiruntur, ut est scientia theorematum, Quadratum hypotenuse æquale est duobus aliis, quæ in reliquis trianguli rectanguli lateribus sunt, Corporum libere cadentium vires sunt in ratione duplicata distantiarum, quæ non intelliguntur clare, nisi fuerint demonstrata. Vocantur præterea Scientiæ disciplinæ illæ, quæ conflatae sunt ex longa serie scientiarum utriusque generis, intuitionis nempe & demonstrationis, quæque vocari solent in Philosophorum.

scholis habitus scientifici, qualis Geometria, Arithmetica &c.

§. II.

Dubitare non possumus, qui scientia *simplicis intuitionis*, & *axiomatum* nobilior sit & perfectior scientia *demonstrationis*, seu *theorematum*, sitque prima illa securior præ ista. Nam scientia theorematum non acquiritur, nisi serie quadam judiciorum, quorum alterum ex altero pendeat necessario, & in cujus progressionis singulis gradibus evidentia *simplicis intuitionis* retineatur. Pendet ergo hæc scientia a memorie *vivacitate* & *facilitate*: nisi enim memoria vivax & facilis ideas in serie illa suppeditat, ratiocinii nexus simul & claritas evanescit. Jam quum memoria, ut alibi dictum est, in hominibus satis magna, & clara non sit, possumusque de ejus fidelitate subdubitare, efficitur, scientiam hanc, quæ pendet a memoria, minus esse præstantem, minusque, quam prima est, securum. Ergo Spiritus a corporibus segregati, si quæ nos longa meditatione & ratiocinatione detegimus, claro ipsi simplici que intuitu cernant, tanto sunt nobis scientia præstantiores, quanto nos iis sumus in intelligendo tardiores. Ex quo etiam & illud discere licet, *vim ratiocinandi, longissimasque demonstrationes efficiendi*, quam tanto animi capitisque labore acquisitum imus, & in qua humanarum mentium præstantiam ponimus, maximum esse infirmitatis humanæ argumentum.

§. III.

Scientiæ propria est *evidentia*, quæ quid sit intelligitur melius, quam ullis vocabulis explicatur. Est autem evidentia duplex. I. *mathematica* atque *metaphysica*. II. & *physica*. Illa habetur in *axiomatibus*, & *demonstrationibus puræ intellectionis*: axiomatica autem, & demonstrationes *puræ intellectionis* voco, quæ neque Sensui, neque Phantasia innituntur, qualia sunt axiomata & demonstrationes, quæ Scientiæ *abstractæ* idcirco dicuntur, in primis *Geometria, Algebra, & Metaphysica*,
sup-

suppeditant. Sed esse aliquod discrimen videtur inter evidentiam *demonstrationum puræ Metaphysicæ*, & evidentiam *demonstrationum Geometriæ puræ*: tenacior enim est hæc, diutiusque durat: fugacior illa, evanescitque cito. Qui demonstrationem legit geometricam, & dum legit claro lumine se illustrari sentit, & posito etiam libro diu in eodem versatur lumine. At (quod Ciceroni observatum est (a),) metaphysicæ demonstrationes clæræ videntur, persuadentque dum leguntur, aut audiuntur, at haud diu post quasi elabuntur, & diffugiunt. Ejus rei, quantum mentis acie contendo, duas reperio causas. I. Quod geometricæ ideæ *numeris*, aut *lineis* vivacius memoria tenentur, unde diuturnior fit evidentia: metaphysicæ vero nullis hujusmodi subsidiis colligatæ & constrictæ, relabente ad phantasmata intellectu, quasi evanescunt (b). Difficile sane est mentem non solum a sensibus, verum etiam a *phantasia* ad pura intelligibilia evehere: difficillimum vero postquam revocaverisne relabatur continere. II. Quod res geometricæ maxima ex parte tales sunt, quæ beatitudinem aut miseriam nostram minime spectant; quocirca nullis nos affectibus agitare possunt, qui affectus omnium maxime evidentiam infuscant: contra vero Metaphysicæ ea tangunt, quæ cum beatitudine vel miseria nostra sunt conjuncta, *Deum* nempe, *animas*, *providentiam*, de quibus differere vix sine commotione possumus; nec cum animi commotione mentis evidentia conservari potest. Accedit tertia, quod notiones metaphysicæ quum raro sint *adequatæ*, quietum animum vix relinquunt: itaque posito libro suapte quasi natura ad suspensiones redit.

§. IV.

EVidentia *physica* ea est, quam sensus faciunt, veluti quum clare & distincte lumen & colores videmus, sonos audimus, corpora tangimus. Quanta hæc sit

L 4 evi-

(a) Cicero lib. 1. *Tusculanarum* quum *Platonicas* memorat de immortalitate animorum rationes.

(b) Vide Maleb. in *illustrat.*

evidentia quæsitum est. Minorem eam esse evidentia geometrica & metaphysica pronunciant Philosophi, quod verum est in iis qui mente valent. Contra vero in majore hominum parte, qui ad abstracta & pura intelligibilia non pertingunt, sensuum tantum evidentia primas habet partes; altera illa evidentia despiciatui est. Bellum igitur video inter *Philosophos & Populum*: illi nimium deiciunt sensus, horumque evidentiam præmentis evidentia nihili faciunt: iste *lymphatos* illos, *bacchantes, fanaticos*, nullius pretii homines habet. Videntur utrique peccare, ejus immemores, **UT NE QUID NIMIS**; Sed crassius isti, & stupidius, qui, quæ non intelligunt, rident: quibus si illud, false quidem, sed vere. *Ne ultra crepidas sutor*, dixeris, subirascuntur. Adeo qui veniat ingenio cedere rarus est!

Jam duplicem hanc evidentiam duplex comitatur certitudo. Sed quæ geometricam & metaphysicam evidentiam sequitur certitudo, longe securior est, minus hæc, quæ a sensibus nascitur.

§. V.

Sequitur *fides*. Ei vocabulo non eandem affigunt Philosophi Ethici notionem, quam Theologi, & Logici. Illis enim fides est *dictorum, conventorumque constantia, & veritas* (a). At fidem vocant Logici, & Theologi *aliquid pro vero tenere, non quod ipsi id percipiamus, sed quod nobis narretur ab eo, cujus quum scientia, tum bonitas magna apud nos est*. Itaque *scire, & credere* in hoc longè apud hos differunt, quod ea *scire* dicamur, quæ aut *sensus*, aut *intima conscientia*, aut *ratiocinium* exhibent: credere vero dicamur ea, quæ nec *sensus*, nec *intima conscientia*, nec *ratiocinium*, sed alterius auctoritas persuadet. Quum autem auctoritas pendeat ab opinione *scientiæ*, & *probitatis* ejus, qui narrat, quo major hæc est opinio, eo majorem habet apud nos pondus auctoritatis, fidemque firmiorem gignit; debiliorem vero, quo est minor: ut certam facit auctoritas ejus, qui nec falli potest, nec fallere, cujusmodi est Deus.

Sed

(a) *Cic. 1. de off. cap. VIII.*

Sed de pondere auctoritatis in sequente libro commodior erit dicendi locus.

S. VI.

Vulgatum est adagium, *fides est credere quæ non vides*, idest quæ minime mente comprehendis. *Invisibilibium* esse fidem ipse docet Paulus Apostolus: sed & Malebranchius (a) scripsit earum rerum quæ fide tantum tenentur *nullas nos habere ideas*: quamquam deinde ita interpretatus est, ut nullas habere nos *claras ideas* creditarum rerum, præsertim mysteriorum fidei diceret (b). Revera si nullas haberemus earum rerum, quas credimus, ideas, vocabulum credere *nihil* esset, idest, qui credere aliquid diceretur verba effunderet, nihil interim ipse animo versans, nisi *verba*. B. Augustinus alicubi credere vocat *cogitare cum assensione*: quod scilicet qui alicui rei assentitur, alterius motus auctoritate, quæ est *fides*, ejus rei informatam animo notionem habeat oportet. At dicet aliquis, si quæ credimus intelligamus oportet, *scientia & fides* non distabunt. Falso. Scientiæ enim hoc est proprium, ut non solum *subjecti*, & *prædicati* propositionis, quam *scio*, claram habeam ideam, verum etiam clare percipiam eorum connexionem: at in fide habeam quidem notionem *subjecti* & *prædicati* oportet, sed qualemcumque: connexionem vero non ipse videam, ut in scientia, sed esse supponam, quod alter dicat, quem scio non mentiri, nec falli. E. g. puer habet ideam *laterum*, & *diagonalis* parallelogrammi; habet præterea ideam *commensurabilitatis*, aut *incommensurabilitatis*: quid sibi hæc vocabula volunt intelligit: at fortassis non intelliget, qui *latus*, & *diagonalis* parallelogrammi sint *incommensurabilia*: si id (quod Geometra dicat) verum teneat, tum credit. Eodem modo nos qualemcumque habemus *Dei* notionem: habemus porro claram notionem horum vocabulorum *tres personæ*; sed id non intelligimus: qua ratione *tres personæ*, & *unus Deus* sint *idem*: quoniam autem id
Deus

(a) Lib. 1. de inquir. verit. cap. 3.

(b) In illustrat. ad cap. 3. libri 1.

Deus ipse nos docet, verum id teneamus, etiam si ipsi non intelligimus, atque ita *credimus*. Qua ex re patet, quod ut credamus habere debeamus qualemcumque *subjecti & attributi* propositionis notionem, nullam vero, aut obscuram & confusam tantum eorum connexionis, de qua auctoritate docemur ejus, cui credimus. Unde & hoc etiam patet non posse nos eandem propositionem *scire & credere*: qui enim scit ipse videt: qui credit, non videt connexionem idearum: quæ duo in eodem intellectu se destruunt. Mirum est eos,

Qui tam rixantur de lana sepe caprina (a)
 de re sic contendere pugnacissime.

§. VII.

Sed quamquam *scientia & fides* eadem de re simul esse in mente non possunt; id minime prohibet, quin dicamus, auctoritatem atque fidem plerumque posse securiorem efficere *scientiam*; id est *claram evidentemque* perceptionem. Quod ut intelligatur, illud statuendum est, *credere esse uti auctoritate* vel ut suppleamus rationem nostram, ei substituendo præstantiorem; vel ut rationem nostram, de cujus imbecillitate subdubitare possumus, præstantioris rationis ope confirmemus. Paucis, credere nihil est aliud, nisi *superiorem* rationem inferiori aut *substituere*, aut *addere*. Enimvero nemo credit ei, qui eum rei, de qua agitur, se ignorantiorum putat. Si is mihi paradoxum aliquod philosophicum pronunciat, qui obtusioris etiam pectoris, quam ego sim, apud me est, idque per *Sanctum juratus Ostrim* testatur, non credam: at credam, si is pronunciat, cujus sapientiæ opinio magna mihi est. Id quum sit, qui agnoscit mentis suæ capacitatem esse brevem, quamquam aliquid clare & evidenter percipit, potest tamen subdubitare fallatur nec ne in ipsa clara & distincta perceptione. At si audiat idem ab eo confirmari, qui aut capaciior sit mente, aut infinite intelligens & sapiens, scientiam suam aut securiorem, aut securissimam efficit, non quidem præstantiorem rationem suæ substituendo, quo suam suppleat (id enim fit,

quum

(a) Horat.

quum intelligere ipsi rem nequimus, idest in puræ fidei statu) sed præstantiorem suæ addendo, quo suam confirmet, Explicemus hoc exemplis. Adolescens Geometra, datis duabus lineis A, B, videtur sibi reperiisse tertiam proportionalem C. de demonstratione non dubitat: at subdubitare potest ne brevitate mentis fiat, ut nequeat agnoscere, qua in re demonstratio sua laboret fortassis. Is si audiat præclarissimos Geometras ratam solidamque eam habere demonstrationem, scientiam suam fide confirmat. Eodem modo omnes homines, qui recta ratione utuntur, agnoscunt Deum ita esse bonum, ut nequeat non amare hominum beatitudinem. Idipsum vero quum a Deo revelatum discunt, scientiam divina auctoritate confirmant, idest humanæ rationi, quæ falli potest, supremam Dei rationem, quæ nequit falli, addunt, quo eam confirmant.

C A P. III.

An ullam habeant homines veritatis Logica tesseram.

S. I.

Quid sit veritas, quam logicam dicimus, in primo hujus libri capite explicatum est. Nunc magna res quæritur, sit ne aliqua veritatis logicæ tesseræ, & quænam? Quod eodem recidit, quo tandem argumento tuti esse possimus, ea, quæ affirmate judicamus, sic se habere, ut judicamus, nulloque pacto in iis nos decipi? Academicæ hæc erat sententia, nulla esse, quæ ut vera affirmare possimus: esse vero multa probabilia, idest quæ ad verum quamproxime accedant, quæ sequi facile sit (a). Sed ad furorem usque acatalepsiam hanc suam provexerunt Pyrrhonicæ, & positos ab Academicis terminos longe prætergressi fuerunt, nullamque esse rationem veri a falso discernendi contenderunt (b). Ego vix mihi persuaserim

(a) Legatur Cicero lib. II. Academicarum question.

(b) Historiam scepticismi scripserunt Gassendus, Graviius in Specimine philosophiæ veteris lib. I., Joannes Franciscus Buddeus in dissert. de Scepticismo morali &c.

rūm fuisse usquam, aut hodieque esse, qui sic furese valeant, ut ex animo dicant, *nihil omnino nos scire*. At si qui revera sunt, eos non monitoris, nec doctoris, sed tutoris ab Iudice dati egere censeo: nam nisi hæc manifesta sit phrænesis, fateor ne *non factum* quidem Orestem furem errasse. Interim verum est, bonam eorum partem, quæ non vulgus modo, sed plerique eorum, qui ad *unam quampiam sectam quasi tempestate delati, ad eam tamquam ad saxum adherescunt* (a), audacter affirmant, falsam esse, aut dubiam. Quod qui agnoscit, non is quum Scepticis furit, ut imperitum judicat vulgus, sed

Et sapit, & mecum facit, & Jove judicat æquo.

Quamobrem licet ignorantia vertat, si qui vult, *plus apud me tamen vera ratio valebit, quam vulgi opinio* (b).

§. II.

JAm quum multa tuto a nobis affirmari concedam, illud pervestigandum modo est, quæ sit veri atque tuti alicujus judicii *testera*. Epicurei tria videntur hujusmodi criteria statuisse, *sensationem* in iis quæ sensibus percipimus: *prænotionem*, in iis quæ mente intelligimus: *affectionem* in bonis aut malis vitæ dignoscendis. L. Quum sen-

Scepticorum causam egerunt ex veteribus Cicero in Academicis quæst. & Sextus Empiricus quum in libris adversus Mathematicos, tum in libris hypotyposem. Ex novis Philosophis Henricus Cornelius Agrippa de vanitate & incertitudine Scientiarum, Franciscus Sanchez; de multum nobili & prima universali scientia, quod nihil scitur Lugduni 1581. 4. Daniel Huetius in Tractatu philosophico de imbecillitate homani intellectus Gallice Amstelædami 1723. 8. Petrus Badius in pluribus dict. locis, præsertim art. Pyrrho, Hieronim. Hirnaim, alique; Nemo autem doctius eos confutavit, quam Petrus de Villemandy in scepticismo debellato Lugduni Batavorum 1697. 4. sed & nos adversus Scepticos disputavimus in Metaphysica, & in Appendice ad priorem metaphysicæ partem dialogo II.

(a) Tullius. II. Ac. quæst.

(b) Cicero in paradoxo primo.

sensus falli nequeant ex Epicureorum sententia, quæcunque clare & distincte sensibus percipimus ea vere esse affirmant. Sed demonstratum est in primo libro nos in pluribus a sensu dici: minus ergo tutum hoc criterium videtur. II. Prænotio clara & distincta certos facere nos debet secundum Epicureos: nam ea pendet a sensibus, qui, ut clamant, falli nequeunt. Hac de re paullo post. Tandem *bona vitæ* ex Epicureorum doctrina, sunt quæ voluptatem afferunt, *mala*, quæ dolorem: voluptatem autem aut dolorem ipsa affectione cognoscimus. Quod verum est. Sed quoniam nec voluptates omnes sunt bonæ vitæ, nec omnes dolores mali, ut ipse agnoscebat Epicurus, est in consilium adhibenda ratio, ne promiscue aut voluptates omnes adoptemus pro bonis, aut omnes dolores pro malis fugiamus. Nam quid sanctius hoc?

Sperne voluptates; nocet enim dolore voluptas (a).

Nullam dicebat Archytas Tarentinus (b) *capitalem pestem, quam corporis voluptatem hominibus a natura datam. Hinc Patriæ proditores, hinc rerum publicarum eversores. Nullum denique scelus, nullum malum facinus esse, ad quod suscipiendum non libido voluptatis impelleret. Jam vero quid iis gravius.*

O Passi graviora, dabit Deus his quoque finem.

... forsitan & hæc olim meminisse juvabit,

Durato, & vosmet rebus servate secundis (c).

§. III.

Recentiores philosophi secundum Cartesium, unicuique veri & certi iudicium statuunt, *claram & distinctam perceptionem*: quod & Stoici olim, & Peripatetici docuerunt, nisi id dicere malimus ab Adamo usque hominum omnium eum fuisse communem sensum, *vera esse quæ vera clare & distincte viderentur.* Cartesius (d) hoc potissimum ratiocinio id firmabat, quod

(a) *Horat.*

(b) *Apud Cicor. de senect.*

(c) *Virg. in primo Æn.*

(d) *Meditatione. v. de prim. phil.*

quod nisi quæ clare, & distincte percipimus sunt vera, videtur Deus genius quidam esse malignus, qui ita nos fecerit, ut nihil scire possimus, quique erroribus nostris delectetur, quod impium est suspicari. Ei argumento non omne inesse pondus censet Huetius; facile enim reponet Academicus, satis esse, ut Deo sua constet bonitas, si nos ita effecerit, ut multa *probabiliter & verissimiliter* cognoscamus, quod his probe omnia officia præstare possimus. Nicolaus Malebranchius (a) *clare* huic & *distincte* perceptioni adjecit & *conscientiam*, eaque in re hunc præscripsit Canonem:

Ne assensum plenum unquam præbeas, nisi propositionibus adeo evidenter veris, ut illum sine interno quodam cruciatu tacitoque rationis murmure non possis denegare; idest, nisi clare intelligas, te libertate tua perperam usurum, si assensum tuum denegares.

Sed an idcirco, quod iis, quæ *clare & distincte* cognosco denegare assensum nequeam, certus ero me non falli? Id est in quæstione. *Claritas & evidentia* tuapte natura mentem ad assensum impellunt; nullam habemus libertatem evidentiae assensum denegandi, non magis quam non videndi colores, dum Sol cuncta illustrat, & oculi sunt aperti. Id nemo it inficias. Sed quod quærimus est, an evidentia *veritatis sit tessera*, non vero an nos cogat. Atque omnino affirmandum est. Evidentia *clarum* est veritatis *insigne*. Quæris, quibus id argumentis probem? probarem si evidentiam haberem evidentia evidentiolem: omnis enim demonstratio *ab evidentibus est ad inevidentia*. Nunc quando nihil est ipsa evidentia evidentius, qui quærit ut hoc probem, is evidentiam non esse evidentiam fatetur. Ipsa igitur evidentia, ubicumque affuisset (nam affulget in paucis) sui argumentum est & testis.

§. IV.

Illud videtur explicatu difficilius, quis esse testis debeat hujus evidentiae. Nam experimento scimus quosdam esse, qui, dum patentes errores defendunt,

(a) *Lib. 1. cap. 2. §. IV.*

dunt; ab evidentia se duci clamant. Populus non dubitat asserere se evidenter percipere colorem esse in igne, colores, & res coloratas extra se videre, quum Philosophi demonstrent calorem, atque colores esse affectiones nostras, resque omnes corporeas non videri extra nos, seu per *extramissionem vis alicujus visiva*, ut loquuntur, sed intra nos in ideis nostris, idest in rerum ipsarum imaginibus. Quot æternas discordias *ephimera* hæc evidentia produxit? easque non inter plebejos modo, sed inter ipsos in primis, qui *sapientes* appellantur. Ego ad duos potissimum judices appellaverim. I. ad *Conscientiam*. II. ad *Sensum* optimorum *Communem*. Appellandum est autem ad conscientiam pacatam, & ab omni affectu purgatam. Facile est enim, dum animus affectu turbatur, falsa evidentia specio decipi. Desæcatam hanc conscientiam attente quisque consultat. Si id fiet, plures erunt, qui, quæ jam evidentia putabant, obscura fatebuntur. Deinde a *conscientia* ipsa appellandum est ad *SENSUM* optimorum *COMMUNEM*. Tum igitur putato te ab evidentia falli non posse, quum omnes ii, qui sana ratione utuntur, eandem in eadem re evidentiam agnoscunt. Qui vero clamant mentem esse brevem, posse nos in ipsa evidentia falli, ac proinde serio esse de omnibus dubitandum, ii velut extra sensum hominum communem positi, linea induti veste Medicum, non Doctorem consulant. Nempe brevitatis & imbecillitatis mentis hoc efficere possunt, ut ne omnia evidenter percipiamus; ut ne simul plura: at minime prohibent, quin quædam *clare* intelligamus. Quo modo oculorum brevis vis efficit quidem ut ne distantiora objecta videamus, non ut nihil. Quod si idcirco quod non omnia clare percipimus, nihil omnino nos percipere isti volunt, dicant etiam se nihil videre, quod non omnia videant. Quid autem est aliud impudentissime hominum patientia abuti?

§. V.

HAc autem doctrina semel præstabilita, non admodum erit difficile judicare, quæ propositiones sint

sint veræ, quæ falsæ. Propositionum theoreticarum duo hoc in loco genera statuimus, *axiomata & theoremata*. Axiomata sunt propositiones illæ quarum veritas *simplici intuitione* cernitur, ut si *æqualibus æqualia addas omnia erunt æqualia*, & ceteræ omnes, quæ aut rerum *existentiam*, aut *essentiam*, aut *relationes* spectant, seu earum veritas *sensu*, seu *intima conscientia*, seu *pura intelligentia* perspicitur. Perspicitur autem *simplici intuitu* hæc veritas, quum uno intuitu evidenter cernimus *attributum* contineri in *subiecto*, quod evenit in *propositionibus affirmantibus*; aut *attributum & subiectum* esse contraria, quod in negantibus contingit. Nam si evidentiâ *tessera* est veri, quotiescumque evidenter percipitur A contineri in B, verum erit, A est B: aut si percipiatur evidenter A esse contrarium B, verum erit; A non est B. Theoremata dici solent propositiones, quarum veritas primo intuitu non cernitur, ut *parallelogramma in eadem basi, & intra easdem parallelas posita sunt æqualia* &c. Ad horum veritatem percipiendam iudiciorum & ratiocinationis serie opus est. Ergo tum dicentur vera, quum ope ratiocinii evidenter percipitur theorematum attributa contineri in subiectis, si quidem fuerint affirmantia, aut iis esse contraria, si fuerint negantia.

§. VI.

NE igitur posthac dubitator, *Evidentiâ sensus communis* veri esse tesseram. Qui secus faciunt, næ ii pessime sibi, Reipublicæque litterariæ consulunt. Sed quum evidentiâ sit duplex *physica*, & *Mathematica*, prior quidem in rebus intelligibilibus, posterior in corporeis adhibebitur. Inique enim ii agunt, qui aut priorem in *intelligibilibus*, aut posteriorem in *corporeis* exigunt. Præposterus, inquit B. Augustinus, hic est ratiocinandi modus, ut velimus *intelligibilia* sentire, corpora intelligere. Nec sane minus peccabant Platonici qui *mathematicam evidentiâ* exigebant in *physicis*, quam Epicurei qui ad *physicam* appellabant in intelligibilibus; quique nihil putabant esse, nisi quod oculis consuebantur (a). Quid inquit ali-

(a) *Lactant. lib. VII. cap. IX.*

aliquis, si altera alteri adversetur, si utrique vel alterutri *humana vel divina* auctoritas? Nempe hos sectabitur canones.

I. Si *mathematicæ Evidentiæ physica adversetur, fallax habetor physica*; est enim hæc minor, cui proinde valedicere, quam de *mathematica* subdubitare, quæ summa est, par est.

Fingamus (quamquam id falsum reputo) mathematica evidentiâ demonstrari, terram moveri, si quis sensuum evidentiâ reponeret, non esset audiendus, nisi minorem majori evidentiæ præferre velimus.

II. Si *mathematicæ mathematica, physicæ physica evidentiâ adversari videatur, alterutra habetor fallax*. Ita quum demonstratio demonstrationi, experimento opponitur experimentum, alterutrum fallat oportet. Sed hic est casus in quo *sensus optimorum* communis consulendus est.

III. Si *Mathematicæ, aut Physicæ evidentiæ fides humana repugnet, huic valedicito*. Nam conferri cum iis nec dignitate, nec securitate potest.

IV. Si *Physicæ evidentiæ refragetur Dei clara autoritas, fallax habetor sensus*. Clara enim Dei autoritas ipsa est Dei ratio, quæ omnino sensuum nostrorum evidentiæ præponenda, aut potius substituenda est. Claram dixi Dei autoritatem: nam nisi sit clara, possimusq; de genuino ejus sensu subdubitare, nondum ab evidentiâ physica discedendum.

V. *Mathematicæ evidentiæ clara Dei autoritas refragari nequit*.

Refragetur: quum Dei autoritas sit suprema ratio, adeoque certissima; omnino erit vera: falsa ergo mathematica erit evidentiâ, nec idcirco *veri* erit tessera. Quod quum esse nequeat (ex superioribus); sequitur alteram alteri adversari non posse.

VI. Si *mathematicæ evidentiæ adversari videatur Dei autoritas, aut illa evidentiâ non est, licet jactetur, aut hæc non intelligitur*. Ergo ut illa perpendatur sensus communis; ut hæc clare intelligatur Ecclesia est consulenda. Nam ut sensus communis evidentiæ est iudex, ita divinæ autoritatis interpretandæ magistra est Ecclesia, cui eloquia Dei *concredita sunt*.

§. VII.

Eorum nunc examinanda est opinio, qui quum nullam in humana ratione veri *tesseram* vident, tum solam Dei autoritatem certam esse docent, in qua, præter alios, fuit nuper vir adprime doctus Petrus Daniel Huetius (a). Eam opinionem & falsam reputo, & religioni perniciosam. Qua de re quamquàm dictum est paulo uberius in *Appedice ad priorem Metaphisicæ partem*, hic tamen locus exigit ut paucis saltem disseramus. Quod ea opinio sit falsa ex superioribus patet. Quod sit Religioni perniciosa hinc disci potest, quod sublata omni rationis humanæ certitudine, ipsius divinæ revelationis autoritas evertitur. Nam si ratio nihil certi nec de Deo, nec de mundi origine docet qui ad revelationem adpellat, aut ad Judicem appellat, quem omnino ignorat; aut ad *privatum* cujusque *spiritum* confugit, & *fanatismum* inducit, quo nullus est error qui impune adferi & defendi nequeat. Non nego Prophetas, Dum Dei Numine erant afflati, nullo alio indiguisse argumento, quò convincerentur sibi Deum loqui: at non omnes erant prophetæ. Maxima ergo tum hominum pars nihil sciebant: ut hodie, quum aut rari, aut nulli sint prophetæ; pene omnes in omnium rerum ignoratione versentur necesse est. Quicumque igitur hanc sententiam tuentur, dum nimium rationem Religionis ergo deprimunt, imprudenter licet, sed evertunt tamen primum Religionis fulcrum, nosque in scædissimum pyrrhonismum dejiciunt.

§. VIII.

Inunc restant, quibuscum congrediamur, qui non aliam ob rem humanam rationem veri *tesseram* ponunt, nisi quod ea sit ipsissima Dei ratio. Pythagoreorum ea & Stoicorum fuit sententia mentem nostram partem esse Mentis divinæ: ex quo non poterat non consequi quod Cato apud Lucanum lib. VII. declamat,

Nil

(a) In *Alnetanis* lib. 1. & in opusculo anonymo de imbecillitate mentis humanæ.

*Nil facimus non sponte Dei: nec vocibus ullis
Numen eget: dixitque semel nascentibus Autor
Quicquid scire licet. Steriles ne elegit barenas
Ut caneret paucis, merfitque hoc pulvere verum?
Est ne Dei Sedes nisi terra, & pontus, & aer,
Et Cælum, & virtus? Superos quid querimus ultra:
Jupiter est quodcumque vides, quocumque moveris.*

Arripuere id recentiores Pantheistæ & Fanatici. Spinoza (a) idcirco prophetiam & cognitionem naturalem miscuit: *Prophetia est, inquit, rei alicujus certa Cognitio a Deo hominibus revelata. Extradita, pergit homo nefarius, definitione sequitur, cognitionem naturalem prophetiam vocari posse: nam ea quæ lumine naturali cognoscimus a sola Dei cognitione, ejusque æternis decretis dependent... ea jure divina vocari potest, quatenus de ea participamus. Eodem redeunt quæ Fanaticorum ille Princeps Petrus Poiretus (b) scripsit: Deus, inquit, omnipotens sui LUMINIS SUBSTANTIALIS scintillam aliquam in tenebrosum hominis fundum jaculatus est, & quasi eidem incorporavit.... Est hæc divini luminis scintilla ipsum illud substantiale Dei lumen, æternumque verbum.... in centro anime, pro modulo ejus, ut sic dicam, fixatum. Quæ adeo sunt portentosa, ut qui velit refellere, is etiam cum ratione insanire amat. Nam Dei ratio simplex est & infinita: partiri ergo nequit: ergo ubicumque adest, eadem est. Quod si ratio nostra ipsa est Dei ratio, nulla ignorabimus: infinitæ enim rationi omnia aperta sunt. An quisquam est adeo amens, ut hunc in modum sibi aduleatur, persuadeatque sibi, nihil esse, quod ignoret?*

Platonici autem alia ratione hæc explicuerunt. Dei radio quodam mentem illuminari, in eoque nos veritates cernere Plotinus, & Jamblicus scribunt. Iis accessit B. Augustinus pluribus in locis, præsertim vero in libro de Magistro, in quo id ex instituto agit, ut probet, Deum tantum nos docere veritatem posse, nos intrinsecus adlo-

M 2

quen-

(a) *Tract. Theopol. cap. 1. pag. 1. & 2. apud Huetium in Alnetan. lib. 1.*

(b) *Fides & ratio collatæ §. 144. & 146.*

quando, idque in libris de *Retractione* confirmat, ut scire possimus ei sententiæ & senem adhæsisse. Jam Nicolai Malebranchii opinio est, *Mentem nostram vno Deo coniungi, atque in Dei idea atque lumine omnia percipere*. Quæ si vera sunt, non video qui cæcutire homines, hallucinari, errare possint. Non video quid discriminis intersit inter mortalium, & beatorum statum (a). Hæc Malebranchii sententia adeo portentosa Gallis visa est, ut publice iactaverint, mirum esse Malebranchium omnia in Deo videre præterquam hoc, quod solemnia insaniant: sed dicam gallice & elegantius,

Lui qui voit tout en Dieu, n'y voit pas, qu'il est fou. (b).

C A P. IV.

Quæ viæ sint homini propositæ ad sapientiam comparandam, eæque viæ explicatæ generatim.

§. I.

Quatuor omnino videntur homini viæ ad sapientiam comparandam propositæ, *auctoritas, experimenta sensuum externorum, intima conscientia, & ratiocinium*: his enim ratio humana innititur: ex cognoscendi principia suppeditant. Nihil omnino a nobis sciri potest, quod ex quatuor illis fontibus non manet. Ergo Logicus noster ita animo conformandus est, ut promptus sit atque expeditus, sicubi usus fuerit, ad quatuor illos fontes rite verlandos, quo inde argumenta ad verum investigandum aut confirmandum idonea agiler dextereque haurire possit. Atque ad hoc potissimum Logica facultas comparatur, idque præsertim promittunt Logici. Nos priusquam philosophum in his instruamus, atque exerceamus singillatim, pauca generatim.

§. II.

(a) *Malebranchium refellit ex instituto Lokius in examen del sentiment del P. Mallebranche &c. tom. II. operum eius diversorum.*

(b) *Joan. Arduinus Athei detecti pag. 43.*

§. II.

QUæcumque scire possumus sunt aut *externa*, aut *interna*: *externa* vero, aut *sensibus subiecta*, aut *non*: præterea quæ *sensibus non sunt subiecta*, aut *capacitati mentis nostræ sunt accomodata*, aut *eam excedunt*. Quæ cuique sunt *intrinseca intima conscientia*, *sensu*, *natura* percipiuntur, cuiusmodi sunt, *nos percipere*: *clare*, aut *obscurè percipere*: *velle*, aut *aversari*: *dolorem*, aut *voluptatem sentire*: *amore*, aut *ira agitari*; una verbo, quæcumque ad *hominem*, ut *Platonici loquuntur*, *interiorem* pertinent. In his nec *externorum sensuum experimenta*, nec *auctoritatem consulere oportet*: eorum quilibet sibi testis est *luculentissimus*. Sed quum plurima *intima conscientia percipiamus*, quæ ab occultis in *natura nostra* causis profisciscuntur, in his causis investigandis recte utimur quum primis acri rationis indagine, tum etiam eorum, qui acutius naturam intropexere humanam, auctoritate, Dei potissimum, ubi, quæ ad interiorem hominis naturam spectat, is manifestavit, idque tutissime, quandoquidem is tantum *hominum renes & corda scrutatur*: ei tantum naturæ omnes *aperse patent & nudæ*.

§. III.

QUæ sunt *externa*, & *sensibus subiecta* solis sensuum experimentis perdiscenda sunt. In ea *intima conscientia provinciam suam non extendit*. *Autoritas* in his locum habere non debet nisi, aut quum ipsi experimenta instituire nequimus, veluti si aut *distantia*, aut *præterita* sint: aut quum, quæ ipsi observavimus, aut experti sumus, *communi aliorum sensu* confirmare volumus, quod ubi fieri commode potest faciendum est semper; quippe nulla in re errare homines facilius possunt & solent, quam in sensuum experimentis, aut observationibus. Quod si hæc *externa* minime sint *sensibus subiecta*, ut *Spiritus*, *animæ*, *Vires activæ atque genitricæ*, *phenomenorum causæ*, & similia, tum ad *rationcinium & conjecturam* confugiendum est. Tandem quæ *captum mentis*

nostræ excedunt, sola *auctoritate* pervestiganda sunt, si qua hæc alicubi præsidium præstat. Uti enim auctoritate, est uti *perfectiore ratione*, eam nostræ substituendo, aut ejus ope nostram adjuvando, uti supra explicitum est. Quod si & hoc auctoritatis desit præsidium, relinquenda, ne in deridiculos delabamur errores.

Modulo ergo se quisquam metiatur.

§. IV.

UT autem his propositis homini ad sapientiam viis rite utamur, duo potissimum caute servanda sunt. I. ut notiones, quas *Autoritas*, *Sensus Conscientia* suppeditant, *justæ* sint, saltem ut *quantæ* sint & *quales* iusto iudicio æstimetur. II. Ut ex iis notionibus ea deducamus consequentia, quæ cum illis necessariam habent connexionem: aut si hanc necessariam connexionem non videmus, sincere fateamur, quanta cum probabilitate ex hujusmodi principiis consequentia ista deducantur. Et quod spectat ad primum, notiones *Autoritatis*, *Sensus*, *Conscientiæ* esse possunt aut claræ, distinctæ, adæquatæ; aut obscuræ, confusæ, inadæquatæ. Ergo quales sunt omnium primum philosophus examinare debet, perspicereque quatenus objectis suis conformes sunt, aut ab iis diffformes. Quod nisi in omni aut investigatione, aut disputatione efficit, aut ignorabit ipse quid inde deducendum sit, aut falsa plurima, vel dubia saltem, & ambigua velut vera & certa ex notionibus hujusmodi concludet. Deinde *quandquam ex principiis veris nihil potest sequi nisi verum*, tamen, nisi ars ratiocinandi adhibeatur, etiam ex veris deducere falsa possumus. Narrat Plutarchus Sacerdotes Ægyptios observasse *tampadas Templorum æque crassis ellychniis singulis annis majorem olei mensuram consumere*. Ponamus hoc verum fuisse phænomenon, quanquam non dubito ab avaritia Sacerdotum excogitatum fuisse. Potest id ex pluribus causis nasci, olei crassitie, vel subtilitate; ellychnii textura, aeris temperie, adeoque majori vel minori gravitatione. At Ægyptii rem inde miram concludebant, *Solem* nempe in annuo motu tardiores factum. Ex re vera falsum de-

deducere poterant. Quod autem de autoritatis notionibus dico, id generatim de omnibus aliis dictum putato. Sed ea paucis comprehendamus præceptis.

I. Nullas habent alias sibi propositas vias discendi philosophi, præter has quatuor Auctoritatem, Sensus externos, Conscientiam, Ratiocinium & conjecturam. Per diligenter ergo eas excollunt, atque versant.

II. Horum ne prætergrediuntur provincias: Sciunt quæ sensu, non intelligentia, quæ intelligentia non sensu; quæ neutro discenda sint, limites probe servant.

III. Notiones primùm, quas inde bauriunt, perpendunt, atque metiuntur: veræ ne sint, an a vero dissent, atque quatenus; pervident.

IV. Artem sibi longo exercitio comparant, qua ex principiis suis iusta derivare valeant consequentia, ut nempe ne falsis vera, ex probabilibus certa, ex ambiguis perspicua confidenter deducant: utque talia esse consequentia scire discant, qualia sunt, unde nascuntur, principia. Uno verbo ut singula suo pondere æstimare valeant.



LIBER IV.

De usu Auctoritatis, & arte Critica.



Perpicuum est homines *sine usu rationis* nasci: sed nec minus est *perpicuum, sine usu rationis* in tota ferme versari infantia, & quæ primum discunt, non ratione ulla, sed præjudiciis *sensuum & auctoritatis* discere, sensuumque, & auctoritatis imperium omnem antevertere rationem. Quinimo nequeunt infantes his non uti magistris. Quum enim recte ratiocinandi nondum intelligant usum, si spretis sensibus, & auctoritate ad ratiocinium confugiunt, aut, quoniam eo uti nesciunt, perpetuo ignari vivunt; aut, quod recte uti nesciunt, in infinitos errores præcipites eunt. *divina igitur providentia & ineffabili beneficienda geritur* (inquit appolite B. Augustinus (a)) *animæ medicina, dum auctoritas præcedit, & rationi præparat hominem*. Ea ergo gravissima est ratio, cur omnium primum philosophum nostrum, quem ad rectam sapientiæ investigationem pedetentim ducimus, in genuino auctoritatis sensuum, aut magistrorum usu exercendum putemus. Accedit eodem, quod homines ipsi adulti plura sensuum, & auctoritatis usu, quam meditatione & ratiocinio, discunt: ergo nisi ita instruuntur, ut rite & sensibus, & auctoritate uti sciant, tota sunt vita in errore versaturi.

CA-

(a) Aug. de vera Religione.

C A P. I.

De recto sensuum usu, deque sensuum provincia, & de experimentis atque observationibus rite instituendis.

§. I.

Plurima, quæ sensuum usum spectant, in primo horum elementorum libro sunt explicita. Quæ restant, heic paucis. Sensibus *externa & corporea percipimus*, ut supra monitum. Ergo his tantum in rebus sunt adhibendi: in ceteris coercendi. Sed in externis & corporeis quatuor considerari possunt. I. Existentia. II. Qualitates, III. Relationes. IV. Essentia. Corporis alicujus essentia posita est in *unione indivisibili omnium essentialium*. Eorum si unum ignoretur, tota ignoratur essentia. Quum sensus omnia hæc corporum essentialia nec referant, nec referre possint, quandoquidem iis negatum *intima* corporum inspicere, pluraque fortassis sunt in corporibus, quæ sensibus non sunt subiecta; essentias corporum sensus deferre nequeunt. Quocirca duo hinc sequuntur Canones,

I. Caveto ne de corporum essentia, intimaque natura, & constitutione solo sensuum testimonio judices. Putato aliquid semper esse in quolibet corpore, quod tu nec perspicis, nec perspicere ullo pacto potes.

II. Sic habeto, posse a rebus corporeis prodire effecta, quorum tu nullas in iis cernere causas possis, idcirco quod plura in corporum natura latent. Non igitur hæc statim supernaturalia appellato. Quære potius abditas in corporum natura causas. Præterea ne eos temere magos & demoniacos æstimato qui in corporibus mira efficiunt. Esse omnium horum possunt in Natura causæ. Ex. g. Si Sanguis pluât, si lapides; si bos loquatur; si discurrentes in Cælo armatorum acies appareant, &c. non statim concludendum est esse divina. Possunt ea quidem divinitus fieri, uti & plerumque facta non dubitamus: at possunt etiam esse naturalia. Divina ergo non sunt

putanda, nisi aut quum aliunde constat esse divina, aut quum certi sumus non posse a natura prodire. Alioquin pro divinis habebimus naturalia phænomena, quod superflitiose factum a Gentilibus legimus. Legatur Sturm-
mius de meteoris in *Physica Electrica*, & Albertus Fabri-
cius in dissertatione de *Cruce Constantino visa*.

§. II.

IN corporum existentia dignoscenda sensus proprii sunt iudices, iique certi. Sensus enim organa sunt corpora & necessaria: nimirum non inveniuntur nisi extrinsecus, & tactu: tangi autem corpora non possunt nisi a corporeis; ergo ex tactu tuto de corporum existentia iudicamus. Quocirca ea corpora, a quibus nullo modo tangi nec lumine, nec sono, nec ulla alia via possumus, conjicere quidem licet existere, si eorum ulli effectus in iis appareant corporibus, quæ sensui patent; ac sentiri, idest sensibus percipi, nequeunt. Non igitur eos probo, qui ex ideis corporum eorum existentiam demonstrare conantur (a): ideæ enim res aut possibiles, aut existentes, non necessario existentes deferunt. Quam ob rem, si possibilia esse possunt idearum objecta, non statim concludi potest existere. Jam quum sensus nec nimium pateant, & paulo sint crassiores: efficitur ut plurima esse possint corpora, corporumque qualitates, quæ aut præ distantia, aut præ exiguitate lateant. Ne igitur putato ea tantum existere corpora, quæ semis. Quo Canone & præcedenti §. Canon secundus confirmatur. Quæ autem ratione corporum qualitates, & relationes ope sensuum dignoscamus, in primo libro dictum est.

§. III.

Sed & iis, quæ passim dicta sunt, patet, sensus in iis tantum scientiis adhiberi Duces, quæ Physicæ dicuntur, idest quæ universum hoc corporeum spectant. Hæ scientiæ ita sensibus nituntur, ut nec primum sint natæ, nec deinceps auctæ atque illustratæ, nisi sensuum experimentis, & observationibus. In ceteris di-
sci-

(a) Cartesius in medit. de prim. phil.

sciplinis, aut *Metaphysicis*, aut *Mathematicis*, aut quæ ab autoritate pendent, ut *Theologia revelata*, & *Jurisprudencia*, sensus non audiuntur. Cohibendi potius sunt, ne aut tumultuantes corporeis imaginibus serenam puræ intellectiōis regionem adumbrent, aut ab auctoritate nos faciant delciscere. Jam Philosophi hoc statuunt inter *experimenta*, & observationes discrimen, ut ea *experiri* dicamus, quæ, nisi operam nostram adhibeamus, minime sint proventura; ea vero *observare*, quæ suapte natura sine ulla opera nostra eveniunt. Phænomena *observantur*, veluti meteora, ellipses, plantarum, brutorumque generationes: *experimenta*, *Boyleana*, e. g. *machinæ*, capiuntur.

§. IV.

DUO autem sunt circa experimentorum, & observationum usum monenda. I. ut accurate instituantur. II. ut rite ex iis consequentiæ deducantur. Nulla in re magis peccari facile potest, peccatumque sæpe est, & a viris quidem acutis, & doctis, quam in his duobus. Et primum ut accurate perficiantur experimenta, aut observationes, adhibendi sunt homines rei, de qua agitur, periti, simul & apti, facilesque in instrumentis versandis. Nam qui rei, de qua agitur, sunt imperiti prætermittere quædam possunt, quæ erant observanda. quæque narrata facile phænomeni patefaciunt causam, omissa aut occultant, aut falsam pro vera indicant. Eam ob rem Physici, Medici, alique naturalium scientiarum periti cavere debent ne nimum experimentis hujusmodi, & observationibus a *vulgaribus* hominibus, *agrestibus*, *simplicibus*, *imperitis nautis* factis credant, eaque accipiant tanquam suorum systematum principia. Præterea naturalis scientiæ amatores vetusta, & vulgo jactata, atque consecrata experimenta non verebuntur reperere, iterumque ad lancem revocare. Experientia docuit plurima hujusmodi repetita falsa esse reperta, aut manca, aut interpolata (a). Præterea refert plurimum eadem experimenta a pluribus facta inter se conferre, quatenusque convenient aut distent attente di-

me,

(a) *Muscheb. in præf. experiment &c.*

metiri. Refert & eadem experimenta in pluribus locis aut facere, aut facta comparare. Ex his enim accuratis observationibus facilius intelligitur, & phænomeni causa, & causa variationis experimentorum.

§. V.

IAM illud magnopere cavendum est, ne ad experimenta capienda, aut phænomena observanda animo alienis systematibus imbuto accedamus. Nihil enim facilius quam systemata nostra, quæ deperimus in quibusvis experimentis, aut observationibus cernere. Quod eo vel maxime confirmatur, quod diversi plerumque philosophi diversa systemata iisdem experimentis confirmare conati sunt. Nemini ignotum esse potest quid **ANTICIPATA OPINIO** in hominibus possit. Qui *anticipata opinione* secum statuit constellationum alias *Arietem*, alias *Taurum*, alias *Leonem* referre, dum eas observatum eunt, *Arietem*, *Taurum*, *Leonem* vident, cornua, caudam, crines cernunt, etiamsi tam constellatio *Arietis* similis est *Arieti*, quam *Tauri* constellatio similis est *Virgini*. Quis crederet viros non omnino stupidos credidisse, aut aliis persuadere voluisse, *Fati decreta aureis stellarum litteris quasi descripta legi ab hominibus rerum istarum sagacibus posse*? At ecce Reuclinus (a), Picus Mirandulus Comes (b), Henricus Cornelius Agrippa (c), Blasius Vignierius (c), Athanasius Kircherus (d), aut id crediderunt, aut plures credidisse narrarunt.

§. VI.

NEC minus est difficile ex experimentis & observationis *rite argumentari*. Plures sunt, qui ex uno aut altero experimento, aut observatione conclusiones deducunt universales, quibus deinde rationem omnium similium experimentorum reddunt, quod *genus sophismatis* docuerunt quidem philosophi omnes, pauci evitarunt. Alii eam experimenti, aut observationis causam

(a) *De arte Cabbal. lib. 3. pag. 724.*

(b) *Lib. 8. cap. 5. contra Astrol.*

(c) *De occulta phil. lib. 2. cap. 51.*

(c) *De cifris pag. 162.*

(d) *Tom. 2. Edipi Egypt.*

sam dederunt, quæ prima sibi obtulit. Plerique alii statuto semel generali quodam systemate, ulterius investigandi quasi posito gravissimo onere, in rebus omnibus ad id confugerunt. Explicemus hæc exemplis. Ex accensa subterranea fodina A superposita plaga tremuit: ergo quotiescumque telluris plaga quælibet contremitt, ex accenso in fodinis igne tremit. At qui ita concludit, certus esse debet, nullas esse posse alias causas, quibus terra contremiscat. Quum vermis corrosisset radicem, aut medullam plantæ B, exaruit planta; ergo quæcumque plantæ exarescunt eandem ob causam exarescunt. Nullæne aliæ esse possunt ariditatis causæ? Jam vero extracto aere ex siphone bicrurali, ascendit aqua. Quid ita? horret natura vacuum. Ea vero semel posita causa, nulla fuerunt similia phænomena, quæ non horrore vacui explicarent Peripatetici. Avicula in Boyleano vacuo intumescit: ex horrore provenit vacui. Mirum est Naturam, quam omnipotentem isti fecerunt, tam horrere vacuum potuisse. At magnes attrahit ferrum: Sympathia est: nullum est simile in natura phænomenon, quod sympathia hæc non gignat. Expellit oleum aqua: est antipathia: omnia similia efficit antipathia. Quidam omnia humana corpora *Spiritibus animalibus*, veluti perpetuis satellitibus instruxerunt. Nullum est in homine phænomenon quod non Spiritus animales efficiant. Rubet quispiam, expallet, tussit, sternutit, pituita molesta est, uni efficiunt Spiritus animales: Ædepo negotiosam physicam! In qua unius vocabuli ope cuncta naturæ phænomena explicantur.

§. VII.

ERgo philosophus noster ad sequentia animum ad-
vertet.

I. *Dati phænomeni causæ omnes possibiles investigantor, & cum Phænomeno perdiligenter conferantor.*

Duxæ sunt in hoc Canone utilitates. I. Philosophi mens hunc in modum paulatim in profundam naturæ at intimam contemplationem devenit, unamque veritatem quum investiget, plures detegit, mentemque facit in dies capaciorem, & instructiorem. II. Minori cum erroris

periculo de phænomeni causa judicat. Itaque numquam mihi est probata, ut alias dictum est, in Physicis emuncta per systemata differendi ratio: qui sic enim philosophatur systemati suo, tamquam laxo, adhærescit, nec investigat aliud, nec scit. Nevvtoniana ipsa Physica perpetua illa & generali attractione non minimum adolescentes a penitioris naturæ investigatione removet: abutuntur enim ea plerique, & contenti attractionis vocabulo, nihil ultra perquirunt: attractionem vero ipsam, quæ nimirum sit, & quænam ejus causa, etiam ignorant.

II. *Dati phænomeni A duabus tantum rationibus affirmator causam esse B, . I. si clare & evidenter pateat ex B, A prodire. II. Si constet ex nulla alia possibilitum causarum, non ex C, non ex D, non ex E &c. prodire posse.*

Nam si clare & evidenter constat A prodire ex B, ceteræ omnes possibiles causæ excluduntur. Ex. g. si constet dati motus terræ causam esse accensionem subterraneam, omnes aliæ possibiles sunt exclusæ. At si phænomeni A causæ omnes possibiles sint B, C, D, E, G, clarissimisque rationibus ceteræ præterquam G excludantur, G manifesto erit π A causa.

III. *Si nec clare & distincte pateat quam ex causa A proficiatur, & certi non sumus omnes nos possibiles causas complexos, causa nulla est certitudo: ne ergo audacter & affirmate, sed timide & perplexe, una aliis præferatur.*

IV. *In casu præcedentis canonis, quum certitudo deficit, investigator probabilitas, ita, ut ab ea causa probabilius A pendere affirmetur, quacum est A conjunctior idest ab ea causa, in qua major sit π A producendi RATIO SUFFICIENTS, rejicianturque causæ aliæ, in quibus minor est hujusmodi sufficiens ratio.*

Sit Phænomenon A, dentur causæ, quæ investigari poterunt, B, C, D. Quum non constet clare & distincte A ab harum una pendere, & certi non sumus nullam aliam superesse, ab horum nulla affirmatissime dicam A proficisci. At si comparatis his causis, attenteque omnibus perpensis. reperiatur ratio sufficiens π A esse quidem in B 2, in C 3, in D 4, probabilitas, qua affirmatur nasci A ex D erit ad probabilitatem, qua asseratur nasci ex C, ut 4

ad

ad 3, qua vero asseratur provenire ex B, ut 4 ad 2. Hos canones non Physici tantum & Medici tenere debent, sed & Politici in primis, quorum curæ ac diligentia societatibus tranquillitas commissa est: ii enim eadem ratione, sed & curatius, pervestigare debent, quibus ex causis societatis tranquillitas, aut perturbatio contingere possit. Id quod moneo, quod in his præcipue studiis juvenes philosophos instrui, atque exerceri maximopere cupio.

C A P. II.

De autoritate, & in primis humana.

§. I.

Autoritas in *narrantis* aut *docentis* pondere sita est: eo pondere nobis persuademus ea vera esse, quæ nec sensibus nostris, nec intima nostra conscientia, nec ratio-
cinio ullo assequi valeamus. Ergo a persuasione *scientiæ* & *probitatis* Autoris tota manat autoritas. Si a nobis inest autoris opinio, tanta esse eum scientia præditum, ut falli nequeat, tanta bonitate ut nequeat fallere, autoritas *fidem* pariet *certam*; at si aut Autoris scientia non habetur perfecta, aut de probitate addubitare possumus, auctoritatis pondus majus est vel minus, aut in simplici *scientiæ*, vel *probitatis* ratione; aut in ratione ex utraque composita. Porro in iis auctoritatem statuimus, qui nos docere possunt. Sunt autem qui docere nos possunt in tribus classibus positi. I. Deus. II. Dæmones, III. Homines. Ergo triplex inde profuit autoritas. I. Divina. II. Dæmoniaca. III. Humana. Quamobrem philosophus noster attente pensabit. I. quales istæ sint. II. quantæ. III. Unde earum nos copiam habere possimus. IV. Qui earum usus. Sed instruamus eum in singulis, in primis in humana, quæ prima usu se nobis offert.

§. II.

Autoritas humana aut in narrationibus spectatur, aut in dogmatibus. *Autor narrat quum quidpiam suo,*
vel

vel præterito tempore, a popularibus suis, vel ab exoticis, aut cogitatum, aut dictum, aut factum tradit. Δογματικὴν vero (dogmata docet) *quum aut aliorum sententias velut suas, aut suas affirmare docet. Narratio historia vocatur. Sunt autem historiarum genera tria omnino; etenim historia Politicæ est, aut Naturalis, aut Literaria. Politicæ res, quæ hominibus accidunt, enarrat: Naturalis, quæ pertinent ad naturam: Literaria, quæ ad literas. Politicæ species tres: Divina, quæ complectitur res, quas Deus hominum ergo, & apud homines gessit unquam, aut gerit: Religiosa, quæ eas res narrat, quas homines Dei ergo, & erga Deum gessere: Profana, in qua res hominum nec divinæ, nec sacræ dicuntur. Sed & historia quam Religiosa tum profana, aut generalis est, qua res totius hominum generis, aut particularis, qua unius nationis res continentur. E. g. Diodori Siculi, aut Justinii Trogi historię sunt universales, imperfectæ licet: Tucididis vero, aut Livii particulares, ille enim Peloponnesiaco XXVIII. annorum bello res gestas, hic Romanas ab urbe condita ad sua usque tempora describit. His accedunt *Vitæ*, quibus unius hominis acta narrantur, veluti *Vitæ virorum illustrium Plutarchi*.*

§. III.

Historia naturalis infinitas propemodum habet partes. Ea narrat phænomena quæcumque unquam in rebus corporeis observata sunt, aut quæ ulla in re capta sunt quandocumque, & a quibuscumque experimenta. Ergo complectitur *phænomena*, aut *experimenta* circa *aerem, ventos, planetas* aliaque *sidera, plantas, bruta, homines, aquas, ignes, mineralia*, & alias *naturæ corporeæ* partes. Vastissima est hæc historia, & rerum varietate, & nobilium Scriptorum copia. Est etiam studiorum omnium pulcherrima: vitæ etiam, & hominum societati utilissima. Nam quid pulchrius quam & totius universi, in quod sensus nostri pertingunt, mutationes, atque vicissitudines in numero habere, & ex iis intimam rerum omnium fructuram, ordinem, fines, causas, Deum præcipue, cujus tantum contemplatione, & possessione sunt mentes

tes beatæ, introspicere? Quid porro utilius quam ex hac historia aut quid in serie mundanarum rerum sit olim futurum conicere, aut artes humanæ vitæ necessarias augere, & perpolire? Nulla præterea sunt studia, quæ majorem mentem humanam efficiant, quæque rerum corporearum usum demonstrant, & aut stupidam admirationem, aut horrorem superstitiosum radicitus ex animis evellunt. Ad rem Horatius (a)

*Nil admirari, prope res est una, Numici,
Solaque, quæ possit facere & servare beatum.
Hunc Solem; & Stellæ, & decedentia certis
Tempora momentis, sunt qui formidine nulla
Imbuti spectent. Quid censes munera terræ?
Quid maris extremos Arabas ditantis, & Indos?
Quo spectanda modo, quo sensu credis & ore?*

§. IV.

Historiam litterariam eam dico, in qua aut virorum litteratorum *opiniones & scripta* recensentur, aut origines, & progressus artium, atque scientiarum narrantur, veluti historia Philosophorum Laertii, quæ sola ex pluribus veteribus ad nos demandata est, *Acta Eruditorum, Bibliothecæ Selectæ, Novellæ litterariæ*, & quæ ejusdem sunt generis. Et hæc historię pars non voluptuosa modo est, sed & utilissima. Nam & pulchrum est atque jucundum ea nosse, quæ de humanis, divinisque rebus omnis ætatis, omnisque Gentis homines opinati sunt; & sensus hic hominum communis maximus est humanæ sapientiæ dux & magister. Quo circa non rusticus modo & impolitus in Republica litteraria habetur, qui hujus historię ornamento caret, sed minus etiam futurus est doctus. Infinita enim sunt, ad quæ viri ipsi summi mente & judicio nunquam animum advertissent, nisi ab aliis essent excitati. Præterquam quod *evidentiæ & claritatis*, qua sola veritatem a falsitate distingui supra demonstratum est, non alius esse, ut diximus, testis potest, quam communis hominum doctissimorum sensus. Hæc historiarum genera. Videamus nunc quanta sit historicorum autoritas.

N

§. V.

(a) *Epist. vi. libri primi.*

Historia historici *autoritate* parit *fidem*, ut supra dictum est; ergo ut quanta debeat *historiæ fides* recte perpendatur, *due* sunt *historicorum dotes* examinandæ. I. *Scientia*. II. *Probitas*. *Scientia* duplex, 1. quanto *mentis acumine*, quanta *capacitate* fuerit *historicus præditus*? 2. potuerit *nescire*, quod *narravit*, & quibus *viis ac rationibus*? Primum enim, *historicus doctior*, *mente capacior*, *perspicacior* non facile passus est sibi imponi. Aptus erat cunctis acri *judicio pensandis*, atque vero *proximioribus eligendis*. Præterea eam *industriam* adhibuisse, quum *perspicax statuatur*, *negari*, nisi aliunde *constet*, sine *temeritate* nequit. Contra *indotus*, paulo *stupidior*, facile *credulus*, nec *fraudibus detegendis* est aptus, & inter *narrationes varias distinguere* nec scit, nec potest. Ergo *decipi*, atque *deludi* potuit: potuit *dormitare*, *cæcutire*, *populares incertosque rumores* pro *severis historiis* scribere. Ea *historicorum dos* in omnibus omnino *historicis* est exigenda, quum *prophanis*, tum *ecclesiasticis*, tum *naturalibus*, tum *potissimum literariis*: inde enim manat non *parva historiæ autoritas*. Si omnes *historici mentis capacitate*, *perspicacitate*, *judicio præditi* fuissent, nec tot *fabulas politica* contineret *historia*, nec tot *puerilia*, aut *iniqua judicia* in *ipsis* essent *historiis litterariis*.

§. VI.

Operæ pretium erit rem aliquot exemplis illustrare. Aulus Gellius (a) uberrimam præstat copiam huiusmodi *fabulosarum historiarum*, quas aut *veterum simplicitas*, & *credulitas*, aut *Viatorum*, atque *Mercatorum* (ut est id genus hominum ad *metiendum a natura comparatum*) *vasfrities evulgavit*. Quum e *Græcia*, inquit, *in Italiam rediremus*, & *Brundisium iremus*, *egresque de navi in terram*, *in portu illo inclyto spatiaremur*, *fascēs librorum venalium expositos vidimus*, atque ego statim *avide pergo ad libros*. Erant autem isti omnes *libri Græci*

(a) In *noctilibus Atticis lib. ix. cap. iv.*

ci MIRACULORUM FABULARUMQUE pleni. RES INAUDITÆ, INCREDULÆ. Scriptores veteres, non parvæ auctoritatis, Aristæas Proconnesius, & Ifigonus Niceensis, & Ctesia, & Onesicritus, & Poly Stephanus, & Hegesias.... Erant igitur in libris scripti hujusmodi. Scythas illos penitissimos, qui sub ipsis septemtrionibus ætatem agunt, corporibus hominum vesci & ἀνθρωποφάγοι nominari. Item esse homines sub eadem regione Cæli unum oculum habentes in frontis medio qui appellantur Arimaspi. Alios item esse homines apud eandem Cæli plagam.... vestigia pedum habentes retro porrecta. Præterea... in ultima quadam terra, quæ Albania dicitur, gigni homines, qui in pueritia canescunt, & plas cernunt oculis per noctem, quam inter diem... Esse quoque quasdam in terra Africa familias hominum voce atque lingua affascinantium: qui si impensius forte laudaverint pulchras arbores, segetes letiores, infantes amēiores, egregios equos, pecudes pastu atque cultu opimas, emoriantur repente hæc omnia.... Item esse homines in Illyriis, qui interimant videndo, eosque pupillas in singulis oculis binas habere. Item esse in montibus terræ Indiæ homines caninis capitibus & latratibus. Alios etiam apud ultimas Orientis terras, qui Momeri appellantur, singulis cruribus saltuatim currentes, vāvacissimæ pernicitatis. Quosdam etiam esse nullis cervicibus, oculos in humeris habentes. Præterea esse gentem apud extrema Indiæ, corporibus hirtis, & avium ritu plumantibus, nullo cibatu vrescentem, sed spiritu florum naribus hausto vivitntem.

§. VII.

Mirum autem est, haram rerum ad sequiora tempora nullum vestigium relictum, quum ordo naturæ exigat, ut animalium species perennent. Nec recentes viatores magis sibi temperarunt ab hujusmodi fabulis narrandis. Ex India lapides quidam ad nos advehi sunt, quæ venenatos morsus sanari, viatores isti prædicabant. Eos lapides ex serpentum capitibus extrahi auctores illi boni & creduli testabantur: Serpentes illos Cobras de Cabelo Hispani vocant. Miracula de lapidibus istis jacta-

bantur. Quum autem Franciscus Rhedi acutissimus Philosophus replicatis vicibus horum lapidum experimenta fecisset, meras omnia imposturas esse detexit. Comperit etiam lapides istos arte humana fabrefactos. Pater Philippus Libelli (in Itinerario lib. 11. cap. v.) de Arabiæ Felicis quibusdā incolis, *major*, inquit, *eorum pars, Catasares dicti, sedus cum Diabolo incunt, valdeque noxii sunt. Si attentius fructum aliquem contuentur, medullam devorant, intacto cortice. Eadem ratione hominum corda hauriunt. Sunt autem ipsi armorum ictibus impervii: adamantem ferire crederes. Quis hæc legens temperet a risu!*

§. VIII.

Vulgata fama viatorum erat, corpus Muhammedis Meccæ vi magnetica in aere pendere cista ferrea inclusum: id graves retulerant autores. At compertum est Muhammedis sepulchrum in urbe Arabiæ Meditænanæ jacere. De Guiana Americæ Australis Provincia, quot mendacia Europæis prodita? Præcipue a Gualtero Raleigho Anglo, qui quum Anglos decepisset, Londini post diuturnum carcerem capite plexus fuit, ut retulit Hornius in historia universalī. In Itinerario Baungartem Angli hæc leguntur. *Prope Belbes in Ægypto vidimus Sanctum unum Saracenicum inter arenarum cumulos, ita ut ex utero matris prodiit, nudum sedentem. Mos est, ut didicimus Mahometistis, ut eos, qui amentes, & sine ratione sunt, pro SANCTIS colant & venerentur.... sanctum illum, quem eo loci vidimus publicitus adprime commendari, eum esse hominem sanctum, divinum, ac integritate præcipuum, eo quod nec scæminarum unquam esset nec puerorum, sed tantummodo ASELLARUM CONCUBITOR ATQUE MUL-
LARUM. Hæc ille; quæ, qui mores Muhammedanorum probe didicerit, non veretur fabulis accensere: nec sane autor retulisset si paulo acutiore judicio fuisset instructus. Nihil autem addo de puerilibus judiciis, quæ ob hujus dotis defectum in novellarum literariarum compilatoribus promulgata sunt. Qui in his libris paulo est versatus melius ac plenius hoc intelligit. Unum dico, nulla in re majus judicium, perspicaciam, acumen exigi, quam*

quam in historia literaria compilanda, Sed & idem iudicium, atque perspicacia in *historia religiosa* scribenda necessarium est: quippe non alias magis a vulgo fabellæ vulgantur atque creduntur: quas nisi diligens historicus intenoscat, pro severis historicis fabulas lectori propinandas dabit. Legatur Theologus gravissimus Melchior Canus in xi. de locis cap. vi.

§. IX.

PERPENDI historici doctrina, capacitate, perspicacitate, iudicio, tum eo vertendus animus, ut intelligatur, scire ne potuerit, id quod narrat. Quantumvis enim sit historicus acutus, & doctus, si ei via & ratio defuit, qua id scire potuerit, quod narrat, poeta mihi erit potius, quam historicus. Cognoscitur autem scire potuisse. I. Si fuerit cœvus. II. Si domesticus. Nam qui rei quam narrat, cœvus est, quum recentior ejus adhuc est memoria, scire illam ullo negotio potest: & qui est domesticus non facile ab exteris decipitur. Duo sane sunt, quæ historias ferme omnes diluunt, atque extenuant, *tempus*, & *locorum distantia*: utrumque enim res nobis per longam aliorum aliis narrantium seriem tradit: in longa autem aliorum aliis narrantium serie aut *additur* aliquod, aut *demitur*, aut immutatur. At qui cœvus est, & domesticus serie ista non indiget: ipse sibi testis esse potest. Interim fieri potest ut cœvus & domesticus rei, quam narrat, non interfuerit, sed a popularibus suis narrari audiverit; quo casu eorum expendenda est fides, a quibus accepit. Nam infinitæ ubique vulgantur plerumque fabulæ, & vera gesta aut interpolantur, aut incrustantur. Ex quo patet quale iudicium faciendum sit de iis historicis, qui nec cœvi fuerunt, nec domestici, Ii aut historias suas ab antiquioribus scriptoribus acceperunt; aut ex inscriptionibus sepulchrorum, columnarum, *monetarum*, ex antiquis sculpturis aut picturis, vel aliis vetustis monumentis; aut ex popularibus rumoribus, & traditionibus, collegerunt. Primi non aliam faciunt fidem, quam ii, ex quibus descripserunt: aut monumenta, unde collegerunt:

in eorum igitur ætatem inquirendum est. Ex.g. Livius veterem Romanæ Reip. historiam collegit ex *Annalibus maximis*, quorum & ipse passim; & Cicero (a) mentionem habet: ex *historiis Fabii Pictoris*, ex *originibus Catonis*, monumentis *Pisonis*, *Fannii*, *Vennonii* (b): videndum ergo est, qua istæ ætate vixerunt, & qua ratione, quæ narrarunt, scire potuerunt. Eodem modo Plutarchus vitas illustrium virorum, Laertius Philosophorum vitas ex priscis monumentis descripserunt: ergo eorum habenda ratio: posteriores enim scriptores vetustis rebus nihil autoritatis, aut ponderis addere poterant: contra detrahere plurimum poterat tempus. Eodem modo examinanda esset, si extaret, vetus Ægyptiaca historia Manethonis ex vetustis Ægyptiorum monumentis collecta: eodem modo & aliæ infinitæ. At si populares rumores sectatus est autor, qualis Herodotus historiæ idem & fabularum parens, tanto minorem meretur fidem, quanto leviora sunt, quæ vaga incertaque majorum traditio posteris communicat. Atque hæc est ratio, cur veterum nationum res penitus ignoramus: earum nimirum scriptores aut recentiores sunt, aut jamdiu perierunt. Quocirca quidquid de barbaris Græci nobis tradiderunt, aut ex vulgaribus compilatum est rumoribus, aut propria ejus gentis garrulitate confictum. Nam Græci sero tandem animum veteri historiæ addiscendæ applicuerunt, quum vel ipso Platonis ævo quum barbararum, tam etiam Græcarum antiquitatum egregie essent ignari (c). Etgo vani sunt labores eorum, qui deperdita illa ex ruinosis ruderibus restituere conantur, qui *plerumque multa agendo nihil agunt*. *Valeant igitur* (sunt verba Hornii in historia univertali (d)) *omnia illa commenta & æternis sepeliantur tenebris, ne in posterum opus sit bonas horas in hujusmodi nugis perdere*.

§. X.

(a) *In II. de Orat.*(b) *Cic. I. de Legibus.*(c) *Plato in Timæo.*(d) *pag. 451.*

§. X.

Ceterum infiniti historici, si ex uno omnes rem acceperunt, neque aliunde eam didicerunt, non plures sunt æstimandi, quam ille, ex quo acceperunt. Sunt qui opinantur Manethonem, Berolum, Sanchoniatonem ex Mose historiam suam antediluvianam mutuatos esse, & interpolasse. Id si verum statuamus, omnis labor, qui in his legendis impenditur, vanus est: nec enim plus, aut certius scire potuerunt, quam Moses. Sed non putem hanc opinionem veram: etenim, si memoriæ illæ Sanchoniatonis, Berosi, Manethonis non sunt prorsus fabulæ, ex vetustis Phænicum, Chaldæorum, Ægyptiorum potius monumentis collectas censuerim, quam a Mose depromtas: pleraque enim habent a Mose discordantia. Hoc canone bellum Trojanum quidam critici in dubium vocant (a). Nimirum quamquam nullus vetus gestum tanta testium copia confirmatum est, quam bellum Trojanum; quippe quod Poetæ omnes, Oratores, Historici, Philosophi Græci atque Latini illud memorant: tamen omnes ex uno Homero hanc historiam descripsisse videntur, qui fortasse rem totam ad veri similitudinem, poetica libertate finxit, non secus atque Soricum, Rana- rumque bellum, seu Batrachomiomachiam, quam etiam sub Homeri nomine veteres librarii ad nos transmiserunt. Quod si putemus Homeri Epopejas, uti nunc sunt, ex variis pœsiunculis verustioribus collectas, & ab Homero, aut alio quocumque auctas, & politas, facilius perspiciemus, qua ratione obscura fortasse fabella in *borrentia illa* Trojæ arma excreverit. Eadem ratione historia versionis 70. interpretum in dubium revocatur: omnes enim qui eam narrant, unum videntur Aristæ libellum descripsisse.

N 4

sona-

(a) *Primus qui dubium hac super re movit fuit Dio Chrysostomus in oratione ὑπερ τῆς Ἰλίου μὴ ἄλωσης quod Illium non sit captum. Sed Metrodorus quidam Lampsacenus allegorice scripsisse Homerum censuit (apud Tatianum oratione ad Græcos): Ex recentioribus idem cepit Christianus Alanus, Gerardus Croesus, Struvius, quibus accessit nuper vir noster eruditissimus Joannes Baptista Vicius.*

sonatus ille Aristæas meras narrat fabulas, uti legendo intelligitur.

§. XI.

Quamtam vero probabilitatem faciat unus aut alter historicus, non est facile definitu. Unum aut alterum historicum non facere certitudinem nedum mathematicam, sed ne moralem quidem, non est quod dubitemus. Probabilitatis autem, quam faciunt, gradus, ex eorum *scientia*, & *probitate* dimetiendi sunt. Et maximus probabilitatis gradus, quique a certitudine morali parum distat, est, si unus hic aut alter historicus probi fuerint, & rebus, quas narrant, coetanei, & præsentis, eæque res supra eorum captum non fuerint. Augustinus de Civitate Dei narrat se vidisse homines, qui quotiescumque volebant, comas ad vultum, & a vultu ad occiput agitabant, immoto capite. Quam historiam qui negat, vir est perfrictæ frontis: nam & coetaneus erat historicus, & probus maxime, & qui non facile sibi imponi patiebatur.

§. XII.

Quod si unus hic aut alter historicus coetaneus fuerit, sed aut rei non præsens; aut res, quam narrat, captum suum superabat, tunc probabilitas illa valde minuetur. Scilicet fieri potuit ut vel a rumore populari fuerit deceptus, vel rem non intelligens ipse sese deceperit. Infinita sunt hujusmodi in historia Politica, & Naturali, quæ, qui attente legit, passim observat. Itaque dum lego in historicis politicis vel ipsa Principum plerumque remotissimorum, arcana, & secretas consultationes, & epistolas referri, temperare mihi a risu nequeo. Magis etiam rideo, dum experimenta naturalia apud eos historicos lego, qui Physicarum disciplinarum penitus imperiti fuerunt: quippe hæc experimenta uti intelligi non possunt, nisi ab earum rerum peritis, ita narrari exacte a nullo alio possunt. Sunt etiam ejusdem generis plura in historia religiosa, ut quum viri boni pro miraculis narrant, quæ sunt naturalia, aut conficta.

§. XIII.

§. XIII.

Veniamus ad *probitatem*. Si *probitas* desit, tum vero omnis historiæ probabilitas funditus intercidit. Dignoscitur autem deesse probitatem, vel si nobis aliunde historici vita nota sit, vel si in ejus scriptionibus frequentia mendacia, & imposturæ detegantur, vel si odio, aut amore partium nimium agitatus fuerit, aut tandem si superstitione fuerit corruptus. Ita quum narrat Muhammedes in Alcorano miracula, constatque fuisse illum solennem impostorem, nemo illa unquam vera putaverit. Idem judicium ferendum de gestis Apollonii Thianæi, quæ magno numero Philostratus retulit, aut quia ob superstitionem vera putaverit, aut quia ob Gentilismi studium Christi simiam mundo obtrudere voluerit, quo Christianismo se opponeret, quemadmodum docti plurimi censuerunt.

§. XIV.

Partium potissimum studia historicos ferme omnes faciunt. Hinc fit, ut domestici plerunque historici suspecti sint. Nam Livius, e.g. & Cæsar res Romanas augustiores fortasse, quam fuerunt, faciunt: exteras etiam res, Carthaginensium, Gallorum, Germanorum, aliarumque nationum data opera augent, ut quum eas viderint Romani, eorum gloria major evadat, non secus atque Hectorem Homerus ceteris omnibus Græcis Trojanisque extollit, uti Achillis, a quo tandem victus est, fortitudinem celebret. Græci vero Scriptores, qui elato supercilio cunctas spernebant nationes, in gentis suæ laudem pronissimi, & effusissimi fuerunt, atque idcirco omnes suas historias suspectas fecerunt. Hinc Græcia mendax, garrula, levis, apud Juvenalem, aliosque audit. Curtius quoque magnopere historiam dehonestavit, nimio rerum Alexandri studio. Jesuita Maiburgus ut paribus faveret, non erubuit scribere, Solem cursum suum cohibuisse, ut Germani ex prælio victores evaderent. Pleni sunt historici omnes hujusmodi mendaciis. Jam quum nos nostroque naturali & necessario amore ame-

mus,

mus, & quilibet historicus nationi alicui aut propriæ, aut quam delectu sibi propriam fecit, addictus sit, eam potissimum ob rationem vix historicum reperiās, qui partium studio non laboret, quique *nec amore & sine odio dicat*, quem veri historici characterem statuit Tacitus. Sed plerumque talis est rerum status, ut historicus res sui ævi scribere sincere nequeat, cogaturque aut Principi, aut nationi suæ adulari, atque historiam fœdare. Ad rem Tacitus sub initium annalium: *temporibus Augusti dicendis non defuere decora ingenia, donec gliscente adulatione deterrerentur. Tiberii, Caiique, & Claudii ac Neronis res florentibus ipsis, OB METUM FALSÆ; postquam occiderunt, recentibus odiis COMPOSITÆ sunt*. Caute igitur legendi historici Politici.

§. XV.

Eodem accedunt fabulæ, quas de moribus, literis, Politia, Religione nationum narrant viatores. Hinc fit, ut nedum vetustarum Gentium, sed ne recentiorum quidem Religio ulla nobis certa sit. Etenim quum aut ex quibusdam externis ritibus & signis, aut *ex rerum suarum notionibus*, & propria superstitione corrupti de Religionibus exterarum notionum iudicium fecerint viri plerumque imperiti, mendacia infinita nobis narrarunt: Primæ post diluvium nationes nulla Divinitatis templa, nulla idola habebant: paucas etiam ceremonias, seu externos ritus usurpabant. Hæc Religio diu perduravit apud quasdam Asiæ & Africæ Gentes. At Græci Romani-que, qui templis & idolis undique circumdabantur, quum has Gentes primum noverunt, eas non dubitarunt Atheismi reas facere, non secus atque primos Christianos Atheos vocaverunt, quod *nulla templa, nulla publica sacrificia haberent*. Consulatur Apologia 2. Justinii Martyris, & Octavius Minutii Felicis. Religionem Hebraicam ignoraremus, si eam ex libris Gentilium tantum vellemus discere. Juvenalis dum de Judæis loquitur (Satyr. 14. v. 96.)

Quidam sortiti metuentem Sabbathæ Patrem,

Nihil præter nubes in Cœli lumen adorant.

Quam solemnia satyricus iste mentitur? Omnium Gentilia n

tilium consentiens opinio erat, in Templo Hierosolymitano caput Arietis adorari a Judæis, uti ex Josepho contra Appionem, ex Tacito (lib. v. historiarum) aliisque discimus. Qnam putidum mendacium? Sed hæc mendacia detegimus facile ope librorum Hebræorum. At mendacia circa Religionem Ægyptiorum, Chaldæorum, Persarum, Indorum, aliorumque a Græcis, Romanisque narrata, quum aut nulla harum nationum monumenta supersint, aut interpolata fragmenta, qua ratione detegere speramus? Qui leget Plutarchum de Iside & Osiride, intelliget profecto, Græcos plurima Ægyptiis imposuisse, quod non satis illorum mysteria tenuerint. Totam Theologiam Chaldaicam a Stanleyo diligenter collectam (In hist. Phil. Part. xii.) eam ob causam suspectam habent viri docti.

§. XVI.

Quid, quod ob eandem causam præsentis orbis Religionis, etiam in communi nationum commercio, ignorantur? Nam de Religione Sinensium & Siamensium adhuc contenditur. Martinius (in Historia Sinensi lib. i.) *de summo*, inquit, *ac primo rerum Auctore*, mirum apud omnes silentium, quippe in tam copiosa lingua, ne nomen quidem Deus habet. Hoc ipsum confirmant alii, maxime Jesuitæ, veluti Alexander Rhodi (lib. i. cap. 14.) Adrianus Gresson, aliique. At Trigaltius, Semedus, aliique non eodem modo sentiunt. Trigaltius (lib. i. cap. x.) sic loquitur. *Tametsi literati supremum, unumque numen agnoscant, nullum tamen ei templum exstruunt ... nullos etiam, quod consequens est, Sacerdotes aut Religionis ministros habent.* Hinc illæ lacrymæ! Nimirum qui non satis mentem literatorum Sinensium tenent eos Spinozistas faciunt. Literatis Sinensibus persuasum est, quod ratio naturalis omnibus acutis Philosophis dicat, *Deum esse mentem quandam nedum æternam, sed etiam undequaque immensam, in qua existit, movetur, vivit, quicquid factum est.* Inde fortassis occasionem arripuerunt viatores, Sinenses inter Spinozistas censendi.

§. XVII.

§. XVII.

Sed nunquam clarius intellexi, in quas absurdas opinioniones circa Religionem, partium studia & affectus mentem humanam inducant, quamquam literas Judaicas legi. Auctor vehementi adversus Monachos & Clericos, atque cunctas ceremonias Ecclesiæ Romanæ, odio flagrabat. Hæc causa fuit, ut singulorum vitia, toti Religioni Christianæ imputarit Aaron ille Monfeca, eamque Religionem declamatorio stylo, uti superstitionem, traduxerit. In prima Epistola adulterium apud nos tolerari, permitti, seculum vocari, calumniatur miser ille impostor, qui civiles, sacraque; leges nostras nescire simulabat. Ep. 2. quum in medium protulisset quorundam Theologorum nostrorum ineptissimam controversiam, parum certe piam, teneatur ne homo, quatenus vivit, semel saltem actum amoris Dei in se excitare? addit in Religione Christiana homines eximi ab amore Dei. Frontem hominis! Sed ne me quis imposturare putet, en verba Auctoris. *Exigent ipsi (Christiani) ut nos (Judæi) complectamur legem, quæ nos ab amore Dei eximit? Veu-ent-ils (nos scilicet) que nous (Judæi) embrassons une Loi, qui dispense d'aimer Dieu.* Idem auctoris ingenium, eadem calumniæ in omnibus suis literis regnant: paucâs legeris, omnes noveris. Privata vitia toti nationi, aut sectæ imputat Deista ille. Utinam nulli eum antecesserint, nulli sequantur!

§. XVIII.

Ad probitatem etiam historici spectat, ut constet eum historiam suam, non exercendi styli gratiâ, sed veritatis amore scripsisse. Qui enim exercitio styli scribunt, dum res veri similes narrant, nihil reliqui curant. Isti vocantur nunc Scriptores Romanenses. In horum numero ponit Cicero *ἱστοριογράφου* Xenophontis, quæ sane cum Romani illo Gallico, quem *Artamenum* vocant, ejusdem est characteris. Licet non ita sentiant recentiores historici, qui Xenophontem in rebus Persicis, vel ipsi Cæsar, & Herodoto præferunt. Herodoti

Musas

Musas hoc etiam nomine quidam accusant: itaut non certe illepide is fecerit, qui Herodoti libris Musarum nomina præscripserit, garrularum nempe puellarum. Livius etiam & Curtius artem declamatoriam adfectasse clare videntur: quamobrem cum magno delectu legendi sunt. Hoc idem censent quidam de Historia Veneta Petri Bembi. Ego Paulum Jovium ejus criminis non immunem puto (a) Nimiam nempe styli curam in historico suspectam habeo. Sed *nimiam* dico. Essent hoc in loco tradendi canones, quorum ope rite historicis uti possimus: sed eos in sequentem librum rejiciemus, quo in libro regulas analyticas tradituri sumus.

C A P. III.

De auctoritate divina generatim.

§. I.

Auctoritas divina constat quum Deus docet. Trium autem sunt necessaria, ut quis divina auctoritate uti possit. I. Constare debet Deum loquutum esse: II. Et quenam sint Dei verba. III. Et qui verborum sensus. Quorum trium, unum si ignoratur, omnis divina auctoritas perit. Ad primum quod spectat, Deus potest homines alloqui pluribus viis, nempe via mentis, via phantasie, via sensuum. Via mentis quum cogitationes suas mentibus nostris communicat: nam quum Deus sit pura mens, nihil vetat, mentibus nostris ita uti, ut cogitationes & voluntates suas nobis aperiat etsi fortassis qua id fiat ratione ignoremus. Hoc modo Prophetis quibusdam Hebræis loquutus est. Dicitur autem in scripturis nostris id facere, per spiritum suum, quem diffundit in mentibus humanis. Plato in Jone vocat *vim divinam*, qua mentes agitantur: adpellat etiam *sacrum furorem*.

§. II.

(a) Sed & cum venalem fuisse in judiciis suis scribit vir acutus Melchior Canus in xi. de locis cap. vi.

§. II.

Via *phantasie* vel alicujus rei imaginem in cerebro nostro excitando, vel somnia immittendo, quod Deum passim cum Patribus Hebræis fecisse, veteres scripturæ narrant. Ea quoque in re consentiunt Gentiles omnes. Legatur Cicero de *divinatione*. Via tandem sensuum pluribus modis, quorum duo sunt præcipui, per *aures*, & per *oculos*: nempe aut verba seu sonos articulatos producendo in auribus nostris, qualis inducitur loquutus Patriarchis Hebræis; aut signa aliqua oculis obijciendo, quibus voluntates suas explicet, qualia erant flamma de Cælo descendens & victimas consumens, lumen in aere, aut alibi rutilans. Locutio per Urim & Thummim, seu per lapides pretiosos, qui in *pectoralis* Summi Sacerdotis erant, huc etiam spectat. Quamquam qua ratione Deus loqueretur per Urim & Thummim non constat inter Doctos. Urim fuisse instrumentum sinuosum Rationali S. Sacerdotis affixum, unde Deus consultus verba fundebat, censuit *Spencerus*, l. III. de Legib. Ritual. Hebræorum, dissert. VII. c. III. qui Hieronymi potissimum autoritate nititur.

§. III.

His & similibus rationibus Deus homines alloquitur. Qui autem scire vult, loquutus ne sit Deus, is primum Ecclesiam consulere debet, a qua & Dei verbum, & ejus verbi sensum accipere debemus. Sed si quis Theologus ea de re philosophari velit, is necesse est utatur vel *conscientia*, vel *sensu*, vel *auctoritate*, vel *ratione*. Utimur Conscientia & sensu, quum nobis loquitur, vel intrinsecus, vel extrinsecus. Et ad Conscientiam quod spectat (conscientiæ nomine etiam phantasiam intelligo) tum credendum est, Deum nobis loqui, quum modo insolito mentem nostram, aut phantasiam atillari, ei que cogitationes insolitas, divinas, honestas infundi sentimus, ad easque producendas nos nulla opera nostra utimur. Accedunt etiam aliæ conjecturæ, si nos scilicet vi quadam præditos sentimus futura prædicendi, aut miracula

cula edendi: si novo erga Deum & divina amore flagremus, & a terrenis quasi abhoreamus. His omnibus ratio utitur ad discernendam internam Dei revelationem.

§. IV.

CAvenda est autem in hac re illusio: nimirum plerumque spiritus melancholicus, & vis calidæ phantasiæ, efficere possunt, ut credamus Deum nobis loquutum. Quot mortales hac via Prophetas se egerunt? Nec apud Gentiles modo, sed & apud Hebræos, & Christianos Pseudo-Prophetæ extiterunt. Generalis regula est, tunc putato insolitas aliquas cogitationes, imagines, commotiones animi, esse divinas, quum certus es, eas, neque a causis nobis intrinsicis, neque ab ullis aliis extrinsecis, provenire posse: alioquin quantumvis insolite agiteris, putæ esse causas, aut in tua ipsius natura occultas, aut extra te, unde agitaris. Sed & in iis probandis sapientum utitor sensu & iudicio. Circa somnia præcipue quot illusiones, quot imposturæ? Nempe eveniunt plerumque naturalia somnia, quorum rationem reddere nequeas: & plerumque, quum aliquid vehementer timetur, aut speratur, in animis paulo superstitiosis, mira somnia, & quasi divina excitat.

§. V.

Sensu vero scire possumus, Deum nobis loqui, si is verba ad aures nostras fundat, aut alia signa suæ voluntatis oculis, aliisve sensibus objiciat. Ita Ada, Cainus, Noëmus, Abrahamus, Moyses, alique, qui ore ad os cum Deo loquebantur, (a) certi erant de divina locutione. Ceterum quum doceant scripturæ esse Dæmones, qui nobis illudere possunt, adhibenda est in consilium ratio: ut scilicet diligenter examinemus commotiones a locutione illa in nobis excitatas, sententias ipsas, quas loquutor nobis communicat, scilicet sanctæ sint & honestæ, necne: veræ, an falsæ: signa porro, quæ loquutor, ut sibi credatur, præstat. Uno verbo, quemvis potius creden-

(a) Quamquam cum Dei Angelo loquutos sunt qui putant, in primis B. August.

dendum nobis loqui, quam Deum, nisi certo constet, alium esse non posse, nisi Deum. Cautos enim nos humanæ & dæmoniacæ imposturæ fecerunt. Et hæc quidem, quum judicandum est, num Divinitas nobis locuta sit per semetipsam.

§. VI.

AT si per alios nobis loquatur, ad auctoritatem & rationem confugiendum. Nimirum quum plurimi docti, perspicaces, minimæ creduli testantur, se Prophetam aliquem audivisse, in eo omnia signa divinitatis observasse, & omnibus examinatis comperisse, nullam ibi imposturam subfuisse: tunc perfrictæ frontis fuerit assensum denegare. Sed ratio quoque & critica adhibenda est. Scilicet primum observandum quo tempore hoc accidisse narratur qualesque erant homines ejus temporis, culti & perspicaces, an inculti, superstitiosi, facile creduli. II. An ejus, qui Dei nomine loquutus est, interfuit aliis imponere, aut alias imposuerit. III. An similes imposturæ fieri solitæ fuerint. IV. Quæ sint illa, quæ Dei nomine revelavit. V. Quibus signis missionem suam confirmavit. VI. An aliqui ejus populares imposturam suspicati sint, & quam ob causam. Ex his omnibus ferme fontibus ut divinarum scripturarum divinitatem, ita Alkorani falsitatem detegimus: harum enim rerum nulla in scriptis Christianorum divinis locum habet; omnes vero, aut ferme omnes, in Muhammedanorum Alkorano.

§. VII.

Sed qualis auctoritas humana nos certos faciat de iis, quæ ante nos evenerunt, loco suo dictum est. Ratio autem, quæ nos certas facere potest, aliquem Dei spiritu loqui a Prophetis potissimum & miraculis desumitur. Prophetiæ nomine intelligo prædictiones rerum, quæ non dum evenerunt, quum prædicantur, quæque neque a causis naturalibus, neque a præsentibus rerum statu prævideri possunt. Nam quæ, aut ex cau-

causis naturalibus præsciri possunt, veluti futuram Lunæ eclypsim, ubertatem fructuum, aut ex præsentē rerum statu qualis Ciceronis prævisio de interitu Reipublicæ civilibus bellis jamdiu dilaceratæ, Prophetiæ nomen non merentur. Veræ porro prophetiæ character est, si ea opere sit completa ita ut prædicta fuit.

§. VIII.

Quoniam igitur vera prophetia est earum rerum prædictio, quæ neque a causis naturalibus, neque a præsentē rerum statu prævideri possunt (§. 9.) & vis ista prævidendi solius Dei est, uti in Theologia naturali demonstramus; inde sequitur has prædictiones a solo Deo fieri posse; adeoque eos homines, qui audacter has prædictiones faciunt quæ ad amissim implentur, theopneustos esse, seu divinos. Quo potissimum argumento probamus libros veteris testamenti esse divinos. Qua de re copiose disputo in Elementis Theologiæ Christianæ. Interim potest legi Huetius in Dem. Evang.

§. IX.

Illud fortasse dicet aliquis: Quum in mundo nihil fiat sine causa, aut sine ordine, omnes causæ, & omnes effectus mundi concatenati sunt inter se: adeoque quemadmodum sunt in natura qui paucarum causarum & effectuum concatenationem prævident, alii qui plurium; ita etiam esse possunt, qui longissimam causarum & effectuum seriem prævideant, & prædicant; qui tamen theopneusti non sunt.

§. X.

Sed isti in locum difficilem, & qui ad hanc disciplinam non pertinet, nos adigunt. Primum igitur responsum sit, inter homines constare jam, capacitatem mentis humanæ, ad ea futura, quæ libera & contingentia vocantur, se non extendere, adeoque ea non posse audacter & vere prædicere, idque non semel, sed constanter. Quod vero pertinet ad alias mentes, ignoramus sane, quousque earum perspicacitas extendatur; itaque non facile credimus

mus eas a Deo missas, ex hoc solo quod quædam futura prædicant, verum miracula quoque exigimus. Sed, ais, fieri posse ut Dæmon aliquis hominem invadat, & per eum loquatur. Respondeo, bonus ne fingetur hic, an malus? Si bonus non faciet imposturas, neque idcirco ejus ope homo nomine Dei loquetur quum a Deo non affatur. Si malus. I. Ex doctrina & moribus hominis loquentis facile detegetur. II. Non poterit miracula facere, quæ homines in errores agant; id enim Dei bonitas non finit.

§. XI.

JAm vero quod de ordine rerum dictum est §. ix. quamquam, ut dixi ad sublimiores disciplinas pertinet; tamen quale sit per transennam explicabo. Non dubitamus, quin omnia individua mundi præteriti, præsentis, futuri, ita inter se concatenata sint, ut perfectam harmoniam & ordinem faciant. Sed totus hic ordo universalis ex infinitis pene aliis seriebus & ordinibus compactus est, non secus atque magnus aliquis funis ex pluribus aliis funiculis, aut magna catena ex catenulis aliis. Particulares autem istæ series etiam ex simplicioribus aliis compactæ sunt. Præterea & totus ordo, & peculiare illæ series & catenulæ spectari possunt, vel in tota mundi duratione, vel in parte aliqua hujus, durationis majori vel minori. Scilicet catenula una, quo longius pergit, eo magis cum aliis & aliis catenulis intricatur, ut difficilius sit eam persequi.

§. XII.

Quibus explicatis, quoniam, superis grates, plus minus capacitatem mentium humanarum novērunt jam homines; scimus posse nos in serie simplici causarum & effectuum longissime prævidere, veluti Astronomus, qui per plura sæcula supputabit, quoties Luna in umbram Telluris incidet. At in seriebus ex infinitis aliis compositis, vix est, ut ad tertios effectus procedat. Hujusmodi autem sunt actiones humanæ, quæ cum infinitis causarum & effectuum seriebus implicite sunt:

nam

nam uti variæ, & infinitæ perceptiones nasci possunt ex variis & infinitis motionibus cerebri, & organorum sensoriorum, ita variæ & infinitæ voluntates, & actiones, quarum quælibet in serie sua simplici est, ex omnibus vero series actionum humanarum conflatur, quam perfecte prævidere sola potest mens infinita.

§. XIII.

JAm videamus qua ratione ex miraculis loquentis divinitas probari possit. Locus iste celeberrimus factus est dissertationibus Lockii, Clarkii, Leibnitii, VVolphii. aliorumque. Quidam sunt, qui miraculum vocant, id quod contra naturæ leges fit. Qua definitione posita nulum erit miraculum: etenim quum leges naturæ sint leges ordinis æterni, quem Deus in conservatione mundi servat, & contra ordinem Dei æternum nihil fieri a Deo possit; sequitur nihil fieri posse contra leges naturales, nisi aut Deum mutabilem facere velimus, aut certe minus potentem, cujus ordini aliquid adversari possit. Alii ergo rectius docent miraculum esse id, quod supra vires naturæ fit, idest supra vires eorum, qui miracula agunt, & earum rerum in quibus miracula edunt. Sed inquirunt, hac data definitione, nulla ratione a nobis miracula cognosci possunt: Nam quum ignoremus quousq; vires rerum creatarum se extendant, dicere nunquam possumus aliquid esse supra naturæ vires. Hinc acatalepsia circa miracula inducetur. Respondemus, quamquam ignoramus quousque extendant se vires totius naturæ, aut omnium rerum creatarum, scimus tamen terminos virium quarundam rerum, *animalium*, e. g., *plantarum* saltem quarundam, *hominum*: itaque quotiescumque animal planta, homo aliquid supra vires suas efficit, id miraculum vocandum est.

§. XIV.

Illud vero quærendum restat, quamam ratione sciri possit, ut quod fit ab homine supra suas vires, id fiat ipsius Dei vi & Spiritu. Facile. In personis a Deo missis cum miraculis conjuncta erat veræ doctrinæ præ-

dicatio, quæ argumento erat, personas illas a Deo missas, & miraculis hanc missionem comprobata. Alioquin disertis verbis quum in veteri tum in novo testamento præcipitur nobis, ne solis signis credamus, quæ etiam falsi prophetæ efficere possunt. Frustra igitur Gentiles pro Religione sua miracula jactant; quandoquidem etiam ea facta esse demus, tamen quum Gentilismi tum theoretica erronea est, tum vero maxime practica corruptissima, & fœdissima, si quæ apud eos miracula facta sunt, ea ab aliis causis potius, quam a Deo, facta fuisse, credendum. Generatim igitur, quum constat personam aliquam rectam & sanctam doctrinam docere, nulla ambitione gloriæ laborare, nulla spe voluptatum vel commodi affici, natura sua ab imposturis abhorreere, tenendum est, esse vera miracula ea, quæ facit, usquedum non constat, id per causas naturales & occultas facere. Qui autem dicit, hæc non esse vera miracula, is ridebitur, usquedum non explicabit causas, quibus illa fiunt. Ita deridiculi erant Pharisei, qui quum nolent admittere miracula Christi servatoris nostri, ineptas, generales, & sibi etiam ignotas responsiones dabant. Loquor autem de miraculis, quæ fiunt nobis inspectantibus, & observantibus. Quando vero narrantur miracula facta, ut missio divina probetur, tum aliud examen est instituendum, nimirum circa auctoritatem narrationum; qua de re superius dictum est.

C A P. IV.

*Quanam ratione dignosci possit quantum sint
Dei verba.*

§. I.

Qua ratione dignosci possit, loquutus ne Deus sit, nec ne, superiori capite edisseruimus. Nunc qua ratione Dei verba valeamus discernere, perquirendum est. Esse hæc possunt vel scripta, vel sine scriptura, a majoribus nostris veluti per manus nobis tradita.

ta. Quam de libris scriptis agitur, hæc sunt perpendenda. I. Qui fuerint illi, a quibus scripti fuisse dicuntur. II. An libri sint genuini, idest ab iis scripti, quibus tribuuntur, vel eo tempore scripti, quo feruntur. III. An integri sint. IV. Quid de illis coevi homines crediderint, quid proximi sequentes, & reliqui. V. An potuerit aliqua impostura subesse, & an alicujus intererat imposturare. VI. An, quæ libris illis continentur, sint manifeste falsa, aut impia, aut saltem parum pia, & sancta. VII. An constet Auctores librorum illorum miraculis doctrinam illam confirmasse. VIII. An in libris illis prophetiæ opere completæ contineantur. Quæ ut particulatim examinem operæ pretium est.

§. II.

QUOD ad primum attinet, si constet librum aliquem scriptum esse a viro theopneusto, seu divino numine afflato, liber divinus habendus erit. Hac ratione. Hebræi libros Moſis, Davidis, Eſaiæ, aliorumque divinos habuerunt; contra vero, si constet librum a viro non theopneusto scriptum esse, qualia Poemata Hesiodi, aut Carmina Orphæi vel Sybillarum. Qua vero ratione sciri potest, an vir aliquis sit, vel fuerit theopneustus, superiori capite demonstratum est.

§. III.

CETERUM magna etiam acribia heic adhibita est ab Ecclesia, cujus est de verbo Dei judicare. Nempe perquisitum est, an spiritus Dei hominem illum perpetuo afflaverit, an vero aliquando cessaverit: & an vir ille scripserit eo tempore, quo afflatus erat Spiritu Dei, an vero alio tempore. Præterea & id investigatum est, an Spiritus Dei, quum mentem alicujus afflat, eam omnino agat ad ea scribendum, quæ Spiritus ipse suggerit, an vero libertatem illi relinquat ea scribendi, quæ vult, aut aliquid e suo commiscendi: seu, quod idem est, an levis fuerit Spiritus Dei afflatus, an vero talis afflatio, qua mens humana a serie cogitationum suarum averſa fuerit ad ea cogitanda, quæ Spiritus suggerebat. Hæc quam

diligenter perpenſa ſunt, quod alioquin, periculum erat ne profanum librum, pro divino acciperetur. Quum igitur, ut dixi, hæc omnia ut olim Synagoga, ita deinde Eccleſia Chriſtiana examinaſſent attentiffime, repere-
runt ſpiritum autorum theopneuſtorum Sanctum ita eorum invaſiſſe animos, ut nequiverint aut non ea prædicare, quæ Spiritus Dei dictabat, aut ea mutilare, interpolare, vel quomodocumque corrumpere; ex quo con-
cluſerunt libros veteris & novi teſtamenti divinos eſſe.

ſ. IV.

UT autem libri genuinitas, & integritas cognoscatur, quod eſt ſecundum & tertium poſtulatam (ſ. I.) Artis Criticæ regulæ adhibendæ ſunt, de quibus poſtea. Dependet vero a genuinitate & integritate, libri aucto-
ritas. E. g. idcirco Apocalypſim Johannis Apoſtoli divinam putamus, quod credamus a Joanne viro theopneuſto ſcriptam, & eandem eſſe, quam Johannes ſcripſit. At ſi quis ex. g. evidenter demonſtraret, aut ab alio ſcriptam eſſe, aut hanc, quam habemus non eſſe Johannis Apoſtoli, aut mutilatam, interpolatam, & depravatam eſſe, iſt totam ejus libri auctoritatem labefactaret.

ſ. V.

EX auctoritate coævorum, aut proxime ſequutorum, diſcimus an liber ſit genuinus, & an auctor miſſionem ſuam divinam certis argumentis probaverit. Nam ſi coævi omnes de miſſione divina Auctoris perſuaſi fuerunt, nec erant homines ſtupidi & bardi, quibus facile imponi potuerit, magnum argumentum habebimus pro divinitate alicujus libri. Ceterum volo ut probe examinetur, an coævi iſti affectu aliquo erga Auctorem fuerint agitati: nam ſi cognoscatur eos voluiſſe illi adulari, ejus beneficiis captos, vel nimio erga illum amore paſſos eſſe ſibi imponi: aut etiam ſi ab illo averſi animo fuerint, eumq; injuria exagitaverint; tunc nec pro Auctore, nec contra Autorem teſtimonium dicere poſſunt. Sed & hac in re Eccleſia ſemper audienda eſt, nec ulterius inquirere fas eſt.

ſ. VI.

§. VI.

Illustremus hæc aliquot exemplis. Plato in Jone observat viros phantasticos, qui magna sui commotione loquuntur, in iis, a quibus studiose auscultantur, easdem commotiones producere; quibus fit, ut auscultatores in loquentis opiniones facile trahantur. Quum Quakerus tanquam Spiritu Dei invasus aliis prædicat id magna commotione, quam oculis totoq; vultu indicat, tum plurimi eorum eodem Spiritu se agitari credunt, itaq; surgunt & ipsi, atque prædicant, uti Voltærius testatur in Epistolis Philosophicis de Quakeris. An putemus hos fidem facere de auctoritate & divinitate alicujus Quakeri? Melancthon credidit facile Lutherum Spiritu Prophetico agitari, tum ob magnam opinionem quam de illo habebat, magnamque amicitiam, quæ ei conjunctus erat; tum etiam ob insolitas & vehementes hominis commotiones, vel furorem. E contrario Pharisei, jurati hostes Jesu Christi, omnia ejus dicta, facta, in pessimam partem accipiebant, & criminabantur: qui dum de divina missione Jesu agitur, audiendi non sunt.

§. VII.

Quintum postulatum ut rite examinetur, homines exigit acutos & doctos. Possunt imposturæ a diversis causis proficisci. Primum ab ambitione honoris. Hinc plerique se theopneustos simularunt, uti tanquam Prophetæ haberi possent, aut tanquam factionum capita, qualis Mahammedes fuit, qui quum morbo comitiali agigaretur, evulgavit se ab Angelo Gabriele corripì ut ea via summum inter suos principatum obtinere posset. Hujusmodi impostores fuere & inter Hebræos, & inter Gentiles, Muhammedanos, atq; Christianos plurimi, & nunc sunt. Hinc ille Sabatæi Sevi, qui præterito seculo se Messiam finxit, Judæosq; omnes Asiæ, Africæ, Europæ commovit, iisque exitialis persecutionis causa fuit.

§. VIII.

DEinde imposturæ etiam ex desiderio *libertatis*, *commodi*, *voluptatum*, proveniunt. Apud Turcas, qui Santones vocantur, magnam vivendi libertatem acquisiverunt. Hujus libertatis desiderium plurimos facit Hippocritas. Quot sunt hujus generis in omni natione, qui virtutem simulant, ut libere vitiis indulgere possint? Ex hac & superiori causa oraculorum Gentilium tot imposturæ provenerunt. Nempe intererat Mystrarum ut crederetur se esse Deum interpretes: inde enim & imperium in animos, & aurum, & vitæ commoda omnia, habebant. Vide similem imposturam Sacerdotum Assyriorum descriptam a Daniele Propheta.

§. IX.

TUM quoque proveniunt imposturæ ex animo nimis religioso, easque vocant pias fraudes. Ita veteres quidam semi Christiani libros quosdam vulgarunt sub Mercurii Trismegisti nomine. Carmina Sybillina, quæ octo nunc libris Græce habemus, ejusdem esse generis Critici putant. Sane demonstrant in quibusdam oraculis Sybillarum, quæ habet Lactantius, nedum Evangelicas sententias usurpatas, sed verba etiam evangelica, quod magnum est argumentum, auctorem horum carminum post scripta Evangelia fuisse. Sed res non est hujus loci.

§. X.

ODium etiam imposturas in Religione peperit. Hinc in primis Ecclesiæ seculis passim vulgabantur Evangelia apocrypha, epistolæ Apostolis adscriptæ, acta Martyrum fabulosa; idque fiebat potissimum per hæreticos, & rerum suarum amore, & nostrarum odio commotos. Plures testantur in Galliis, dum controversiæ acerrime agitentur Molinistas inter & Jansenistas, plurimos libros falsatos, & interpolatos. At quod scribit Auctor Epistolarum Judaicarum, etiam Jansenii *Augustinum* falsatum a Molinistis, id meram calumniam puto. Qui enim

enim fieri potuit ; tot exemplaribus undequaque vulgatis ?

§. XI.

Nimia vis phantastica plurimas plerumque produxit imposturas. Nam primum phanaticus facile credit se Spiritu Divino agi, quum Spiritu atræ bilis agatur. Hinc tanquam Divina ea vulgare potest, quæ ipse imaginatus est. Possunt esse plures aliæ imposturarum causæ. Quicumque igitur libri alicujus divinitatem nosse cupit, is videat acute, an imposturarum ullæ causæ subesse potuerint, deinde an re vera imposturæ factæ sint. His regulis noscimus Alkoranum Muhammedanorum esse meram imposturam a pluribus simul harum causis; ambitione, spiritu voluptatis & divitiarum, odio nata. Contra vero, libros Apostolicos omnis imposturæ suspitione carere, quod nulla harum causarum in iis locum habuerit.

§. XII.

Accedamus ad VI. postulatam. Sunt quædam veritates, quæ tam clare, & distincte ab omnibus hominibus perspiciuntur, ut suspicari non possimus, mentes nostras in iis falli: alioquin credendum esset Deum frustra nobis facultatem intelligendi dedisse, aut voluisse ut nos in omnibus perceptionibus nostris falleremur, quod est impium. Veritates porro istæ, quas nemo unquam sanæ mentis in dubium vocavit, sunt varii generis: aliæ ad naturam Dei pertinent, veluti *Deum existere, esse sapientissimum, immutabilem, ab eo mundum esse factum, & gubernari*, & aliæ plurimæ. Aliæ pertinent ad naturam mentis humanæ, aliæ ad naturam corpoream, aliæ spectant jus Naturale & Gentium, atque conservationem generis humani, aliæ ad alias res pertinent.

§. XIII.

Quibus positis sequitur Canon generalis: *Si liber aliquis ea docet, quæ adversantur clavis perceptioni*

nibus luminis naturalis, non potest esse divinus : nam nequit Deus docere ea, quæ contra omnem rationem naturalem sunt : quippe ratio naturalis est quasi radius ipsius æternæ rationis Dei : & Deus nequit nos aliud lumine naturali docere, aliud lumine revelationis. Sed caute ad hoc iudicium eundem est : fieri enim potest ut, aut rationem naturalem putemus claram & certam, quum tamen non est, aut librum non satis intelligamus, itaque censeamus rationi naturali adversari.

§. XIV.

NON solum autem liber non erit divinitus, si opponatur rationi naturali, verum etiam si opponatur cuicumque certitudini reali. Itaque si liber opponatur *Veræ* historię humanæ ; nequit esse divinus. Eodem modo si liber adversetur aliis libris, quos constat esse divinos, non est ipse divinus. Ratio Canonis semper est eadem, nimirum non posse Deum nos falsa docere. Sed, ut dixi, diligenter observandum est, an probe oppositionem istam cognoscamus : nam facile ob brevitatem mentis decipi possumus. Atque ob eam rationem hæc iudicia proprie sunt Ecclesiæ : Quo spectat tritum Augustini illud, *Ego Evangelio non crederem nisi Ecclesiæ me commoveret auctoritas*.

§. XV.

PAriter, quum liber nec pius est, nec honestus, idest aut parum Religioni favens, aut bonos mores enervans ; divinus haberi non potest : nam quum constet Deo ab hominibus, aliisque mentibus creatis, Religionem deberi ; nec haberi potest Religio nisi cum honestis moribus ; sequitur, Deum in libris, quos dictat, non posse aut Religionem evertere, vel elevare ; aut bonis moribus efficere. Qui postremus Canon docet, oracula Gentilismi non potuisse a Deo proficisci, aut ab Angelis ; quippe quæ idololatriam confirmabant, scdissimamque morum disciplinam fovebant. Quæ vero ad duo postrema postulata pertinent, quousque scilicet libri divinitas ex miraculis & Prophetis cognosci possit, superiori capite dis-

dis-

differuimus. Interim legatur Huetius in Alnetanis lib. primo ex quo plurima hunc in locum derivari possunt.

C A P. V.

De librorum divinorum interpretatione.

§. I.

Eorum, quæ ad auctoritatem divinam pertinent; priora duo explicata sunt: tertium nunc restat, qua nimirum ratione liber aliquis divinus interpretandus sit. Ea in re adhibendæ sunt partim regulæ generales hermeneuticæ, partim vero & speciales. Generales paulo post explicabimus. Particulares heic complectemur, ut iis hoc in loco morem geramus qui studia theologica aut exercent, aut spectant. Efficiemus per summa capita, ne tractationem theologicam hic adfuisse quis objiciat.

§. II.

Omnium primum conari debemus, quoad possumus, ut quem finem in eo libro dictando Deus sibi proposuerit, intelligamus: ex fine enim libri facile percipimus eorum, quæ in eo docentur, concatenationem, & œconomiam, ut vocant; deinde doctrinæ concatenatione probe intellecta, ejus partes clarius & distinctius cognoscimus: tum vero omnium dogmatum utilitatem pervidemus, atque ita de tota doctrina judicium ferre possumus. Sic, quum sciamus librorum theopneustorum veteris & novi fœderis finem esse, Religionis integritatem sanctitatemque, eorum dogmata facillime perspicimus. Generalis est hæc regula, & ad libros etiam profanos intelligendos, adhibenda.

§. III.

Quoniam igitur Deus, totam doctrinam revelatam ad Religionis sanctitatem, & ad morum conformationem adtemperavit (§. 2.); opus fuit, ut ad homines:

mines loqueretur ea lingua ; iisque linguæ phrasibus , quæ consuetæ erant iis , ad quos loquebatur : nam si aut aliena lingua , aut ignotis linguæ phrasibus loqui voluisset , revelatiō sua ignota mansisset , frustra facta fuisset . Ex quibus inferimus , in libris veteris , aut novi fœderis Hebraice , aut Græce scriptis , verba & phrasēs esse intelligenda ex usu nationis Hebraicæ , quæ Hebraice , aut Græce loquebatur ; nec esse in verbis & phrasibus semper emphases , & mysteria investiganda . Hac in re veteres quidam scripturæ interpretes peccaverunt , quæ linguæ aut Hebraicæ , & Chaldaicæ , aut Hellenisticæ , seu Græco-judaicæ , indolem , & genium ignorantes , atque ubique mysteria venantes , sententias suas divinis Scriptoribus attribuerunt .

§. IV.

EX eadem §. 11. doctrina & hanc regulam , pro Sacra Scriptura interpretanda , deducimus , non esse semper in libris Sacris pervestigandas veritates sublimēs , & a captu populi longe remotas , metaphysicas , Astronomicas , Physicas , & id genus alias , quæ ad Religionem , & mores non pertinent (a) . Nam quum Deus his libris Religionem & mores purgare atque formare constituerit , volueritque doctrinam captui totius populi adtemperatam esse , fini suo contrarius fuisset , si doctrinam moralem sublimibus sententiis , & disciplinis obscurasset . Quo circa deridiculi mihi videntur , qui ex Scripturis Sacris auxilia arcessunt , ut probent ideas innatas , aut magnitudinem , & motum Planetarum , aut spatium vacuum , aut similia : quasi Dei interfuerit humanam curiositatem sua revelatione explere , & non potius mores emendare . Fœdant igitur Scripturas , qui Systemata Gassendistica , Cartesiana , Nevvtoniana , Leibnitiana in libris Christianorum Sacris perquirunt . Hoc autem ita intellectum volo , ut sicubi in scripturis sacris veritates istæ tradantur , scripturarum potius sententiæ , quam ullæ philosophorum ratiocinationes sint audiendæ .

§. V.

(a) Vide virum doctum Ant. Muratorium de Moderatione Ingeniorum .

§. V.

NEc vero ista ita intelligenda sunt, quasi in libris Christianorum Sacris omnia sint plana & facilia, nulla obscura & perplexa: nam ipsi Commentatorum labores, variz interpretationes, lapsus, aperte demonstrant, plurima esse in his libris obscura & intricata. Sed hæc tamen sine ulla Sacrorum Scriptorum culpa, nobis obscura sunt; atque id ob duas potissimum causas, linguæ nempe, & veteris historiæ, ignorationem. Etenim quum lingua Hæbraica interciderit, vetusque Hæbræorum historia, mores, consuetudines, opiniones magna ex parte ignorentur, plurima in libris Sacris, qui ab Hæbreis, & Hæbræis potissimum scripti sunt, obscura evaserunt, quæ quum libri illi scriberentur, clare patebant. Hinc natæ infinitæ illæ quæstiones Chronologicæ, Geographicæ, aliæque plantas, animalia bruta, gemmas, leges politicas, ceremonias, spectantes, quas docti magna inter se contentione agitant, quæque definiri nullo modo possunt.

§. VI.

EST etiam alia, eaque generalis causa, qua libri Sacri obscuri sunt, nimirum *Prophetiæ*: etenim quum *Prophetiæ* res aut occultas, aut futuras spectent, obscuritate quadam perfunduntur, itaque plerumque laborandum, ut personis, factis, temporis, locis adaptentur. Sed sunt tamen aliæ aliis obscuriores: nempe interdum *Prophetæ* pauciores, interdum plures notas *rei prædictæ* explicant: illæ igitur prophetiæ his obscuriores sunt. Extant in libris sacris antiquis, præter ceteras, duæ celeberrimæ de Messia *Prophetiæ*, altera Jacobi (Geneseos 49.) Danielis altera: utraque plurima obscuritate perfusa, sed prior posteriore profecto obscurior. Etenim in Danielis prophetia unum tantum est, quod obscurum est, tempus scilicet, unde septuaginta illæ hebdomades incipiant. At in Jacobi *Prophetia* plura sunt intricata, & obscura. I. Quid Sceptri & Ducis vocabulis intelligatur. II. Quodnam sit tempus, ex quo memoratus Judæ Dux, non defuturus, nisi quum venerit Messias,

fias, regnare incipiat. III. Quid vocabulo *Judæ* significetur: totaan gens Ebreæ, an sola *Judæ* tribus.

§. VII.

PRæterea, vocabula sunt signa idearum & cogitationum loquentis: ideæ vero & cogitationes perfectiores sunt in mentibus magis perfectis; ergo vocabula eadem a diversis mentibus per organa corporea pronunciata non easdem ideas explicant: nam pronunciata a mente perfectiori ideas perfectiores exprimunt, pronunciata vero a mente minus perfecta, ideas minus perfectas referunt. Quum igitur vocabula Scripturarum divinarum a Mente divina dicta fuerint, profecto ideas longe perfectissimas exhibere debent, quam si ab ulla creatura pronunciata fuissent. Atque hinc alia causa obscuritatis scripturarum theopneustarum arcessenda. Hinc veteres Ecclesiæ Patres hanc regulam statuerunt, *eodem scilicet spiritu scripturas sacras intelligendas, quo dictæ sunt, cum vero Spiritum Ecclesiæ datum.*

§. VIII.

EX quo alia regula Scriptionum Sacrarum interpretandarum sequitur: nimirum, *eas interpretandas esse ex consensu totius Ecclesiæ Christianæ.* Nam quum Scripturæ Sacræ eodem Spiritu rite intelligi possint, quo sunt dictæ (§. 7.); & hic Spiritus toti Ecclesiæ datus sit, deturque etiamdum, ut ipsæ Scripturæ docent; efficitur, ut ex consensu Ecclesiæ rite interpretari Scripturæ Sacræ possint, quod in Comitibus Tridentinis sapienter statutum est, nempe Scripturas interpretandas juxta sensum quem semper tenuit Ecclesia, hodieque tenet.

§. IX.

Postrema istæc regula alia etiam ratione confirmatur. Scriptores theopneusti, potissimum Evangelici, Spiritu & numine Dei afflati erant: Sacram ergo revelationem primum iis a Jesu Christo communicatam, deinde quinquagesima a Christi morte die per spiritum Dei uberius enucleatam, auctam, confirmatam, cla-

clare, & distinctæ percipiebant, eamque partim scripti-
onibus, partim sermone docuerunt. Itaque si in scri-
ptionibus aliqua subrepsisset obscuritas, eam voce diffu-
bant: Ita Ecclesia Christiana nedum Scripturas Evan-
gelicas, sed earum quoque sensum ab Apostolis accep-
pit: ex quo regula §. 8. confirmatur.

§. X.

SED Scripturas veteris testamenti nihil tam reddit ob-
scuras, quam ratio loquendi per enigmata, para-
bolas, allegorias perpetuas, metaphoras, & catachre-
ses; quam loquendi rationem qui assuetudine lectionis
non didicit, Scripturas istas interpretari non potest.
Mos iste scribendi usitatus omnibus orientalibus natio-
nibus: hodie Arabes eundem habent stylum. Muham-
medis Alkoran eadem ratione scriptus est. Sed Ægy-
ptiis in hoc scribendi more primas partes lubenter de-
mus. Adeatur Plutarchus sub initium aurei libelli de
Iside, & Osiride. Hi enim per enigmata, & hyerogli-
phica res paulo sublimiores, & diviniore explicabant.
Idem inde Hebræis mos hæsit. Moses præcipue, qui in
Ægyptiorum sapientia per 40. annos innutritus est, haud
raro eundem stylum sectatus est. Prophetæ quoque eo-
rum stylo utuntur. Psalmi Davidis ob eum stylum vix
intelliguntur. Ipse Jesus Christus non loquebatur nisi
in parabolis; quod nimirum sciret huic stylo Hebræos
adsuetuosesse. Veteres quidam patres in primis Origi-
nes eam potissimum ob causam, etsi non recte, allego-
ricos intelligebant quæcumque Moses de sex diebus,
Serpente & Paradiso terrestri scripsit (a).

§. XI.

CETERUM tria heic cavenda sunt. Primum ne allego-
rias etiam ibi vestigemus, ubi nullæ sunt, in quo
maxime peccavit Origines & aliquot alii veteres. Secun-
dum ne in alterum extremum deflectamus, nullas, aut
ad-

(a) Vide, scilicet, quæ hac de re scribit Burnetius in
Archæologiis philosophicis:

admodum raras esse allegorias istas, in quo recentiores interpretes, sensus literalis æquo nimius amantes, plerumque peccant. Tertium ne putemus stylo hoc allegorico, & tropologico semper mysteria contineri, quod interpretes sæculorum Europæ barbarorum qui in ipsis idiotisimis Hebraicæ linguæ, quam egregie ignorabant, reconditos sensus ut plurimum paullo frigidiores reperiebant, fecerunt.

§. XII.

QUUM dico, non investiganda mysteria in *stylo* emphatico non est animus sensum, quem vocant mysticum, negandi: tantum ut ne extra modum aberretur moneo. Quod vero pertinet ad sensum mysticum, dici nequit quanta acribia opus sit, ut rite perspiciatur. De hac re pauca. Omnium primum sciendum est, homines propter Adæ peccatum, & beatitudinem & vitam æternam amisisse, nullamque in se opem relictam esse, ut amissa illa bona iterum consequi possint. Ergo Deus eos miseratus, vel ab Adæ tempore promisit Restauratorem & Servatorem, quem Hebræi Messiam appellant: statuitque eos omnes immortalitatem & beatitudinem consequuturos, qui Messię obtemperarent, crederentq; Sed ut promissi Messię memoria coleretur, variis rationibus usus est, quarum potissimæ fuerunt prophetiæ.

§. XIII.

EST autem Prophetia aut vocabulis facta, aut re. Quum Daniel prædicit, fore ut post quoddam tempus ungatur *Sanctus Sanctorum*, disertis verbis Prophetia concepta est. Sed quum Moses penuria aquæ saxum percutit, ex quo aquæ effluant, Messias ille adumbratur, ut docet Paulus, licet, *re*, non *verbis*. Plurimæ sunt in scriptis veteris testamenti *allusiones* ad Messiam; quarum aliæ obscuriores; quædam disertis verbis; aliæ rebus ipsis continentur. Hinc Paulus Apostolus scribit, *Hebræis omnia in figura contigisse*. Et in Epistola ad Galatas duos

duos Abrahami filios Ismaelem de serva susceptum meli-
liere, & Isaacum ex libera, duo esse testamenta, vetus,
& novum, interpretatur. Non igitur negare possu-
mus cum sensu scripturarum literali mysticum junctum
plerumque esse. Sed non satis monere possumus, uti
interpretes scripturarum caveant, ne sensum hunc ipsi
faciant, non reperiant. Inde enim natæ sunt frigida
allusiones, & ut vocant, *accommodationes*, quæ paula-
tim apud plerosque pro sensu literalis acceptæ sunt. Eg.
Scriptum est in Salomonis *Cantico*, *tota pulchra es, &*
macula non est in te. Ea verba Ecclesia Beatæ Mariæ Vir-
gini aptat, idque sapientissime, quod ea sine ullo pec-
cato originali sit concepta. At quum nihil definiat de
sensu illorum literalis, veteresque Patres de Ecclesia Chri-
sti, quæ *nec rugam habet, nec maculam*, intelligant,
non recte faceret aliquis, qui affirmate, & contentio-
se *ad literam* de B. M. V. hæc intelligeret, etsi pie fa-
ceret. Idem dicito de aliis plurimis: nos enim ad fon-
tem digitum intendisse contenti sumus.

§. XIV.

UT igitur sensum hunc mysticum rite perspiciamus,
primum omnium advertendum cenleo, an recen-
tiores scriptores divini illum in vetustioribus observa-
verint. II. An Ecclesia Catholica eum sensum agnove-
rit. III. An circumstantiæ rerum, vel narrationis eum
indicerent. IV. acuti, & minus prejudicati interpretes de
illo cogitaverint. Quæ qui spernit, is ridiculas sacro-
rum librorum interpretationes affert, & se misere in illis
intelligendis hallucinat, potestque alios plures in errores
suos inducere.

§. XV.

Hæc passim ab aliis observata. Quæ sequuntur mi-
nus sunt ab Interpretibus Animadversa. Omnes
cujusque nationis Scriptores ad quatuor classes referri
possunt: nam aut *historici* sunt, aut *Poetæ*, aut *Philo-
sophi*, aut *Oratores*: ita apud Græcos ad primam classem
referuntur Herodotus, Tucides, Diodorus Siculus:

ad secundam Homerus, Pindarus, Sophocles, Menander ad tertiam Plato, Aristoteles: ad quartam Demosthenes, Isocrates. Apud Hebræos, perspecte id post alios, in primis B. Hieronymum, observante Riccardo Simonio viro *κρητικώτατος*, Moses, Samuel, historicos referunt; Davides, Jobus, Poetas; Salomon, Sadrach, Philosophos; Esaias, Ezechiel, alique Prophetæ, Oratores. Quibus nominibus nolumus quicquam eorum divinitati detractum. Descriptionum tantum characteres indigitamus.

§. XVI.

JAM quum non idem character, nec idem stylus sit Scriptorum quatuor illarum classium, tu quum librum aliquem Sacrum interpretandum suscipis, id primum inquiras oportet, ad quam classem pertineat, scilicet historicus, aut philosophus simpliciori stylo utitur: elegantiori, graviori, tropis & schematibus abundantiori Poeta & Orator. Phrases minus usitatas plerumque adhibet Poeta: res novo circuitu verborum exhibet: magis tropologicus est. Proxime sequitur Orator. Ergo historicos, & philosophos minus, Prophetas, & Poetas magis allegorice interpretaberis.

§. XVII.

SED & hinc cognoscitur alia regula Scripturas Sacras interpretandi, omnium utilissima, & maxime generalis: nempe observandum est, *verba scripturarum ex cujus persona proferantur*. Nam quanquam in omnibus scriptis sacris unus sit narrator Deus; at Deus non semper ex persona sua verba pronunciat, sed aut ex sua, aut ex persona Angelorum, aut ex persona dæmonum, ut ex hominum persona: quæ verba non eodem omnia modo sunt examinanda. Nam quæ Deus profert ex persona sua, nedum verum est ea dicta esse, sed veritatem etiam continent, & honestatem, veluti quum dicit apud Mosem, *non est bonum hominem esse solum, non permanebit spiritus meus in homine in æternum*, apud Hieremiam, *Cælum & terram ego impleo &c.* At quæ ex persona aliorum proferuntur, verum est esse dicta;

ita; Deus enim testatur; at possunt tamen continere ut veritatem & honestatem, ita falsitatem, aut turpitudinem. Veluti quum dicit Davides, *dixit insipiens; non est Deus*, tantum verum est, hoc dictum aut cogitatum fuisse. Cain dicit, *omnis qui inveniet me occidet me*, veritatem habet historicam; at fallebatur fortassis Cain a timore. Pharisæi dicunt Christo in *Beelzebu ejicis demonia*, revera id dictum est, falsum quod est dictum. S. Lucas refert orationem beati Stephani ad Judæos, in qua errores quidam sunt historici & Chronologici: uti recte post Bedam aliosque observat Canus de locis lib. II. cap. XVIII. pag. 84. edit. Patav. 1727. verum est illa dixisse Stephanum: refert enim ea Spiritus Sanctus qui loquebatur per Lucam: sed falsa esse potuerunt quæ dixit Stephanus. Est hæc observatio ejusdem Theologi doctissimi *ibidem*.

§. XVIII.

JAM vero ad Sacram Scripturam intelligendam necessaria est triplex historia, atque triplex historiæ œconomia. I. historia *gestorum*. II. historia *doctrinarum*. III. historia *verborum*: tum trium harum historiarum Oeconomia. Conetur scilicet interpres sibi ponere ante oculos in tabulis Chronologicis præcipua scripturarum gesta: ea comparet inter se. Ita ex clavis ea, quæ paulo sunt obscuriora intelliget. Deinde idem faciat cum doctrinis: earum sibi conficiat seriem: omnes cum omnibus comparet. Hoc modo obscuras ope clararum interpretabitur. Tandem habeat historiam verborum, idest sciat quodlibet verbum, quælibet phrasis, quoties in Scriptura occurrat, & cum quibus notionibus adhibeatur. Scire e.g. volumus quid sibi vult hoc, *credere in Christum*, omnes locos ubicumque id occurrit, colligemus, factaque comparatione conabimur perspicere quid id significet. Agendum est de interpretatione horum vocabulorum *Spiritus Dei, vel Domini*, omnes locos conferemus, in quibus adhibetur. Hæc Oeconomia magnum subsidium præstabit Theologo ad Scripturas interpretandas. Utilissimæ tam ob rem sunt Harmoniæ, Concordantiæ, & hujuscemodi alii libri.

§. XIX.

TAndem nihil magis turbat plerumque interpretes Scripturarum, quam locutionum emphasis, quæ vetustis Scriptoribus, potissimum Orientalibus, gentilis erat. Est emphasis duplex: aut enim verba *minus sonant plus significant*; aut *majus sonant, minus significant*. Utriusque plurima occurrunt in Scripturis Sacris exempla: ea, nisi perspecte intelligantur emphases, & dimetiantur, non intelliguntur. Ad posterius genus pertinent locutiones Scripturarum, in quibus res quædam insignes ex *Dei nomine* appellantur. Ita cedrus altissima *cedrus Dei*, *mons altissimus*, *mons Dei*, horribilis tempestas, tempestas Dei, vel *a facie Domini*, vehemens ventus, *Spiritus Domini*. Quinimo quum Deus ipse quædam facit insolita dicitur plerumque fecisse *Domini a Domino*. Ad prius genus hæc pertinent, hic est *filius meus dilectus*, idest *filius unigenitus & consubstantialis*. Quis *mensus est terram pugillo*? minus sonat, at significat Omnipotentiam. Qui *fecit Cælum & Terram*, idest omnia, &c. Atque hæc regulæ præcipuæ & memoratu nobiliores: nam quæ minus sunt præcipuè passim in vulgaribus libris prostant, eæque sunt numero pene infinitæ, potissimum quæ spectant ad genium linguarum Hebraicæ, & Græcæ,

C A P. VI.

De Librorum Mendis.

§. I.

QUI in sapientiæ studio autoritate utuntur veterum, in id potissimum acres intendere curas debent, ut ne a mendis, quæ variis ex causis in antiquos libros irreperere potuerunt, decipiantur, idque veteribus tribuant, quod illi nunquam scripserunt. Infinita autem menda in veteres libros irreperere potuisse, non est quod dubitemus, maxime si observaverimus, ignotam antiquis fuisse artem typographicam, quæ tan-

tandem circa decimiquinti seculi æræ Christianæ medietatem ab Europeis aut inventa est, aut cognita; adeoque libros omnes manu exscribi oportuisse. Quot autem menda, & quotuplicia admitti possunt dum aliquid manu exscribitur, ii tantum ignorare possunt, qui nihil unquam aut scripserunt, aut excripserunt.

§. II.

CAusas autem omnes mendorum hujusmodi ad quatuor classes retulit Joannes Clericus, qui in *Arte Critica* ex instituto ea de re differuit, *Librarios*, *Criticos*, *Impositores*, *Tempus*. Has per summa capita delibat loco citato capite primo. Atque primum Librariorum *incuria*, aut *imperitia*, pergit ille; pleraque sine dubio menda irrepserunt, quæ nos nunc exercitos habent; cum enim plerosque libros describerent, ab iis longe maximam mendorum segetem provenire necesse fuit. *Incuriæ* peccata tot & tanta sunt, ut difficillimum sit sibi ab ea cavere. Novit enim quisque, si quid exscribat parum adtentus, non modo se adfinia vocabula, dum animus peregrinatur, miscere; sed diversa plane scribere, detrahare, addere; & nescio quot peccata admittere, quorum rationem ipse postea reddere non posset, nedum ut alii eam deprehendere queant. *Imperitiæ* quoque in describendo, si magna sit, ut sine dubio magna sæpissime fuit in Librariis, monstra etiam mendorum parit; cujus exemplorum ingentem copiam omnes MSS. Codices, omnesque Criticorum libri suppeditant.

§. III.

SED variis modis imperiti, aut indiligentes Librarii in errorem delabi potuerunt, quos indicasse, quod licebit, inutile non erit. Cum alii dictarent, alii scriberent, ab utrisque varia provenire potuerunt menda. Ut a dictante incipiam, ille, licet statuamus emendato Codice esse usum, si non fuit satis peritus, sæpissime decipi potuit, dum non bene legit, quæ bene scripta erant. Cum enim manu exararentur omnia, multique sine dubio non pulcre pingerent litteras, ut hodie sit, loca fuere, in quibus legendis homines rei aut linguæ

non satis periti cespitare potuerunt. Voces adfines, aut similes litteras facile misceant. Si vox quæpiam bis repeteretur, & forte ad eam usque vocem, ubi primum occurrebat, dictassent; sæpe fiebat, ut, omissis interjectis, ea quæ vocem secundo repetitam sequebantur, priori proxime subjicerent; aut etiam integros versus, aliud agentes, omitterent. Præterea dictantis, & festinantis lucri causa, vox non semper fuit satis clara, aut pronunciatio satis distincta, ita ut scribentes, licet adtenti, quid dixisset, non satis intelligentes, scriberent quod sibi audivisse videbantur, adfinesque sono litteras, syllabas, voces confunderent. Vocabula varia, apud Græcos præsertim, aut eodem, aut pene eodem modo pronunciabatur, quamvis diversissima; eaque a scribentibus, aut imperitis, aut parum adtentis, facile poterant misceri; cum præsertim celeriter scribentibus, & sequentia adtendentibus, non satis esset temporis ad videndum, utrum vox, quam scripserant, loco conveniret; aut ad interrogandum dictantem.

§. V.

Præterea cum *dictans* videret sæpe in margine exemplaris, quo utebatur, quiddam scriptum, poterat suspicari, verba esse a Librario festinante ommissa, quæ Criticus ad oram postea scripsisset; præsertim si commodè possent inferi, ita ut orationis series iis nequaquam turbaretur. Attamen ejusmodi verba sæpe interpretationes sunt Grammaticorum, aut eorum, qui Codicibus illis usi erant; quo factum, ut tam sæpe Critici in contextum orationis admissa *glossmata*, querantur.

§. VI.

Ubi non est quin Librarii, qui vitam tolerabant quæstu, quem in describendis libris faciebant, pluribus simul dictarent, ut una opera plura haberent ejusdem operis exemplaria; sed fuerunt etiam sine dubio pauperiores, qui vendebant ea quæ ipsi ex libris, nemine dictante, *descripserant*; qua in re, eadem fere irreperere potuerunt menda, quæ vitio *dictantis* debentur,

ex-

exceptis iis quæ ex mala pronuntiatione oriebantur. Præterea dum integra commata, aut etiam integras periodos legunt ac postea scribunt, festinandi causa, quid mirum, si quidpiam omittunt, aut synonymas voces pro aliis scribunt? quod in omnibus antiquis Scriptoribus animadverterent, quicumque varias lectiones, e veteribus MSS. Codicibus collectas, paullo adtentius expendent. Innumera sunt ejusmodi, in variis lectionibus Veteris Testamenti, ex Versione LXX. Intr. & Novi, ut omnibus liquebit, ex inspectis collectionibus dudum & non ita pridem editis. Postremis præsertim sæculis, quicumque imperiti veteris orthographiæ, ex antiquis Codicibus quidpiam transcribebant facile falli poterant, dum alias esse voces putarent, quam reipsa erant.

§. VII.

Hanc in rem observandam non semper, apud omnes Gentes, eandem fuisse rationem pingendorum characterum, aut accentuum adscribendorum. Apud Latinos antiquissimis temporibus, character erat quadratus & majusculus, qualis in veteribus Inscriptionibus & MSS. etiamnum cernitur; nisi quod figuræ litterarum calamo tam eleganter pingi non solerent, ac scalpro. Deinde invaluit scriptura, quæ *Longobardica* dicitur, rotundior & similior huic nostræ, quæ hodie utimur. Hac exarati sunt plerique omnes MSS. Codices, qui nunc exant in Bibliothecis, perpauci vetustiore illo Romano. Creditur ita dici ea Scriptura, quod MSS. plerique ejus ævi, quo *Longobardi* Italia potiebantur, eo characterum genere sint conscripti. Sunt & qui *Saxoniam* scripturam aliasque huic addant; sed non tantum est earum a priore discrimen, ut seorsim expendi debeant. Vide, hac de re *Joannis Mabillonii* Lib. V. de re Diplomatica, ubi omnium earum scripturarum specimina præfert.

§. VIII.

Sunt in Veteribus, seu Majusculis litteris, aliquot sat similes, præsertim si parum eleganter pingantur;

quæ non difficulter a Librariis rerum ipsarum imperitis, nec vocum significationem tenentibus, misceri potuerunt. Cujus rei ratio, in emendationibus maxima habenda est. Similia animadvertenda de litteris Longobardicis. Sæpe factum ut menda irreperent in Codices Romano vetere characterē scriptos, quæ in Longobardicos transfusa sunt; deinde & nata nova eorum progenies, ex Longobardica scriptura; quibus mendis plurima nunc loca usque adeo depravata sunt, ut in integrum restitui nulla ingenii opo possint.

§. IX.

GRæcorum etiam characterum aliqua videtur esse facta mutatio: nam cum antiquissimi quadrati essent, quales in Inscriptionibus visuntur, postea inter scribendum videtur rotundiores esse facti. Qua de re consulenda *Palæographia Græca* doctissimi Monachi Benedectini *Bernardi de Montfaucon*, Lutetiæ edita. Sed præterea accentus, & spiritus, qui in antiquissimis Codicibus nulli erant, in recentioribus sunt additi; unde nata etiam nova menda, dum hæc perperam adpinguntur. Vide, apud eundem veterum Exemplarium MSS. specimina.

§. X.

APud Hæbræos, ante tempora captivitatis Babylo-nicæ, in usu erat id litterarum genus, quod a Phœnicibus acceperant, & quod vulgo *Samariticum* vocatur, eo quod id servarint Samaritæ. Deinde is character in Assyriacum mutatus est in Captivitate, ut demonstrarunt viri doctissimi, & potissimum *Lud. Cappellus*, in *Diss. de Litteris Hebræorum*. Sed & *Clericus* quædam dixit, in *Dissertatione de Nummis characteribus Punicis signatis*, XI. *Bibliothecæ Selectæ* Tomo. Cum Hebræorum Librarii, aut *Scribæ*, homines essent, quemadmodum Græcorum & Latinorum, menda similia admittebant.

§. XI.

§. XI.

VErum aliud animadvertere licet, in Codicibus antiquissimis, cum Græcis, cum Latinis, quod & in Hebraicis fuisse ante Massoretharum tempora, nonnulli Judæi fatentur; voces, nimirum, nullis interstitiis sejunctas, nec ullis interpunctionibus separatas esse; aut, nimium quam plurimas ita conjunctas, quasi essent una vox; quo factum ut non modo falsis interpunctionibus, ab hominibus non satis peritis, corrumpereetur postea sensus; sed etiam ut syllabæ conjungerentur, quas divelli oportebat; aut contra divellerentur, quæ conjungendæ erant. Hinc intelligere licet, munus *Anagnostæ*, temporibus illis, non fuisse indocti prorsus hominis, cum ejusmodi Codicibus utebatur; nam ex tempore orationem interpositis moris dividere, cum divisa in Codice non esset, cujusvis certe non erat. Insigne ejus rei exemplum legere est apud *A. Gellium*, Lib. XIII. c. 30. *Laudabat*, inquit, *venditabatque se quispiam in Libraria sedens, homo inepte gloriosus, tanquam unus esset, sub omni cælo satyrarum M. Varronis enarrator; quas partim Cynicas, alii Menippeas adpellant; & jaciebat inde quædam non admodum difficilia, ad quæ conjicienda adspirare posse neminem dicebat. Tam forte eum ego librum ex iisdem Satyris ferebam, qui id præfixum inscriptus est. Propius igitur accessi, & nosti, inquam, magister, verbum illud, scilicet è Græcis vetus; musicam quæ sit abscondita, eam esse nulli rei? Oro te legas hos versus pauculos, & proverbii istius, quod in his versibus est, sententiam dicas mihi. Lege, inquit, tu mihi potius, quæ non intelligis, ut ea tibi ego enarrem. Quonam, inquam, pacto legere ego possum quæ non adsequor? Indistincta namque sient & confusa quæ legero & tuam quoque impediunt intentionem. Tunc aliis etiam, qui ibi aderant, compluribus idem comprobantibus desiderantibusque, accepit a me librum veterem fidei spectatæ, luculente scriptum; accepit autem inconstantissimo vultu & mœstissimo. Sed quid deinde dicam? Non audeo berce postulare, ut credatur mihi. Pueri in ludo rudes, si eum librum accepissent, non ita magis in legendo deridiculi fuissent;*

ita & sententias intercedebat, & verba corrupte pronuntiabat.

§. XII.

AD hæc omnia, si accedat incuria *dictantis*, aut *scribentis*, aut utriusque simul; potuit alter dictare quod cogitabat, non quod erat in libro, aut alter scribere id quod animum ejus avocabat; quod nobis contingit, cum animus distrahitur aliis cogitationibus. Indidem variorum luxationes ac transpositiones, sequentium ætatum Criticis crucem fixuræ, provenire potuerunt.

§. XIII.

PRæterea & hoc sæpe accidit, ut a festinantibus Librariis per compendium multa scriberentur, omisissis aliquot syllabis, quæ Lectori conjiciendæ relinquebantur. Ex vero vocum contractiones sæpe male a Librariis aut Criticis intellectæ pepererunt maxima menda, cum in nominibus adpellativis, tum etiam in propriis.

§. XIV.

ANtiquissimis temporibus, cum litterarum studia in Græcia atque in Italia etiamnum flourerent, Librariis pœne solis aut Criticis imperitis, vel æquo audacioribus tribui poterant omnia menda; sed cum barbaries Orientem, sub Imperatoribus Christianis jam invasisset, & una cum ea crevisset mirum in modum Monachorum numerus; hi cœperunt veteres libros in Monasteriis exscribere, cumq; eorum plerique homines essent non satis docti; præsertim ad humaniores litteras quod adinet, quippe in legendis Liturgiis potissimum occupati, menda innumera admittebant. Quod fiebat in libris Græcis, apud Græciæ & Asiæ Monachos, idem faciebant in Occidente alii Monachi, ad libros Latinos quod spectat. Hinc fit ut perpauci sint Græci, aut Latini Codices MSS. qui non scateant mendis, præsertim qui complectuntur res non ita vulgo notas.

§. XV.

§. XV.

Igitur cum antiquissimi Librarii parum emendate Codices describerent, iique Codices postea in manus scriptorum ignarorum inciderent; quid mirum, si depravatiissimi pervenerunt in manus nostras? Cum autem inventa est Typographia, viri docti, pro illo ævo, qui ex MSS. primum typographicis litteris descripta ediderunt veterum monumenta, sæpe nimis ingenio suo indulserunt, in emendandis quæ vitiosa ipsis videbantur; unde nata in Editionibus, ex primis illis expressis, nova menda; quæ nonnisi inspectis denuo Codicibus MSS. hoc & præteritis sæculis, tolli a viris doctis potuerunt, Sed & horum multi imperitia, aut audacia nimia, qua conjecturas suas, quasi exploratas lectiones, in Veterum contextum admiserunt, eorum Scripta conspurcarunt; ne jam loquar de Typothetarum mendis, quæ vix possunt omnino vitari.

§. XVI.

II. Quot & quanta orta sint ex Librariorum aut indiligentia, aut imperitia menda satis, ut opinor, liquet ex superioribus. Hæc cum CRITICI jam olim animadverterent, hoc in se laboris susceperunt, ut exemplaria optimorum quorumque Scriptorum manu sua emendarent; cum in gratiam amicorum, tum etiam lucelli causa, quod exemplaria ab eruditissimis Grammaticis emendata majore pretio emerentur, Sed cum hi Critici non omnia æque intelligerent, nec pari omnes judicio valerent, sæpe quæ emendatione indigebant, quasi sana transvolarunt; aut contra violentas manus iis, quæ recte posita erant, adtulerunt. Quæ omnia exemplis pluribus comprobari possent.

§. XVII.

III. Sed & homines nequam; quos non Criticos vocaverim, cum Critica nequaquam uterentur, sed FALSARIOS, data opera, varia in Veterum scriptis mutaverunt, aut iis detraxerunt, vel adfuerunt, ut le-

ut legentes fallerent. Quod in antiquitatibus Ethnicis rarius contingit, in quibus operæ pretium non erat fallere; sed in Ecclesiasticorum Scriptorum antiquissimis monumentis, quæ contendentes Christiani in suas quique partes trahere conabantur, frequenter accedit.

§. XVII.

AD hæc omnia accessit VETUSTAS, qua factum ut antiquissimæ membranæ & chartæ laceræ, vel ita situ adfectæ, ut litteræ sæpe deletæ essent, ad posteros pervenerint. Hoc modo, sine culpa ulla Librariorum, Criticorum, aut Falsariorum, plurimæ lacunæ in Veterum Scriptis factæ sunt, quæ sæpe nullo ingenio expleri possunt; aut si non incommode expleantur, desiderium tamen in nobis verorum Scriptoris verborum relinquunt. Hæc omnia vir doctus longa exemplorum serie sequentibus capitibus comprobat, quæ provectiores, si licet, apud ipsum potius legant.

C A P. VII.

Quod veteres quum Librarii, tum Critici, alique impostores, libros aut depravare, aut supponere consueverint, & quod quædam sint indicia, quibus integri a corruptis, genuini a spuris discerni possint.

§. I.

Difficile dictu est, quot libri aut mutilati aut interpolati, aut suppositi & apud veteres, & medio ævo, & postremis tandem temporibus ad nos devenerint. Qui in Criticorum libris minus sunt versati, dum facile credunt quidquid aut scriptum, aut typis editum extat, & integrum, & genuinum esse, nec inter noscunt quid distant æra lupinis, non possunt non in plurimos; ex aliorum autoritate dum toti pendent, errores labi. Ergo ut caute perspecteque in usu librorum versentur tirones, duo sunt hoc in loco præstanda. Primum demonstrandum est quam consuetæ fuerint quovis ævo depravationes hujusmodi & imposturæ: deinde indicia tra-

den-

denda sunt, quibus integri a corruptis, nothi a genuinis libris discerni possint.

§. II.

Superiori capite demonstratum est librorum depravationes, aut etiam suppositiones a pluribus causis manare potuisse. Nunc paucis ostendam id revera factum esse. Galenus (a) sic scribit: *antequam reges, qui erant Alexandria & Pergami de possessione veterum librorum studiose contenderent, nondum ullum falso inscribebatur opus. Sed postquam præmium accipere cœpissent qui antiqui alicujus hominis scripta iis afferebant, sic demum MULTA FALSA INSCRIBENTES* adportabant. Idem Galenus alibi (b): *temporibus Attallicorum Regum qui de acquisitione librorum inter se contendebant, cœpit fraus circa inscriptiones & dispositiones librorum fieri ab iis, qui pecuniæ causis ferebant ad reges virorum illustrium scripta.* Nec putandum est hoc demum tempore fraudes istas fieri cœptas: nam sæpe idem factitatum ab antiquioribus, plurimis exemplis probat Johannes Vovverius in Polymathia cap. xvi. Sane Ammonius in Categoriis Aristotelis testatur tempore Ptolomæi Philadelphi plurimos libros Aristoteli suppositos, quod eos carius emeret Princeps ille. Diogenes Laertius lib. 11. §. 60. scribit Æschinem a Menedemo Eretriensi accusatum *quasi complures dialogos qui Socratis essent, a Xanthippo acceptos pro suis supposuisset.* Quid plura? quot vulgarunt Egyptii libros sub nomine Mercurii? quot supposuerunt Zoroastri Chaldæi? quot Orpheo Traces? Latinis ipsis, quamvis rigidioribus, idem factitatum probat Clericus (c). Quod vero diximus de suppositione librorum, idem, & majus etiam intelligendum est de mutilatione, interpolatione, depravatione.

§. III.

IN primis Christianismi seculis easdem fraudes factas passim quærentur Ecclesiæ Patres. Ajunt hæreticos

ut

(a) Galenus comm: I. in Hippocratem de natura hominis ad textum 42.

(b) Idem præfatione comm: II.

(c) In art. Crit: tom. II. p. Sect: III. 2. cap. I.

ut somniis suis auctoritatem conciliarent, libros, quibus ea in vulgus profeminabant, celeberrimi cujunque Ecclesiæ doctoris, inimo & Apostolorum ipsorum nominibus inscribere aulos esse. Anphilochius Episcopus Iconii de suppositiis hujusmodi libris commentarium inscripserat, qui temporum injuria periit (a). Hieronymus in lib. de Scriptoribus Ecclesiasticis passim varia scripta Apocrypha Apostolorum, & eorum qui proxime iis successerunt, veluti Petri, Clementis, Barnabæ & aliorum nomina præferentia, notat. Eodem loco habentur a VII. Synodo Evangelium secundum Thomam, & Epistola Pauli ad Laodicensēs. Quod si pessimi nebulones isti de nominibus Apostolorum sic luserunt, quod licentiæ non proruperunt in Patres? Patres ipsi eade re vehementissime lamentantur, ut in Synodo V.; Leontius in Bibliotheca Patrum tom. IV. p. 2. Patres in Synodo VI. act. 3., & ut cetera mittam, passim in comitiis Tridentinis. Queritur Hieronymus lib. II: Apologiæ contra Rufinum epistolam suo nomine scriptam, in qua plurima autor mentiatur. Queritur Gregorius M. epistolarum lib. X. epistola 69. Sermones aliquos suo nomine præscriptos ab Andrea Græco Monacho. Sed libeat exscribere Sixti Senensis viri doctissimi locum ex præfatione in Bibliot. in quod de Librariis sui temporis queritur. Librarii nihil, inquit, præter quæstum arte sua quærentes, novos quotidie librorum sætus emittunt adulterinos, supposititios, Pseudepigraphos, & nothos, præpositis absque ullo judicio & pudore in frontispiciis operum, quo ipsa & carius & citius vendant falsis autorum inscriptionibus. Hoc sane artificio supposuerunt nobis inter multos spurios partus quæstiones in Genesim Philonis Judæi, quæstiones Justinii philosophi, & Martyris ad gentes; quæstiones D. Athanasii ad Antiochum, Origenis paraphrasim in Job &c. Res infiniti esset operis suppositiones librorum enumerare, quas aut Librariorum avaritia vel inscitia; aut contendentium studia fecerunt. Sat est tirones præmonuisse.

§. IV.

(a) *Laudatur in Concilio VII. Oecumenico act. III. tom. 3. veteris editionis.*

§. IV.

JAm quis dixerit quot mendacia veteribus adsuta sint, aut ab indoctis Librariis, qui ut scribebat Hieronymus, *non quod inveniunt, sed quod intelligunt scribunt*, (a) aut a falsariis dolo malo ut haberent unde dogmata sua confirmarent, aut ab aliis causis, de quibus in superiori capite dictum est? Id monendi sunt, qui aliorum autoritate uti amant, operosum esse plerumque genuina scripta a spuriiis discernere: sed & postquam se creveris, multo adhuc difficilius ea discernere, quæ sunt ab autore ipso scripta, ab aliunde adsutis & infartis, aut quæ vel tempus delevit, vel addidit. At id necessarium scitu est, ut possis adsequi quæ vera, & genuina fuerit autorum ipsorum sententia.

§. V.

ERgo videamus quibus indiciis genuini libri a spuriiis, integri a corruptis, aut mutilatis, vel interpolatis discerni possint. Plurimas ea in re Critici præscripserunt regulas. Prima est, *suppositi libri indicium est, si in vetustis codicibus alii tribuatur auctori, quum nulla ratio sit, cur ejus non habeatur, cujus nomen apud antiquos codices præfert: interpolati vero libri argumentum est, si in veteribus codicibus aliquid desit, quod reperitur in novis: mutilati tandem libri indicium est, si aliquid in vetustis codicibus sit, quod deest in novis*. Ejus canonis hæc est ratio, quod genuinitatis & integritatis libri alicujus nullum sit aliud argumentum, præterquam judicium antiquitatis ab ipso Scriptoris ævo per aliquot secula sibi constans (b). Sane quemadmodum in vetustis historiis perpendendis antiquos historicos & cœvos, rei que gnaros, recentioribus præferimus; ita dum de genuinitate, & integritate libri disputatur, ubi nulla est alia ratio, quæ nos valeat remorari, merito antiquos recentibus codicibus anteponimus.

§. VI.

(a) Hieron. Epist. XXVIII. ad Lucin.

(b) Consule Huetium sub initium Dem. Evang.

§. VI.

Secunda regula est: Si quæ a veteribus ex libro aliquo olim prolata sunt, ea nunc in libro eadem inscriptione insignito desiderantur, aut alius est, aut mutilus: si vero aliter legantur, suspectus sit oportet: si omnia inveniuntur eadem, genuinus est liber & integer, nisi alia subsint dubitandi rationes.

§. VII.

Tertia regula: scripta, quorum nulla mentio in veteribus catalogis, quæque memorata non sunt ab ullo Scriptore proxime sequentium seculorum, ut plurimum, aut ficta sunt judicanda, aut suspecta habenda, nisi alia sit ratio in contrarium. Sed hæc regula fallit in Phedro, & Curtio in Latinis Scriptoribus: quocirca caute est adhibenda: nititur enim argumento negativo, ut vocant, cujus non semper eadem est vis, ut in sequente libro explicitum erit.

§. VIII.

Quarta regula: quæ diserte sunt rejecta, aut indubium revocata ab antiquioribus, ea admitti nequeunt ut genuina propter auctoritatem recentiorum, nisi rationes gravissimæ nos commoveant. Scilicet iis qui propiores fuerunt ætatis scriptorum notiores esse debuerunt eorum genuini fœtus, quam iis qui serius nati sunt: nam quo serius nascimur, eo tenuior rerum præteritarum notitia ad nos pervenit.

§. IX.

Quinta regula: liber in quo dogmata leguntur iis contraria, quæ scriptor, cujus nomen præfert, constanter defendit, præsertim si dogmata videantur esse alicujus momenti, aut spurius est, aut interpolatus. Sed & hæc regula magna cum cautione adhibenda est: potuit enim autor doctior factus, alia scribere, nec interim priorum recordari, quod omnibus qui plura scribunt passim contingit. Potuit esse paullo scepticissimo addictior, adeoque in diversis locis diversa tueri dogmata, quod præter alios, Platonem, & Ciceronem egisse apud veteres, apud recentiores Petrum Bælium, scimus.

§. X.

§. X.

Regula sexta: *Liber in quo memorantur aut persone autore, cui tribuitur recentiores, aut nomina recentiora, aut recentiora facta, vel spurius est, vel interpolatus.* Sed quoniam fieri potuit ut adnotationes e margine in textum irreperierint, magno cum iudicio hæc regula utendum est. Nimirum fingamus Grammaticum, dum libros Ciceronis de Oratore legit, ad codicis marginem Quintiliani aut nomen, aut dicta quædam adnotare, quæ deinde imperitus Librarius tamquam omissa textui adsuat; non idcirco statim censoria virga e germanis Tullii libris isti de Oratore abstrahendi sunt, licet sint illi casu quodam interpolati.

§. XI.

Regula septima: *Liber indoctus aut imperitia refertus, non potest ulla ex parte, aut saltem totus viro docto tribui, nec liber fabulis scatens viro non inepto affigi, quamvis in vetustis codicibus ejus nomen præferat.* Hoc argumento commentarios Servii in Virgilium, & Donati in Terentium viri eruditi interpolatos putant, quod multa frigida, futilia, & viris illis indigna contineant; Eodem argumento quum alios libros, tum potissimum *Sermones ad fratres in eremo* Augustino abjudicant: nam quis ferat virum doctum inter ceteras fabulas narrare, se, quum esset Episcopus Hypponenſis, Æthiopiam petiisse, ibique uoculos Centauros, & alia id genus portentosa oculis suis vidisse?

§. XII.

Regula octava; *Liber in quo tractantur, vel respiciuntur controversiæ natæ post tempora Scriptoris cui tribuitur, aut in quo deprehenditur Scriptoris recentioris imitatio, aut spurius est, aut interpolatus.* Hoc argumento Critic. negant Symbolum Athanasianum esse B. Athanasii: quippe in quo, præter cetera, Nestorianam & Eutychianam hæreses post Athanasium ortas, aperte autor spectat.

§. XIII.

Regula nona: Si *stylus sit diversus a noto aut Scriptoris cui tribuitur, aut seculi in quo ille vixit, spurius est. Si vero idem sit stylus cum stylo alterius Scriptoris, ejus potius censeri debet, si nihil aliud obftet.*

§. XIV.

Regula decima: *Vocabula sequioris ævi indicant Scriptorem recentiorem, vel libri interpolationem: in translatione vero si nihil sit, quod sapiat linguam, qua scripsisse constat autorem, cui tribuitur, translatio non est. Plurimis exemplis regulas istas confirmat idem Clericus in art. Crit.*

C A P. VIII.

De Arte Hermeneutica.

§. I.

CAnones auctoritatem spectantes, quos in superioribus capitibus tradidimus, inutiles futuri sunt, nisi doceamus, qua ratione autorum libri interpretandi sint. Eam ob rem comparata est ars *hermeneutica*, id est ars aliorum verba rite intelligendi. Sed hæc ars paucis constat canonibus. Ii partim externa spectant, partim interna. Ad primam classem pertinent sequentes.

§. II.

I. Qui librum aliquem est interpretaturus, *originalem linguam, in qua est scriptus, ita callere debet, ut non magis calleat aprugnum callum.*

Ejus regulæ ratio est, quod versiones nec sunt ullæ perfectæ, id est quæ autoris mentem plene exhibeant, nec fieri ullo modo possunt perfectæ, quemadmodum plurimis demonstrat vir doctus Riccardus Simonius in hist. Crit. V. T. Nam I. linguæ sibi adaptatæ non respondent: II. linguarum idiotismi, nativi colores, venerationes, emphases, ver-

verti in alienam nequeunt: III. quí libros vertunt vocabula ut plurimum accipiunt aut ex relatione ad objecta, aut ex relatione ad proprias notiones, quod æque interpretandi legibus adverſatur, ut in ſecundo libro monuimus.

§. III.

II. **C**urandum eſt, ut autorum, quos interpretamur, codices habeamus quam emendatiſſimos.

Ejus ratio eſt quod interpolati codices, mutilati, depravati, aut prohibent quominus autoris mentem adſequamur, aut cauſa eſſe poſſunt, cur ſententias non ſuas illi tribuamus.

§. IV.

III. **N**eceſſe eſt ut Scriptoris ætatem, patriam, mores, profeſſionem, religionem ſciamus: ex his enim facillime ejus mentem penetramus. Nempe Scriptores paſſim ſpectant in ſcriptis ſuis opiniones, aut mores ætatis, vel patriæ ſuæ: paſſim ideas ſuas incruſtant colore profeſſionis, aut religionis ſuæ. Ex moribus plerumque ſuis aut opinionibus aliena metiuntur.

§. V.

IV. **D**iſcendæ ſunt antiquitates, & mores gentis ex qua Scriptor ille eſt: difficile enim eſt ut Scriptor opinionum, aut morum gentis ſuæ colore ſcripta ſua non inficiat. Quocirca deridiculi ii mihi videntur qui Hebraicarum, Græcarum, Latinarum antiquitatum ignari ad libros Hebræorum, Græcorum, aut Latinorum interpretandos aggrediuntur, ſola Grammatica, & Lexicis contenti, in quo miſere hallucinantur ipſi, decipiunt alios.

§. VI.

V. **P**ræterea ſpectandus eſt finis Scriptoris: nam alia ratione interpretandus eſt Philoſophus, alia Orator, alia Poeta, quandoquidem non unus omnium eſt ſcribendi finis. Oratores, & poetæ aut delectant, aut popularia ſectantur, plerumque contra quod ſibi perſuaſerunt:

runt: quocirca *verum Poeticum, & verum Oratorium* quum popularia sint vera, idest popularia præjudicia, minus sunt quandoque *vera philosophica*. At Philosophi finis una est veritas. Quamobrem nisi constat Poeticum in morem ludere voluisse Philosophum, severius interpretandus est. Hæc eadem regula tenenda est in legendis primorum Christianæ religionis Theologorum libris. Nempe Patres illi non eodem modo loquebantur in Homiliis ad populum, in quibus quædam aut subtricebant, aut obscure explicabant, ne in corruptas & profanas Gentilissimi aures abirent; & in libris dogmaticis, aut in Epistolis familiaribus ad viros eruditos datis, quod Hieronimus ad Pammachium diserte observat.

§. VII.

ATque hæc sunt præcipuæ regulæ interpretandi, earum, quæ externa spectant. Veniamus nunc ad ea, quæ cuique libro sunt interna. Ad hæc quod spectat, prima regula est, *verba cum naturali sensu accipito, nisi certa subsit ratio a sensu literali recedendi: naturalis porro verborum sensus is esto, quem primum verba nacta sunt & cui translatus opponitur*. Ex hac regula iterum admone-mur, ut linguarum quibus Scriptores usi sunt, peritiam nobis comparemus, singulorumque linguarum vocabulorum proprietatem studiose investigemus: alioquin naturalem verborum sensum nulla ope adsequi speremus. Rationes autem quæ nos cogunt a sensu proprio discedere, plurimæ esse possunt, sed duæ illæ potissimum, quum alioquin Scriptor aut nullum referret sensum, aut eum referret, qui instituto suo repugnat: adde aut quum eum referret, qui manifesto absurdus est, quique viro non prorsus inepto tribui nequit.

§. VIII.

ALtera regula est, *loci obscuri per alios clariores interpretentur*. Ut hæc regula rite observetur, duo primum sunt curanda. I. paucis comprehendendum est totum auctoris systema, & in tabulis synopticis distribuendum,

dum, ut uno quasi oculo perspicui possit. II. Lexicon proprium ejus libri conficiendum est. Ita facillime sententiæ cum sententiis, verba cum verbis conferentur. Sed hac de re alias dictum est.

§. IX.

Tertia regula **PROPOSITIONUM**: *subjectu & predi-
cata diligenter investigantor, & accurate examinantor:*
quippe enim ex notionibus subjectorum notiones prædi-
catorum intelliguntur, & vicissim. Vocabulum *ruab* ex.g.
Spiritus in libris Hebreis novem aut decem habet notiones
diversas, quæ nunquam intelliguntur, nisi attributa dili-
genter fuerint pervestigata. Vocabulum *θεος* apud Græcos
& *Deum supremum*, & *Dæmonas*, & *Heroes*, & res uti-
les, aut in genere suo præstantes significat: ex attribu-
tis ergo ejus eruenda notio Eg. retulit Clemens Alex. in
strom. Apud Ægyptios ventris crepitus *θεος* haberi, qui
interpretatur Deos, quum potius sanitati utiles interpre-
tari debebat, ne lapide silice stultiores Ægyptios fuisse di-
cere cogamur. Pauca sunt in omnibus linguis vocabula,
quæ unam simplicemque habent notionem. Ergo eorum
notiones ex attributis sunt pervestigandæ. Hæc regula
longe est utilissima.

§. X.

Quarta regula: *nisi rite legamus, fieri vix potest ut
recte interpretemur. Rite autem legemus. I. Si
eos primum legamus libros, qui faciem aliis præferunt.
II. Si librum sine interjectis moris, sed continenter lega-
mus: qui enim interrupte legunt, nec memoria tenent,
quæ legerunt, nec inter se conferre possunt: ex quo fit,
ut quæ legunt, non intelligant. III. Si tantum legeri-
mus, quantum ferre memoria poterit nostra: opprimunt
enim animi vires aut multa, aut multijuga lectio. IV. Si
quæ legimus ruminaverimus: ita enim & memoria cor-
roboratur, & res cum rebus, verba cum verbis facilius
conferentur. V. Si virorum perspicacium & eruditorum*

adnotationes, aut commentarios consuluerimus: plurima enim sunt ad quæ non facile advertunt homines animum, nisi ab aliis fuerint excitati.

§. XI.

QUærit aliquis, quandonam locus aliquis censendus sit obscurus, & quid quum est obscurus faciendum interpreti. Respondeo primum, nullum ullius libri locum censendum esse obscurum, quod ejus sententia idiotæ, aut rei, de qua agit, imperito, non satis pateat: alioquin nihil unquam clare scriptum fuerit. Deinde nec judicio tantum nostro de obscuritate libri judicandum, si plurimis aliis viris doctis censeatur clarus. Liber ergo, aut libri locus aliquis obscurus censendus est, quum. I. Viri doctiores, & rei, de qua agit, periti, obscurum habent. Aut. II. quum, etsi id disertè non fatentur, opera ipsa fatentur, quum nimirum in ejus interpretatione in diversa abeunt.

§. XII.

QUod si constat obscurum esse librum, aut libri locum, tum his regulis utatur interpretes. I. Omnes posibles notiones, quas verbis autor dare potuit, rimeatur. II. Si gravissimis rationibus constet ex omnibus possibiliibus notionibus, v. g. A. B. C. D. E. Solam A. dedisse verbis Autorem, ceteræ rejicientur: vel si gravissimis notionibus B. C. D. E. rejiciantur, A notio erit verborum. III. Si gravissimæ hujusmodi rationes desint, probabiles investigantur: Sed interpretatio habeatur probabilis, non certa. IV. Eam eligat notionem, quæ fini & doctrinæ autoris magis est consuetanea. V. Quum omnes sunt æque probabiles, nihil certo definiatur, sed deferatur locus, tanquam qui minime sit intelligibilis.

ARTIS LOGICOCRITICÆ

LIBER V.

De usu ratiocinii, & de methodo.



EX omnibus Logicæ præceptis, quæ postremo hoc Elementorum nostrorum libro continentur, omnium sunt utilissima, omniumque maxime scitu necessaria: agendum est enim de mentis capacitate dimetienda, & augenda, atque de vi ratiocinii: tum canones tradendi, quibus ratiocinandi vis & formetur, & regatur, & quam maxime fieri longius potest, provehatur. Totius ergo *artis philosophandi* nervus esse debet hic liber. Quocirca in hoc perdiscendo toti esse tirones occupati debent, & tamdiu in eo se exercere, quoad eos, quantum proficiant, non pœnitebit. Quamquam haud scio an cito pœniteat. Nam quum in hoc potissimum libro coagmentando atque ornando curas omnes destinasssem, id quod vix pertimescebam, gravissimo pectoris dolore laborare occœpi: ita omnis non scriptio modo, sed lectio quoque se vere vetita. Hinc quæ omnium maxime pertractate facta esse debuerunt, paulo sunt negligentius edita, ita nempe ut auditoribus dictare consueveram.

CAP. I.

De dimetienda & augenda Capacitate mentis.

§. I.

Mentem nostram re extra se positas sola *idearum* ope percipere, in compertis habemus: non enim aut *res ipsæ* mentem lubire, aut mens *res* invisere potest. Tota erga mentis nostræ cognitio *nuda* *mero*, & *varietate idearum* unice continetur, nec ideis nostris latius patere potest. Judicia ergo nostra,

opiniones, conjecturæ *primario* non res extra mentem positas, sed ideas spectant, seu, si ita loqui licet, ad *mundum intelligibilem* pertinent non ad *realem*. At quia in ea sumus *naturali* opinione, ideas nostras, saltem *adventitias*, *mundum realem* referre; inde nascitur hæc in nobis confidentia, ut quæcumque judicavimus, aut conclusimus de *ideis*; de rebus ipsis conclusa & judicata habeamus: in quo errare longe possumus, ut alibi est dictum. Sed de his paulo post commodius.

§. II.

Nunc illud explicandum, quid in hoc idearum campo excolendo efficit mens. Egit ea de re accurate Lockius & copiose (a). Nos in pauca ejus doctrinam conferemus. Tota mentis occupatio circa ideas in hoc est posita, ut *idearum aut convenientiam, aut repugnantiam vestiget*, & *intueatur*. Si duarum aut plurium idearum *convenientiam*, vel *repugnantiam* clare & distincte intuetur, tum hæc cognitio *scientia* vocatur; at si cæcutit, hæret, tentat, nec cernit; tum aut *dubia* est, aut *opinatur*; aut, si eam *convenientiam*, vel *repugnantiam* ex alterius autoritate sibi persuadet, quamquam ipsa nihil videt, *credit*. Putat autem laudatus Autor operationes mentis circa *convenientiam*, aut *disconvenientiam* in his quatuor consistere. I. In perspicienda idearum *identitate*, & *distinctione*. II. *Relatione*. III. *Coexistentia*, aut *necessaria connexione*. IV. *Existencia reali*.

§. III.

Quod spectat ad primum, dum ideam aliquam percipio, id primum mihi vel invitus conscius sum, *ideam illam esse id quod est, nihil aliud, duasque aut tres, quas intueor, ideas, esse duas potius, aut tres, quam unam*. Percipio ideam *trianguli*, statim sum conscius, *trianguli ideam esse, & non posse aliud esse, &* *distinctam esse ab idea quadraticeirculi, Coni, Cilindri*, saltem nisi ideæ, quas percipio, tam sint confusæ, ut distinguere nulla ope valeam. Hinc nascuntur duo illa, *Quidquid est, est: & impossibile est idem simul esse & non esse*.

§. IV.

(a) Lib. IV. cap. 1. & seqq.

§. IV.

DEinde hanc habet mens nostra facultatem, ut duarum idearum *relationem* perspicere possit: Nempe convenient inter se, nec ne, & quousque: Similes ne sint, an diversæ, & quatenus: altera ex altera pendeat, & quam ob rem: quæ quamque sequatur, quæ antecedit. Atque hoc proprie est, quod mentem nostram facit *rationalem*. Nisi enim hanc idearum relationem intueri possemus, nec *judicare* ullo modo, nec *retiocinari* possemus: unicam haberemus *perceptionem* simplicem.

§. V.

PRæterea percipit intellectus noster idearum quandam *coexistentiam*, & connexionem, quasi in unum coëuntium subjectum. Ita concipimus ideas *extensionis*, *soliditatis*, *divisibilitatis*, *figuræ*, *mobilitatis* in unam quasi rem coire, efficereque id, quod nos *corpus* vocamus. Sane non aliud sunt in mente nostra *res corporeæ*, nisi simplicium quarundam idearum *coexistentia* & *copulatio*. Res ipsas incorporeas eundem in modum percipimus. Deus enim nobis est *connexio* quædam & *coexistentia* idearum mentis *intelligentissimæ*, *æternæ*, *potentissimæ*, *optimæ*. Ex perceptione hujus coexistentiæ idearum nascuntur idæ substantiarum, idest *eorum subjectorum* in quibus *coexistere* idearum objecta putamus. Quum autem hujusmodi subjecta ut plurimum sint *ipse coexistentes idæ*; fit ex hac cogitandi ratione, ut *subjecta*, seu *substantiæ imaginariæ* evadant *reales*, & de iis, tanquam de *existentibus* magna animorum consensione disputetur.

§. VI.

TAndem percipit mens nostra *existentiam realem rei alicujus*, quam exhibet idea. Exhibet idea *extensionem*: cogitamus de *extensione aliqua existente*. Percipit *soliditatem*: cogitamus de *existente soliditate*: cetera eundem in modum. Sed de hac *realitate* paulo post.

Atqui hoc agit intellectus in *mundo idearum*: earum scili-

scilicet aut *identitatem*, vel *diversitatem*, aut *relationes*; aut *coexistentiam*: aut *objectorum existentiam* realem percipit. Hinc nascitur tota hominis *Scientia*, & *Sapientia*: quæ, ut patet, posita est in *Memoria* idearum; & *facilitate* ideas, earumque *convenientiam*, aut *repugnantiam* percipiendi. Quotuplex hæc sic scientia, alibi est explicatum. Nascitur hinc etiam multiplex animi *status* circa *veritates*, de quo eodem in loco disseruimus. Illud superest, ut ex his mentis magnitudinem dimetiri, & augere discamus, in quo laborare debet philosophia. Quanquam *philosophia* tota quanta quanta est, nihil est aliud, quam continuatum studium mentis capacitatem, & perspicacitatem augendi, scientiæque omnes symbolam hanc in rem suam conferunt. Sed faciendum est peculiariter.

§. VII.

ITaque ex his, quæ dicta sunt, mentis *capacitas* & *magnitudo*, ut ut minus fortassis exacte, dimetiri potest. Ea ex quatuor pendet. I. *Memoria*, seu idearum numero. II. *Judicii facilitate* & *soliditate*. III. *Ratiocinii extensione*, *facilitate*, *velocitate*, *claritate*. IV. *Realitate cognitionum*. Quo hæc majora & perfectiora fuerint, major erit & perfectior mens. Quæ mentes hæc habebunt æqualia, erunt magnitudine æquales: quæ varia, inæquales, aut in simplici unius ratione, aut in composita plurium, si hoc in loco Geometrarum loquendi formalis uti licet.

§. VIII.

ET memoria quidem primum est omnis humanæ eruditionis veluti fulcrum: vulgatum enim est & verum, *tantum scimus quantum memoria tenemus*. Sed est duplex memoria, quemadmodum Ciceroni observatum est, *rerum* nempe & *verborum*: hæc servilis est, dominaturque potissimum in iis, qui perspicacitate parum valent; a corporis enim temperie pendet: illa nobilior est, eorumque est propria, qui mentis acumine plurimum valent, animunque rebus magnis in-

intentum habent. Et quidem ad mentis præstantiam & magnitudinem quod adinet, tanto est rerum memoria præstantior, quanto est corpore ipso. Spiritus nobilior. Memoriam naturæ esse dotem vulgo dici solet, quod ita intelligendum est, ut a cerebri temperie plurimum pendeat. At quum memoria sit habitus animi simul & corporis, ut alibi demonstro (a); habitusque omnes fiant excolendo, idest exercitatione continuata; peripicuum, est, aut nullam esse artem efficiendæ memoriæ, aut hanc esse solam exercitationem, quod quotidianis experimentis comprobari posset, nisi esset supervacaneum. Quicumque ergo memoriam magnam efficere conantur, ii continua exercitatione eam excolant oportet. Posita est autem hujusmodi exercitatio in his, ut. I. Res, quas discimus, vividis sub initium ideis nobis exhibere conemur, quod fiet si attentione audiamus aut legamus, si ejus rei sciendæ desiderio summo flagremus, si cum iis ideis aliqua voluptas aut dolor in nobis excitetur, si corporeis imaginibus eas nobis exhibeamus (b). II. Ut quæ didicimus meditemur, revocemusque ad animum quam sæpius fieri potest. Huc pertinent decantati Pythagoræ versiculi.

Nec festa in dulcem declines lumina somnum,

Quin ter cuncta prius repetiveris acta diei.

Huc illud Senecæ ad Lucilium, quum multa percurreris, unum excerpe, quod illo die concoquas. III. Ut aut literis, aut aliis symbolis, cogitata, aut accepta, vel lecta, describamus, eaque subinde relegamus.

s. IX.

QUoniam experientia docuit, eos, qui in excolenda verborum memoria sunt nimii, infelices ut plurimum esse in memoria rerum, idest longiorem cogitationum seriem percipere non posse: e contrario destitui plerumque verborum memoria, qui nobilissima hac & præstantissima memoria rerum cotti sunt; eam ob rem in hac

(a) In Poster. Metaph. parte.

(b) Vide Malebranch. l.vi. de inq. ver. cap. 2.3. & 4. ubi copiose admodum & docte de excitanda attentione differit.

hac excolenda majores curas impendat Philosophus, Majores dixi, non omnes; nam & memoria aliqua verborum philosopho necessaria est, non ut loquatur, nam *breve prævisam rem verba non invita sequuntur*, sed ut discat, aut doceat: plurimæ enim quæstiones a vocabulorum studio pendent, uti ex superiore libro patet. Quod si quis talis est, ut nequeat & linguarum simul, & rerum Scientiam ferre, is, si alterutra deferenda est, linguarum deserat, quam rerum, studia: nam in his propriæ mentis præstantia, & magnitudo posita est; & cui ea, quæ a memoria est magnitudo, longe est inferior: *memoria*, inquit apposite Malebranchius (lib. vi. de inq. verit., cap. i.) *opinionum, judiciorumque aliorum non tam scientia est, quam historia: vera Scientia est quæ eam menti humanæ præstare perfectionem potest, cujus est illa capax, tanta scilicet esse mentis perspicacitate & facilitate præditum, ut possis de rebus omnibus, quæ captum humanum non omnino excedunt, perspicere judicare.*

S. X.

Accedit præstantia illa, quæ ex judicandi facilitate, claritate, & soliditate nascitur, quæ ut est in paucis, ita nequit non haberi excellentissima animi humani *dos*. *Facilitatem* judicandi dico eam, qua idearum relationes acute & facile perspicimus, qualis exg. est quam habent exercitatissimi Mathematici, ut proportionum figurarum aut numerorum cernant, & qua in axiomatum scientia quilibet gaudet. Sed nequit haberi facilitas sine judiciorum *claritate*: qui enim sunt mente subobscuri, paulo sunt etiam in judicando impeditiores. *Soliditatem* appello *selectum universalium axiomatum*, non quorumvis, sed eorum, ex quibus scientia non umbratilis & curiosa, sed necessaria & utilis progignitur, qualia sunt axiomata quibus hominum vita, ejusque tranquillitas continetur: axiomata, ex quibus scientia Dei, vel universi manat. Ex hoc autem loco ita discerni potest mentis alicujus magnitudo, ut ea dicatur major cujus judicia

dicia fuerint & *plura*, & *solidiora*, & *facilius facta*, & *clarius*. Ex quo discerni quoque potest, quid intersit inter mentem *solidam*, *facilem*, *claram*; & *superficiariam*, *ineptam*, *morosam*, *dubiis implicitam*. Acquiruntur autem hæc iudicii dotes. I. Lectione optimorum librorum, auctorum nempe emunctæ naris. II. Exercitatione rerum difficillimarum & utilium: III. Perpetuis disputationibus cum iis, qui mente & iudicio valent. Scholastici ob tertium hoc postulatum mentis acquisiverunt facilitatem, & perspicacitatem: sed quum exercerentur in rebus aut ignotis, aut ineptis, nullius emolumenti iis facilitas illa fuit: idcirco ineptissima evasit sophistice. Geometræ idem exercitium in rebus claris, & utilibus exercuerunt, acquisiveruntque eandem mentis facilitatem, sed *claram*, & *solidam*. Idem usu venit iis, qui eos legunt libros, qui mente & iudicio valuerunt, quorum librorum numerus hoc nostro ævo ingens est.

§. XI.

JAm vero efficitur mens magna & quidem vera magnitudine, *ratiocinii extensione*, *facilitate*, *velocitate* et *claritate*. Est ratiocinium, ut alias dictum, perceptio congruentiæ, aut repugnantæ seriei alicujus iudiciorum longiusculæ. Ratiocinium commendant. 1. *extensio*. 2. *facilitas* & *velocitas*. 3. & *claritas*. Ergo ex mentes, quæ longiorem iudiciorum seriem intueri valent immota attentione, majores habendæ sunt. Majores quoque sunt mentes, quæ facilius, velocius, & clarius ratiocinantur. Facilitas exercitatione acquiritur disciplinarum intellectualium, quales mathematicæ potissimum. Claritas pendet a vivacitate memoriæ: adeoque aut naturalis est, aut exercitio acquisita. De vi ratiocinii, atque ratiocinii regendi atque promovendi regulis, interius.

§. XII.

TAndem mens est magna *cognitionum realitate*. Cartesiani duas in ideis *realitates* distinguere solent, *formalem*, & *objectivam*, ita enim vocant. *Formalis realitas*

Itas vocatur *ipsum esse ideæ representativum*, idest quo *idea* est *idea*, nempe simulacrum, imago: *Objectiva* *realitas* est *objectum ipsum prout in idea exhibetur*. *Paucis, realitas formalis* est ipsa *idea*, quatenus *forma rei* cuiuspiam est, *objectiva* id quod *idea* representat, prout in ipsa exhibetur *idea*. Hæc duo longe distant, prout *idearum genera* distant: nam in *ideis phantasticis & abstractis objectiva*, & *formalis realitates una eademque sunt*, veluti in *ideis Circuli, Quadrati, Centauri, Chimææ*, similibus: in his tanta est *objectiva realitas*, quanta *formalis*. Contra vero in *ideis adventitiis*, aut *factis* quidem, sed quæ ad *objecta externa* referuntur, *realitas objectiva* sunt ipsa *externa objecta*, prout illa exhibent *ideæ*.

S. XIII.

SI quis infinitum haberet *idearum numerum*, sed *ex essent omnes phantasticæ*, atque *confictæ*, atque *nulla alia exhiberent objecta præter ipsas ideas*: tantæ quoque esset *mentis agilitatis*, & *dexteritatis*, ut valeret eas inter se se conferre, in iisque *velocissime*, & *longissime* *rationcinari*, esset is quidem *mente præstantissimus*: at non minus inter *philosophos* censendus esset, quam inter *historicos* censeretur, qui *Romanenses omnes historias mente haberet comprehensas*, narraretque *disertissime*, *mundi interim hujus rerum ignorantissimus*. Nempe inter *homines* non is *magnitudine mentis celebratur*, qui *ingenio plurimum & phantasia potest*, quique *ingentem idearum phantasticarum numerum sibi confixit*; sed qui *realium idearum*, *res scilicet extra nos existentes referentium*, *magnum sibi penu instruxit*: qui quatenus *hujusmodi ideæ objectis suis congruunt*, aut *ab iis distant*, *didicit*: qui *ex relatione idearum istarum*, *rerum ipsarum novit relationes*: qui, dum de his *rationcinatur ideis*, *scit se*, quod de *ideis conclusit*, de *rebus ipsis conclusisse*: uno verbo, qui non tam in *intelligibili idearum mundo*, quam in *ipso versatur mundo rerum*. Hæc dicitur *realitas cognitionum*. In ea laborare *philosophus debet*. Ea quo erit major, *majorem efficiet mentem*, & *solidiorem*.

Ab

Ab ipsa infantia assuefaciendi sumus huic cognitionum realitati amandæ, atque vestigandæ. Quocirca ut qui veram amat humanarum rerum historiam confictas Romanensium fabulas non sectatur, ita qui veram optat scientiam non phantastica systemata, & hypotheses fictas, sed reales persequitur cognitiones.

§. XIV.

Dicet aliquis, non ergo utetur philosophus ad mentis magnitudinem *scientiis abstractis*, veluti Geometria, Arithmetica, Algebra, Ontologia? At id & gravissimorum hominum consiliis, & experientiæ adversatur. Malebranchius lib. vi. de inq. cap. v. totus est in Geometriæ, Arithmeticæ, & Algebrae studiis commendandis; inde capacitatem mentis augeri mirum in modum posse putat. *Mens*, inquit, *majorem acquirere realitatem nequit: tota ergo eius magnitudo in hoc est posita, ut facillime, & dextere operationes suas componat, atque ordinet. At id demum est, quod egregie Arithmetica, & Algebra præstant. Tales enim hujusmodi sunt scientiæ, ut idearum numerum & contrahant in breviorum, & ordinem efficiant simpliciorum, ita ut implicitæ ipsæ, atque obscuræ quæstiones, intelligi aut uno possint intuitu, aut haud longiori. Sed his non refragor: agilitatem & perspicaciam mentis disciplinæ istæ, ratiocinandique dexteritatem augent: compendium quoque ratiocinandi in plerisque rebus efficiunt. Ceterum, ut dixi, nisi cum his, quæ artem potius philosophandi conficiunt, quam ipsam sapientiam, realitas ipsa cognitionum conjungatur, erit mens ingenio magis & acumine, quam soliditate præstans.*

§. XV.

JAm ea molestior est objectio: quum tota scientia nostra ambitu idearum nostrarum contineatur; ignoremus vero utrum ideæ nostræ rebus ipsis conformes sint; perspicuum est, ignorare nos, utrum ulla sit cognitionibus nostris realitas, atque soliditas. Ei objectioni tum demum satis fuerit factum, quum criterium repertum fuerit, quo agnoscere certo possimus, quæ ideæ nostræ sint

sint ipsis rebus conformes. Huic difficultati hunc in modum respondet Lockius (a): esse scilicet duo idearum genera, quas esse rebus conformes simus certi. *Prima* inquit, *sunt ipsæ simplices ideæ*. Nam quandoquidem mens nostra simplices ideæ confingere sibi nequit, eæ profecto ab iis nascuntur rebus, quæ, quacumque tandem via, in mentem nostram agunt, idest a rebus ipsis, quarum sunt ideæ istæ imagines. Sed valde vereor ut hæc omnibus plana sint: nam quum externæ res non agant in animum nostrum, nisi sensuum via, quod statuit Lockius, demonstrandum ei erit, ideæ hujusmodi nullo modo in sensibus immutari, quod operosum esse video: quippe apertum est, impressiones in variis corporibus factas ab eadem causa esse posse diversas ob subjectorum diversitatem: quod argumento est, nunquam causas imprimentes perfecte exhiberi.

§. XVI.

Alterius generis ideæ, pergit ille, sunt, quas mens sibi conficit, non tanquam ullarum rerum existentium, sed tanquam possibilium, quæque sui ipsarum sunt objecta, idest in quibus realitas objectiva & formalis unum sunt idemque. Eæ temper veræ sunt & reales. Hujusmodi sunt ideæ scientiarum mathematicarum. Sed quærimus a Lockio, ut velit esse quæstionis, quam proposuit, paulo tenacior, sibi que magis consentaneus. Quærebatur enim ea soliditas, quæ posita est in congruentia idearum & rerum ipsarum existentium, non idearum & constitutarum rerum, de qua non erat valde laborandum. At enim, applicare possumus rebus ipsis mathematica. Uti que si uti theoremata mathematica a certis & evidentibus datis deducimus, res etiam ipsas naturæ a certis & evidentibus datis liceret deducere. Clarum est, omnibus mathematicis theorematis sua præstabiliri data: ea seu postuluntur, seu ex postulatis derivantur: ex his datis theoremata hujusmodi demonstrantur. Si igitur mathematicum theorema physicis rebus aptare velis, data illa evidentia habeas oportet, non quidem ex ullis postulatis,

ne

(a) Lib. IV. §. 3. & seqq.

ne physicas scientias in Romanefes convertas historias, sed ex talibus ideis, quas rebus ipsis esse conformes certus sis. Sed id quæritur, unde certus esse possis *has datorum ideas* rebus ipsis esse conformes. Non enim efficere illas conformes debes, sed reperire. Quum autem dubia sint illa data, videant mathematici, ne dum theoremata abstracta rebus naturæ aptant tam confidenter, naturæ res non quales sunt explicant; sed ut tales sint, quales volunt, efficere conentur. Res agenda est nec amore, & sine odio, quorum causas longe habeant philosophi oportet.

§. XVII.

SI hæc sunt vera, dicet fortasse aliquis, in scientiis Physicis Sceptici triumphabunt. Respondeo, rerum corporearum existentiam, talemque earum usum, quali vita indiget humana Scepticorum Sophismatibus non esse obnoxia: ea vero satis esse nobis possunt. At in plerisque naturalium phænomenorum causis explicandis, in exacte corporum viribus dimetiendis, non evaserunt Physico-mathematici Scepticismum: etsi hoc effecerunt, ut minus a veritate, quam veteres, distemus, ususque rerum habeamus faciliores: progressi longo sunt: acu rem nondum tetigerunt.

C A P. II.

De cognitionis humanæ extensione.

§. I.

PAUCIS componam, quæ hac de re Lokius 24. paginis in 4. (a) docte differit. Ex iis quæ superius dicta sunt perspicuum est, totam cognitionem nostram, idest *judicia, ratiocinationes, conjecturas, systemata scientifica*, & si quid est aliud, quod ad cognitionem nostram pertinet, unico idearum nostrarum ambitu contineri: ad ea enim, quorum nullas habemus notiones, nullo modo cognitio nostra pertingit. Prima

R

ergo

(a) *Lib. IV. cap. III.*

ergo ratio cognitionem nostram supputandi, est idearum numerus: quo hic minor est, eo arctioribus limitibus cognitio nostra continetur: latioribus, ubi fuerit major. Quumq; ideæ in nobis proveniant a *sensatione*, & *conjectura*; sequitur in iis, qui magis cum natura rerum, aut hominum versati sunt, quique magis mentem in contemplationibus exercuerunt, cognitionis extensionem esse majorem.

§. II.

Sed quamquam cognitio nostra nequit latius patere idearum ambitu, potest tamen esse arctior. Nascuntur enim cognitiones nostræ ex *idearum* comparatione: ea comparatio fit aut *intuitione*, aut *ratiocinio*. Jam *intuitio* nequit in omnibus ideis locum habere: unde fit, ut *cognitiones intuitivæ* sint admodum paucæ, ut in superiori libro adnotatum est. Ergo *cognitionis intuitivæ extensio* ad numerum idearum relata, valde est exigua. Brevitatem cognitionis intuitivæ supplet quocumque tandem modo *ratiocinium*. Ratiocinii ope inter se conferimus eas ideas, quas simplici intuitionem conferre non possumus. Fit autem id ope *mediæ* alicujus *ideæ*; ut paulo post dicitur: At ne hoc quidem modo omnes idearum relationes percipere possumus: nam deficient plerumq; *mediæ ideæ*, quarum ope id efficiamus. Ejus rei hoc exemplum profert Lockius: Ideam habemus *corporis*, & *cogitationis*; sed ob medii defectum nunquam fortassis sola ratione intelligemus, utrum duo hæc ita se mutuo destruant; ut nequeant unam eandemque efficere substantiam. Addit & hoc, intelligere nos clare, quid sit *quadratum esse circulo æquale*: sed fortasse nunquam invenietur medium, quo demonstretur, datum quadratum esse dato circulo æquale. Sane curvas in se redeuntes esse *inrestituibilis* demonstrat Newtonus.

§. III.

Quibus ex rebus patet *extensionem cognitionis* nostræ esse ut *totam capacitatem mentis*, id est non ut numerum tantum idearum, sed in *ratione*, ut inquit, *composita* numeri idearum, vivacitatis memoriæ, & facilitatis,

tis, dexteritatis, atq; perspicacitatis intellectus, seu in ratione composita *memoriæ*, *reminiscentiæ*, *perspicitatis*. Ex his enim magnitudo mentis existit, ut superius ostendimus. Et numerus quidem idearum, idest memoria, prima est velut materies cognitionis: felix reminiscentia, idest memoriæ vivacitas, promptitudinem cognitionis facit. Perspicacitas forma est indigestæ materiæ. Prima est *stupidia* sine secunda & tertia: Secunda *adesse* nequit ubi prima deficit: At tertia sine prima *inutilis* est, sine secunda *miseræ*.

§. IV.

JAm *affirmationes*, aut *negationes*, quæ ideas nostras afficiunt, & quibus cognitio nostra continetur, ad quatuor summa genera referri possunt secundum Lokium. I. *Identitatem*. II. *Coexistentiam*. III. *Relationem*. IV. *Existentiam realem*, de quibus & superiori capite quædam sunt dicta. Paucis ostendendum quatenus cognitiones nostræ, ad quatuor hæc summa genera quod spectat, pertingant. Cognitionis extensio, quod spectat ad primum genus, tam late patet, quam idearum numerus, seu: campus: nam simplici quilibet intuitione perspicit, quamlibet ideam esse id quod est, nihil aliud: tum quamlibet esse a qualibet distinctam.

§. V.

Quod adinet ad *coexistentiam*, quamquam in hoc genere plurimæ cognitiones nostræ versantur, tamen non admodum eæ latius patent. I. paucæ sunt ideæ simplices, quæ necessariam inter se habent connexionem: quocirca cognitio *necessariæ coexistentiæ* idearum arctissima est. Associationes idearum arbitrariæ, aut levibus iudiciis factæ, esse quidem possunt infinitæ pene numero, sed nec omnes possibiles perspicere possumus, nec in id laborat, qui iudicio aliquo est præditus: quippe qui associationes eas quærit, quæ *realitatem* præferunt, non quæ poeticæ sunt. III. *Sensu* quidem *substantiarum corporarum* associationes fiunt: sed quantilla est sensuum provincia? ea longe est rerum extensione & numero in-

ferior, IV. Associationes sensu factæ principia esse possunt, quorum ope alias ideas detegamus, & associemus: sed nimis caute ea in re procedendum: nam primo esse possunt ideæ hunc in modum partæ *falsæ*, idest *minus objectis conformes*: deinde hujusmodi idearum associationes possunt esse tales, ut nulla eis respondeat *realitas*. Certe hunc in modum *spiritus animales*, *materia subtilis*, *materia striata* Cartesianorum inventa sunt. Eodem modo universi substantiæ aliæ multiplicatæ. Quocirca etsi non alia adest via aut alias ideas detegendi, aut alias idearum associationes, quam via idearum, quas habemus; patet tamen non admodum tutam esse eam viam, nec nos valde interius ea via in rerum naturam penetrare. Hinc fit, ut nedum *Spirituum*, qui longe absunt a captu humano, sed ne corporum quidem cognitionem aut satis amplam, aut certam habemus.

§. VI.

CApaciores sumus secundum Lokium. cognoscendi *repugnantiam* idearum, quam *coexistentiam*. Quilibet enim dum duas simplices ideas intelligit, veluti A, & B, potior est perspicere, utrum altera alteri adversetur; quam an cum ea congruat. Sit A idea rotunditatis, B quadraturæ, nemo est tam stupidus, qui ipsa intuitione idearum A & B non intelligat, eas sibi adversari. Quamquam non æque facile est inspicere repugnantiam idearum compositarum. In eam rem medio utimur, quod *diversitatis* aut *repugnantia* dicemus, & de quo paullo post differemus: queniadmodum ut detegamus *coexistentiam* idearum compositarum, plerumque etiam simplicium, medio utimur, quod *identitatis* appellabimus. Censet præterea laudatus autor, longius progredi mentem nostram in perspicienda idearum repugnantia, quam identitate. Id extra controversiam est, esse hoc, ut dixi, quam illud, facilius, & expeditius.

§. VII.

COgnitio *relationum similitudinis*, aut *proportionis idæarum*, atque idcirco rerum cum rebus, ut est maxima

xima humanæ sapientiæ pars, ita unice est homini necessaria, ut possit aut vivere beatus, aut ad beatitudinem pergere, quæ duo sunt nobis a natura proposita. Et quidem vivimus beati, *quum animus sine perturbatione est, corpus sine dolore*. Consequimur beatitudinem, quum observaverimus *quæ a Deo sunt mandata*. Prius conantur efficere disciplinæ duæ *Ethica*, qua animus, *Medicina*, qua corpus curatur: alterum efficit *Theologia*, quæ propositas homini ad beatitudinem vias patefacit. *Ethica* continetur *cognitione relationis virtutum & tranquillitatis animi*: docet enim quousque virtutum aliquarum exercitio pacate vivere possimus; *Medicina cognitione relationis remedium & valetudinis*: *Theologia* cognitione relationis *Legum divinarum, & actionum nostrarum liberarum*. Ergo cognitio relationum & maxima est sapientiæ nostræ pars, & unice necessaria. Quæritur quousque in his cognitio nostra aucta sit; aut possit augeri. Et quidem quantum progressi sumus in *Medicina* non audeo dicere. Id certum, longe seculum nostrum vetusta in hac scientia excédere, & si, ut cœpimus, pergamus, longissime hanc disciplinam processuram certum est. Quod spectat ad *Moralem*, quo nomine & *Ethicam*, & *Theologiam* practicam complector; serio & exacto *naturæ*, & *revelationis* studio eo redacta est, ut si animo ab adfectibus depurgato judicare velimus, vix esse ullus poterit, qui tranquillitatis & beatitudinis media ignorare possit: nihil est defœcatius, nihil illis tritius. Scientia juris naturalis geometricos est a plurimis demonstrata: *Theologia moralis* ad simplicia & plana Evangelii præcepta relata, atque a tricis casuistarum extricata. Itaq; si esse beatum esset noscere beatitudinis media, nemo esset miser. Quocirca ex iis aperte patet, nulli rei tam esse mentem humanam adaptatam, quam iis idearum, rerumque relationibus cognoscendis, quæ hominem beatum efficere possunt: quumque in aliis cæcutiat, hic clare intuetur. In quo summa ergo homines Dei benignitas, & providentia suspicienda est.

§. VIII.

Pertinet ad hoc cognitionum nostrarum genus cognitio *quæ dependere effectuum a suis causis*. Hæc cognitio in quibusdam rebus necessaria est homini, in aliis utilis, in plerisque curiosa. Et quidem in iis, ubi est necessaria, vix ulla est, nisi forte inter stupidos, ignorantia. Ego saltem nec esse hanc ignorantiam ullibi video, nec, quum Deus homini provideat, esse posse mihi persuasis. Ex quo illud deduco, earum causarum, quæ ignorantur, cognitionem minime esse homini necessariam. Utilem causarum plurimarum cognitionem deesse, frustra quoque pluries tentatam, hodieque tentari, non abnuo: sed si sua esse sorte contenti homines velint, possunt & tranquille, iis etiam ignoratis, vivere. Ergo in hac parte cognitio nostra, si verum, fateri velimus, admodum est exigua, quamquam & dilatetur quotidie, & spes sit fore, ut, nisi barbarie Europa iterum silvescit, longissime provehatur. Utinam vehementiora philosophos præmia adigant!

§. IX.

Veniamus ad postremum genus. Cognitio nostra quod *ad existentiam rerum realem* tribus nititur principiis, *conscientia, sensatione, ratiocinatione*. Conscientia existentiam nostri, sensatione existentiam eorum corporum, qui sensuum nostrorum organa commovent, ratiocinatione causas phaenomenorum activas cognoscimus. Ex primo fonte cognitio existentiae nostri realis clara est & certa, sed hoc unico continetur objecto: nullam ergo habet extensionem. Sed ea sensatione paulo latius extenditur, licet præ universi immensitate, rerumque numero infinito, vix latum unguem, Paulo quoque longius progreditur via ratiocinii: ea enim causas plurimas rerum generatrices cognoscimus. Ad duo autem rerum summa genera referre possumus quaecumque existere *clare* cognoscimus, *corpora, & vires quasdam activas*: Primarum enim substantiarum ideas non habemus nisi confusas & obscuras.

§. X.

§. X.

ATque hæc demonstrant quatenus cognitio nostra extendatur. Demonstrant præterea ignorantiam nostram longe esse majorem, quam nostra est cognitio. Cujus ignorantiae tres affert idem autor causas. I. *Quod deficiant ideæ: quot enim existere putandum est, quorum nullas nec habemus, nec habere possumus ideæ?* II. *Quod plurimas ideæ comparare nequeamus, aut mediorem defectu aut defectu perspicacitatis.* III. *Quod in maiore hominum parte deficiat labor & attentio ad veritates detegendas necessaria.* Sed quæ sunt hujus loci copiose sunt in primo libro explicata.

C A P. III.

De ratiocinii natura & generibus.

§. I.

OMnis cognitio nostra, quemadmodum alias diximus, aut *simplici intuitione* acquiritur, aut *ratiocinatione*. *Simplici intuitione* intelliguntur *axiomata*: in his enim sine ulla media idea percipitur extremorum relatio. At, uti superiore capite observatum est, maxima idearum nostrarum pars sine *medio* conferri nequeunt: operatio mentis qua duæ ideæ inter se conferuntur ope *medii*, ratiocinatio appellatur. Ei semper principium aliquod aut evidens, aut certum præstituitur. Ratiocinio ergo id quærimus, quod primo intuitu non videmus. Quæ autem quærentur infinita esse possunt: sed referri possunt ad capita quædam generica: ex iis capitibus ratiocinandi diversa quoque genera nascuntur. Præcipua capita earum rerum, quæ ratiocinio quæri solent, sunt sequentia. I. Quantitatum æqualitas. II. Inæqualitas. III. Proportio. IV. Entium identitas. V. Distinctio. VI. Similitudo. VII. Dissimilitudo. VIII. Causæ. IX. Effectus. X. Existencia realis. XI. Conformitas. Plura alia statui possent. Sed ea possunt ad hæc undecim referri. In his omnibus perquirendis *ratiocinii natura* erit eadem, id-

est eadem concatenata idearum series, ita ut nullibi interrumpatur, quousque inventum sit, quod quærebatur, aut quousque progredi inquirendo mens potest: sed non iisdem principiis regentur ratiocinia omnia: inde factum est, ut Aaria distinxerimus genera.

§. II.

PRincipia autem horum ratiocinandi generum sunt sequentia.

I. Quantitatum (idest omnium rerum, quæ magnitudinem habent) æqualitas quæritur hoc principio. *Quæ eisdem sunt æqualia inter se sunt æqualia.* Signum æqualitatis est =

II. Inæqualitas hoc. *Quod uno æqualium est majus aut minus, est etiam majus aut minus altero.* Signum quantitatis majoris est >, minoris <

III. Proportionis principia plurima sunt: ea Geometræ docent. Euclides in v. & vi. Elementorum Geometriæ, aliique in Elementis suis. Itaque ratiocinationes de quantitatum proportionem, Geometria, quæ & Algebra (quæ plurimum facit in his, ratiocinandi facilitatem & compendium) ignoratis, nullo modo succedunt. Quocirca non sunt tentandæ ab iis, qui in his scientiis non sunt versati. Loquor autem non de proportionem extensionis tantum, verum etiam virium corporum, etiam mentium, Civitatum, Populorum, Exercituum, saltem quatenus calculi iniri possunt. Ut sciatur esse scientias istas & Societatibus regendis utiles. Hoc ergo in loco nihil præcipere possumus: nam paucis ea docere non possumus, plurimis non debemus.

IV. Identitatis principium esse solet. *Quæ eisdem sunt eadem inter se sunt eadem.* Identitatis signum θ .

V. Distinctionis & diversitatis quæsitum diu est a Dialecticis principium, nec tamen ullum, quod sciam, clarum, certumque statutum, ne a VVolffio quidem in Logica, quo in loco ex instituto ea de re disputat. Sed hujusmodi ratiocinationes hoc niti principio. *Non potest idem constare ex iis quæ se mutuo destruunt,*
exem-

exemplis docebo . Jam sit distinctionis & diversitatis signum fit.

VI. & VII. Similitudo , & dissimilitudo reguntur principii identitatis , & distinctionis , ut facile est demonstrare .

VIII. Causæ perquiruntur ab effectis . Hujusmodi perquisitiones his nituntur principiiis . I. *Nihil fit sine ratione sufficiente , vel ex nihilo nihil fit .* II. *Nemo dat , quod non habet , neque plusquam habet , vel , oportet ut in causa tantundem saltem sit perfectionis realis , quantum in effectu est .* III. *Si quotiescunque ponitur A existit B , quotiescunque aufertur A , aufertur B , erit A causa & B .*

IX. Effecta per causas . Hæ inquisitiones his reguntur principiiis . I. *Eædem causæ eodem producunt effectus , similes producunt similes .* II. *Causæ necessarie semper operantur secundum totas suas vires , non item liberæ .*

X. *Existencia realis iis modisquæritur , de quibus passim dictum est : aut duobus superioribus .*

XI. *Conformitas vel simplici intuitionem percipitur , vel hoc axiomate nititur , Quæ eidem sunt conformia , inter se sunt conformia ; difformitas hoc si A non est conforme B , B conforme C , A non est conforme C .*

Hæc per summa capita tetigimus : nam quicumque artem ratiocinandi rerum ipsarum scientia consequuti sunt , ii plurima alia ratiocinandi his in rebus media adesse intelligent , quæ in locos communes frustra Logicus referat : ipsa enim exercitatione & doctrina perdiscenda sunt . Interim exemplis paucis & brevibus hæc tironibus faciliora sunt efficienda .

S. III.

DUæ spectant æqualitatem , inæqualitatem , proportionem usu Geometriæ docentur . Nunc generatim . Conferendæ sint duæ quantitates A . C . æquales ne eæ sint an inæquales , ignoro : adhibeo mediam B , cui si ambæ æquales erunt , vi Principii æqualitatis , concludo esse inter se æquales , hoc modo .

$$A = B :$$

$$A = B:$$

$$C = B:$$

ergo

$$A = C.$$

Quod si perquirendum sit ulterius utrum A , vel C ,
vel utrumque æquantur ipsi D , posita superiori demon-
stratione, aliud, aut alia media adhibebo, hoc modo.

$$A = B:$$

$$D = B:$$

ergo

$$A = D.$$

Jam

$$A = D:$$

(ex sup.)

$$E = D:$$

ergo

$$A = E,$$

vel adhibebimus unam seriem nullibi interruptam.

Probandum sit

$$A = H.$$

$$A = B,$$

$$B = C,$$

$$C = D,$$

$$D = E,$$

$$E = G,$$

$$G = H:$$

ergo

$$A = H:$$

§. IV.

PRobanda porro sit inæqualitas majoritatis.

$$A > B$$

$$C = B$$

ergo

$$A > C$$

Jam

$$C = D$$

ergo

$$A > D.$$

$$A < B.$$

$$C = B$$

ergo

$$A < B.$$

Sic deinceps. Eodem modo concluditur, de inæqua-
litate minoritatis. Ex g.

§. V.

PRobanda sit identitas H & M .

$$H \theta I:$$

$$K \theta I:$$

ergo

$$H \theta K.$$

Diversitas hoc modo

$$K \theta I:$$

$$H \theta I:$$

ergo

$$H \theta K.$$

Jam

Jam K θ L:ergo H θ L.Tum L θ M:ergo H θ M.Jam K θ L:ergo H θ L.tum L θ M:ergo H θ M.

Eadem exempla, substitutis similitudinis signis, quibusvis, pro similitudine aut dissimilitudine demonstranda satis esse possunt.

§. VI.

IN causis ab effectis demonstrandis, ita procedemus.

X. fit: existit ergo causa (per 1. ax.

X. Porro fit posito Z, aufertur ablato Z:

Z ergo causa τ X (per 3.)

Quod si longior sit causarum series, servabitur idem ordo.

X. fit: est ergo ejus causa aliqua

Ponatur S, ponitur X; auferatur S, aufertur X:

Ergo S causa τ X.

Jam S ponitur posito R, aufertur ablato R.

Ergo R causa τ S.

Tum R ponitur posito Z, aufertur, ablato Z.

Z. ergo causa τ R adeoque & τ S, & X.

§. VII.

Demonstranda tandem sit conformitas actionis & legis.

Actio D conformis Legi R:

C conformis ipsi D:

ergo C conformis R.

E Difformitas

D difformis R:

C conformis D:

ergo C difformis R.

Ita porro, si ulterius investigatione procedendum sit. Patet autem ex hoc exemplo syllogismos omnes negantes vi hujus principii concludere, *nequit idem constare ex iis, quæ se mutuo destruunt*; nam si C sit conformis ipsi R, quum sit etiam conformis τ D (ex minori) erit & D conformis τ R, cui (per majorem prop.)

dis-

difformis est: ergo idem D ex iis constabit quæ se mutuo destruunt.

§. VIII.

QUærit hic aliquis quanta sit certitudo, vel evidentia hujusmodi conclusionum: respondeo, si nihil peccatum sit in ipsa serie, idest in *forma*, ut loquebantur Scholastici, quanta erit evidentia vel certitudo judiciorum, ex quibus consequentia deducuntur. Si evidens est, aut certum D esse conformem R, & C esse conformem D, hæc conclusio, C conformis R, aut evidens est, aut certa: contra si priora illa judicia, & ut vocant, *premissæ*, fuerint probabilia, erunt consequentia probabilia, & quidem in ratione antecedentium. Si antecedentia dubia, dubia consequentia: si falsa, etiam falsa.

§. IX.

JAM est omnis ratiocinatio aut *directa*, aut *apogogica*, seu *indirecta*. Directe ratiocinamur, quum ex proposito principio, continuata atque connexa idearum serie veritatem detegimus, quemadmodum in exemplis superioribus. *Indirecta* autem ratiocinatio sit, quum demonstramus, nisi id sit, quod contendimus, absurdum aliquod inde nasciturum. Quæ ratiocinandi ratio validissima est: nam quum ex *vero* sequi nequeat *falsum*; conficitur falsam esse propositionem eam, quæ nostræ statutaræ thesi opponitur, quandoquidem ex ea sequitur falsum: ex quo porro nostræ veritas deducitur: quoniam falso nonnisi verum opponitur. Hujusmodi ratiocinationum apogogicarum plurima habes apud Euclidem exempla, veluti in prop. VI. VII. VIII. XIX. XXV. & alibi libri primæ. Passim quoque in aliis libris. Quoniam autem hæc demonstrationes minus mentem illuminant, quemadmodum perspecte observat auctor *Artis cogitandi*; tum est ad eas confugiendum, quum directe deficiunt. Sed tum rite concludunt, quum inter agentem, & negantem propositionem medium non est. Ex. g. Statuatur $A = B$, & $X < B$, dico X esse $< A$. Demonstruo indirecte: Sinegas, erit X aut $=$, aut $> A$: nequit

quit esse \equiv , alioquin esset \equiv ipsi B; nec potest esse majus, alioquin majus esset ipso B; ergo erit minus. Conclusio valida est idcirco, quod nihil aliud est reliquum, quod dicatur. At si esse potest reliquum, tum ratiocinatio merum erit sophisma. Ex. g. *Nulla est in brutis anima.*

D. apogogice, Si est, substantia est: est porro omnis substantia aut spiritus, aut corpus: ea ergo erit aut spiritus, aut corpus. Non est spiritus: ratione enim non esset destituta: nec corpus: corpus enim nequit animæ operationes edere: non ergo est. Argumentum plurimis obnoxium exceptionibus, in primis huic, quod ignoremus, utrum sint aliæ substantiæ mediæ inter corpus, & spiritum. Ex quo perspicuum est, ratiocinationes apogogicas esse justas, si enumerationem contineant exactam, & si partes reliquæ apertæ sint falsæ, quod ipso Geometriæ usu luculentius discant tirones.

§. X.

HUc quoque pertinent ratiocinationes Analyticorum, quum propositionem assumunt ut veram, deinde quæ inde sequuntur, perpendunt: hæc si omnia vera fuerint, & statutz propositioni consentanea, ea censetur vera, contra, si fuerint falsa, & absurda. Ex. g. ponamus *Mentem humanam esse immortalem*: si nihil inde sequetur, quod non sit consentaneum & verum, tum iterum deducunt velut demonstratum, *esse immortalem*: contra, si minime consentanea, aut falsa sequentur. Posterior hic concludendi modus ad demonstrationes apogogicas spectat: prior, ubi etiam exacte supputatio facta fuerit, nihil demonstrat aliud, nisi possibile id quidem esse, quod asseritur, ita vero se habere non ostendit. Qui demonstravit, ex posita immortalitate animi omnia sequi consentanea, nullum absurdum, is probavit, *possibile esse animam esse immortalem*. At ut evincat id ita se habere aliis utatur argumentis oportet. Ex quo patet hypotheses confingendas quidem, ut veritas, omnibus tentatis viis, facilius & tutius inveniri possit. At si ne hac quidem ratione reperta sit veritas, potius est

est rem omnem in medio relinquere, quam incertas hypothese pro veritate aliis propinare. Interim hoc argumentorum genere, quod hypotheticum est; usi plurimum sunt Cartesius & Cartesiani omnes, qui non inutiliter legentur a Philosopho, ut & huic perquisitionis generi assuescat.

C A P. IV.

De methodo generatim, tum de iis methodi ratiocinandi regulis, quæ utrique methodo Compositionis scilicet, & Resolutionis sunt communes.

§. I.

SI veritates omnes aut *simplici intuitione*, aut *simplici ratiocinio*, idest *uno simplici syllogismo* percipi possent, inutilia essent quæcumque de *ratiocinandi* methodo præcipiunt Logici. Nunc quando humanæ mentis brevitæ sit, ut paucissimæ veritates sine longa iudiciorum serie intelligantur, ratiocinandi regulas negligere philosophus non debet: non quod iis ratiocinandi aut *capacitatem*, aut *facilitatem* acquirere quisquam possit, quæ sola *exercitatione* comparantur; sed quod *rectius*, atque *ordinatius*, si quidem eas servat, ratiocinetur. Possunt hæ quidem regulæ sola lectione eorum librorum, in quibus exacte observantur, disci, quinimmo non alia ratione melius ac plenius discuntur (a): Sed juvabit profecto ad eam lectionem præparato animo, atque paullo attentiore accedere.

§. II.

DUas ratiocinandi methodos tradiderit philosophi (b) unam qua veritates deteguntur, quæ *analytica*, idest *resolutionis*: alteram, qua detectæ alios docentur, quæ *synthetica*, idest *compositionis* appellatur.

Sane

(a) Vide Malebranch. de inquir. ver. part. 3. lib. 2. cap. 2.

(b) Vide Autor. Art. cog. part. 4. cap. 3.

Sane quanquam eadem via, quæ sunt veritates inventæ, plenius docerentur, eaque doceri vellet Verulamius; brevius tamen atque rectius altera methodo doceri possunt. Amplior quidem illa est, animumque varia imbuunt cognitione, efficitque capacior: hæc arctior est, limatior, fortiusque convincit & brevius. Sed quoniam est illa *feracior*, hæc *sterilior*, operæ pretium scientiarum doctores, me saltem auctore, efficerent, atque auditores dimitterent capaciores; si postquam syntheticos veritatem tradiderunt, iidem docerent qua tandem ratione sit inventa: ita enim aliis inveniendis veritatibus aptiores evaderent tirones. Atque hæc est ratio, cur summopere exopto ut philosophi tirones Cartesii opera legant: in nullis enim aliis libris methodus analytica exactius servatur.

§. II.

A Nalytice minuta quæque confectatur, singularia examinat, possibiles omnes fingit casus, paulatimque a conferta plurium rerum quasi silva, ad rem ipsam devenit ambagibus omnibus extricatam. At synthetice a generalibus principiis brevissimo, eoque arctissimo ordine ad propositionem demonstrandam accedit. Ex. g. quæritur utrum A manet ab X. Analysis proxima scrutatur; possibiles omnes confingit hypotheses, & causas, colligiturque singula, comparat; conficitque aliquid, ita ut paulatim ostendat A manere a B, B a C, C ab H, H a P, P ab R, R ab X; unde concludit A esse ab X. Synthesis minuto illo & longo possibilium omnium examine rescato, demonstrat brevi circulo A prodire ab X, quia XR, RP, PH, HC, CB, BA producat. Duas ergo has methodo duplici Viatori alicujus viæ comparare soleo. Viator recti tramitis inscius, ut eo perveniat, quo contendit, per plura alia oppida, montes, planities, fluvios divagatur, eamque ob rem, dum locum unum petit, plurima tentando discit; idem vero quum redit, doctus tandem experimento viam, rectam persequitur, eamque unice infisit: hæc brevior est & simplicior, illa jucundior, forte etiam utilior.

§. IV.

§. IV.

PRiusquam autem utriusque methodi proprias leges explicemus, libeat quæ utrique sunt communia expedire. Primum utrique methodo commune est, *ut a notioribus & facilioribus incipiamus, atque hinc pedetentim ad difficilia & ignota progrediamur*. Hujus regulæ ea est ratio, quod seu perquiras veritatem, seu doceas, præstabiliendum est aliquod firmum, atque solidum fundamentum, idest aliquod aut *evidens*, aut saltem *certum*, quo investigatio regatur, aut a quo incipiat institutio. Itaque nec sine hac face progredi ulterius potest, qui philosophatur, & qui docet, auditorum mentibus tenebras offundit, tantum abest, ut eas illustret.

§. V.

Postquam autem aut *axiomata*, aut *observata*, aut *experimenta*, aut *demonstrata*, aut quacunque via certa præstabilivit ex prima illa regula, seu philosophus, seu doctor, tum servanda est hæc altera. *In singulis gradibus seriei judiciorum, quibus continetur ratiocinatio, curato, ut eadem servetur evidentia, aut certitudo, quæ primum præstabilita est, ut nempe non tantum secunda judicia necessariam habeant cum primis connexionem, cum tertiis secunda, quarta cum tertiis, & sic porro, sed ut eam connexionem tu clare persentiscas, clareque atque distincte veritatem eorum judiciorum, quæ ex primis contrivantur, intelligas*. Hac enim ratione mens illustratur & eruditur. Enim vero indigesta illa farrago idearum, & judiciorum, quam plerique suspiciunt, mentis est potius ingeniosæ, & memoriæ secundæ; quam sapientis atque intelligentis. Itaque videre est hoc vitium, quod *pedantisme* vocant Galli, in eorum potissimum libris regnare, qui mente parum, memoria non mediocriter valent: li frustula quædam satis docta producunt, sed ea ita consarcinant, ut, nec pes, nec caput longo insit sermoni. Horationo sunt Fabro similes;

*Emilium circa ludum faber imus & ungues
Exprimet, & molles imitabitur aere capillos:*

In-

Infelix operis summa (a)

Profecto scire non est tam meminisse, quam quæ memineris & intelligere ipsum, & ita efferre, ut alii intelligant.

§. VI.

UT autem rite secunda hæc regula observetur adhibenda omnino est tertia, seu perquiras, seu doceas, verborum tantum adhibeto, quantum nitide ideis concipiendis, aut explicandis, satis est; stilo utitor simplici, facili, naturali; caveo ut a verborum copia, ita a stilo declamatorio, & tragico. Nam verborum nimia copia impeditiores nos efficit ad quærendum, intellectu vero difficiliore. Stilus vero declamatorius & tragicus auditores commovet, non docet; at philosophus, nisi oratorem agat, docere vult, non movere; assensionem argumentorum pondere gignere, non affectuum perturbatione extorquere, Quocirca, si curat eos illuminare, quos instituit,

Projicit ampullas & sesquipedalia verba,

§. VII.

QUarta regula est, Rem, de qua agitur, accurate dividito, membra singula diligenter examinato, aut expedito. Qui enim rem, de qua agitur in omnia sua membra accurate dividit, deinde minutatim quærit, aut explicat, quid cuique conveniat, aut adversetur, & facilius progreditur in veritate investiganda, perpendenda, discernenda; & clarius alios instituit. Regulas autem exactarum divisionum has præcipiunt Logici. I. ut primum res dividatur in omnia sua membra generalia, ita ut nullum membrum, quod scitu sit necessarium, omitatur, nullum redundet superfluum, II. ut generalia hæc membra, si opus fuerit, in alia subdividantur, usque ad simplicissima; III. Ut unum membrorum non contineatur sub alio. Ex quibus illud perspicuum est,

S

exa-

(a) *De Arte poet.*

exactas divisiones docentis potius esse, quam quærentis! illi enim, non huic, ita rei, de qua agitur, natura patere potest, ut possit ejus membra noscere atque partiri.

§. VIII.

Quinta regula, *Singula vocabula, quæ aut obscuritatem aliquam, aut ambiguitatem præferunt, definito, id est eorum certas statuito notiones, cumque iis semper notionibus adhibeto*. Nisi enim id fiat, aut ignorabis quid quæras, aut ignorabunt alii quid doceas. Hæc regula maximopere commendanda est in controversiis, quas cum aliis a nobis dissentientibus habemus. Audacter dico, si hanc regulam tot viri alioquin docti accurate in controversiarum libris servassent, & mole minores, & numero pauciores scripti essent; & controversiæ quæ pluribus in rebus genus dividunt humanum, aut exterminatæ essent, aut in exiguum relatæ numerum. Nulli autem tam sæpe, tamque turpissime hanc violant legem, quam disputantes, seu incuria, seu disputationis æstu præpediti: at nulli magis ejus memores esse deberent. Inde fit ut videas passim homines integros dies furiose disputare, interim egregie ignorare quæ de re disputetur.

Jam definitiones paucissimis verbis & clarissimis sunt faciendæ: nulla in iis adhibenda sunt vocabula, quæ & ipsa non sint aut definita, aut clara, & certa: nec adhibenda sunt plura, quam quæ satis sunt: alioquin non illustrabunt, sed obscurabunt. Itaque quis temperet a risu Peripateticorum hujusmodi audiens definitiones? Quid lumen? *actus diaphani, quæ diaphani*. Quid motus? *actus entis in potentia prout in potentia*. Egregie in hac parte versati sunt Stoici. Proferam eorum exempla quædam ex Tullio (a). Quid ægritudo? *Opinio recens mali præsentis*. Quid lætitia? *Opinio recens boni præsentis*. Quid metus? *Opinio impendentis mali, quod intolerabile esse videatur*. Misericordia, *ægritudo ex miseria alterius injuria laborantis*. Angor, *ægritudo premens*: Luctus, *ægritudo ex ejus, qui carus fuerit, interitu acerbo*.

Æru-

Ærumna, ægritudo laboriosa. Sollicitudo, ægritudo cum cogitatione &c.

Quum sint duo definitionum genera, *verborum, & rerum*, loquor in hac regula de *verborum* tantum definitione. Nam *rerum* definitiones, quæ fiunt quum paucis & clavis verbis rei alicujus aut omnes, aut præcipuas proprietates explicamus, esse quidem illæ possunt *docentis*, non vero *inquirentis*, nisi antequam inquireat rem teneat totam. Sed nec docens adæquatas rerum definitiones unquam dabit, quum nemo est, qui rerum naturas perfecte noverit. Ex Logicorum autem doctrina definitiones rerum debent esse. I. Universales, idest convenire debent toti rei definitæ, quanta quanta est: eam ob rem hæc Platonica motus definitio, *mensura motus secundum prius & posterius*, mala est: nam tempus est & mensura quiescentium. II. Debent esse propriæ, idest solius rei definitæ. Ergo si quis hominem definiat, *rem cogitantem*, latior ea est definitio: sunt enim & aliæ res cogitantes, quæ homines non sunt.

C A P. V.

De methodi analyticæ regulis.

§. I.

Qui veritatem aliquam est investigaturus, aut quæstionem expediturus; quod methodo fit *analytica*, is præter eas regulas, quas & in superiori capite, & passim in aliis horum Elementorum libris præcepimus, has etiam addet (a). I. *Propositæ quæstionis nodum quam clarissimis verbis explicato*. Siquidem nisi statuatur aperte quid quærendum sit, aut demonstrandum, in incerto omnis vagabitur oratio. Potest autem quæstio aut a nobis, aut ab aliis proponi. Si no-

S 2 bis

(a) *Lege de his Maleb. libi vi. de ing. verit. Art. cogitandi part. iv. Clericum part. 3. Logica, s Gravet-zandium Introducti. ad Phil. cap. 33. Soria de Emendanda mente &c.*

his ipsi quæstionem proposuerimus, omnium primum claram ejus notionem ut in animo efformemus oportet. Si vero ab aliis fuerit quæstio proposita, eos rogabimus, ut clare ac distincte mentem explicant suam. Nisi id factum fuerit, ulterius progredi nec debemus, nec possumus.

§. II.

QUOD si priori legi probe fecerimus satis, tum secunda monebit lex. *Perpende utrum ita sis animo præparatus, ut ei veritati inveniendæ, aut solvendæ quæstioni aptus sis, ne aut inutiliter divageris, aut inepta & ridicula effutias.* Ex. g. quæstio in medio jure Romano versetur, & tu ne fando quidem Romana jura audivisti, aut corticem vix degustasti, ei non es aptus solvendæ. Agitur de re Theologica, Mechanica, Astronomica, quas res ignoras, nonne perridiculus eris, qui nullis prius earum disciplinarum notionibus, animo subacto in scenam prodis Theologum, Mechanicum, Astronomum acturus? Huc Horatianum illud spectat,
*Sumite materiam vestris, qui scribitis, equam
 Viribus, & versate diu, quid ferre recusent,
 Quid valeant humeri....*

§. III.

TUM sequitur tertia regula, *Expendito perspecte, simplex ne quæstio sit, an composita: Quod si fuerit composita, eam accurate in omnes simplices dividito, minutatim examinato, & in eas primum inquirito, quæ lucem aliis præferre possint.* Ex. g. Quæsitum est, quinam usus, & quænam constructio partium oculi. Duæ proponuntur quæstiones: earum primum examinabitur secunda: nisi enim sciatur quænam sint oculi partes, explicari non potest, quinam sint earundem usus. Eodem modo si quæstionis partes fuerint tales, ut una expedita, nullo negotio aliæ solvantur, ab illa initium faciendum est. Quæritur, utrum sit Deus, & providen-
 tia,

tia, initium faciam a prima: quandoquidem demonstra-
ta providentia, sequitur esse Deum; omnium condito-
rem; atque conservatorem:

§. IV.

Porro his factis, monet quarta regula, *Diligentissi-
me perquirito quæcunque eum proposita questione con-
nexionem aliquam habent: comparato quæcumque ei lumen a-
liquod asserre possunt: possibiles quaslibet confingito hypotheses.*
Ita enim undequaque præsidia accerfis, quibus enodan-
dæ questioni, atque veritati detegendæ aptior evadas.
Hanc autem regulam servare nequeunt, qui secundam
non servant: difficile enim est posse te hæc undequaque
præsidia arcessere, nisi in ea scientia, ad quam questio
pertinet, sis versatus. Demonstrandum sit, Christianam
religionem esse veram: quot tibi ex intimiore Metaphy-
sica, Ethica, Physica, Historia Gentili, & Judaica,
Critica, sunt necessaria? Ea tamen colligere non pote-
ris, nisi in disciplinis illis fuerit contritus.

§. V.

Jam sequitur quinta regula: *Questionem corrige; &
exacte & quam simplicissime exprime; idest refecato ob-
ea, quæ collecta quidem per superiorem regulam, intelli-
gis nullum tibi asserre præsidium: Nam hæc oneri po-
tius sunt, & impedimento: remorantur, perturbant,
obscurant.*

§. VI.

Deinceps præcipit sexta. *Principia solida, quibus ve-
ritatem invenias, aut questionem expedias, perqui-
rito, & velut faces perpetuo ante oculos habeto.* Hæc
est regula quæ facile quidem præcipitur, difficillime
vero adhibetur. Locos communes, unde hæc princi-
pia sumi possint, quidam dederunt. Sed inutiles ii sunt,
nisi quis secundæ regulæ præsidio ad hujusmodi examina

accedat. Qui enim principia quærit, quibus quæstionem aliquam Mathematicam, aut Physicam solvere possit, nisi fuerit in Mathematicis, aut Physicis disciplinis exercitus, ex communibus illis locis nullum speret auxilium,

§. VII.

ET leges quidem istæ sunt genericæ. Sequuntur aliæ minus generales. Quarum prior est, *pervestigato utrum quæstionis solutio pendeat ex ratiocinio, an ex experimentis, an ex autoritate, eamque definire conator eorum principiorum ope, quæ aut ratiocinium, aut experimenta, aut autoritas suppeditant: caveto ne tria hæc misceas*. Passim videas philosophos adversus hanc legem peccare. Ita quidam, quæ theoretica sunt, & puræ intelligentiæ, ex aliorum autoritate repetunt: alii quæ sola sunt definienda autoritate, ratione intelligere conantur: plures ubi experimentis opus, ad abstractas confugiunt ratiocinationes. Ex.g. demonstrandum est, utrum in brutis sit anima sui generis, nec ne: ea theoretica quæstio est, in qua appellare ad populum, aut ad idiotarum autoritatem desipere est. At si agatur quæstio, utrum Apostoli fecerint miracula, historica est, in qua ab autoritate pendere unice debemus: appellare autem, ut imperite faciunt Deistæ, ad rationis sophismata, est furere. Agitur, de resurrectione corporum, ea quæstio divina revelatione definitur: ea standum. Ergo ea in re captiones Atheorum audiendæ non sunt. Quod si fuerit quæstio physica, experimenta præbunt, ratiocinium experimentis inhærebit. Ita porro,

§. VIII.

SI quæstio pendeat ab autoritate, id deinde scrutator, *fallibilis ne illa sit autoritas, an infallibilis*. Si fuerit infallibilis, hos teneto canones. I. *Quæ hæc autoritas clare docet, ita ut nulli exceptioni sint obnoxia, velut axiomata teneto: iis inquisitionem regito*. II. *Quæ ex his axiomatibus clare sequuntur, habeto tanquam propositio-*

tiones demonstratas, & ita certas, ut priora illa. III. Quæ aut illis axiomatibus, aut his consequentibus clare adversantur, falsa reputato. IV. Quæ autoritas illa obscure docet in neutram partem affirmato, sed memento tu iri xur aut sine ira & odio probabiliter disputato, idest quempiam in suo sensu abundare finito,

§. IX.

QUOD si fallibilis sit autoritas, hos sectaberis canones. I. Ex eo quod quidam potuit decipi, non statim sequitur fuisse deceptum: ergo hoc tantum argumento autoritatem rejicere, quod sit fallibilis, desipere est: alia adhibenda sunt argumenta, ut ab ea discedas.

II. Quæ omnes, aut plures narrant historici oculati, nemine refragante, certa sunt habenda: si unus aut alius adversus plures testificentur, historicorum conferendæ dotes: secundum eas judicandum.

III. Quæ facta unus aut alter ocularis narrat historicus, nemine contra scribente, proxima sunt certitudini, si historici isti veras habuerint historicorum dotes.

IV. Qui aliquid tacet, is id non negat. Ergo quæ historici narrant coevi in dubium vocanda non sunt ex hoc tantum, quod alius, aut alij etiam coevi taceant (ex can. II. & III.) Qui enim tacet, aut oscitantia, aut ad summum malitiæ accusari potest.

Sed inquirunt, historiæ leges exigebant ut non taceret? Quid ergo: adversus hæc peccavit historicus; at ea negasse, quæ tacet, dici nequit. Quod si non negavit, perstat historicorum agentium fides. Mirum est de hoc argumento quod negativum vocant, potuisse tanta contentione inter doctos disputari.

V. Quæ facta testes non coevi, neque oculares magna consensione narrant, in dubium sunt vocanda, si nemo coæporum, & ocularium historicorum memoret, quum memorandi opportunitas erat.

Nam unde recentes isti ea hauserunt? Nihil aliud proferri potest, nisi popularis fama, quæ valde quam mendax est. Atque hoc, non antecedens

illud, *argumentum est negativum*, quod maximi semper ponderis viris de his est habitum.

VI. *Si nulli extent cœvi, & oculares historici, posteriorum autoritas probabilis habeatur, quum nulla sunt repugnans argumenta.*

VII. *Quæ historia claris rationibus repugnat inter falsa reputatur.*

VIII. *Historia ne vocetur rationi contraria, quod moribus, & opinionibus præsentibus adversetur: opiniones enim atque mores mutantur.*

IX. *Non idcirco historia habeatur falsa, quod id narrat, cujus nos causas non intelligimus. Hujus canonis rationem alibi dedimus.*

S. X.

QUæ veritates usu ratiocinii perquiruntur, iis perquiruntur canonibus, de quibus & in Superioribus & passim alibi dictum est. Pauca addam.

I. *Quæ in idea clare & distincte contineri cernis, de ea affirmato: negato vero, quæ ei adversari clare & distincte percipis. Nam claritas & evidentia veritatis character statutus est.*

II. *Quæ inter se se convenient, an sibi adversentur, non evidenter percipis, inter obscura & incerta habeto: adeoque aut medias alias ideas quærito, quibus possis comparare, aut ne unquam affirmato.*

III. *Si diu perquisiveris, nec veritatem repereris, ne pronunciatum falsum, ex hoc tantum, quod non intelligis, nisi adeo sis perridiculus, ut mentem tuam veri & falsi mensuram putes,*

S. XI.

QUæstiones physicae sunt potissimum, quæ ab experimentis pendent. De experimentis autem capiendis, deque eorum usu superius dictum. Quum vero in his quæstionibus argumentum ab analogia desumptum passim adhiberi soleat, de eo pauca. Argumentum

ab

ab *analogia* hoc nititur principio, *similium effectuum similes esse causas*. Id principium magna consensione a philosophis probatum est, & quidem sapientissime. Nam quum universi Creator, atque moderator sit Deus, natura scilicet intelligentissima, sapientissima, potentissima; inducere in animum non possumus, naturam superfluis luxuriari. Hinc veteres duo hæc alia ad nos demandant veriverbia, *Deus & natura nihil frustra moluntur*, tum, *Deus quod efficere paucioribus potest, non facit pluribus*. Ergo his freti Philosophi, ubicunque aut eodem, aut similes reperiunt effectus easdem esse causas, aut similes concludunt. Quod argumentum ut plurimum rectum est, & verum. Sed quum in cognoscenda effectuum similitudine decipi possimus, leveque similitudines, pro integris habere, magna cautione est hoc argumentum adhibendum. Patet autem id argumentandi genus longe atque late: & non physicas tantum res attingit, sed ceteras omnes, in primis morales, & politicas. Ex. g. ex similibus hominum actionibus concludere possumus, aut similes causas, aut eventus similes. Ex similibus rerum publicarum statibus, causas similes similesque eventus. Hoc certe principio tota prudentia Ethica, OEconomica, & Politica nititur: ita ut qui humanarum rerum probe callet historiam, possit de futuris humanis rebus quam facillime judicare.

§. XII.

Postquam his rationibus atque viis veritas perquisita est, si ita nobis esse felicibus licuit, aut certo, aut magna probabilitate aliquid statutum sit, tum omnia ea ad incudem revocare debemus, quæ alii unquam contra moliti sunt, aut quæ dicere quisquam posset. Nam tum plena erit persuasio, quum & adversariorum omnium argumenta confutaverimus: nonnihil enim illa ponderis habent, ut a persuasionem nos dimoveant. Faciendum autem id est sine odio atque ira, quarum causas longe habere Philosophus, idest veri amator, debet. Et quidem refellenda argumenta adversariorum sunt non

ex ulla anticipata rei nostræ opinione, sed serena mente, & candida. Perquirendum in quo ea deficient, quid sublesta illa & falsa faciat. Principia ne falsa sunt? an error ullus est in serie iudiciorum admissus? Quod si & propositionem nostram *evidenter* demonstravimus, & interim argumento cuidam adversariorum nequeamus respondere, non idcirco dimovendi a veritate sumus: brevitate enim mentis nostræ fit, ut videre nequeamus, in quo obiectio peccet. Nec interea respondendum, ut facere imprudentes solent, argumentum esse ineptum, sophisma, indignum cui respondeatur, quum ei respondere nesciunt; id enim magis etiam imbecillitatem & perturbationem nostram ostendit: fatendum potius est ingenue, quod est. Iis tantum argumentis risu respondere possumus, quæ inepta revera sunt & ridicula.

C A P. VI.

De methodo synthetica.

§. I.

ADhibemus methodum *syntheticam* quum alios ea docere volumus, *quæ scimus*. Ergo I. *Curato, ut ea doceas, quæ tu, quoad potest perfectius, tenes*. Ridiculum enim est ea velle docere, quæ aut omnino ignoras, aut per summa capita didicisti, & *in Creta figulinam* discere, uti dici solet. Qui hanc violant legem, aut se perridiculos faciunt, aut alios turpissime decipiunt.

§. II.

II. **A**uditores *eligito aptos*: has enim primas esse debere doctoris curas perspecto docet Aristoteles (a) Sane vero non omnia omnes ferre possunt, nec de omnibus est cum omnibus differendum. Itaque Ægyptii, & hinc Græci, potissimum Pythagorici, secretiora quedam doctrinarum initiatos tantum docebant. Christus

ser-

(a) *In primo ad Nicomach.*

servator noster non omnia docuit Apostolos, quod quædam essent, quæ nondum ferre possent: ergo quædam distulit ad Pentecostem. Paulus quoque, *lac*, inquit, *vobis dedi, tanquam infantibus*. Beatus Basilus (a) *scire*, inquit, *debemus, & quæ dicenda, & quæ tacenda sunt*.

Multa etenim bene testæ latent, nescitaque profunt (b) *Inde secreti lex apud vetustos Christianos.*

§. III.

III. **V**ocabula quibus utendum est, & quæ esse possunt *ambigua, aut obscura, definito*. Vide §. VIII. capitis IV. Itaque Plato, Aristoteles, Cicero statum hoc atque indubium habuerunt; *omnem institutionem, quæ de re quacumque suscipitur, debere a definitione proficisci, ut intelligatur quid sit id de quo differitur*. Plerique definitiones omnes alicujus disciplinæ, aut saltem materiæ, quam Syntetice docent, sub initium præponunt veluti Geometræ. Ad id minime est necessarium, possuntque recte iis in locis exhiberi, in quibus earum est usus, quod Gravefandius in Physica, Vvolsius in operibus metaphysicis fecerunt.

§. IV.

IV. **S**tatutis definitionibus, sequantur axiomata, ex quibus ratiocinia concludamus. Sunt axiomata, ut alias est dictum, propositiones adeo evidenter veræ, ut earum veritas simplici pateat intuitionem. In iis scientiis, in quibus autoritas suppeditat principia, axiomatum loco habentur quæcumque propositiones clare & distincte in Autoris verbis continentur; ex quibus ratiocinationes tam arcto nexu deduci possunt, quam ex axiomatibus Geometricis geometricæ demonstrationes. Quandoque axiomatum loco habemus propositiones eas, quarum intellectus pendet quidem a ratiocinio, sed notæ tamen sunt iis, quibuscum disputamus. Sed & non raro propo-

(a) Hom. 29.

(b) S. Prosper. in Carmine de ingratis.

positiones demonstratas in aliis disciplinis pro axiomatis usurpamus. Aliquando etiam ea, quæ inter partes conveniunt, etsi minime fortassis evidentia, aut certa, axiomatum loco habemus. Plerumque principiorum loco assumimus ea, quæ etsi falsa, ut vera habentur ab iis cum quibus differimus. Ita veteres Christiani ex libris Mercurii Trismegisti, aut Sybillarum rite confutabant Gentilismum, quamquam libri illi spurii sint: quandoquidem ut genuini & divini habebantur Gentilium multitudini,

§. V.

V. **N**ihil demonstrato, nisi ex iis, quæ præstabilita sunt, definitionibus, axiomatibus postulatis, hypothesebus, & probatis propositionibus.

VI. Nullas adhibeto propositiones, quæ aut ad rem, de qua agitur, non pertinent, aut quæ primis istis demonstrandis, aut illustrandis non inserviunt.

VII. Propositiones, quæ aliis demonstrandis serviunt, illis præmittito.

VIII. Si per superiorem regulam liceat, simplices propositiones præcant compositas, genericæ vero minus genericas.

Plures aliæ regulæ addi possent: sed iis qui versantur in scientiis mathematicis & hæ quoque superflue sunt: ex illis enim disciplinis melius ac plenius, quam ex ullis Logicorum regulis huiusmodi differendi methodus discitur: iis vero, qui in scientiis mathematicis minime versantur, nullæ Logicorum regulæ satis esse possunt, ut rem aliquam methodo hac Synthetica docere valeant.

C A P. VII.

De disputatione Dialectica.

§. I.

Disputatio *dialectica* ea proprie est, quæ inter duos instituitur, qui alternatim proponunt, atque respondent; quemadmodum ex ipso *dialectica* vocabulo passim explicat Plato: est enim *διαλογος* cum altero disserere. At fieri potest disputatio vel *socratica* methodo; vel *sylogistica*; idque sive *analyticus*, sive *syntheticus*. Et prior quidem dicitur *Socratica*: quia ea potissimum disputando utebatur Socrates; ut ex Platone & Xenophonte discimus. Ea ex Platonis, & Xenophontis lectione discitur commodius, quam ex ullis præceptis dialecticis. Duobus præcipue tota *Socraticis* disputandi methodus nitebatur. I. *Definitionibus*. II. *Inductionibus*, idest singularium similium diligente enarratione, & comparatione, quo posset clarius; id, de quo agebatur, intelligi, & aut demonstrari, aut refelli.

§. II.

Ergo in hac familiari disputatione, qui alium aut docere; aut confutare vult; primum se rei, de qua agitur, aut omnino imperitum simulat; aut vix summa quædam capita doctum. Quod ita faciendum est, ut ironia lateat. Deinde minutatim illum, qui cum disputat; interroget; & *analytica* methodo paulatim, quasi illo minime sentiente, ad veritatem ducere conetur. Tum ejus responsa magna humanitate & affabilitate excipiat; indolem, capacitatem perspicacitatem laudet, & si junior sit, magnam de illo spem animo concepisse simulet; caveat a verbis paulo asperioribus; ab ironicis gestibus, aut nutibus, quæ alterius animum exasperare, atq; a disputatione avertere possunt. Jam postquam omnia laudaverit, ejus

ejus responsa, velut quæ minus intelligat, revocet ad incudem, examinetque acute quidem, sed humanissime. Eam vero methodum sectetur, quousque isidem, quocum disputat, fateatur se victum, testimoniumque ipse adversus se dicat. Nam & hoc sæpe dicebat *πυλοτρώπος* Socrates, se in controversiis nullum alium velle judicem, quam eum ipsum cum quo differebat. Addebat se nihil scire, sed efficere interrogando ut adolescentes, quæ scirent, proferrent: adeoque se Ostetrici similem esse, quæ non pariat, sed alias ad parturiendum adjuvet. Sed nisi Xenophontis & Platonis libri legantur, inutilia hæc erunt, quæ monuimus. Assuescere quoque paulatim huic disputandi methodo admodum est utile.

§. III.

Sequitur disputatio. Syllogistica, quæ pressior est & arctior, quandoque etiam iracundior, atque idcirco foedior. Memini ego, cum puer essem, ad pugnos etiam ventum in Scholasticis concertationibus. Non illæ describi elegantius possunt, quam Juvenalis verbis.

.... sed Jurgia prima sonare

Incipiunt animis ardentibus: hæc tuba rixæ.

Dehinc clamore pari concurritur, & vice teli

Sævis nuda manus: paucæ sine vulnere malæ;

Ludere se credunt ipsi tamen, & pueriles

Exercere acies... sane hunc in modum veritas amittitur potius, quam reperitur. Itaque servanda quidem est Scholastica disputandi methodus, sed sine odio & ira.

§. IV.

Hæc autem disputatio sic instituitur. Disputantium unus propositionem aliquam statuit: alter eam inficias it. Propositio hæc controversa appellatur. Porro qui propositionem statuit pergit illam argumentis confirmare: qui eam negavit, argumentis respondere se comparat.

tat. Ergo prior ille primum conformat argumentum: alter istud excipit, & repetit integrum, deinde argumenti propositionibus singillatim respondet, falsas negat, veras concedit, ambiguas distinguit, eas quæ ad rem non faciunt transmittit. Plerumque etiam argumentum retorquet, idest ex principio ab argumentante posito aliud conformat argumentum contra argumentantem, Plerumque respondet per *instantiam*, idest ex principio ab argumentante posito simile conficit argumentum, quod sit falsum, ut sic ostendat adversarii argumentum & ipsum esse falsum. Sed qui aut argumentum retorquit, aut per *instantiam* respondit, ex disputationis Scholasticæ legibus, tenetur deinde *directe*, &, ut inquit, *in forma* respondere. Ceterum argumentans responsionem excipit, conaturque probare, id quod est ab altero negatum. Ita disputatio procedit. Ejus autem disputationis lex fundamentalis est, ut *argumentans semper in conclusionem deducat propositionem negatam, quæ in controversa dicitur*.

§. V.

Argumenta esse solent aut *Syllogismi*, aut *Enthimemata*: at, quoniam Enthimemata sunt trunci Syllogismi, Syllogismi tantum naturam, & constitutionem explicabimus. Syllogismus est argumentationis species, quæ tribus propositionibus ætissimo inter se nexu copulatis constat. Priores duæ propositiones vocari solent *præmissæ*, & prima quidem *major*, altera vero *minor*; tertia vocatur *complexio*, *conclusio*, *consequens*, *consequentia*. Quamquam Dialectici, qui severius loquuntur, consequentiam distinguunt a *consequente*, & *consequens* vocant tertiam propositionem, *consequentiam* vero appellant connexionem *consequentis* cum *præmissis*. Hinc *consequens* dici solet *verum*, vel *falsum*, *certum*, vel *probabile*: *consequentia* vero *bona*, vel *mala*; *bona* quidem si ex regulis dialecticis, *mala* si contra regulas inferatur. Quod si inter præmissas & *consequens* nulla est connexio, tum nulla esse *consequentia* dicitur, totusque negatur syllogismus, veluti

A =

$$A = B:$$

$$C = B:$$

ergo $D = A$. . . quum nulla sit vis consequen-
tiæ syllogismus ineptus est & falsus.

§. VI.

Est autem syllogismus omnis aut *affirmans*, aut *negans*. *Affirmantes* sunt; quorum complexio *affirmans* est; *negantes*, quorum est *negans*. In affirmantibus hoc agimus, ut demonstramus attributum propositionis controversæ in subiecto contineri: in negantibus ostendimus, attributum *Controversæ* adversari subiecto: Ergo Priores concludunt vi mediæ *identitatis, similitudinis &c.*: posteriores vi mediæ *distinctionis*, de quibus supra est dictum.

§. VII.

UT autem syllogismi rite concludant septem regulas Logici tradiderunt. His regulis tria hæc axiomata præponit Autor *Artis cogitandi*. I. *Propositiones particulares continentur in universalibus ejusdem generis, non item contra*. Ex. g. hæc propositio, *ferrum igne liquefit*, continetur in hac ejusdem generis universali, *omne metallum igne liquefit*, non autem hæc in illa. II. *Attributum propositionis affirmantis semper sumitur particulariter*, idest non potest habere majorem latitudinem, quam habet subiectum. Ex. g. *Quadratum est figura rectilinea*: *¶* figura rectilinea, quod est attributum propositionis, non accipitur pro tota sua extensione, alioquin quadratum esset triangulum, trapezium &c., sed tanta cum extensione; quanta est extensio notionis quadrati. III. *Attributum propositionis negantis latius patet suo subiecto*. Ex. g. *Cubus non est figura plana*, idest non est ulla figura plana.

§. VIII.

§. VIII.

Regulæ porro sunt hujusmodi. 1. *Syllogismus nepluribus, quam tribus terminis conformator, extremis nempe duobus propositionis controversæ, & medio.*

Ut hæc regula intelligatur, tradendus est ordo conficiendi Syllogismi. Statuatur propositio aliqua; ea conflatur *subiecto & attributo*, duobus nempe terminis. Si hæc propositio controvertatur, tota controversia huc redibit, attributum conveniat ne subiecto, an adversetur. Si mihi probandum sit convenire, Seligam medium *congruentiæ*, id erit tertius terminus: cum eo singillatim comparabo priores duos, efficiamque Syllogismi præmissas: at complexio ipsa semper erit propositio controversa. Agitur utrum $A \text{ sit } = B$; negas; demonstro, Assumo tertium terminum C .

$$A = C:$$

$$B = C:$$

ergo $A = B$.

Quod si propositio affirmetur, mihi que sit probandum, eam negandam, adhibeo medium distinctionis

$$B \neq X:$$

$$A \neq X:$$

ergo $A \neq B$;

Ex tribus, uti est perspicuum, tantum terminis conficiendus est syllogismus. Si quartus accedat erit sophisma: ex. g.

$$A = B:$$

$$D = C:$$

ergo $A = D$,

§. IX.

Sequitur secunda regula. *Oportet semel saltem medium universaliter sumi, idque seu sit medium identitatis, seu distinctionis.* Ejus regulæ ratio est, quod medium bis sumtum *particulariter*, non unum est; sunt potius duo: at id syllogismi unitatem dissolvit. Eam igitur ob causam sequens syllogismus est falsus.

Quæ-

Quædam figura est circulus :

Quædam vero figura est & quadratum :

Ergo quoddam quadratum est circulus .

Nam quamquam præmissæ sunt veræ , at medium non unum est : *æ* enim quædam figura in majori quidem propositione posita non est *æ* quædam figura posita in assumptione : in illa circulus est : in hac quadratum . Atque hæc regula intelligitur etiam locum habere , si medium sit in utraque propositione attributum in syllogismis affirmantibus , per axioma 2.

§. X.

Regula III. *Termini consequentis esse nequeunt universales , quam sunt in præmissis .* Sint universaliores ; ergo non continentur in præmissis (per ax. 1.) : nec ergo ex illis manat consequens , ac proinde nulla est consequentia . Ita hic Syllogismus eam ob rem est falsus .

Omne triangulum = tribus rectis :

Omne triangulum est figura :

Ergo omnis figura = tribus rectis .

Figura enim in assumptione particulariter sumitur , in consequente universaliter .

§. XI.

Regula IV. *Ex præmissis negantibus nihil concludi potest .* Nam nihil concludi potest affirmando ; deest enim medium identitatis : nec negando ; non enim ex eo quod A & B non sint idem cum X , sequitur non esse inter se idem , alioquin duæ lineæ palmares non essent æquales , quod eidem semipalmo non sint æquales . Ex.g.

Sinenses non sunt Christiani ;

Itali non sunt Sinenses :

Ergo Itali non sunt Christiani .

§. XII.

Regula V. : *Ex affirmantibus nequit concludi negando.* Nam si ex duabus affirmantibus negantem deducas, eade se invicem negabis, quæ cum medio conveniunt, quod est absurdum.

§. XIII.

Regula VI. *Si alterutra præmissarum fuerit negans, consequens erit negans.* Nam si alterutra præmissarum fuerit negans, duorum extremorum propositionis controversæ alterum cum medio conveniet, alterum eidem adversabitur : ergo medium erit principium diversitatis : quocirca conclusio sequetur negans.

§. XIV.

Regula VII. : *Si alterutra præmissarum fuerit particularis, & consequens erit particulare :* alioquin termini consequentis erunt universaliores, quod esse nequit (ex ax. 1.) Duæ hæ postremæ regulæ una comprehenduntur a Scholasticis, *Conclusionem sequi debere debiliorem præmissarum.* Debilior autem eis est negans præ affirmante, particularis præ universali.

§. XV.

Qui artem Syllogisticam tradidere infinita alia hoc in loco de Syllogismorum *Modis, Figuris*, de Syllogismis *simplicibus & hypotheticis*, de syllogismorum *reductione* differere solent. Ipse Autor artis cogitandi hæc quam diligentissime persequutus est. At sunt ea inutilia : nec enim subsidio sunt disputanti, & nunquam in ipsa scholastica disputatione aut adhibentur, aut in usu veniunt. Ego certe qui & in his studiis pueritiam egi, & adolescens disputavi pluries, & viros scholasticarum rerum Coryphæos disputantes non raro audiavi, nec modo.

dorum atque figurarum legibus sumumquam usus, nec alios usos animadverti. Quod si qui est, qui ea etiamdum amet, per se licet: tantum ne sophistici mentem depravet moneo: Experimento enim plurimum annorum didici, non parvum in huiusmodi studiis momentum inesse ad gustum germanæ sapientiæ retundendum. Nec ego nego prospicienda ista: sed prospicienda tantum, & a limine salutanda, in hoc unum, ne verba nobis dentur, & aliquid esse in illis magni ac secreti boni judicemus (a).

(a) Seneca Ep. 49.

F I N I S.



785563

بِسْمِ اللَّهِ الرَّحْمَنِ الرَّحِيمِ

By Lady Hester

